

牟氏陵阳集

牟
巖

文碩閣

wenshuoge.com

目录

关于我们	3
提要	5
原序	6
卷一	7
卷二	14
卷三	21
卷四	28
卷五	37
卷六	44
卷七	55
卷八	60
卷九	65
卷十	71
卷十一	77
卷十二	83
卷十三	89
卷十四	95
卷十五	101
卷十六	107
卷十七	114
卷十八	121
卷十九	127
卷二十	133
卷二十一	139
卷二十二	147
卷二十三	157
卷二十四	160

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

陵阳集 别集类三 【宋】

提要

【臣】等谨案陵阳集二十四卷宋牟巘撰巘字献之湖州人父子才理宗朝官端明殿学士礼部尚书以刚直着名巘亦登进士第官至大理少卿入元不仕闭户三十六年故其集中九日五言诗序论陶潜於王宏中路具酒食事及题渊明图诸文意皆自寓又尝谓世喜称渊明入宋书甲子无年号黄豫章亦曰甲子不数义熙前然今陶集诗本无书年号者渊明耻事刘裕大节较然此未须深论云云故巘文中多书至元年号意本此也是集凡诗六卷襍文十八卷前有至顺二年程端学序王士禎居易录称其诗有坡谷门风襍文皆典实详雅今观所作知士禎之论不诬巘本蜀之井研人世居陵山之阳至子才始着籍湖州其以陵阳名集者盖不忘本也乾隆四十六年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

陵阳集原序

文者言语之精华也因吾道以有传然古者文以道传後世道以饰文古之人有是道然後托於文以达之道若斯文亦若斯故其言约以实是谓文以传道易诗书春秋论孟是也後世不必皆以其道亦欲为文以自见道若斯文不若斯故其言支以虚是谓道以饰文文士之文是也然则终不复古乎复古有道道弻乎中不得已而有言文斯复古矣故周程张朱数君子者出而太极图说西铭易传语类诸书不在中庸孟子下谁谓文不可复古乎亦在实之而已矣西汉之文道虽不醇大略言由事发犹近古也自余随其人品以为重轻若诸葛孔明陶元亮杜子美陆敬輿韩退之欧阳永叔苏子瞻曾子固数子者其忠义直谅磊磊落落有以自显於世而其文亦可相为不朽至如司马相如扬雄柳宗元王安石之流其声音步骤盖亦无媿乎数子然予不知读其言者视其人何如也由是观之传道之文与天地悠久其?与其重轻下此犹荣华飘风而殫一世之力而为之者惑也故元初陵阳先生牟公巖博学实德为时名卿天下之书无所不读古今典礼无所不考其源出於伊洛其出处有元亮大节故其发於文章渊源雅淡从容造理其法度之妙盖有与欧曾并驰而其实则吾道之言也天下後世当有慕其人而爱其文诵其文而想见其人者矣端学自史院归田於鄞公之?子浙东帅府都事应复景阳甫在鄞出公诗文若干卷将锓诸梓属端学序引自惟庸陋生晚於公无能为役其敬赞一辞然亦尝登公之堂而识公之容亦尝诵公之文於学者所传且得交於景阳悉观公之着述非幸欤敬附一言以志予之幸若公之德业文章则不待赞也至顺二年八月朔从仕郎前翰林国史院编修官程端学序

卷一

钦定四库全书

陵阳集卷一

元 牟巘 撰

古诗五言

东野平陵图

鞅掌不可耐壮士缚申卯驱驴古平林水木乐幽茂苦吟到斜日危坐类持钓俗情见摆落鴈极衆口两曹第忍之适满百乃报吾终不以此而易彼升斗小裁鹤料案官事竟未了斯人坐诗穷咎在亏天巧有如发其罣为谗岂不暴理宜得嫌憎枵腹镇雷吼区区尤李氏此颇天意不

赵春谷约游北山?陈本斋韵

病士痼於懒举世少匹亚未省读道书低头蒙绦帕梦想北山北户限久不跨折简许我游篮輿暂相借腹鸣肩自举悠然谢衔靶邂逅得水竹神明湛吾舍山亦紫翠横了不费要迓平生赤两脚城市所深怕何妨岩石间共永一日暇高情伟卓犖不在古人下喜客见眉宇煮茗扫风榭老山澹一癯龟息闻静夜摄衣倒凌景回首怜俗驾吾侪偶会弁小语辄雷咤风雨万虑清讵肯随物化商山尚局促而况彼畦夏

东坡九日尊俎萧然有怀宜兴高安诸子侄和渊明贫士七首余今岁重九有酒无肴而长儿在宜兴诸儿苏杭溧阳因辄继和

吾翁始落南土思尚依依筑堂扁岷峨目断落日晖忆昔丙申岁锦里烟尘飞甲子已一周而我犹未归孤蓬失本丛旅鴈抱长饥百年直寄尔旷然勿徒悲

惊飈举落叶意气何轩轩秋高百卉尽寂寞但空园何异富与贵变灭随云烟缅怀陶彭泽平生极几研朗咏贫士诗相对如晤言今人之所耻古人以为贤

我殆胜彭泽无酒亦无琴湖外来远饷屋角嗽好音吹帽节已迫醉乡路可寻勿违故人意洗盞起自斟甜酒乏风骨谷永与杜钦而此清且劲良足慰我心

人生徒自苦与世为卷娄何如有美酒自献还自酬贫虽不若富用寡庶易周婚嫁愿已毕此外复何忧况无下溷田得与彭泽俦年丰米长贱一饱或可求

翁媼老白髮蕭然老江干大兒荆溪游折腰豈為官諸兒走異縣亦各營一餐別多會面少端
復坐飢寒諸幼且眼前笑語開我顏勿問賢與愚懷抱俱相關

好惡豈不察菑垣植蒿蓬而此庭前菊鋤灌少人工此物抱至潔有似楚兩糞留香待嚴凜意
與烈士同糞土笑伯始金錢鄙鄧通千載一元亮舍此將安從

兩山南北峙四水貫此州登臨豈不嘉出門自寡俦客鄉幾重九歲月如奔流蕭然具果飲聊
以散百憂平生和陶集韻高乃敢酬乃復詠歌之歲晚葆姱修

和程漁庄救燕

燕巢屹高壘蛇行危折磬不虞猝見侵怪事發軒屏黃口養漸大紫翮翻相映雌雄力難護吞
噬氣方盛豈不避戊巳天意特未定主人勇赴救為惠固當竟蜿蜒墮尺箠折首甘所迎古人
致陰類嗜好用其性此族遭炮燔往往多夭橫人固異於物縱暴胡忍聽試看自古來善者終
必勝羿殛莽亦屠曾莫保軀命報應各以類豈不信可証驅而放之菹是乃三代政姑用柳子
言鋤吾草萊徑

題淵明圖【并序】

淵明九日無酒坐宅邊菊叢中意殊寂寞江州刺史王弘諸孫已荷朝寄猶知有賦歸去來者
能於此時遣白衣担酒遠餉邂逅一醉大是奇事集中九日詩僅兩首無酒則曰塵爵耻虛疊
寒花徒自榮有酒則曰何以稱此情濁酒且自陶而王茂弘所餉己酉九日十有九年略不見
詩集何耶此翁志節耿亮與秋俱高往往逃於酒而寓於菊二詩之作一感一喜微見於意固
不暇於歲歲皆詩此中有真意欲辨已忘言正當求之言句之外可也此幅筆雖簡意有余輒
和己酉九日韻述其事醉中看畫未免發千古一笑

平生抱耿介四海寡朋交淒其九日至頗感顏髮凋無酒醒對菊風味乃更高誰識此時情白
云行遠霄地主有佳餉得之良已勞而我適邂逅赴飲如沃焦永言大化內朽質非所陶惟有
飲美酒一醉可千朝

九日【并序】

陶公再為建威參軍劉裕幕府也忽棄去屈為彭澤令未幾又棄去裕是時已有異志劉穆之
寧死不与九錫事王弘自江北來首以此事風朝廷裕遂移晉祚而弘為吏部尚書為江州刺
史遂被心腹之寄既來江州柴桑近在境內於陶公時惓惓豈非內懷前媿欲拔高人勝士以
自湔祓耶彼曷不知名節之為高也陶公未易致則使人中路具酒食候其出醉而要之庶几
一見斯蓋已甚迫則亦可以見吾胸懷本趣固有在豈端為一王弘哉適乘籃輿足以自返其
視華軒為何物而弘欲以此榮其歸此又可笑也前是論者偶未及九日蕭然因賦數語

秋风?以至今日重阳日明明对南山尚想陶彭泽向来建威幕颇见有此客驱车不少留驾言公田秫如何又弃去此意谁能识寄奴趣殊礼风旨来自北只今王江州建白功第一故是僧弥孙举动殊足惜饮媿望柴桑稍欲自湔涤殷勤白衣饷犹恐不我即中路候篮舆要致已甚迫葛巾赤两脚颓然向州宅此翁本坦荡焉能苦违物一时可计取中实未易屈华轩有何羨自载返蓬荜终身书甲子凛凛义形色如使磷且缁安得为玉雪篱边有佳菊弄黄正堪摘我方持空觞千载高风激

简赵子昂

君维大雅姿被服藹兰荪胷?综流略本本又元元手追七子作凌厉气所吞余事到翰墨藉甚声价喧居然难自藏珠玉走中原四年郎省户小滞当高骞肯来为多士复除布春温力争吾道回中流收崩奔眷言维桑旧从容驻輶轩我亦喜再见一笑略寒暄首诵新诗章两耳为君尊高情殊磊落俗子何足论顾我寂寞地无物当赠言乃复携尺纸看君醉墨翻霜木石共老野竹翠不蕃落笔频申顷岁晚古色存思君时一把此意期勿谖

和赵子俊闲居十首

俛仰一室内我兴尚无为凝尘澹素几乍见闲居诗吐词甚高简观者未必知士固各有志肯为富贵移汲多羸其瓶居然井在湄何似鸱夷全张弛随所宜杨子不违物赵子不干时此意谅所同相与三复之

窘步殊蹒跚户限久不踰若或縈维之媿彼空谷驹俛焉念平生我亦酷信书所得不偿失每与忧患俱饮水饭脱粟此意岂愿余贫实为我累舍贫将焉如堪嗟嗜利者死甘諡为愚

维昔陶元亮早岁尚隐沦从事建威幕奔走戎马尘宵征亦良苦我岂恋轩茵时运不可回物态日以新悠然彭泽去渐与乡里亲公田半税秫亦足慰我贫有人企高躅漫仕求所伸闽峤虽云远弦歌遂其真

九日忽已过霜薄阳光曦未漉头上巾先典篋中衣时物尚有菊采掇频尔稀对酒胡不饮坐看白日飞五胜更囚旺万事谁是非且复进一觞酒尽情依依晚蝶抱孤蘂无乃昧先几

势利苦炎炎名节贵嶢嶢河县开桃李家园熟梨枣当年归骑省名誉岂不早一染金谷尘萧艾没芳草胡为闲居赋乃谄任安巧所以惟慕陶固穷而守道

我亦爱闲居好山环屋青拄颊坐来久冉冉白云生山中有三秀谁为采其荣散我腰脚顽使我神观清我居殊偃仄东西凿两牖卧起於其间不知岁年久秋菜上墙生废圃一何有只应谿上人笑我已白首橘柚非所种劝我且种柳也莫种牡丹与物争妍丑

闲居维弄翰窻明庭户寂硬黄力追古旁观共叹息当由结习深亶亶向晨夕持用自怡悦而

不为物役但恐好事者逸少混铁石我能别真贋一纸百金直

衣短不及髡髮短不滿梳惟有忧世心皇皇此生俱鮒鱼呼轍中微湿以相濡斗水旦夕急岂
与人意殊试诵反招隐愿无怀故居墨突何曾黔行矣勿踟蹰

人生与出处要不失其正手捧毛义檄以为庭闱庆禄养有甘旨东西惟所命贺客来何多踏
破苍苔径再拜称壽觞间里生新敬

米元晖山水

鹖突烟树外水远山更长天地有如许扁舟何处藏如何短篷底结习犹未忘是时水月繁不
见此夜光於今尚无恙怀袖行可将我亦流落者此味惯所尝谁能画戟堂坐我於其旁

十月既望能静饮客海棠花下即席索诗走笔一笑

久闻使君归扁舟欲自载竟负九日约吾意良有待今朝得得来适与佳辰会名园盛衆卉摇
落不少爱为语玉林神无乃风景杀春葩发霜枝一夜作奇怪此花红湿处无如锦城最衔来
定鸿鹄万里从雪外高情相暖热置酒出花背固知是乡人岂不在我辈西庄见西产一笑心
领解主人独妙年有花正宜戴胡为亦见分无乃嘲老大谁令开非时故遣白髮对君勿轻白
髮髮白老更耐洛阳刘伯壽耆英典型在醉帽仍插花岂是儿女态还以壽主人风流更耆艾

罗汉臣挂笏亭

爽气鍾於西峨眉横太白春风吹不暖暑路有积雪月照平羌冷云顶七顶湿游戏两谪仙银
河洒醉墨遂令汉嘉郡千古占一色一从殊方走江山颇萧瑟流落各天涯相逢未相识微闻
庄舄吟握手话畴昔乃知此邦秀终不断地脉权门车如雾衆甘炙手热而君独几先惟恐浼
我笏伟哉百尺楼西望即乡国爽气今已回何妨高挂頰里中表圣公千载推汲直当年几谏
纸扣笏良鯁切意欲摧百士死职非所惜此笏岂其遗正自峭风骨愿君善藏之击邪看他日
也无羨堆牀富贵竟何益长鑱白木柄乃我手中物惟有故乡梦与君共愁絶何当驾双鹄万
里遡寥碧

文本心参政约游西山分韵得顶字

仆仆事行役度尽千峰顶恣览亦云倦困卧殊未醒西爽俄见要前约欲重订结习若犹在宁
复计两胫天际豁轻陰溪头横短艇掙手谢篮輿信步蹋荒径适意自忘远迷途谁为詞此翁
平生意故自略畦町何妨一笑回呼僮催煮茗两年已三至我如饫鼃鼎无乃太属厌徒欲逃
酩酊老笔忽先倡高标准谁与并尚记去载游金碧光炯炯何处非吾乡一气相滓溟

送姚子敬

方闻兴秀孝久矣无令举公车冷於冰吾已弃如土提书向孔墙万代礼乐主而与先簿正厥有圣法寓土也得所归至穷亦云遇於惟京頼旧幸不生蒿魯斯文谅在兹天意岂轻付之子抱渊静萧然守环堵光彩难自閤珠玉满囊楮一从鶚表飞诸公共称许如何但熟睨引鼎力不武栖迟冷椽间无乃太廉取相縻共升斗端欲重黉宇勿嫌屋打头碑兀气未吐六月取一息千里始跬步期君在远业看君即轩翥风雨忽道别恨恨寡惊绪从今闭柴荆何以慰衰暮

题张老山从好堂

世有嗜土炭恣啖等梁稻海上逐臭夫自谓姣且好好恶一失正万境眩颠倒亦有欲富者蝇营无不到洗削夸鼎食执鞭甘隶皂於此还有人深耻货赂冒一笑视千驷贫贱守以道厥好岂尔殊吾自有至宝但恐好不真回夺谅难保老山殊絶尘褰裳衣欲缟区区名与利何曾挂怀抱世人定不爱昌歜与羊枣吾意各有在端未恨枯槁从好以名堂一室聊笑傲心惟有所好乃能无所好好仁者夫子不知岁年老益晚而好易易编穷所好彼富如浮云非义是所悼谅兹得其从圣言极探讨孰重复孰轻辨之亦既早而我方忍饥四壁净如埽舍鱼取熊掌因用傲衰耄

十日菊为子昂壽

风露浩如洗渐觉霜气滋九日已成旬黄花烂盈枝谁云清香减清香在诗脾诗人亦未老皎皎冰雪姿为我掇繁英和露三咽之此物是壽耐千载以为期一点缀须髮真是麒麟儿长大着膝上彩衣相娱嬉

戚子云袖诗见过且笃叙先祭酒与先人同朝之雅意甚古用韵为谢

白髮祭酒公仪刑古君子多士所共敬岂独桑与梓吾翁幸同朝輶路时并轡流风日以邈追慨徒倚徙子云笃世谊竭来自樵李念我一破庐落落荒城址遗以五朶云置之五云里我是老祠官未忘镜湖水握手更细论书味渊以旨嘉问有青衿十载诗千纸

西崑使君上冢过霅首访敝庐又会能静话旧感慨情见於辞所以道别

自为盱江行最声日飞驰赤子问襦袴白云满鬓髭苕边重会晤握手慰所思旧有泷冈表三读起懦衰乃翁平生志正在造膝时会击戚畹悍曾疏公田欺曾陈岷山急或讶话太危移疾逃相印何忍张悌为全归干戈际一致视险夷象贤有令子纪实无溢辞刻之并纂疏自足永久垂忆昔姑孰守欲碎脱鞬碑博士何伟哉奋身力护持麤沙与大石彼计竟莫施遂令两图在留作千载奇此事关世道砥激我匪私他时记先友要当附见之顾我穷未死仅存骨裹皮殷勤终衣祝古道其在斯无物当赠策远大以为期愿勿忘吾州岁晚托茅茨

和德清曹鲁郊七十一吟

元日书甲子晓盘问五辛颇记绦县老宜有善颂陈君平生是岁早晚战伐尘明年七十二旧
谍无纠纷斜飞滞栖枳旁观叹积薪欸乃来泽国比屋多嘯呻何由跻壽域君勿开荒榛遗以
大有年在在鼓腹人非徒事勾稽耄稚情日亲溪流甚清泚鷺山亦嶙峋胡为动乡思便欲乞
其身驾言登东山遐眺穷厓垠有时於沂浴庶几远俗氛平生布衣旧方今鼎铉臣挽留不听
去好语温如春悠然复少住终惠此邑民九十以珍重八十起渭滨如君老益壮眼明无眵昏
精力殊未衰齿宿意自新盍陪英俊游可是枯槁伦而况二三子左右参鱼鳞从翁取青紫且
姑置垂纶忆昨初相识气象清以淳而我已索如髮短不可耘蓬庐辱再访顿觉双眉伸大笑
向我言六甲那解轮惟须饮美酒分饷良已勤珍重君子意自酌不及宾和气何盎盎喜色何
津津长我梨与枣平地即仙宸勿使他馈伤小大相参辰悛诵长短歌尤足夷我神倘来视富
贵高情渺浮云想其下笔时健能幹千钧君倡我当和捻髭檐屡巡向来九老集往往多沉沦
亦欲相从去病惫力弗臻似闻纪初度先我十二旬看君咏薰风笑我醉霜旻所期在千载天
地见本真【盖其生五月予九月也】

饯潜冈南提举

君前郡文学端自吾州始坛坫日以高到处执牛耳平生洒落胸作事故奇伟飞上南楼去坐
得数千里全楚带五岭古俗甚丰美一昨干戈後或未识瑚簋禾穰生黉宫学士气如洗此行
累佩印良为吾党喜三闾屈大夫四海洗凿齿堂堂始兴公亦从韶石起何地不生贤幸勿遐
陋视着意绚荒余文物中州比况复多蜀客谁其顾琐尾相与噢休之我颇念桑梓垂老犹惜
别何以当马箠愿君为广厦大庇天下士

栢生两石间千岁终不大韩子则欲移之平地以遂其生栢生两石间天命本如此苏子则欲
安之石间以全其生二说若异然韩子爱惜人物以有用者也故又曰伤根栢不死千丈不难
至苏子爱惜名节以自保者也故曰虽云生之艰与石相终始爱栢一也虽然处险难而出险
尤难金华倪君老儒也以栢山自号因取二公意赋诗寄之

栢生两石间平地盍移置平地岂不好又恐伤生意两翁为栢谋其虑各已至受命独也正固
与凡木异夷险犹尔殊而我本一致但能全其天所择不在地我闻栢山名抱艺久不试自种
秋栢实离离满山翠石碍曾不伤地平亦不肆岁月渐婉婉冰雪几凌厉此栢初不知老大见
根柢一笑谢两翁何省为荣悴

送洪竹堂

家住西湖西爱吟仍爱竹富贵岂不好变灭如转烛一昨流落後破垣竹犹绿往事何用访得
此良自足胡为被书误弹冠向苕曲三年饭脱粟不饱而况肉颇有青衿子对之寻旧读时复
吐佳句家山如在目不知竹是伴谁护苍玉束官满还滞留欲归未可卜无钱买扁舟迁居更
勿促悠然谢此君行止任迟速新年雨雪深忽已归期告天公似有意为尔开晴旭士固不可
料穷久理当复东风吹浩荡万里奔鸿鹄

赠姜医

越人尝游齐後世多名医汉时太仓长亦复出临淄子实同乡里两翁谅所师从今霅川水饮者不厉疵

赠日者薛东湖

抱疴蓬庐下白日背我驰我生已如此天命复奚疑悠哉东湖水不迎亦不随相对澹无语可以乐我饥

陵阳集卷一

卷二

钦定四库全书

陵阳集卷二

元 牟巘 撰

古诗五言

和德问弟苦雨

鹑鸠朝唤晴竹鷄莫催雨
脩脩晴雨间平生睡足处
剥啄忽以诗使我浪愁苦
此事属天公底用强如许
淋漓不得休土偶复於土
君何见之晚三叹咏集栩
不如两忘言危坐拥败絮
向来夏畦劳抱瓮汉陰圃
旱涝相乘除天地只此数
为我语老农未用轻喜怒
使有二顷田亦欲荷锄去
我评昔逊世幼安胜根矩
毋为苦近名江湖多数罟
但看采荣者隐约殆终古
彼以膏自煎谢去非吾侣
无已则沮溺躬耕谅所取
吾侪固长贫正坐力不武
所营薄少耳抔沙尚难聚
却笑杜陵翁欲把漏天补
胡不归自谋飕飕破茅宇
天边金老鷄已放晴曜吐
马嘶羣动起吾惟守环堵

和无逸子敬独姥山

维址呀洞户云气一缕烟
老龙蓄精佑万石护其巔
从此叩林屋倒翻水中天
金庭漫隔凡穷探未拟旋
轰厖四面动兀坐孤寂然
颇疑北山脉跨湖潛属聯
归来梦所历跳波撼昼眠
种橘化为枳我髮日已宣
何时一边走路去伴毛公
仙独姥旧闻名俚俗讹已
传一朝得妙语涂抹乃更
妍天姥似失色叶姥休语
年而我复自笑槁乾非叶
鲜聊以调二士鼓棹还延
缘

和善之游龟溪乾元寺

畴昔侍吾翁尚记入雪年
米麴家家酿蒲荷处处田
龟溪见鹤林欲去遭挽牵
借屋度长夏对牀时醉眠
或登左顾亭风物清且妍
回顾一甲子往事随奔川
翰林左绵秀宫锦不上舩
肯寻两翁游来弄明月泉
弄泉珠丽袖吟诗箭脱弦
是谁修月斧斲地成空穿
犹有半泓碧柰此笔如椽
乃知宇宙内小大常相悬
惟堪供我辈古瓦生茶烟
云乳聊一啜松风洒秃顛

和善之游法华

胜游得胜士欲济得健櫓
如此正自佳宁论晴复雨
徐行看前山云气互吞吐
借我乌藤枝急奔青莲宇
跋?良亦疲簪篠可能俯
呼酒酌此脚一笑失枝拄
吾怀已旷然阿香殷余怒
牀敷相对睡不暇参佛祖
晨光报新霁生色浮宿莽
诸峰忽自献颇自作眉妩
絶顶瞰具区勇往不可

户而我跛躄者迟钝谁比数窘步竟难陪内热生心腑庞通远相要渊明喜欲舞篮舆叩隐庐
趺坐直香缕四士苦未还踏破辛夷坞俱是青云客那得薄圭组新笋甜如蜜新茗白胜乳山
灵倘见容吾欲老兹土预愁下山去尘事纷旁午试问白木鐃何如长柄麈他日蒙菜把终当
作地主此翁无乃痴統如已五鼓

真隐诗

招隐费招呼习隐聊习步素隐为素餐充隐似充数悠悠千载内罕与真隐遇少小慕真隐每
诵坡老句竭来法华游正在题诗处真境忽在前更慕坡所慕真则思虑泯不真精爽骛真则
光尘合不真圭角露真书无敬仄真味无反恶真乐无安排真逸无疲苦所以要任真从其诃
箕踞所以贵葆真从他笑椎鲁但看真隐庐萧然只环堵青山以为屏白云常在户随宜种花
药快意扫庭宇可作真率会可说真实语可饮真一酒何者非天趣玄真乃诗流季真是仙侣
拉之相与俱巾屨此容与坐闻雏鹤鸣时看苍虬舞疎散略边幅谁客复谁主吾亦忘吾真酣
歌下山去

俞好客又号菊庄为赋数语

人生自作计北屋连南庄其间复何有积粟埋屋梁敢村有退士用意独异常种菊一万株规
作岁晚粮老农与老圃工勤略相当春雨茁陈根柔荑绿於秧剪翳披厥颖叶盛在本昌啜之
付茗椀聊诳藜苳腸秋高饱风露粲粲枝间黄使天而雨金不可以为粮此赐何敢慢再拜然
後尝揆挲不劳咀进入牙颊香三咽下丹田字之曰黄粱其情性具烈母以他馈伤为尔制颓
龄使尔寿而康彭泽有公田秫种半顷强正使及秋成所得亦已凉奈何不少忍决去惊鸿翔
百匝绕东篱采采不盈筐高吟发清饿持此送一觴珠玉实其腹千载有耿光子亦慕陶者闭
户歌慨慷但得三径存何虑一庄荒老我饥不死谁与辟谷方作诗聊以赠一笑为发棠乡曲
诸名宿不鄙老朽移樽见过风谊甚古语笑甚欢辄借昌黎人日城南诗韵少见谢意

人生贵合并造物忌嘲弄颇与同社阔正坐两骭冻南城七日游前事诸贤用但愁茅屋陋不
足置宾从此会岂偶然岁月日时共【皆壬寅】四癸义可取三壬老堪送况有蹇东阳初不
减潘葑渴吻久已燥乐饮宜一纵笑谈更温克容与非倥偬永言戢厚意拜嘉敢不重

李千秋访数语代谢

昔有孟万年脱帽狂不休今有李千秋吟诗醉愈遒我久闻佳句一面苦未酬殷勤忽过我意
气殊相投能道太白语便可太白浮清论或抵掌乌纱犹在头而我已颓然颇有此乐不伟抱
自卓犖下国难淹留同来玉雪郎外家乃名流好歌凤将雏飞上丹极游

宣和御画紫芥

荒园老蔓菁空见根叶大苦硬螫人口弃去何足赖穰穰来万蚁微醒有余嚼

岳君举用东阳法酿酒味颇蕴藉长儿携归偶得数语

昔屡饮东阳往往错认水次公似少猛汲生终戇耳知我野心性雅不便软美契阔二十年那复此风味饮酒真饮蜜直欲呕心胃儿从南塘归殷勤有佳遗公等久要在相看犹故意曲江加蕴藉郑公殊妩媚一见极倾倒吻渴不能止正性固自存遽莫测其际徐觉和以诤虽劲还可喜酒固未易知知酒亦非易酩酊何适从不夷而不惠

德清孙氏和乐秀明堂

人生致足乐莫如令兄弟绰绰而有裕其中自春意龟溪有二孙能笃友于义同居五十载阖门数百指几微无间言轮囷有和气粤从鸿雁散惟恐棠棣废欲挽古道回兹事良非易亦既成新居始得遂初志和乐揭高扁秀明屹对峙怡然两白发坝篋伯仲氏子孙皆雍睦间里亦顺悌复如无事时难得真可贵唐史传孝义颇记张刘李迹其屡易世往往干戈际义风不少衰大书乃无媿嗟哉广明后旌命曾弗至虽有笃行者谁为纪姓字我闻二孙名不觉为之喜两记信实录联名尽名士先见衆论公必得一行史行看表门间乡邦夸盛事我诗甚鄙拙愿尔多寿祉

赠俞山月

童奴从长耳万风声萧骚归从半山路问字良亦劳卧闻饥虎啸唤醒平生豪前山忽涌月始觉所见高颀然有远孙载酒江湖敖胸中湛水镜邂逅得所遭古月还相照了不隔秋毫但怜露草湿时复暮虫号

送唐同知

平生一寸心神游梦华録喜君晚相遇风景宛在目肯为此邦来大是渠依福我但饮若水生意已俱复轧轧寒女手何事嗟空轴欲去复停车为尔两眉蹙犹是前叔度五袴回余燠千家万家喜吾意始云足路稳驱车去祖帐纷相属贺下不贺上此语传古俗况携善颂归亲舍喜可掬烹羔倾家酿懽声动隣曲麾节愿早还春风棠树緑

适安斋

天圆如旋磨万古几曾息日毂环之走西坠俄东出圣贤法天运所以长汲汲大禹生胼胝孔弗遑煖席客寝何太康人或?不及亦有功名者斋内运甍百不放身暂闲苦欲劳筋骨如何适安斋燕处甘暇佚此斋匪侈丽易安取容膝竹几对藜牀左右置书册有时值佳友从容遂竟日体适任屈伸意适任语默惟其适之安适且忘吾适向来孤山老保此踰耄耄以安遗子孙此计固已得人生天地间何事非吾职夜思昼所为然後安可即况君抱修能当念踵前业相期在万里无从守一室精义以致用龙蛇岂其蛰

次韵程晋辅

一宿蘧庐托百事弁髦弃平生意何如犹动沾沾喜我喜在丘壑富贵非所睨况子好山居泉甘野芳媚鹿门时上冢了不慕城市或嫌人村远知一未知二试看近市者事夺纷梦寐正堕胶网中辗转悞身世举手谢逋客士固各有志结习奈已深坐上漫同异山空陰緑净长日惟宜睡夜半呼僮奴发火燃枯蒂满纸诗已成文采一何丽墨池涨玄云晴窗蔼微霏自子来此山与山相昆弟又将三昧手於焉小游戏向来蜀之日往往召猿吠迺尔付一噓千载息攘袂变?今安在但有山绕翠可怜七十翁嬉遨尚童稚坐闻酒如川留客烂漫醉亦思翩然去芒屨踏初霁就林煨短茁带泥落花蘂清絶恐无分得已吾欲已那堪迫暮未来日能余几城外土馒头区区诚过计卓哉荷插翁旷達未可毀

仲实示中秋诗甚恨不同此乐用韵一笑病中殊无思也

谁其持冰炭晨夕闯我庭遥哉水帝后乃有此宁馨不受百药镌奈何顽且冥是时八月半无云天正清居然作灾怪流汗如翻瓶捕逐出八荒弱步愁【缺】而子方眞酒宾主更醉醒作诗调明月顾兔下乞灵饮量闻小减犹能吸南溟客疾扫已空荡荡白云扃何必傲渊明若问神影形吾生七望八臄胸知几经不乐复奚为美子鬓未星何时定一来眼中见鸾停软语到夜阑发火烹中泠诵子新诗篇我亦能静聽

同赋开元宫避暑诗

避暑如避虎山林每逢旃谁知浩穰内自有清静缘同来戴牟张作计良亦贤是时正流汗赤日行中天劳坐苦役役何异烹炰煎居然得胜地神观为爽然凉飈起珍簟妙香泛琼篇坐客易生感泉隐独谈玄静者躁之君方寸湛其渊勿谓火胜月此意諒默传我户隔珠庭遥企玉真仙仙游虽云邈肯逐大化迁曲池况未平中多蒲与莲更有离离者使我增愁涓

次韵仲实秋夜

空庭两犀株吹香满前轩颇疑顾虎头幻此金粟繁或是乘鸾女月窟分天根更与泻浩露尽洗蜂蝶喧若无好事者为我载一尊而我子张子古谊夙所敦肯将新诗句到我罗雀门何殊小山赋欲招楚客魂犀首累佩印陋矣不足论老我罕出户东墙甘曝暄应同花下醉式副我愿言

送家自昭长慈湖

眉山鍾神秀翁季天下伟直到仲虎輩奕奕殊未已家为文章家百年兼两侍存翁名侍从颐山古肤使秘书性具存文脉益演迤前除罗玉树乃复有令子超超夔不羣老气压纨绮早岁瑟僖篇短檠午夜几要渠绍编剗教示正勤止家宝未轻出吾侪方侧耳一朝着斑衣束书事行李堂上白髮翁为尔颜色喜涛江日日静酒酣可以起慈湖在何许精庐屹其沚我欲鼓枻

游浩渺曷涯涘长风驾高浪瞥忽可千里如此宁不超踔厉前无比须知归宿处其道元甚迹
鲤庭尊所闻固自有源委愿毋厌凡近读书愈穷理修程与远业亦从今日始合沓来衆誉烜
赫继世美持以貽家尊良足当甘旨

赠陈一斋

谢公文物郡山川如错綉转眼成萧瑟富览宁复有自我识君子再挹中屿秀卓萃妙言语经
术更兼茂早岁六典书嚶嚶发孤昧春官失分寸苦不入吾彀天意将有待本郡烦客授乡人
弟子行月旦师友旧朝随贡篚入莫处儒席右固知致远业当时无近售多士皆景附三道共
辐辏而我初何心高下随所就澹然守吾一拥书坐清昼交希谢俗物冰雪凜怀袖独於吾辈
人倒屣惟恐後谁云一缝掖不如鴈门守好贤笃緇衣同心藹兰臭况乃诸老翁夜艾耿残宿
殷勤见尊礼能使风俗厚颇怜世议隘或用儒为诟元气须爱护大体必争掇诵言百僚上大
作万间覆君当自此升儒蘊获尽究是为斯文福岂弟神明佑平生闻人善喜气如饌馐作诗
继鲁頌千岁俾眉寿

送王仲明长明道

君本邺中士行向建业去故都多感慨尽在登临处乃心所师仰当年上元簿闭门玩微言春
风会归趣

和马侯游何山

自还吴兴居头童而齿豁信意时出教所览深以廓何山在何许细路穿木末跻攀不憚劳历
历见郭郭晴岚堆紫翠正在吾屋角世事苦坳并我但专一壑嗟彼竞利者为计自各各缅怀
安定公雅合居台阁平生惟自道未有轻造脚竭从海陵来姑苏亦暂泊湖学得公重学子有
攸托南园庆历间六老曾会酌当年马太守高谊谁能若直卿为之记文字诚磊落厥今同姓
侯胥次有活着长篇俄写就传写腕欲脱昨闻上湖坟寒色正错莫樵木不为禁宰树叹濯濯
新祠已卜龟华表伫立鹤神游倘来下旷逵离尘缚

送吕锡入闽省覲

吾友邓善之从游多佳士其间最妙龄英英有吕子虚中风寒处子独鍾秀美忆昨初过我丰
度如水峙不肯逐利名惟耽玩文史闭门肆探讨往往穷日晷刻意逗幽深飞辨摘譌记我欲
濬其源融液会衆理何事遽索去明发事行李八咏须恣游三山亦甚遽人生着彩衣侍官真
乐只行当拜家庆亲顔为渠喜非复旧阿蒙有子能如此便可置膝下家室勿轻视

聚星堂【并序】

颍川周宅有聚星堂世但传欧苏白战诗句晦翁在建安固作新陈氏之考亭始绘荀陈聚星

故事於屏上考订指示甚详且为之赞世或称先生为考亭盖误赞中一语若不满于膝上长文文若二孙者然其意则为侂冑发也陈氏乃晦翁之孙故曰课忠责孝独慨余衷此横幅意亦是时所作以便卷舒尔今考亭已毁而此本独传於世岂偶然哉曹士开博雅士也能宝藏之因识于下方云

建武重名节狂奴态犹故客星复何事一夕感乾度风声激末造骈首死党锢而五百里内乃有贤人聚行行望德星高阳里中去德隆则星晷时网不足与元气之所全政在簪盍处乃知忠贤类天每下其顾二老甘隐沦四海起尊慕有如子孙行已是廊庙具深期任世道相期扶国步皇路方险岩倾軫当急赴赤手徒捧块诘障奔流怒濡迹本揅时其忍谗诸数事盖有至难竟乖天所付汝南榜堂皇考亭绘缣素室有聚星事四远竞传布老眼苦昏暗见画如隔雾卷还坐太息冰炭扰百虑

史彦明致乐堂

高堂有寿母黄发映儿齿天方畀修龄康宁燕多祉怡然人子心何物堪伦比和气为愉色皆自深爱始郁穆涵春风融怡妙天理此是谓至乐乐则焉可已再拜为献言忠养极娱侍随时换轻煖每侍进修飏初非假外内至乐皆在此况能以志养先意而承旨鮒鮓故自珍懽不如菽水有时平反归儿喜亲亦喜吾以名吾堂致乐义最美试看纪孝行昔曾今日史会有邦人土升堂奉醇醴俾尔登期颐俾尔宜孙子

次史德载韵示诸孙

我家无绦帐贫贱人所弃忽闻唔咿声老怀倍懽喜比隣亦惊怪捩眼不敢睨先生史鱼直自谓骨不媚珠玉在短褐深藏未轻市而况门阀高指不屈第二肯应童蒙求为尔觉昏昧袖中一卷书传之自名世尔幸近得师盍勉从学志人品分中下教法初无异采芑复采芑我田自新美那似斥卤滨弥望荒白苇短园围败屋不见花药丽赖此小窗明晴光开霏?日长书好读所讲先孝悌泥牛共土狗勿复事嬉戏後池蒲稗深竟日羣蛤吠也勿向池边照影如孔翠低头勤笔砚翻墨满裾袂男儿十四五年纪非幼穉不妨笑阿翁愤愤长如醉先生有雪霜严威不汝霁今朝发长吟闭门苦覓句老年谢丸药殆似陈无已区区古人心今人知者几乎生颍川教不作功名计但令本根在浮华终易毁

侍辂院叔过山庐意行甚适夜过半乃知醉卧山中而亲友或去或留因借渊明时运暮春篇一笑

宿戒亲友蓐食诘朝携幼偕往历览江郊鸣吭在谷时云在霄灼灼桃华青青麦苗且行且扶且憩且濯桥有危蹶湖有遐瞩古人惜春常若不足又一月多何如其乐狷者隐沦狂者咏沂千载彭泽异致同归匪怨匪荒天趣发挥大阮静渊心慕以追暑嬉我林夕偃我庐或醉或逃听客所如林堕片月室耿残壶一笑成诗良非起子

再和

摩肩趋利市门之朝夷然抱关市也亦郊一念静躁悬隔壤霄旱火禾焚实炊我苗饮水内热其何能濯大播昧昧近或弗瞩我有至境反观内足寂寞宽闲自得其乐茫茫禹迹海岱淮沂游子倦矣故乡如归牛羊在野举肱一挥既入其苙夫又何追八荒我闕天地我庐六凿何有一席晏如西风篱落剥枣断壶静以观复闭户者予

陵阳集卷二

卷三

钦定四库全书

陵阳集卷三

元 牟巘 撰

古诗七言

长江图

汉川影落鸚鵡洲金山钟到多景楼老龙几载卧寒碧中间不断万古流晚来雪浪大如屋澎湃舞我一叶舟舟移?转知何处离离烟草令人愁说与渠侬莫倚柁转帆别浦盍少休此图此景俱可惜展玩不足空白头家在江水发源处何时还我旧菟裘

山水图

凝尘不去鼠行几划见巨然与千里修眉拂略远意开碎点孤烟树如荠髯龙郁郁新翠摇我觉郑公殊妩媚悬知自是栋梁具岁晚霜雪须饱试旧闻北岳锺洹寒长松造天冰裂地苍皮玉骨不受冻礪礪千丈世絶拟谁能为我试貌取奇姿伟状来眼底张君平生饫所见雅复爱此秀而美虽然莫作差池观老壮险夷同一致

凤凰山涧石图

南湖山人小戏剧夜半钩天闻拊击音节疎宕凤起舞至今笋簴遗枏业君来访古用此时地老天荒何处覓矻矻渡尽涧与冈确荦径微予趾棘重华忽已三千载凤鸟一去无消息石兮石兮奈尔何搔首湖漚徒伫立羣仙拍手相劳苦但知簸空吸寒碧殷勤问翁今何如方瞳炯炯映丹颊颇记三生石上无读书双趺雨苔澁归来举似翁一笑飞鸿踏雪那可忆子其为我谢羣仙不妨天游复八极袖中行记真画图留向人间作奇特

题洪崖先生出市图

洪崖先生住何许支离拥肿之为伍萧然行李偶出市束书瓢剑略可数自谓生在三皇前野鹿标枝何太古当时但以结绳治书中正复作何语舆马络头亦复来雪精胡为鬣继具只呼张老无不可面谩三郎直戏侮承平无事相娱嬉力追遐风来湛露一朝恍惚思草昧此意似已厌繁膺千邨万落荆杞生宛是洪荒一风土袖中纸驴不吃草拍手还向洪崖去

王维画孟浩然骑驴图

穷浩然老摩诘平生交情两莫逆也曾携去宿禁中堪笑诗人命奇薄只应寂莫归旧庐此翁殷勤殊未足作诗借问襄阳老诗中犹苦忆孟六悠悠江汉经几秋一夕神交如在目分明写出骑驴图丰度散朗貌清淑更有偶傥一片心不是相知那得貌行行复行向何许酸风吹驴耳卓朔向来十上困旅尘驴饥拒地愁向洛不如乘輿且田园万山亭前大堤曲鲤鱼正肥甘蔗美鸡黍可具杨梅熟一樽相与寿先生醉归勿遣驴失脚

和王寅甫御史游南山韵

平生爱山苦趼足况此对面美冠玉也曾杖屨极跻攀稍度湾碕转虚曲径踏青螭脊上行所历渐高山渐束红亭白塔出湖外下瞰诸峰等臣仆祖禅晏坐服生狞法席宏开俨清肃何人梵呗呼僧定划然透户如击筑浮岚暖翠忽纷披依依精舍傍修竹至今犹作呬唔声饱食颇惭空洞腹崎岖竟日亦已劳应接满前端为目道人对境了无美折脚铛中煨脱粟小立为尔起深悟愿事埽除甘播掬峥嵘岁月苦难记三寸穉杉俄立鹄山中老宿亦向尽访旧无人空感触细评道人似豪家台殿耽耽枕岩谷当时气象雄一方谁教劫火烧糜竺十年旧观未全还金钱奔走倾缙俗何山试问何所有一溪清冷寒绿入门使我意也消不省人间有华辱殆是高人胜士徒山灵笑许兹论笃旷荡幽深两俱胜胡不重游勇奔鹿多病欢娱久去心良辰美景宁相属昏昏午窗供坐凉跳丸西走白日速夜来可奈风雨尽尽力催花亦良酷痛杀新红三万片园林惨澹余老木作诗遣愁愁未遣那知翻作愁根窟古人真欲焚笔砚苦语殆可书绅笏颇怜阮屐共嵇锻更笑周妻与何肉留连一物即是碍羡君开襟少频促爱诗乃复宜相似句语卓犖光透幅倦还始觉心和平人生有手莫操牍

送陈正德教谕常熟

此邦自是高阳里陈太丘家好孙子十年闭户养隼声我先子後一时起前时送兄今送弟彩衣拜亲亲为喜人言昆令而季强羡君清标如玉峙善和尚有千卷书一一穷探亲夜几新诗那更翻手成便当拾芥取青紫小营甘旨束书去且烦私淑青衿士天公应念友于情任国相望才尺咫苏州明白照两县正好高吟清影里吴江定作对牀留笑隔垂虹脰鲜鲤托好我已三世深待老敢当二生侍萧萧风雨起送客万里飞鸿看双眦端明老子旧家声一举先鞭从此始

杨求仁路教游何道山之明日余始自洞庭归恨不与隼游漫趣韵一笑

君能匝腊过茗水我正絶湖寻橘里人生有数会不免先後差池数日耳天教新年暂相见握手如获丹与砥略似德公上冢回径入就谈倾底里如闻前月清兴发杖藜晓对南山起苍官掀髯自虹举清流照影时鹄峙我归已晚不得陪脚中平生信有鬼独留诗卷使我和思枯预怕搜脂髓小溪深处是何山藏机一句无多子当时言下谁领会只认泉石为对履至今遗迹记东坡遂使此山同畏垒拟议固已输一筹跻攀锐欲穷寸晷真境不乐有无间更使高人为标指先生醉归方熟睡冻蝇一任钻故纸

和顾伯玉陈朝桧

长城大雄古刹里一庭老栢质已死依约仅见左纽纹垂柯布叶乃如此相传云是陈朝桧欲论往事皆死鬼冰悬雪跨黄尘尽何烦阜茱相料理只应孤根铁石坚不怕如壶之赤螳四旁那复有生意生意却从中心起陈氏机浅根枝弱虽有子孙何足倚峥嵘霸业随手坏五传不堪重屈指君语居然多硬语千载兴亡杂悲喜隋唐而来尤可感区区未数钱与李

寄阎静斋徐容斋二学士【代人作】

斯人宗工国司命容斋有容静斋静海涵岳峙俱伟人心同道同不同姓向来先後持玉节共仰福星在吴分一公归领集仙班一公继登六鳌禁大名本是宰相职高搢书帷地步峻导密亦是翰林长快埽槐厅消息紧天教两翁转鸿钧赤子到头合苏醒东南秀士颇不乏当年着意极索引而今造化况在手想见姓名犹见省石生已起有温生我爱莫助德恹恹苦为百草忧春雨坐待风霜发苔藓

善之入雪兰臯置酒小诗纪坐中事

病翁禁酒仍禁脚不省人间有行乐主人善最客善之邀我来同鸡黍约清樽快吸船落瑯颇悔从前谢杯酌故人久别如此酒一时倾倒慰离索更擘新笋供春淘狐泉槐叶未须学殷勤入鼎煮过熟老饕恣吞不劳嚼人生难得是合并开口一笑良不恶呼车载我雨中归阿香推车散飞雹分明戒我轻破戒故把春衫都湿却我亦投牀作雷吼无数残红枕边落

倒撑鱼船上滩图

倒撑鱼船逆上溪六鷁过飞风退飞吕梁悬瀑行越之灏灏如象人西归一笑恬视险与夷同波委顺未必非

赵石心诗

试问吴儿歌小海何如广平赋梅花一片石心元不死平生不落徐庾家赵子陈陈有胷府云根半夜生槎芽有时盘空吐硬语更觉世上浮且夸谁能为藟青藜杖苔莓荒尽天禄与辟邪

赠刘心月

心月还将眼为月秋空表里俱澄澈閱尽世间姘与妍分明无处藏毫髮我方回向心地初含光自照非外谍平生最喜阮嗣宗臧否两字何曾说

送陈正德长慈湖【并序】

陈正德甫本斋端明公之孙姿稟穎异而气象峻整与其二兄无逸正则相後先克持世业盖本斋师蒋实斋友汤东涧而闻之魏鹤山真西山者也师友绪言讲之甚悉以选为慈湖山长兄无逸取东涧送本斋教授金华诗和之以送而送者亦皆和焉杨文元自号慈湖在慈溪其乡里在乐平其仕国遂有两慈湖相望千余里慈溪之慈湖其在乐平之慈湖否耶不可知也或谓莫妙乎吾之心之神变化无方俛仰之间【缺】拊海外安知慈溪之不乐平乎然则正德之乐平也亦且三月聚粮撰日而戒行乎告行於尝所往来问途之所出孰为近远乎其既至书院也亦且循序而进历阶而升堂乎集其学者正席而登义乎正德曰若是者固知之且慈湖每举心之精神是谓圣者语其徒亦未尝不曰孝也敬也实也忠信也诚使学者极高明而道中庸下学而上達尽心知性而知天其有不至於圣也乎子深异其言夫义理无穷其是非疑似不过毫厘之间讲去其疑而求其是可也昔吕成公平亭而议陆氏之学以为勇於求道之时若不由阶序然毫发之偏不敢安兼听并视却立回顾不造於至平至粹之地弗措其语可念也盍以是求之焉遂和诗以赠

本斋之孙盛词华下视流辈十倍过家书虽散尚千卷其奈储无儋石何二昆研席相与共勘辨不遣毫发讹一朝束书慈湖去慈湖之学自象梭人之高明骛高远不由梯级陡上坡而其下者保固陋终岁无路登嵯峨万形惟实乃无弊此道自古传思轲慈湖论心论无我真意初不烦镌磨虚明一语更超絶不肯与人同其波却笑禅宗用心错我每读此毋麾哦微言日絶诸老尽独抱永感如宿疴君家诗友讲贯熟持之以注岂在他我耕我获粒我腹而彼徒梦笠与蓑

题喊泉亭

大龙小龙天下絶水帘高挂三千尺吕梁悬水那复言便应压倒栖贤峡我来覓水洗双眵怪底老崖枯欲裂龙公何处抱宝眠閤蓄精枯未渠泄谁知水火本无根重陰可以阳气彻倚空长啸山为开以虚为感感尤烈千山屬聳方沍寒鍾乳淙流忽飞发珠玑噴薄杂霏雾琼瑶倾泻濺白日若非卷取银河水那得变幻在呼吸看泉须看无泉时自无而有乃奇特龙公作事真狡狴吾侪用意亦奇崛经营小立看未了洞门忽已云霏湿龙公龙公可以止何如翻手作飞雪便将丰年报明主苍生赤子俱函活火云六月汗如浆更为渠依洗炎热一笑回首谢龙公神用俱停天地寂

再和杨求仁何道二山韵

雪堂西席雪江水广文先生是乡里此翁平生事崛奇欲上虚空鞭騄耳迺来深藏老锋铍未许容易试越砥插天光气尚历历若为着渠岩石里仲华本愿郡文学百年功名一日起峥嵘今不少自贬吾道毋乃太孤峙苦将新句调山灵不遣陈迹蹋死鬼世俗贵耳不贵目谁得其皮兼得髓翰林主人墨客卿会将此事全付子吾衰正复何所用两钱之锥漫苴履固知梅老难抵当夜半偏师来研垒襍硯囊笔俱坚坐尔以不战淹客暑天地冻合万木僵军中颇怪多堕指春风呼酒为解严十部从事贤一纸

律诗五言

和孟能静总管西庄闲居九日见招

风物居然好亭池稳处安上饶初奏最西墅且追懽朗诵诗千首高眠日几竿放怀闻孟浩乘兴过苏端近局人人喜闲居事事宽扶筇差可强投社亦非难岁月期鲐背功名付鼠肝相将斟寿斝一笑拂尘冠红蕾春犹小黄花晚更寒摩挲话铜狄惟许鹤来观

张彦清学士以使事来杭访问忠烈王子孙盖其先皆自保定原系实同乃合二谱聚族谒庙叙拜厥谊甚古仲实赋诗以纪録寄山中辄和之

有伟秦咸望厥初保定人风云际兴运茅土褒勲臣端自积余庆非徒荣一身闻孙蔼令誉抗志矫秋旻嗜学今该古问安昏复晨金方感义气内谱存宗亲肤使光华盛輶轩采访频乃知清庙器俱是崑山珍分???既同出驰声尤絶伦仙班重典领宥府久弥纶揭节方宣化挥毫看爽神应嗟远俗薄欲挽古风淳钜族同三春高情隘八垠焚香肃遗像序拜欣嘉辰颇屈彦清贵宁嫌仲实贫绵延百年绪翕合一家春乐只饮此酒勤哉书尔绅寻盟谅愈笃踏道毋胥沦暂别山河阻终期事业新相从万里去伐鼓起通津

和梅君遇退闲

鞅掌徒劳耳人皆羨子闲惟甘寄市隐勿苦忆家山街鼓晨眠稳丹田夜气还萧然无一事意已出区寰

赠厉白云上人

双径闻钟罢而今夜熟眠事须红日上身在白云边古貌应违俗高吟不碍禅炉头煨芋火相对各欣然

羣羊踏菜畦戏作

活计元堪笑毛羣尚见欺蹴蔬元匪梦樊柳竟何裨正尔败诸葛从何捉左慈若鞭其後者犹得养生规

次韵八咏楼

八咏楼中景都从笔下收使君容此客诗卷重於舟我颇曾三至君应倍四愁潇湘与章贡千古只同流

赠叶一山

气?有如许当年乃鷖冠覓官谈笑易知已古今难膊耸如山瘦心坚可岁寒郎潛有顏驥博士却儒酸

题诗禪方丈

切忌犯正位須教截衆流聞鐘應已悟縛律未為遁室小才容膝詩成自點頭出門忽大笑明月一天秋仲實踐約來訪又得韶甫方君同行數日語蟬聯甚慰五詩寄意甚高次韻為一笑

重腿嫌卑濕那堪暑雨稠拋書事藥裹敲枕听溪流何用攄孤憤惟宜号四休誰能訪生死天際有來舟江河去不息金石仰而觀但未隨流轉安能制汗漫親情人所重友誼古尤難二士俱來意遙知可歲寒紅帶承顏色青霄奮翮時猶尋云弁約肯為水亭嬉快婿豈嬌客老翁真小兒五噫且勿作舉案樂齊眉陽羨長腰米儋州禿鬢翁相傳作佳話好為表遺忠收檻溪山勝從容詩酒中南湖未歸客歲晚倘來同平湖好亭子高出亂雲層一水作之字衆山羅豆登襟懷為爾豁杯勺尚能勝却笑鑽故紙窗巾效凍蠅

答術者

賢关夙多士子獨抱遺經衣尚旧時褐眼誰今日青直須行万里未許赴三星會友誦佳句等閑生鶴翎

送吳古邨入越

笑我甘苔隱因君動越思綠波元可監縞髮已成絲共說修齋老仍懷闕道時匆匆還別去江海入新詩

次韻寄卫山齋

蜀客嗟留落甘為學圃遲年華空自老心事復誰知未有盍簪日還須上冢時緒余何足論相對但期期

送周东甫教授余干【并序】

太學賢士之关異時英雋如林冠盖如雲眎功名富貴可立致一旦高攀遠蹈携書入山林惟恐其不深且密也盖久之而稍稍出為時用何進之難耶然流落顛頓之余尤為人所愛重譬如珠玉犀象之珍要未易煨歷之也吳興周君東甫以前太學諸生教授饒之余干州人皆謂此未足以處東甫也東甫笑曰曩使吾幸而久於太學或四三年或五六年又甚者十餘年以得一第而又幸在前列法得為學官須次且數年幸而得至其官豈有異今日之為哉而何所寘淹速喜嘆於其間乃亟裝為行予聞而壯之以東甫辯博而文通敏而能何適不宜况博士非冗官可行其志余干非陋邦可施其教行矣東甫久郁者其發必大其進孰御子姑自愛重

敬修其可愿以俟其远者大者焉是邦自忠定公以及近世之诸贤绪言余烈尚有存者诗云
高山仰止景行行止敢以是为赠言诗曰

博士广文馆迟君二十年新邦重于越旧俗记诸贤【谓古心榘峯东涧碧梧】鷁首南风至
臯比右席专暮年尤惜别搔首意凄然

和雨中

但听四檐滴真成万事休空邨就谁饭高树系吾舟那忍田翁笑还怜木偶流老人浑忘事略
记酉年秋薄宦亦良苦救圯泥溅裘陈红犹不足太白几曾浮赖有两诗好聊宽一日忧天公
应念此未用祝篝瓿

水邨图

山色浓还淡孤村水遶之俗尘飞不到野老住偏宜碕岸疎疎柳茅檐短短篱小舟敲仄过便
是少陵诗

陵阳集卷三

卷四

钦定四库全书

陵阳集卷四

元 牟巘 撰

律诗七言

劭农日漫成

白髮紅顏烏帽翁年年从尔覓年丰争看汉诏来身畔便觉幽诗在眼中且喜畦秧三日雨莫愁花信几番风我今亦是惰游者不稼而禾愧食功

景定甲子理宗尝以顏曾传道配飧下问词臣越咸淳丁卯昉以曾子思升侑孔庭盖推本先意也先臣所被宸笔藏之私室会军学撤旧庙崇新阁愿得摹刻其上而某固未敢也府教张君遂诗以成之後之观者将有考於斯文谨用韵以谢

在昔前朝帝问頒龙楼当日正承顏曾思参侑褒崇后尧舜相传密勿间遹骏先猷昭若日於皇吾道重于山老臣独抱乌号痛不及临雍扈从班

藻有嘉鱼首自頒师儒乐育士懽顏宸奎恍若从天下杰阁崇成不日间要识道原观泮水坐令文物盛黔山熙明殿下槐龙舞便合归陪讲读班

荷花辱於淫邪陷於老佛几千载自托根濂溪而後始得以其中通外直者侪於道而近世魏鹤山又推本周子之意取泽陂之诗所谓硕大且俨者归之君子焉明伦堂後新池骤着花教授遂见之诗且有取于周子香远之句寄兴远矣因次韵

道中何物不生焉顷刻能开碧玉莲根脚好时花发越源头活处水漪涟唤醒佛土从前梦细绎陈诗最後篇霁月光风真洒落千年此意後谁传

和张敦雨诗

占云日日问何如物意焦卷重可吁微洒人皆忧未济积诚我自愧中孚滂沱幸已符先兆?經行看获上腴此事相关情正切吾侪初岂事夸谀

试院和李提管韵

圣世旁搜盛武宣
几人舍耒叹胝胼
武成宜取二三策
稽古还夸数万言
充栋此时唯恐後
着鞭他日竟谁先
空筌相对真堪笑
半夜鱼龙已变迁

无党为东冈赋远游余卧病空山闻而壮之和韵为别

鬓丝梅雪两鬢鬢
底事征车又指南
自是曾游习蛙黾
不妨小住话鱼蚕
揜袂中岁情良苦
秉耒平生分所甘
若有书来访生死
白云多处是吾庵

次韵无党留别

涛波万木撼新秋
却笑茅庐似叶舟
我但萧疎眠颍尾
君方矍铄向壶头
早凉已喜无残暑
老别当须似壮游
黄木扶胥最奇处
想留句子待浮洲

和刘朔斋海棠

人物当今第一流
以花为屋玉为舟
晓粧未许褰帏看
夜醉何妨秉烛游
锦里宣华思旧梦
黄州定惠起新愁
何如归伴徐公饮
稳结一巢花上头

和善之寄游何道二山

行尽千峰日未晡
斋余扣槛唤红鱼
百梁扶栋神输巧
一铎鸣檐乐出虚
那得诗情陪岛可
但夸山色胜衡庐
老禅趺坐浑无语
案上旁行几叶书

两人相对说蚕丛
蒿藿堪嗟满故宫
忽见画图如雪外
不知身世此山中
余生才寓一稊米
独往殊欣六尺篷
寄得诗来何处覓
南湖蒲稗没鳬翁

送李仲宾同知

一别丰仪十载间
新春再见为开颜
鷄林传去诗如锦
龙节归来鬓未斑
日丝纶端可待
平分风月早须还
此行已满英雄轂
同上烟霞紫禁班

七儿应复同客饮樱桃园摘新归以遗亲用其诗韵识所感

闻汝相随入翠微
归时晚色已凄迷
樱桃为喜筠笼重
燕子休嫌茅屋低
我老恐妨儿辈乐
新诗欲继古人题
年高自觉摧颓甚
送客何嫌过虎溪

尚记当年荐寝园
百官分赐荷恩渊
带青丝笼空余梦
搔白头人苦不欢
诗老夸称作崖蜜
野翁惊看泻银盘
南山见说红千树
鸟雀儿童任入阑

次韵王寅甫

共惜余春赋式微莫教当饭失苗藜行行直度南云北得得还寻东院西白发已应随日长黄鹂更与尽情啼试哦小雨轻埃句絶胜前邨滑滑泥

和陈无逸九日

扬鸾设醴奏丝桐九日台头咏渚鸿宣远风情虽旷代渊明霜气直横空卧龙自命初非过戏马当时未足雄莫笑东篱太岑寂南山长在醉醒中

万事真成一缪悠西风节物若为酬鸿饥未觉他乡远菊老谁同此日愁已洗眵昏看白眼更扶衰病费丹头吟情笑我今何似废笕寒泉澁不流

和张老山辞免运同

曾驱海若傲波臣底事年来苦乞身径为蓴鲈称退掾要将蓑笠伴玄真流空素月光难掩过雨青山老更新祇恐未应闲袖手盐梅鼎鼐正须人

和李侯九日

自愧羸骍在井湄颇思时复一中之平生殊欠题餽字今日堪怜对菊时乌帽已忻新得酒白衣谁似更携诗吴兴太守真三絶烂醉轻教玉笛吹

几回九日九江湄杖屨从容信所之下渚远寻观获处东篱想见醉眠时共陪今日吴兴守犹记当年己酉诗我亦平生知所慕飘飘衣裾任风吹

贺张老山得代

富贵方来本不期湖山径去岂无辞衆咻直欲齐为语一笑姑存郢与讥难辨求田还问舍且教入务并寻医幡然强为招延起从此岩阿烂蕨薇

别赵子昂

粉省星郎蹋晓班暂随使传走日间荆州利得习凿齿江左今称庾子山君意颇为蓴菜喜人情争羨锦衣还但怜老病匆匆别白发如何更可删

送萧子中

诚斋手摘千岩藁诗律清森近代无仍世科名香未歇诸孙文采蔚相扶横经为喜臯比稳覓

句何妨鹤骨癯会见萧生起东海几年志抱一时攄

春雪

一冬只辨作严寒剪水飞花事竟难闭户不知春意动扑窗忽觉雨声乾颇闻万事正云集何处一蓑如画看但喜畦蔬得苏醒从今小摘有余懽

送罗汉臣

向曾平步上仙螯拂袖归来气尚豪自有西山堪拄笏不妨右手且持螯凌云载酒浑如梦泛雪回舟也自高顾我余生复何事闭门三径削蓬蒿

过洞庭山书湖中所见

欲谈旧事恐凄然谁遣奇观堕我前鹜阵万屯湖为黑水须千尺水皆悬无多风色似天相阿那人家疑地仙更有一般堪羨处嫩醅绿蚁醉无眠

送赵兰皋教杭学

一似彭城向颍时重开讲席整冠綬青衿喜得新师范白发能言旧尹厘独冷定应非热属衆芳况复异凡姿不妨且作回翔意直上抟扶亦未迟

送种南仲主簿

六客堂前翠竹屏双谿馆下碧麟生遍经此老行吟处可是常行簿领人更为求蚕覓休暇官因祭竈请比隣也知矮屋难淹滞且与空山作好春

题用拙斋

柿林园里仵文党金谷丛中石贾尘漫说愚溪诳当世苦将巧宦目他人何如杜老幽居处一似无怀太古民说道书斋名用拙可存吾道乐吾真

曩在长沙有遗以石山今旧物云散此石以坚顽独存渔庄为赋九芙蓉之句遂以归之目为壶中九华致其怅望

当年持饷自襄东共载尤怜翠色浓莫向壶头疑薏苡要从华顶看芙蓉诸郎自是阶庭秀此物聊堪笔砚供却笑仇池无与伴图中怅望九奇峰

饯留忠斋丞相【并序】

赵清献公自衢过永嘉曾文清公自越过姑苏皆以八十之年就养子舍此东州盛事也大丞相忠斋留先生视两公名德同乡里同寿年同而东阁府判将迎安輿以踵芳躅邦人士日夜望者余以老门生敢援前比赋小诗赞公之行

咫尺柯山路未賒人生迎养最堪夸续茶山集过吴下看戏彩堂来永嘉八袞高龄忻子舍同乡盛事属公家邦人莫笑门生老日日花间望小车

予与会孟同游古心先生之门死生契濶今见其十年前与仲实诗帅初记和予亦继焉

扰扰人间万事尘旧交无奈白头新此翁固是同门友今日真成旷世人千里赏音知絶识九秋落木见横陈也休频把遗篇看说到铜人更怆神

和虚谷韵简唐月心

平生自分只虞毗况是而今一槁枝江左何人谭太极洛阳有客赋新诗物情於我真疎矣吾道非公谁与斯未必梅边柳索笑微言好与共参之

饯陈正则学录长城

本翁十载郡博士司铎官清亦未迟暂屈吴淞湖海气来看陈桧雪霜姿近家聊喜片帆稳远业当为万里期老我柴扉看岑寂不妨时寄昼溪诗

再和虚谷韵

肯随世事事夸毗得得来寻霜雪枝苔曲新添渔隐话陵阳别论????家诗卜隣已喜同王翰到处犹能说项斯不是晚来投社去杖藜兀兀欲何之

和梅遇二诗

除却壶中日月长不知何处是真常等闲铅汞自生死从古薰莸更臭香粪扫袍边覓鍾吕步虚曲里换伊凉何当月朗风清夜唤出胎仙舞一场

行止非人所可为疎慵何事不违时已惊梦里鸡鸣早翻笑人间鹤到迟剡曲船回空此兴洞庭飞过怕渠知依然身世溪亭上售用新添五首诗

高贤孺厚斋使君之令子自番来雪访明亲旧此意甚古岁辛亥余识厚斋金陵通守之舍堂陪朔斋刘公饮海棠花下俛仰四十五年追念凄然

厚德流光报必丰当年齿穉已奇童兰芽秀擢孤根内华表惊呼一梦中肯向陈人论世好絶

知新句有家风海棠花下看鍾蔣说着令人念此翁

和王梅泉黄静斋载酒问花

逃疟形容兀似槎谁寻独树老夫家高人早擅无双誉佳客争看第一花已为义尊成酩酊更夸信笔写葩华斑斓小草真儿戏得借余光亦所嘉

吾五十年间未尝一杯自寿汝曹所知者今乃力营甘旨为七袞庆事出创见欲深避去复不可使汝曹他日懊恨亦如吾者小诗答渠勤意丙申正月十五示诸儿

七十新年未尽穷香醪满泛饌尤丰便同五鼎为吾养汝有双亲胜乃翁一念自能通造物诸孙更与振家风花灯璧月今何夕春在亲情笑语中

十六日谢郡官两学及乡里朋友

七夕空余永感情南园养病闭柴荆一朝破戒为儿子四坐合并表友情地主每能容枯枿天公特为放新晴余年得此今多幸白发倾觥一醉成

十七日谢赵子昂孟能静及诸亲友

儿将白发共嬉娱敢意高轩访敝庐七袞年龄同绦县诸贤诗句过黄初菌芝那解出枯朽冠盖便能倾里闾烂醉休须问生理贫家今有百车渠

送杨兴府

细语当年别後春惊心?县尚吹尘浊醪易贯新丰酒衰俗难逢旧雨人君似伏波当益壮我几南斗不能神合并未几匆匆去鱼鸟蒹葭谁与隣

大水後得雪

便涓飞洒又何佳得得来寻贫士家破屋青灯才一黍荒园老树忽千花酒逢寒夜饶偏贵诗出穷人矫转夸两月儿书浑未到定应行脚更天涯

萧条篱落胜於邨还径人稀早闭门过眼风花才一瞥到头石笋只双蹲何妨岁恶诗仍好那笑炉空火自存笑咏车斜徵雪事诸君本本又元元

再和

饥年得雪意殊佳天亦终怜田父家是处连云畦宿麦一时积水散空花预占饼饵真堪喜若

比琼瑶未足夸我正坐须来岁麩夜中踏瓮喜无涯

正思覓食遶诸邨咄咄今朝雪塞门屋角空困饥雀噪牀头败絮冻鸱蹲分无醺醪能相熟赖有符贄仅自存堪笑少陵穷不死区区苦欲问黎元

三用韵

雪中饶有百般佳却似绸缪困约家老病自应余菜色风骚犹未合梅花背暄拟向田翁覓面少时闻儿女夸可是年来四不出也随箬簪傍南涯

惭愧长髯市入邨送诗踏冻到衡门未愁顾兔千毫秃持看阳乌三足蹲我亦欲寻安道去人应共怪阿先存界天雪岭依然白更忆当年李仲元

四用韵

寄食於人苦未佳从来逆旅便为家四时长是餅无粟一夜偶然灯有花雪夜又寒谁复料物中惟老不堪夸卷书危坐时相望不觉西南各一涯

五十年前三尺雪匆匆振柁下荆门坐惊荏苒吴枫换长忆轮囷蜀芋蹲覆局还如一日事劫灰能有几人存新诗读罢令人感转瞬看看又岁元

道士号庭梅为赋此

苦把庭梅劣野梅庭梅元自野梅来肯辞台鼎当年贵直向丹田内景开山意浓时还耐看道根孤处更深培玄机参透何分别猛拊阑干一笑回

送张刚甫广德学正

桐川咫尺路平宽华檄春风白髮欢教育兼全三者乐起居频报四时安的传何况自诸老【谓实斋本斋】远业岂徒荣一官从此江东有新句寄来应对暮云看

十一月朔冬至

鲁僖再闰孰为偏五载之终似远然辛亥徒为章首岁上元直在太初年【是年上元甲子朔旦始正周正秦正】未从元凯叩长历且效少陵吟短篇一线闲愁随日长形容空老此江边

钱余好问入燕

炎?渐已转凉颺想见湖亭送别时发切功名初得意聯鑣宾主总能诗昔人犹自荐佳客今日

何忧乏已知最是人生急三釜高堂白髮数归期

和徐容斋正旦

想见新年试笔时风流应不减丘迟归来燕子元相识落尽桃花若未知何事兰亭修禊乐便怀墨客感秋悲湖山胜践无由共禅榻茶烟老鬢丝

和赵景程提举见招

高标照我发星星百尺楼边一寸茎樽自不空如北海客非善饮类公荣四筵惊起闻豪唱五斗教解宿醒何事诗筒来较晚且容汤粥煮榆羹

再用前韵盖座上有九老绣幃

耆英图障烂如星胜似屏风映紫茎洛社便如同此乐商颜未必采其荣戴花刘九徒歌舞当局温公岂醉醒试问诸贤闲得否熙丰一鼎沸於羹

次本斋韵

七十八春华髮老斡旋文鼎力犹堪品题人物多成传管领溪山尽属衙了不安排方是适本无全缺又何惭夸传析国睢阳冠五字新诗落枕函

十月能静饮于海棠花下唐同知适至因言昔在汉中十月海棠亦开用韵

贰车曾上汉中台十月海棠无数开万里相逢曾识面双眇埽净更传杯高情共惜燕支晕归梦还思灞灞堆客去主人应卜夜不妨唤取烛笼来

和除日闻鹊

门前车马气如云鹊噪惊猜意甚驯别岁风光从草草报人消息喜频频当家金印君先得明日椒盘我自亲共乐高堂称寿安舆迎养趣垂龄

送邓善之

尺一俄闻有急徵风云奋迅在南溟正如蜀客怀鉛笔未羨鸿都写石经此事惟须一艮卦今朝顿见两文星帙沟娄畔藏书去人在金坡白玉局

送人赴宜兴教授

催唤沙棠港口船门前龙象耸初筵养亲始愿家良近事道中年志愈坚美俗一新吾礼乐高
贤多羨此山川不妨且为坡翁住却上玉堂陪衆仙

陵阳集卷四

卷五

<集部,别集类,南宋建炎至德佑,牟氏陵阳集>

钦定四库全书

陵阳集卷五

元 牟巘 撰

律诗七言

次韵李千秋中秋

节物诗情总索然漫将梨栗当盘筵堪怜永夜空樽月记取衰翁断酒年十日尚留花影在两
餅便作竹根眠分明破戒缘佳句免使儿童诮禁烟

癸卯人日送李千秋还杭

喜闻晷昼初回棹便拟共公吟过春何事客乡还送客今朝人日更愁人风吹杯面梅花老路
转裙腰草色新只恐西湖留不住重来好为活疲民

失题

篇章何事等嬉游尚想挥毫剪烛秋从古杀青徒自苦只今醉墨可能求忽传鹭立沙头句又
见鸿归天外州襍研去来须猛省不由自己更谁由

岁在丙辰元日立春是时先人守当涂郡斋宾客云集皆用元佑八年东坡和王仲至秦少游
诗故事所谓省事天公厌雨回先人笑曰天公省事今乃多事耶今三十有九年矣追念感慨
小诗聊记当时笑谈之语

忆昨姑溪岁丙辰老仙元日去班春当家句子频催客省事天公却笑人紫凤天涯今已老泥
牛岁首又还新笑谈谁记当时选独立东风倍怆神

和任东津山长

吴兴学法徧诸华吾道元无迹与遐今日谁能【缺】下马古人犹自酌先茶肯开燕豆惊流
俗共喜臯比得当家入手新诗惟重拜颔颔那得并飞霞

和汴教耶律伯明

翩然来自旧京华
历数山河不谓遐
往事已空惟重黍
元谈未了更浇茶
南游句好俄惊座
东道情深未忆家
也欲卫州门外去
一声长啸入烟霞

新城罗氏棣华堂

中和偶向此枝藂
友爱当知吾意同
十世共居尤盛事
一家三代共春风
试看华萼相扶处
正在闺门载翕中
昭谏而来名节伟
更添新记与无穷

寄昌化孙梅泉

挥手秦稽信宿然
未行俄已两周天
云緘尺素惟开后
雪辊双溪恐堕前
高谊谁能似孙宰
旧题应复记苏仙
何时布鞵青鞋去
摘野芎苗古寺边

送季云在学録

横经之暇即吟诗
三载如常匪激随
听雨不知官独冷
看云自与意俱迟
翬飞黉宇生新敬
鹄立儒衣动去思
还恐西湖难久滞
此声梁楚已先驰

次韵九日寄史推

弁有山兮水有湄
登临舍此复何之
髮疎帽脱狂嘲後
鴈过江涵感慨时
盛府主宾俱好事
满城风雨苦吟诗
人生自可行乐耳
剑首功名但一吹

次韵寄史彦明

等闲看尽弁衡毗
旁郡聊从捧檄驰
候管乍披新定志
邮筒忽见故人诗
君方清絶行明镜
我正催颓据槁枝
为喜彩衣还膝下
椒舂趣得颂花时

答朱芑林见寄

天目羣仙帝所毗
别来引领但神驰
分明输与芑山老
活脱吟成玉局诗
论旧惊心几甲子
扶羸笑覓一筇枝
如公再合幡然起
勿恋春先笋蕨肥

次韵李侯喜雨

谁似当年召信臣
天教来此活疲民
水乡怕旱相传古
甘澍随车总是春
坐看丰登成乐岁
只将恺悌对明神
已闻宣布形歌咏
宾主殷勤用意新

谢李侯枉过

鸣驄穷巷忽相过其柰将迎窘步何每望故都身不羽欲赓新句砚空磨
籃輿端复为公出泥饮唯应说尹多却是旁观工指点若为公锦杂渔蓑

长儿授馆於杭每休暇过仲实家相与谭经析理间则饮酒赋诗为乐今闰秋十四日会於复轩相视而笑曰好天凉月即中秋况今岁两中秋乎乃留饮剧论夜参半蝉聯不休情愈郁穆予闻之甚喜因为诗寄之

共饮方酣月满楼剧谈无寐露侵袭此宵此景应难值吾婿吾儿亦罕俦
情谊浑如同一姓风流不负两中秋絶怜老子婆娑甚破戒何当大白浮

和陈无逸木屋

秋旻金气正高张并作西风一夜凉何处杯中无白堕如今扇底有黄香
自慙老枿如犀秃却笑春花为蝶狂胜赏清吟两奇絶吴山横过即仙鄉

和仲实秋兴

金飈吹暑顿然清闻早空庭一叶惊挂颊偏宜对朝爽挥毫正好赋秋声
镜中髯短休烦镊壁上弦闲不受繁志士由来多慷慨何如百啭听鶯鸣

黄元静饮客蒲莲海中殊胜絶

扁舟径入芙渠国一笑俱非襜褕人低拂柳阴偏障暑活烹芡觥快尝新
小巾脱去我先醉大杓取来渠更真啜醑数觥诗兴发羡君越漾老精神

次姚子敬简高司丞

西风小立对晴川冷笑人间目圣颠使事端因荔枝出归期休在菊花前
平生漫说少陵老终日谁陪上界仙应是杜中鸥与鹭诗情比旧更依然

王梅泉生日惠诗次韵答之

堪笑衰翁作计狂又随笭箠到鱼梁未秋早觉凋蒲柳已老安能种豫章
谁似读骚仍饮酒有时赞易自焚香梅边有约君应记但愧年来久覆觥

白贲

致饰虽云贲则亨含章内照乃为真离明外附天光发艮止中存道体纯玉质未雕虹贯日素功後绘物生春也应笑我元犹白不比羔羊正直人

次韵

大海相环宛一洲浮沕乍起已千秋三壬笑向人间世四癸时寻物外游我辈安能知许事平生未若乐斯丘开窗翠竹时相对更说诸余总谬悠

送程晋辅长和靖

传家气脉固深长挟策来登和靖堂南渡金声元不泯西庵草色可能荒要知持守为涵养好把精微重发扬共喜慈帏得甘旨他时远到未渠央

赵君宝宣慰别三十五年矣未由再晤近张倩仲实转似西湖诗图乃知吟啸湖山之乐辄为五诗奉答

南屏环拥翠云堆谁遣精庐特地开祭酒先生甘隐遯燃藜太乙忽飞来胸中礪礪五千卷门外芙蕖十万栽白日竟抛妻子去羣仙携手上瑶台【右南屏书院】

橘园亭畔市多尘麴院桥边境转清山色湖光精舍敞笔牀茶竈钓船轻柰何一字不堪煮且与三贤相竝行笑问壽藏何早计不妨更学赵台卿【右西湖书院】

毅斋大老除【缺】名节尤偏无所尊曾是胪传第一唱却留衣付外诸孙挹掇柳汁初承渥称泛霞觞共拜恩尚记吾家多夙契何当握手得重论【右郑夫人传】

伯子尧夫豪杰人四时佳致四时春静能观动一机活会复乘元千古淳造物生生还化化世情故故又新新不妨长向亭中醉自觉冲融气味真【右四时春】

平生知旧一李友别後长关白板扉偶有客来孤鹤起也无人觉小舟归尽渠俗子频相恼只恐仙禽未肯飞莫笑?琴并煮鹤醉眠林下两忘机【右小舟归】

孤鴈

如何苦作断腸声度尽关山失弟兄万里他鄉谁是伴单栖半夜若为情嚶嚶每叹衆人薄落落孤将一意行只恐影沉湘水後更无来者继高名

赠陈东洲

散髮披襟颇自由野麋见客忽惊投新诗生怕将愁至博学何妨与艺游未说天边金弹子试

寻城外土馒头不然且学伯伦醉荷插相随死便休

题陆起潜皆山楼

醉翁朝暮四时景谁遣描摹入此图唤作皆山真个是携来到处与之俱也曾佳客相陪否亦有清泉可酿无更喜一般僧侣旧高楼百尺俯尘区

送屠存博教授溧水

直道方心古所难任渠俗眼笑儒冠子龙有屋犹黄壤老郑无毡漫冷官一片湖光清客署三州鼎足屹书坛只应翠绿迎人意岁月功名正好看

送鄣南俞教谕

试把溪堂旧谱看三千苜蓿守酸寒吟肩祇自初来瘦?尾方知细满难忧患可能期学力功名终不误儒冠到家莫作多时住趣取秋风送羽翰

絕句五言

贾节庵冒夏暑越修涂过我茗雪情谊甚厚令闻古式无思大节不可复见而骨肉消息访问难真相对殆感慨不能为怀青灯夜语诵少陵夜阑更秉烛相对如梦寐之句意甚惘然其归也儿曹以此为韵赋诗道别余亦作焉衰老拙恶姑写我怀且以卜後期云尔

君留剑水浔我卧弁峰下十书九不到思君无日夜一朝忽在眼喜极生悲酸老泪如撒菽泪尽气亦阑事故不可料柯烂碁局更两家骨肉内往往隔死生英英君令弟介烈夙所秉就死得处所我意复何恨吾女去二穉何处吞声哭忠孝果何辜神理谅未烛君能为置後此意不可忘嶢嶢峙头骨正好玉其相自言勤教督灯火与之对泉明定不孤门户期汝大我为饥寒困坐遣恩义疎君固不忘我我愧当何如连宵接软语共说梦中梦聚行时未多归驂忽已动别饥别尤苦辗转那得寐後会倘可期握手三致意

拂菻天马图

赤手谢衔轡踏蹴翻九衢健哉此女子果胜大丈夫

和渔具十絕

买得五浮舟江湖落我手呼儿下笥去此事渠能了【舟】卧吹月明里龙吟鼉打鼓别是一家风荻花摆头舞【笛】披时响萧骚卧处堆偃仄傲然烟雨中安知有睢泽【蓑】轻圆兀其颠不受暑雨厄时将篷外挂旋转卷七泽【笠】裊裊不自持何以制沈疴聊悬一鲂饵鲸

鱸未可狎【竿】彼已苦其密此犹患其疎欢呼试新罔一举双白鱼【网】荧荧枯?中急雪洒不?西风明日晴双花为依结【灯】呼风忙趁鱼一片如掌大且等後船来过船犹早在【帆】登登远还合声从何处起鱼走潜深波祸在深波里【榔】即此是庾水醉棹舞波面何似宫亭湖为我覓如愿【楫】

赠薛东湖

抱疴蓬庐下白日背我驰我生已如此天命复奚疑悠哉东湖水不迎亦不随相对澹无谈可以乐我饥希年初度老友王希宣扁舟远访夙谊甚厚贐以十诗实用渊明采菊东篱下语五章云每岁思亲不持竿蓼莪几欲废诗雅盖深知予心者读之凄然辄尔和韵

行年似啓期顔发日夜改此身尚我累橡栗时自采古人歌既醉其中有五福如何憔悴者忍饮但餐菊有酒巾可漉无酒榼自空但怀停云友相望各西东九日把壽酒时节无差池我生秋已老菊荒而崩篱扁舟过寂寞十诗继骚雅定是王弘孙犹记南山下渊明六十三我已多数秋未死亦偶然神仙殊谬悠平生遇初度何曾具盘筵感君知我意老泪更潸然人生百年内荣华仅少选何似鷄黍约岁晚长相见怜彼武昌柳摇落向江潭虚名竟何益北斗与箕南渊明咏三士讲学马队间斯道幸不广石高媲庐山

溪边钓船

莫出前溪去随宜下钓钩风波苦不恶鲈鳊满船头

方竹杖

此君久不见岁晚伴华颠直节要到底勿论方与圆

题束季博山园二十韵

是谁按蓝染千条万条碧我欲问东风东风澹无迹【垂柳】轮囷肖天巧沾?含雨意惟应野老知此是丰年瑞【瑞雪】云卧不禁冷误把岩扃触翻动若木枝红光被空曲【东壑】落落金弹丸飞鸟不敢下卢橘不到吴杨梅同过夏【枇杷坞】

行行西崦西暝色苍然入芸芸各归根我亦坐内息【西崦】緑醅春灩灩緑水烟渺渺百年散诞内空以愁自绕【緑绕】倚阑发长啸援笔记旧游想见同来者俱非第二流【第一溪】

桃源逃不彻真境宛在目要令千载下知有古风俗【桃源】泉脉十字过石廉千里通汲来聊煮茗风味故应同【小谷帘】

青青南涧芹雪消春已动如闻修废筑岩半发流湏【南涧】穷鳞无处避网罟如云密悠然
钓台畔袖手看落日【钓台】神仙好狡狴空飞万里行石桥小如许铁杖响彭铿【石桥】
扪萝上复上未省所历高忽与归鸿值万里一羽毛【山亭】冷石眠夏天冰室透毛骨所以
安乐窝大暑苦不出【安乐窝】

澄然蓄清浏百尺往往深不放寒沍发可以观我心【寒湫】此处若为关自来还自去中有
无心人不妨相伴住【云关】都将千石危化作一林雪尽日无别香五月何曾热【蓍卜林
】

幽人读书处皎皎霜月烂香影不可掇高花在岩畔【梅岩】别来五百岁於焉驻飈馭吴市
梅子真解后亦神遇【聚仙】好着在眼前世上少人觉留此妙不传付与神仙着【奕仙】

张敞画眉图

眉妩臣罪小君王一笑休明日章台路便面越风流

相如抚琴

不负百年心琴中托意深如何浑忘却犹费白头吟

猿鹿图

野鹿正周张猿投两臂长由基方逞巧何似总相忘

胡孙图

山果包已尽充然两颡中雄雌自相命槲叶老秋风

陵阳集卷五

卷六

钦定四库全书

陵阳集卷六

元 牟巘 撰

絕句七言

已巳秋七月不雨人心焦然乃戊午斋宿致城隍清源渠渡龙君陂山五神于州宅以祷始至雨洗尘自是间微雨辄随止旱气转深苗且就槁要神弗获某忧惧不知所出越癸亥日亭午率郡僚吏申祷於庭未移顷雨大摯旄旆呼舞皆曰神之赐也某既拜祝又明日以神归念无为神报者乃作送神之诗七章以侈神功且又以祈焉

休休早稻已焦卷晚稻摇风更可怜
枯尽百源无一滴老龙何处卷云眠

几度看云眼欲穿不应气数总关天
去年兵又今年旱守也於民自寡缘

五神萃止足精神迅发风霆一欠伸
能事莫嫌相迫促门前多少望霓人

老火犹骄气蘊隆炉香爇罢日方中
片云忽卷天河落顷刻难名造化功

神佑恭惟及物深中间感应妙精勤
要知应处还为感终始惟当秉一心

眼前物意颇昭苏未省郊原遍也无
更覓洗车三日雨普教大地活焦枯

龙輶欲驾已多时父老遮留一日迟
秋菊寒泉何以报精勤更写送神诗

都梁北乡士多好学有向君敏衡者一日访予语甚质气甚夷礼甚度予心异之间为予言曰家故沅徙也今所居有谿实自沅来乃筑室聚书其上以教子弟因以沅溪书舍名之而其亭则曰无加盖其地旧号无加庄以其东止於石西止於?南止於路北止於泉也愿有以发之予既为籀右书二顔而向君复以所谓廉崖者谥予予闻此石杰立千尺实峭厉峻削可敬可仰有类乎廉者颇思一至其处摩挲此石以激衰懦而未能也乃各为一解以谢焉

书满精庐芷绕门门前流水出於沅夫君自得濂溪意直向沅沅认本原【周子寓匡庐号濂溪右沅溪书舍者本春陵故居也】

无加之义复何如解尽当年太极图【朱子曰太极者犹曰举天下之至极无以如此云尔】

八面四方都恰匝更於止善用工夫【右无加亭】

廉崖千仞孰能干一见令人毛发寒可以人而不如石我当为石共衣冠【右廉崖】

予方卧病税院刘君以画梅坚索诗口占遣之

今年四野赤如赭安有吟情到此花何况病夫空百妄只於真实认根芽

题德范弟三香图

水仙侑食老逋家更着江南小白花三雅如渠好兄弟衆芳未许以肩差

次韵洪帅喜雨

礮车亭午作云头喜雨亭前黍稌秋但得人间瓠窠满等闲万虑一时收

感孚妙处捷风雷造化於人岂远哉见说商霖一尺字向前车马待公来

游高园用前韵

蝉声紧唤客回头依约疎僚去後秋不是先生新句子一川云锦费勾收

尽渠弦索辊春雷相对清风君子哉凉观主人归未得不妨却许蜀人来

和本斋止酒

白家老瓦惯从游和气如春不汝邮近日更谁嫌外酒梦成燥吻吸青丘

羹渠痛饮日亡何一石如髡亦未多麴米春浓禁不撤酒肠笑我本无它

闻公久矣空诸妄止酒真成一事无旧说蜜殊惟饮蜜不妨试候小风鱸

生憎市酒赤如霞难效当年老阿嘉一任花前杀风景破除旧赐小龙茶

酒名真一妙形容方法传来玉局翁摇动天关出琼液澄然不比小槽红

病余井臼不任劳欲饮无钱可是高一笑犹堪谁空腹少陵诗里学焦糟

送程茂叔

天涯忽送非常喜阿团斑衣郎罢前话尽青灯十年事牀头周易故依然
真成有子万事足何况人生七十稀莫道梅花遮五岭头轻月朗去如飞
赠罗竹山术者

此君乃肯与人事辩舌生风有竹山何似竹林惟痛饮嗒然臧否两相闲
鱼须翠碧都抛却重糴今居卜隐中门外有来能握粟为渠满意说年丰
韡纹纸帐稻畦衲榻拙地鑪煨芋供此是人间真富贵莫将轻易许渠依
和陈无逸中秋风雨

身似浮槎何足绊家同堕甌不须看枉裁白髮三千丈可柰青泥八百盘
病攻我剧声摩垒月避人深目眯糠一盏浊醪如许障诸余不容苦思量
钱高仁卿农丞奉使还北

常平旧法最为良颇记中丞耿壽昌此意推行在人耳肯教丰歉制低昂
好农使者惯经常归路西风水国凉但使人皆歌美稷故应此即是甘棠
别来五度见重阳草草宾朋共此觴听得酒边新句子可人风味故难忘
装轻路稳好兼程还向鵷班侣雋英自叶流根谁识此老农摩腹送余生
舜举水仙梅五絕

横出一枝谁与并整青葱佩立多时窗明几净好风日移向此中渠不知
檀晕金杯两擅奇晚风并作一香吹此中毕竟同还别付与司南鼻孔知
雪碗冰瓯荐茗时萧然相与对幽姿一生肝胆何由俗时有清风披拂之
当代涪翁有素评此花雅合唤梅兄玉宸殿上重差次可是诗人许与轻
老逋久共梅同住好事谁令侑酒仙变化侯王等闲耳不堪持到影香前

舜举马

常得奚官剪拂齐也思骧首一长嘶好随便面章台去柳色如烟路不泥

秋江晚渡图

晚来江上鲤鱼风十里青山一望中自是欲归人意急等闲付与济川功

梦会图并叙

赵尧卿尝梦东坡野服乘驴访之顾室中书史环列喜曰天下之乐无以加此他日又梦问以水仙王事即答以茫昧语尧卿与斜川游稔而是时方补注坡诗故心诚所感如此今翰林张周卿所记澄照德公之事人皆以为异余谓东坡之精神无往不在而平生喜佛言句流布中土历劫不磨岂非澄照素知向慕虽乱离奔走结习未忘有以得之欤一以诗一以禅所趋虽不同而所感未始不同也乐广以形神不接而梦为因东坡为之说曰心依尘而有梦梦觉之间尘尘相授数传之後失其本矣岂非因乎信斯言也二会之梦东坡必他有所因使因东坡则数传之後不当复为东坡故窃有疑於其说然澄照梦公时年六十有一而其壽至一百有十四则倍壽之语亦几矣正甫御史视澄照为同姓是宜保其图而登其壽二小诗附下方

觉来犹记旧仪型趺坐无言月满庭毕竟是因还是想不妨重举梦斋铭

洛僧加满九十五也向香山画作图况是东坡曾嘱付壽年多似手中珠

题戚子云五云图

一从鳌去波翻海梦断蓬莱不可寻当日五云依约处有人掩卷自微吟

金南峰隐居图

高哉千丈屹南端路入层云欲到难试看幼舆岩石里人间争似画图看

身在山中不见山却因远看更孱颜煌煌三秀如堪采拂石眠云未忍还

四安道中所见

苍凉初日破林霏几度言归今得归兀兀篮舆续残梦门前儿女挽人衣

分明路入茶山去唤起昏昏嗜睡翁共笑翁来已差晚珍芽秀甲老秋风

一溪百折渡复渡寻日如行纠篆中自叹劳生欲飞去琴高借我赤鯀公
何事区区外谋光五浆先馈岂其当尽渠争炀仍争席物我而今已两忘
生怕秋虫稻把稀腰鎌争出傍晴辉尻高首下泥中鹤啄得黄云尽始归
狭路倾欹下涧隈归牛忽带夕阳来狂遮瞪视浑无奈凭仗谁人拽鼻回
纷惹多岐意转猜若为误向此中来平生不作穷途叹途若穷时一笑回
依约茅茨傍翠微炊烟孤起半开扉早禾趁日连枷闹老菜争风拍板飞

木瓜已过折山来黄帕封林未敢开想见白沙红照里绣纹冷落见奇瑰【木瓜园入折山数
里供进後方敢卖土人取瓜埋其半於沙中以纸镂花贴上以溪水洒之日晒乃红】

千颗丰融怕日侵楮生调护贵於金直须待折囊封了方见冰霜一片心
薄酒三盃醉不成雨敲疎瓦见分明破衾判作空堦滴滴到乾时也解晴
听得荒鷄第一鸣吹灯发火饭初成衣囊减尽浑无袂又是萧萧带雨行
崎岖踏破布行纒负米担盐似蚁缘为美生涯随处足五湖鲑菜范公船
人向长安渡口归长安不见但云霏只应白鹭曾相识船到前头更不飞
可是茅冈太无赖苦要钱足刺船行却闻官路相将近便觉山舆陡顿轻
千山过尽又行脚惭愧道人看客勤裹得白云欲相赠一瓯茶复白於云
斧斤不贷老根株素节苍皮委路隅忆昨此中逃午暑前知愧不及尧夫
落落长松不许年轮困扳斡欲参天流肪已化为神物枉损苍鳞亦可怜
姑溪小队带薰风笳鼓懽迎鹤发翁三十九年成一梦几多陈迹泪痕中
每羡向平婚嫁了恣游五岳可曾回也应未断尘缘在依旧挑包入浙来
支离病骨倦泥行拟向蓬窗睡到明绕鬓秋蚊故相恼更求底物是亲情

亭亭明月无人伴一意孤行天地间怜我扁舟连夜发肯分清影到苍湾
中秋有约竟须归未到家时月已随不合尽情看到晓今宵杀漫雨垂垂
儿能忍渴留佳醞我亦开包得快梨自笑初无泥可洗颓然还得醉如泥
归途拟向城中去论旧翻惊人已非怅望敬亭烟雨外平生漫说谢元晖
题罗御史诗

諫草诗篇好护持又吟蜀井竹西诗携将高节堂前去题作云旧也更奇
丘咏涯

圣道洋洋陋百家就其浅矣咏其涯直须辨取槎乘去未许当年海若夸
月轩

坐叹冰轮吐复吞长风忽为拂霾昏褰开万里无纖翳到处人家月满轩
题择庵云山图

老圆画里也藏机云抹前山冻不飞寸许塔尖何处市扁舟腊日访僧归
约家性存

春风小语记怀岷二十年中臂屈伸白髮遗民几人在重来老鹤更精神
萧条今尚有谁来老尽荒庭一树梅多谢高情肯相过冲寒自起扫苍苔
送李际可婺源学録

说看琼台气塞胸天教有子慰孤忠春秋为喜一经在兄弟谁知异姓同
乃祖当年洗日功特书赖有紫阳翁此邦况是渊源地好玩遗编振绪风
羯鼓图

春光一曲透霓屏红锦綳中养不廷谁道青峰白雨点开元宰相也渠听

山矾图

玉殿何劳定等差弟兄俱是老涪家季方也与新名字免得人呼作場花

赠东臯讲师

飞锡曾闻五台去云间瑞相是耶非峨眉清现更奇絶万里白头吾未归

东臯何事字无功讲罢应知万法空时枕苕溪作归梦临平一路藕花风

送戚性传

睢阳书院戚先生纶也名孙侍从臣文物相传今几叶又开讲席淑来人

送萧之刚

旬宣幕府得君重直到千峰尽处回闻道棠阴【阙】

倦书图

日长偏困校讐人袖手旁观亦欠伸一觉黑甜酣午枕絶怜识字苦劳神

谁道春酣雨不禁蒙笼眼色透云屏着人花气深於雾却是三郎睡未醒

题高丽字迹

片纸殷勤赠跋篇来从箕子旧朝鲜六经原不经秦火好为刊传惠後贤

毗山之居不皆竹也而其所尚友独在竹遂擅此山予观野纵横陈荆扉半启小舟划柳下不觉欣然呼渡径入万竹烟霏中山灵颇怪俗客何自来耶因留诗云

指点山居向那边闭门花木养风烟隣人不饌苍玉束一一而今欲造天

山人犹未出山时风月云烟总为诗笑问年来间何濶此盟应有此君知

右军书裙帖

?将墨妙写烟云晓起惊呼失素裙尽洗当年羞澁态从今不比旧羊欣

题四画

天气融和冻已开桃花浪暖亦佳哉人生办取东南尉底用一双鸂鶒来

多情宛颈两鸳鸯贪趁湖心错褰香散发幽人休荡桨夜深花露湿衣裳

金鸂争放木夫容蘸影清波分外红玉立前庭一公子丰标不与俗人同

积雪凝寒不肯融梅花伫立待春风嫩波正比鸭头绿厚叶休嗤鹤顶红

南岳魏监庙曩自请奉祠恬於声利十余年来益闭户读易人罕识之余托婣且契比来吴惠教五絶笃叙故旧情谊蔼然用韵复寄不足酬盛意

人生一世匆匆尔筵帙亡何已旅酬南岳鑪头芋初熟等闲知閱几春秋

谁知白鹤早登门遗墨犹余屋漏痕师友百年同慧脉固应自有不云存

全真闭户魏不琢二纪怡然外世荣留得诗名皮陆集到君句法有余清

阿囷离鸾嗟嘱耳谁陪老妇祭餠盆二雏幸足寬怀抱共说河汾有外孙

静探五一共谁论悔不当初迺扣门自笑吾元今尙白刻舟空守旧时痕

三禽

何处飞来把修竹数声圆活梦还惊雨鸠那解知人意寂寞梨花雨又晴

风里空余碧玉柯离离秋子不胜多莫教却向人间语金井银牀愁奈何

送恩上人还云门

当日亲曾见珙公如雷辨舌振宗风分明句句字字是又向苕川访病翁

澈师何处覓遗踪坐听云门寺里钟正自年来苦行脚个中元自有千峰

挽诗

挽杨知府

蜀有古爱直公为令子孙驻原曾婉画治狱辄平反槁落荣观尽纡徐雅道存灵光洞劫火德
齿晚弥尊肮脏羣飞外康强七袞余耆年犹谨礼细字每抄书十载甘琳馆三州奉板舆挂冠
天木可双犊老康庐见说佳眠食遗身疾自无方期操几杖俄已易牀肤久读耆旧传仍联嫁
娶图湘岑望不到洒泪向天隅

挽师叔理

卓尔见成鑠超然惊絶尘形骸脱边幅肝膈炯精神正自关天分应难语俗人谁收身後藁隽
逸更清新已饱忧患味方收翰墨勲龙飞新进士猿臂老将军千里推车轴羣工愧斧斤天平
如有意更为续斯文四海东坡老平生秦太虚神游已冥漠坐念更歔歔手墨看犹湿心期炯
未疎堪怜畴昔语腹痛勿驱车

挽赵春谷

墮地追风驥垂天驾海鹏嗟哉中道止藉甚到今称几士待举火一生甘饮水居然使跼壽念
此拂人膺子美转同谷灵均怀此都修名千载短多难一臣孤天意终难料心期自不渝西风
吹更急萧索间泉途北弁方胥会西崦遽莫追津梁摩诘病台沼雍门悲鹤有还家梦乌无反
哺期泂冈松檟近足慰九原思

挽孙太监

埋玉愁闻薤露歌向来耆艾日消磨平生所至棠阴在晚岁其如麦秀何洛社竟虚同甲会监
湖应改旧时波四春手植烦调护万感今犹忆烂柯

挽陈本斋尚书

在昔实斋老公能继盛名平生守师说晚岁萃儒荣禋赦原兵祸台纲忤物情抽身甬东去腾
上几公卿天俾公多壽人知道不孤超然一室内不与万波俱甲子新诗藁烝尝旧布襦何妨
传遗老文字照龟趺

挽王厚斋尚书

清要三朝望文章一世荣掌纶夸独直荷橐表羣英石室资殫洽金华赖阐明孤臣伤暮景风
雨自鷄鸣开庆言容悦咸淳奏直前每逢时宰怒自保哲人全垂世三千卷归田二十年汾亭
有遗操独拍泪潸然文献遗诸老风霜鲁殿余斯人不可赎吾道意何如永念年家好曾联选
部居无繇陪缟送东望泪沾裾

挽陈本斋尚书【补遗一首】

有意超尘俗无心爱夕晖劝餐惟屡却持壁竟全归得正复奚憾偷生良所非传家孙子盛端不坠前徽

挽成弢峯

轻举游帷宅高辞神武门赐湖分老监遗笏付诸孙玉映神尤朗丹成道自真只应弢顶月万里照仙魂吾叔联姻好当年记汉嘉回头一甲子遗恨满天涯尚喜长庚老俄闻大耋嗟区区论畴昔何处挹蜚霞

挽赵止善

自处若素士不知为贵游多闻每是正寡欲更清修方借望郎重已深宗国忧嗟哉事竟尔乔木委林丘昔日三株树雕容顿可惊一癯危独坐多难失孤撑官舍煎茶梦天涯裹饭情无由送车後擦泪愧平生

挽亲家孟从吾

东野哭其子难存百感身孤孙犹在抱行路亦沾巾满目家园树何时泪叶春诸生为执紼良足化乡人

挽岳君举

五十余年事都将作梦看早方磨铁砚老遂葬桐棺蚁结途方戒驹驰岁已阑山前一片石读者为悲酸

挽姚景春

昔在仙都世人称善士门丘山叹华屋风雨长孤根鹤瘦空余影鸿冥更断 植斋书万卷喜有外孙存

挽赵碧兰母刘氏

苗裔真王後仪型老监同庭惟参玉树气未感秋蓬衣制先期具舟藏半夜空故应芳懿在位刻贲幽宫

挽张师道

少日追杨晏由来间气鍾两科无近比万里有奇逢正喜鳌扉重俄惊鹏舍凶輶车方远税已见若堂封在昔台州守先人事分多通家能记忆上冢每来过老我病未死送君情奈何贤哉

幸有子健翮看云摩

挽唐学宾

奕世诗书味端知积庆长於人不畦畛为世作津梁肯助鲁修泮能令齐发棠阴功天所相食
报在诸郎

陵阳集卷六

卷七

钦定四库全书

陵阳集卷七

元 牟巘 撰

杂着

乔木亭铭并序

晋国王公佑手植三槐於庭虽不作王溥官职而其子文正公旦为名宰相孙懿敏公素为名谏官名将帅曾孙巩苏文忠公为记三槐堂称其好学而文以世其家又为作懿敏真赞发明故国世臣之义以为世臣者其勲烈以着於时德望以服乎人譬之乔木封殖之勤养自拱把以至合抱非一日之故其论懿敏公之父祖子孙盖足以当之予倩张模字仲实循王五世孙追维前烈宝其旧物近又复乔木之亭取苏文忠公所称王巩定国者以铭其亭曰

循王甲第吴山之麓勤身事国虬螭刀?而不妄杀一念纯熟三十年间种木绕屋厥木惟乔异彼朴樛爰自芽蘖以长以育以至拱把合抱连幅忠根义干积善渗漉其阴数亩万世之福我思其人犹爱其木曾是比隣弗戒樵牧仅逃斤斧容惨神辱维时闻孙有恻心目赎之以归天实从欲泛埽其庭云涨新绿媲美王氏三槐鼎足日有清辉如曦膏沐风有清音如韵琴筑可娛其亲可庇其族我诵角弓封殖是祝自今伊始公侯必复万叶子孙并受戩谷

俞好问摘西铭玉成二字揭之座右俾其子若孙因名思义克遂有成

天地之心生於万物其生维何凝沍摧剥兼葭苍苍受变乃成霜露既杀而况在人贫贱忧戚是为福泽德慧术知是为灾疾增益不能空乏其身於维此意未或不仁父母於子夫岂不爱厥既爱之曷骄以败恩之过甚如饱则伤所以古人教必义方旨哉西铭造化全体惟好问父以训其子他山之石攻玉之工物有相假始就厥功彼粗而厉此温而密宛其成矣错落圭璧如琢如磨君子自修既恂且栗镌发孔周匪玉其美伊石其力生成之德

陈玉岩真赞

尔巾犹古尔鬓未斑画前有易胸次不凡早岁塲屋略取二三一旦弃去隐几穷探时乎神游双溪之间亦有负苓相与往还怨而无极肯露机缄山空月朗虹贯岩盘

周公谨赞

儒而俠其非欤?而隱其几欤違俗而聾牙玩世而滑稽欤吾亦不自知或隱几着書或狂歌醉墨是殆見吾衡氣機也將求之北山之北忽在乎西湖之西然已見囿於筆墨矣儼幅巾而杖藜

謝竹所歲寒圖

我觀在昔交道實難風雪凌芳衆卉日殫睠乃三友媚於歲寒松勁梅清綢繆相歡竹亦欣然枝舉葉攢如相告語晚節是完復有石交竦立嶠嶢三而四之愈久能看允矣謝子取友必端顧彼市道慨其永嘆設圖燕坐銘詩載刊勿渝此盟以鑒以觀

學古齋箴并序

吾婿張仲實好學者也嘗即其家教授生徒着籍頗衆束修以養意甚樂而尤與吾鄉鄧善之相友善其之江陰也善之實繼為之今所謂學古齋者蓋是其處善之比有遠役此齋復歸張氏程則去蘇實來德孺子箴未始不同也事彌似其年仲實方念自弛使函漑埽老屋數椽環以華竹日挾二子開卷其間唔咿聲徹戶外鏘如鸞鵲學子欣然乃皆來集如其初講肄之暇俯仰千載嘯歌一室自樂其樂書來頗有驕婦翁意余欲扁舟自致以同其樂而未能也夫世有古今學無古今一人已之分霄壤懸絕此乃聖師吃緊為人語然施之教學之室則几若教人者之為為人而為己者之私為己予疑焉仲實曰今將使教者以為己之心為人學者以為人之心為己若何余曰然何教非學何今非古則為之箴曰

今人與居戢戢同宇古往之宙庶越而語匪好曷求匪執曷御是以君子惟古是慕學古之齋不過環堵我友寓之子去我處窗明几淨研席有所爰命二子密侍巾屨亦有來學五合六聚魚雅童貫其進以序執業呻畢豈不夙莫其教伊何吾行必與非以為己成人之故雖我有余不爾閉拒大匠自治為世規矩其學伊何反躬內顧非以為人成己是務自足于己不外馳騁舍己而耘何有黍稌惟學惟教惟忠惟恕古人皆然今人則否絕今不為是謂學古咨爾學者目击心悟亦惟敬哉我仲實甫

漁父聽琴圖

出緇帷坐杏壇環弟子而琴穆然深思蓋托之文王想見其人漁者何為下船而來持頤以听既以仁稱夫子猶嘆其苦心勞形而欲語之以所謂真者豈以文王之操其有忧患之心乎故其离世遠害甘終身以隱淪然自居以知道未有真而不仁者也曾余論之未竟悵莫駐於欸音

有翅天馬圖

何年尘鏡昏乍洗金背涌出狀怪詭自古空言馬生角今乃見馬生兩翅恐是渥洼種往往感龍氣龍惟神飛行天若傳兩翅何足貴想似穆天子會瑤池肉多身重不得飛一朝乘之逍遙

出六合奔风轶电那容追万里一息日未旰当时从官无乃疲或云车辙马迹往往有如此安用彼翅为徒留诞谲诳後世我愿观者更勿疑我闻西王母参目而虎首物以类应固宜尔

石上道士閱经图

石盘盘可容膝山竹亚籬烟直捐尔书捐尔笔嗒然坐自纳息【缺】

昔朱桃椎见高士廉瞪视而其意竟莫传言固不若不言之全吾终日言而未尝言亦不自知其所以然是语是无以问月川

张季宜像

貌古貌巾凡巾孰知其满腹下笔如神盖昔之勇冠军而今之老斲轮也可为中国之式席上之珍然且弗屑方超然企涪翁而浥元真

画竹

临风永啸剑戟相摩大节凜然正而不阿

玉立娟娟现清浄身匪雨之力本无垢尘

维翠琅玕高拂晴空朝采之发有若长虹

枝叶清润发此华滋蒙雾之力而不自知

孟集虚像

黄冠野服翛然於大涤天柱无何有之滨吾与之虚而委蛇其虚缘而葆真者欤

四虎图

藜藿不采林有伏猛其何一日朝无骨鯁

惊雷游雪赴此渴吻下瞰清泚有文其炳

顾视有威岩下之电不疾而速风行草偃

画梅

清香袭人无处可着起视天宇参横月落

老逋之诗逃禅之笔洞其玉屑忽在吾侧

画猫

剪红以聘文炳如虎鼠辈疾走莫予敢侮

放鹤图

放鹤兮林臯澹容与兮萧骚欻素风而孤矫兮舞空中之落毛翁在南山南北山北兮羌欲往而从之翱翁曷为自还兮波粼粼而送轳轳鹤如迎兮乃下翱婉欲止兮锵鸣漱噫吾与汝兮犹未离乎天弢数数然肆可迹兮宇宙虽大将焉逃吾曾不得夫白鸥兮以为曹吾何意兮客之适与遭吾气以为馭盖未尝去来兮彼延竚祇徒劳日暮客去但见鹤啄乎空庭兮首下而尻高我亦嗒然而忘吾兮眇天地其秋毫

故驾部郎中扞膝先生喻公赞并序

唐时喻鳧天宝末从驾狩蜀尝为陵州守卒官遂家焉蜀之有喻从此始其俗益蕃大与牟氏世通婚姻如古朱陈人以为美谈扞膝讳汝砺汝舟则其季也无闷翁讳炜然皆有文集传於世越自属难先父存斋公与舅氏名绳先後出蜀舅氏寓太湖之西山盖隐於橘诸子亦能自树立不替家声昔陶潜尝作外祖孟嘉传某窃不自揆援此比为扞膝翁赞当求名笔书而刻之俾後有考焉外诸孙牟某赞

蜀有遗直陵阳喻公靖康之末驾部郎中惟国与主已所愿忠阳九百六厄运适逢两宫北狩外沮内讧金虏伪首议易宋宗我之百官若盲若聋以次署议屏息厥恭贼臣邦昌何等妄庸僭干天位自取其凶公于是时义愤填胸吾膝虽弱与铁石同誓不少屈以仕楚宫掷笔竟去矫如惊鸿扞膝之令走卒儿童不肯帝秦自以为功呜呼鲁连万夫之雄惟吾扞膝异代同风国有生气炎绍再隆揭节谕蜀公来自东一有不合归卧藁蓬信意为文大篇春容时乎自写纸上横纵奇奇怪怪龙蛇之踪而其英烈冲斗贯虹奕叶诗书至无闷翁惟我祖母庆善夤锺越至吾母信安肇封謨焉小子敢昧所从爰述斯赞传示无穷

赞缪淡圃之祖四训

缪淡圃以其祖中斋君遗训四言者求予言衆俱备乃申述其意以复焉

积善曰 有所为而为善必不力能真积力万善身一持忍曰
惟不忍於人乃能忍於己忍者义所为忍过事堪喜

勤俭曰 勤俭必起家更有为己学进修贵自勉敛退贵自约

安分曰 人生已分事犹恐不得尽鸡豚认隣栅母乃非吾分
虽然所以行之者一敬而已矣祖训孔昭淡圃其懋敬之

陵阳集卷七

卷八

钦定四库全书

陵阳集卷八

元 牟巘 撰

奏劄

咸淳辛未十二月初一日转对劄子

臣一介疎贱误玷周行每窃惟念自先臣子才以来世受国恩至深至厚涓埃未报日惧空官兹者皇帝陛下视朔前殿诸门洞开旦气清明而臣以此时猥当转对天光所临其敢具文以塞故事臣尝伏读国史窃观元佑三年五月一日苏轼转对条陈三事其一条曰唐太宗司门令式云其有无门籍人有急奏者皆令监门与仗家引奏不许关碍祖宗之制自两省两制近臣六曹等监长贰有所欲言及典大藩镇奉使一路出入辞见皆得奏事殿上其余小臣布衣亦时特赐召问非独以通下情知外事亦以考察羣臣能否情伪非苟而已伏望更与大臣商议除台谏开封知府已许上殿外其余臣僚旧制许请问奏事及出入辞见许上殿者皆复祖宗故事元佑六年八月一日范百禄转对亦条陈三事其一条曰太祖皇帝建隆三年诏自今每五日内殿起居翰林学士及文班常转官转对既又命尚书省集官议其可者而行之真宗皇帝诏有司録转对章疏一本留中祖宗之於转对其勤且至如此今一岁之中侍朝者有数臣僚每次二员转对不过十余人借使人悉知而言言皆见用亦不过十数事耳望诏执事审议转对之制悉由太宗真宗旧章二臣之言大祇因转对以通下情以广上意而已臣尝谨心考观元佑五六年间大小之臣类无不得其言者或入见上十事或经筵陈三劄此言及君德者也或议差役或争回河此言及政事者也或言陕西地震或言冬温不雪或言日食六分之变此言及灾异者也或十九疏论章惇或十三疏论蔡确或十疏论安燾此言及小人者也或乞免浙西五谷力胜钱或乞蠲放户部余剩钱或乞取常平敕令删为一书且放秋成收余斗斛此言及民事者也或乞昭宝元庆历令内侍省取先朝帐籍比较近年用度之数或言奉宸库已取珠子六十斤户部已用金三千六百两此言及节用者也禁中求乳母则刘安世等言之内中朱红车子乱行则苏轼劾之其言及宫闈者如此皇太后亲属向宗良知邢州则苏辙言之皇太后亲属扑断酒务少欠官属钱均作七年送纳则曾肇等言之其言及戚畹者如此随龙冯宗道迁转则王岩叟言之内批钱班干当牛羊司刘言干当翰林司则曾肇言之宋用臣叙复中州刺史则范祖禹以为官寺兴土木不可以复用一陈景元校黄本道书则范祖禹又以为异端虚诞不可以成宗夫其一时更进迭谏议论已有余并包兼容听受已甚美而臣轼臣百禄犹惓惓以复旧制议转对为言岂过计哉忠言利行固不厌其多王道利宣固不嫌其广也伏惟皇帝陛下作共即位於今八年凡其所建植施置壹是皆以元佑为的而听言一事尤极谦隆初元诏书尽复祖宗旧制间因臣僚避对则又戒飭申严导人使言固已无所壅蔽乃自比岁顿异流传皆谓诸臣进言稍有忤拂圣意厌憚玉色弗怡或顾左右而言他或

视屋溜而不答人臣犯顔逆耳本为难事藉令未能施用奈何更加沮伤遂使循默成风此岂盛世宜有我朝以言立国列圣相传未尝罪一言者虽中更大拂乱大伤败而社稷之长久终有赖于人言然则人言何负於国倘陛下不察径销毁之志士忠臣宁不为之解体况外而边事孔繁内而陰邪伺隙日食不见天且忘予而入冬过燠寒气未效其何以兴来岁寇斂相挺或能胜予而丰岁且然脱有水旱其何以善其後惟有一綫言脉所当极意扶持今日果已尽如元佑则听言之法固当益循于元佑今日或未尽如元佑则听言之法尤当百倍于元佑陛下试取元佑诸臣之论奏与夫愚臣前者之条陈螻蛄燕闲特赐观省圣明之意必将有槩於中其继自今益恢圣听毋疑其归过而卖直毋嫌其立异而要名凡有苦口之言率皆虚心以考其恳直恂忱者则欣然容受其忠实有补者则立见施行或者偶非其人则他山之石可以攻玉不当以人而废言或皆无可采则川泽纳污山藪藏疾亦当容之而勿问庶几听言之美一与元佑同符天下幸甚臣於二臣无能为役特援转对之比以写忧爱之私干冒天威惟陛下幸赦状

乾会节进银状【武冈】

弥月不迟於赫一人之有庆任土作贡丕昭万国之来朝上件银品列於金英生於石地不爱宝式彰万亿年之休天用降康诞受九五福之壽

申省乞祠状

某本以濶疎加之闇劣荷明时曲矜於先绪而大造不弃於微踪擢之於患难之余畀之以民社之寄盖亦自知其非据犹欲少报於殊私领事以来尽力所至虽一毫未有於实惠而千里或谅其苦心顾以资浅望轻平时不足以镇压数奇命薄所至辄值于艰虞妖虽人兴咎将谁执何敢效相尤之语但知为自治之规赖庙朝远扬於德威幸封境获清于旬浹有如旁郡之元恶亦为多方而悉擒尚藉覆存未闻触罢兹遂书于下考正当勉于後图外则障蔽客邪内则补治元气必得精神强诨之吏庶无岁月玩愒之风重念某鼠技已穷马力既竭况以跨年之久病凜乎末路之难全深恐疾颠有幸隆使敢摅真悃上渎公朝欲乞矜怜特赐敷奏纵未加于显黜愿亟畀以闲祠得稍遂休息之私实仰拜生成之德

辞免除浙东提刑状

除委骤加愚衷增惕伏念某素无能解见谓迂疎自污省署之华居慚玩愒比吁祠宫之请实出忱真盖深惧于踰涯惟必期于从欲俄蒙简擢躋畀臬司惟外台之寄最严而左翊之区至近地大物博岸狱颇滋人微望轻风棱何有况复侵于多病亦欲遂於稍休敢乞公朝特赐敷奏收回成焕谨恣祥刑或未弃于微踪尚改畀于小垒庶可效涓糜之力兹允谓生成之恩

申省乞祠状

某藐尔孱庸误蒙獎拔平生梦想岂望台郎旦夕驰驱况在甸服固知极难于称塞犹欲少効

于疲弩逮此弥年居然惕日既不能悉聪明智虑坐蔽于狱成又不能体疾痛痒痾力伸于民隐振扬何有仇怨已多良以物望之轻祇为明指之玷载惟弱质每觉早衰自夏秋以迄冬率菑病而寡懽况心力必凋意绪怔忡无非亲斋居之时固已积旷瘝之咎前奏力祈于夙退庶几少逭于疾颠自堕因循第增愧惕兹幸书于下考其敢昧於初心是用力控微忱上干钧造欲望察其真切赐以敷陈特赋祠官俾安愚分别遴时望以重职司誓殚香火之勤仰答乾坤之施

武冈置靖安寨申省状

本军虽为僻垒然西通融桂北控沅靖南连全永家与溪洞相联旧来节次於要害去处置立堡寨控扼防札无虑十五六而後徭省各安武冈一邑虽地无溪洞而紫阳乡都分最濶去军县且二百余里其俗顽犷又与永郡接境往往恶少之所出没乃无巡寨以为弹压戊辰妖寇相挺啸聚无所控制几至猖獗本军随宜招捕仰赖圣朝威德随得弭宁事定之余愴又不知防守非所以惩前事而毖後患也某虽侥幸替去然不敢不为此邦长久之虑昨差官相度下育渡乃紫阳乡要害之地遂行创立寨屋三十余间及寨官衙守等皆是本军自行措办一毫不以扰民并已齐备了毕今来欲以靖安寨为名招刺寨军一百人驻北防守见将标钉到已断妖贼周千四等及其余妖徒田产尽行籍入本寨充养军之费或尚支用不敷在本军随时那融应付其契勘得本官旧有武阳寨监押一员并同管辖一员阙官岁久欲乞公朝敷奏将上件二阙省罢特置知靖安寨兼巡检一员专任武冈县紫阳长溪两乡防札之责仍下吏部作阙许经任人差注或从本军选辟一名庶几此寨既建可以联接声势禁伏奸暴千里均拜安靖之福实为利便

勸大礼例库申省状

本军每遇大礼例进奉银二千二百十一两一钱四分随纲别进奉银三百八十四两五钱二分五厘所有价钱系照指挥截拨及剗刷杂色窠名应副外尚且不敷旧来弊例或敷之质库墟户或敷之军县吏胥甚至有告讐献助之名本非不得已而吏胥缘奸重贻民害质库墟户之往往停闭以避科买市井萧然日甚一日某曩岁抵军询知此病应词诉并不许告讐献助而他未能区处也缘本军以县为军赋入有限兼因妖寇调发官军民兵为费不貲某不敢以一镗一粒科扰百姓自行那融应办皆出於常年调度之外郡计愈见单窘无可措画遂痛行撙节浮费及供给等钱铢积寸累计见钱一万贯者创置大礼银纲贴助解库一坐月收微息专一桩管不许移动无遇大礼年分收买两项进奉银两除久例截拨剗刷钱外将本军三年所积息钱支出添助上件银两价钱咸淳八年明堂大礼为始大约可增钱六千四百余贯者比之目今市价略同在民可无倍费庶几稍革科配献助等弊田间之间生意初回务以仰称圣朝严恭大礼不渎不扰之意本军除以节次施行外所合具申公朝欲乞割下本军照应永为无穷之利

祈雨未获申诸司状

本军今岁苗稼茂盛但自六月以来一向缺雨高下之田率皆告病早稻抽穗者亦多焦卷连日祈求虽四郊间有得雨去处却未沾足万人之命一年之计决此数日虽已多方疎剔狱讼讲行宽恤如诸牢囚系勘酌疎放合催钱物等第宽减外窃念谬政致蓄实为守者之罪岂容恬然自处谨蔬食闭合自省应出入并用小轿仪物後乐并省少见身自贬削之意仍备申诸台乞赐申奏将某罢黜以谢千里之民

表

贺乾会节表

阳居大夏实符炎运之兴德为圣人爰记虹流之瑞亨嘉之会福祿攸同中贺恭惟皇帝陛下祗遘骏猷丕厘嘉命文宣多子共知有道之长汉举高年尤欲及人之老时万时亿之德之纯臣幸际昌期阻陪贺列周而复始泰元愿神英之增罄无不宜天保效南山之祝

贺壽崇节表

至哉坤元乃顺承天诞弥厥月于其王母受兹介福於万斯年庆辑无疆欢生有感中贺恭惟壽和皇太后陛下俭慈是宝恬澹无为在太极先自见两仪之运以天下养坐膺五日之朝瑞节相宣瑶觞胥恠臣欣逢华旦越任黔邦听长乐之严钟莫陪鸣玉增泰元之神筴复见循环

浙东提刑到任谢表

右銓惕日方自恶于鵷梁左翊观风俾载驰于駟轡宠光舄奕感激轮囷中谢惟民之生皆天所命本无不善何有于刑自後世尊用司空城旦之书故斯人浸迷关雎麟趾之意然则臬事亦重矣安得仁者以司之禁於未然辅所不及矜畀庶戮必深识圣人不获己之心明清单辞类皆非俗吏所能为之事盍咨淑问庸受嘉师伏念臣见谓謏能粗承忠教带衡佩矩仅守曲士之寻常错节盘根初蔑良工之剖劘荷曲予於先绪每加録於後踪出领州麾专城良忝入污省户典选何裨自知称塞之难愿循止足之分俞音汔閱误渥更加叨乘使传之华越在帝王之近然而地大物衆曷敢度之能周人微望轻於振扬乎奚有觉铅刀之甚钝惧绣斧之莫胜视事云初抚躬增惕兹盖恭遇皇帝陛下好生如舜克寛若汤得位曰仁式广天地之大德措刑不用方臻帝王之极功爰重职司以严甸服臣敢不明谨于狱殫既厥心迭礼乐而有光愧曷当於华选画衣冠而不犯惟仰赞于盛时

谢告奏

将命倅临赞书申锡宠临所被戴捧奚堪恭惟皇帝陛下体念臣工惠綏畿服训词至厚盖有三代之风威严在前不违咫尺之地纶音所建节瑞以光臣自愧微踪骤膺隆使维丕显休命何以对扬监於兹祥刑尚思勉厉

贺明堂庆成表

度九尺之筵称秩元祀歌万年之颂申命用休庆衍宗祚泽流函夏中贺恭惟皇帝陛下斋庄中正寅畏严恭式彰致美之忱菲食如禹聿严昭事之德卑服即文宜迄用于肇禋而毕来于诸福臣滥将隆擢幸际昌辰宫庙骏奔莫赞声明之盛邦家燕祉益祈运祚之长

贺皇太后表

世室合祔肇成熙事东朝介福喜溢慈颜万国咸欢两宫交贺中贺恭惟皇太后陛下功高保佑德备徽柔肃在庙之忱此思齐所以圣等如山之壽曰天保莫不增属载举于缙仪庸茂迎于景觐臣亲逢盛旦滥玷使华燕及皇天繁祉愿绥于文母于彼原隰懽謠乐听于尧民

贺皇后牋

礼严上帝於皇旒璫之仪美萃中宫爰赞玉璫之祀万方禔福三殿均懽中贺恭惟皇后殿下文定厥祥柔嘉维则夙有家而警戒孝敬相成兹在庙而肃雝徽音是嗣赞今日王猷之盛踵我朝后德之贤臣拭目邦荣縻身外服秉文显相莫陪多士之联移俗厚伦共美二南之化

谢赦表

熙事备成礼严三载庆条敷宥和畅九垓圣泽流行嘉生欢悵中谢恭惟皇帝陛下寅恭飨帝忠厚承家神感至诚已聿怀於多福邦有大赉用敛锡於庶民开释无辜薰蒸极治臣初将隆指即奉寬书汤网濶疎咸识自新之路吕刑明恤益宣不杀之仁

贺壽崇节表

四月维夏日行南陆之长八千为春天锡东朝之壽宫闈辑庆海宇均懽中贺恭惟皇太后陛下秉德静专游神恬澹诗歌震夙生民时维姜嫄易用正中介福於其王母谷旦相先於嘉会藻旒亲奉於怡愉臣幸际昌期敬衷善颂近畿持节莫陪长乐之仪广内称觴第想瑶池之集

贺乾会节表

岁在壽星爰纪诞弥之节阳居大夏况逢长养之辰华渚流光寰区辑庆中贺恭惟皇帝陛下聪明天纵圣敬日跻亿载怡愉方奉称觴之乐四方绥靖自臻磐石之安于万斯年既多受祉臣欣逢盛际敬辑颂声自惭周雅之使臣阻陪在列愿与帝乡之父老仰祝殊龄

陵阳集卷八

卷九

<集部,别集类,南宋建炎至德佑,牟氏陵阳集>

钦定四库全书

陵阳集卷九

元 牟巘 撰

记

范文正公忠烈庙记

文正范公忠烈庙今在姑苏三让里天平山公自睦移守乡郡再省三世松楸不但汉人过家上冢之荣而已尝建白云庵奉香火泊登政府得追奉三世置坟寺始奏改庵为白云寺祀徐国公唐国公周国公盖庆历时也犹未有忠烈庙之名先是元昊据灵武纳旌节僭位号威胁诸羌肆为边患朝议举兵攻讨遂以边事付公首用种世衡筑青涧城扼冲要大营屯田听民互市鄜延乃异时西夏贡路但严备不出以示招纳有筑大顺城以扞环庆筑细腰朝芦十二寨以制明珠灭臧二族元昊势渐析乃命公及诸号知兵者分领要害为持久计以待其敝已而昊卒内疑如公言而公在庙堂以议论不同均佚南阳继遂谢事矣公内刚外和恩威迭用当时边人相语此小范老子臂中有数万甲兵不比大范指雍也或又以龙图老子大范老子称之其为人所畏爱如此邠庆诸郡与属羌皆立生祠绘像以事其终也属羌酋数百举哀僧舍哭之如此三日乃去宣和间庆帅宇文虚中以郡人思公不忘祠祀甚谨奏赐额忠烈庙它有旧额皆易新榜绍兴失秦陇庆阳庙貌邈在它方始改奉于天平山每岁上巳三司率僚属郡博士率前序偕来致祭庙久颓毁至元乙酉主祭邦瑞提管士贵共议重建取义学余米归之义庄为土木费司计邦翰宗逊等佐之其年四月既望新庙成丙戌二月既望率族奉安前设文正公神像内设三国公神仪庙凡十楹黝垩丹漆备极壮丽供具皆完好大德甲辰行省闻于朝禁治烦扰崇奉尤严於是士贵以书抵某碑记厥成謏焉末学固辞弗获惟昔文正公在朝闻延州危急自请代张存正欲委身不测之地人以为难某窃谓未若公上百官图诋宰相为张禹虽触盛怒坐以越职曾不少沮为尤难盖不顾其一身之利害祸福故能内肃朝纲外抗方面谥曰文正庙号忠烈如是之伟也夫士大夫则知尊祖矣尊之者何铭其德善也是宜作为铭诗刻石列庑下其辞曰

南阳诸葛蜀汉再造志决身殲民哭陌道乃庙沔阳成都夔子号曰忠武西人悲喜相传尚记馘双诛合於惟文正异世同辙虽老益壮虽死不亡精忠盛烈夏日秋霜昔讨灵武皇威远加声势震燁摧其角牙忠宣有庙参错西土公像在堂莫予敢侮天平之山白云之泉公归自西庙貌宛然谁实新之伟矣柱石上公之服扬休山立内祀先公爰备庙制维垣啓宇光荣三世式济美忠宣弟之昆粤至斯今代有贤孙乃厚义廩乃广义学同忠合虑新庙攸作洁我牲牢

率我宗党竭?妥灵默通盼蠻公在帝旁玉虬既驾神游逶迤驭风来下佑我後人俾炽而昌庙佑是保千载奉尝

苍山小隐记

歙之婺源有佳士曰遯叟戴君宜自其先人以诗书遗後至君宜遂发闻而着能名负屈称久泊然无当世意盖尝取邵子书四四而相因为十六者上下究极之叹曰世逾邈岁逾老兹庸讎非吾自佚时乎别业在苍山距其居二里许饶信诸峯环左右皆历历可名物指数一方胜处也筑楼藏书隐事已略具复营小隐于山之旁且疏泉自山趾以为九曲池游者必道池中曰横舟者以入稍进则名花异卉骈罗杂袭於四时佳致竊而洞崇而坛位置略如京洛好事家又进则罗分二圃蒔佳鞠而挹晚香若松梅类也参合四并与主人而五其堂曰五隐萧然幽人静士之庐也又益进则岛沚萦环有船出菰蒲中桃花流水试寻源而问三山对峙藏春中敞霞蒸绣错亭观相望便疑神仙去人不远遯叟杖履日游而乐之曰是足佚吾老矣驰书苕霅属予记予每病世之隘小举足辄值墙壁抵荆榛顾在隐约而平寬若遯叟之于苍山者其乐盖无涯而君以为小隐何也东方生阳狂滑稽自谓陆沈於俗避世金马门何必深山之中蒿芦之下於是有大隐隐朝市小隐隐陵薮之论世之出入名利者此固其所藉口小隐岂果小哉吾尝闻大隐于夫子曰贤者避世盖已居辟色辟言之右而乾初九之文言遂发其义曰遯世无闷夫不见是而无闷非乾之大孰能之遯乾之变也故曰遯而亨而亦有大矣哉之辞未有大而不亨者也至于考盘在涧硕人之寬乃诗人所以形容贤者退而穷处之德体气象而夫子曰於考盘之诗见遯世之士者而无闷于世遽与乾并言之夫亦惟其大而已矣吾所谓大隐者盖如此要非方朔辈所可与遯叟应虎学甚博气甚静不怵于物变者而迁方且依山林即闲旷穷理而参乎数以观夫寒暑之代谢草木之零茂人事之儻来忽往而自乐其所乐以遂隐居求志之愿於夫子所称易诗之旨固已识其大者况生紫阳之里同遯翁之号而九曲之池实为小隐称首其仰高希贤尤切余恨未能一至其处窃惟九曲有大隐屏之名反招隐者也敢附斯义以复於遯叟其小也祇以为大坎波潭之东池离而志不果者也余得以略遯叟曰大矣哉子之大吾隐也乃歌曰云山之苍苍兮言采其荣其下九曲兮彷彿乎大隐之屏吾端策而得遯兮又慕夫嘉名噫孰知吾之乐乎肆其外而中閤纷衆美此具备乎大莫大乎吾身吾将出王游衍兮曰旦而明藏之至密兮拓之无垠举堪輿其犹小兮何况朝市之与山林

木斋记

东平李君公略自号木斋间以谥予予曰古盖有端木其氏干木其名子木其字木心人其号者抑是之取乎公略曰济也非敢自拟於是顾平生狷急往往以语言忤物欲为椎鲁木强而不能早闻论语木讷近仁之义因窃取其警焉特未知蒙庄氏所称形如槁木望之如木鸡者何如也试为我订之夫仁道至大夫子何取於形之不外饰欤故其言也訥木讷类也则亦许之以仁巧言令色反乎木讷也则直以鲜仁目之人患不木讷耳然尝观之木质朴坚韧之中盖有闢动发生者在于其形不于其心非所以论仁亦非所以论木也人有心木亦有心仁人心也心之德也且孰为木之心春盛德在木是木之德具于心者也春也即仁也木神则仁是

木之神妙于心者也仁也亦春也程子曰木仁之气像惻隱之心春之气象木也春也仁也盖合三者而言此木讷之所以为仁质朴坚韧之所以为闾动发生也公略其以形求之乎以心求之乎天下固有形似而心非者彼南郭子綦以形之徒劳行若驰而莫之止也终身役役而无功也嗒然隱几使如槁木焉似矣然心可使如死灰乎纪渚氏以鸡之欲鬪虚憍而恃气也应响景而疾视也养之三月使如木鸡焉亦似矣然其德全者岂吾所谓心之德乎信斯言也是率天下而不仁也毫厘之差千里之谬盖不可以不辩公略有文墨议论尝为吴兴纠曹又为台省掾皆有声质直而好义志仁而无恶不肯婢阿容悦固已知木讷之义矣予犹疑于形似之间故以是语焉

以斋记

汉嘉以峨眉重本名眉山郡後乃易今名不但山川奇絕闻天下昔康节翁前知靖康分裂此为善地可避兵故邵氏之孙皆来卜居七易之学遂盛行于蜀其地距我乡百里鸡犬声相闻也我先人尝仕焉当宝庆丁亥而予以生越十有二年侍亲去蜀昔之善地莽为荆棘六十必复今已踰其数矣辛丑曹君克明举茂异自燕来杭汉复有人在省需选闻之良喜张仲实为予言克明笃实有气义异乎流俗闭门读书一意于学谓易六十四卦卦下象皆有以字因以以名其斋且求予语夫易圣人有忧患之所作吾与克明俱流落万里外忧患备尝固当相与共讲焉易之诸卦皆观象取法乾居其首孔子於此不过曰天行健何哉伊川曰天道覆育之象至大非圣人莫能体欲人皆可取法故取其健而已君子以自强不息法天行之健也大率人一呼吸为一息一息之间天行八十里一昼夜万三千六百息故天行百万余里然则天之行健人之自强不息实相流通一息间断人与天始不相似矣以斋之以要当法乾之自强不息而予读文言则又知所以自强不息在于学以聚之问以辨之两言者又学者吃紧用力处天之运行无已时则人之学问无止法孔子犹韦编三絕而况他人学者诚能用其力者虽休勿休胷中有全易而理无不明自一至六十四何莫非吾日用间事朱子曰以者圣人以易之书也克明尚勉之予耄昏不能进矣毋忘乡里故其亦有以傲我哉

范文正公义学记

古者二十五家为闾闾左右各设塾乡先生为之师褰衣博带晨坐闾门教其民之出入田亩者有教有养诚为良法自井田废闾左废古制荡除汉以来或为讲堂为精舍而养则未之闻也范文正公尝建义宅置义田义庄以收其宗族又设以义学教养咸备意最近古夷考厥初宋时天下有四书院应天府书院为首光是郡人戚同文聚徒讲授士不远千里而至文正公亦依之以学同文为人质直尚信义宗族贫乏则赙给之丧则賑恤之不积财不营居室或勉之辄曰人生以行义为贵安用是义之一字实与公意合暨公登第立朝为守为帅以至大用名位日盛禄赐日厚遂成义庄义学为其宗族宅于斯学于斯所耕者义田所游者义路何适不宜嘉遗後人可谓笃至继继承承亦惟成规是守粤乙亥兵戈倏扰未遑兹事至元丁丑提管士贵主祭邦瑞共议兴学卜地于吴县三让里距祖塋二里所涓日庀工为屋三十楹祀文正公于其中会讲之堂扁曰清白东斋曰知本西斋曰敬身外辟室为教谕偃息之处庖湍廩廡蔬茹之圃咸在外为周垣扁其大门曰义学清溪松竹之间昉闻弦诵声是役也义庄掌计

之劳为多提管又撙节助济浮用增田山仅百亩备师资束修之礼子弟笔札之费一有以劝大德戊戌朝旨以义庄义学有补世教申飭攸司禁治烦扰尝加优恤无复干吾藩者可肆意于学矣至大戊申提管驰书来雪俾为之记昔钱公辅尝记义田某也何敢与斯文窃闻文正公早岁就学应天时夜以继旦冬月惫甚以水沃面食糜度日人不堪其忧其苦心劳形者如此博通六经尤长于易学者从之叩质终日往复无微弗究其难疑问答者又如此用力何啻十倍今人耶咨尔来学书尔佩衿盍亦追思先志俛焉孳孳毋以寒暑而为作辍庶几他日业精行成式克有立得为名儒以应选用以副二范君惓惓兴学之意其年七月旦日记

重修妙行院记

杭北关之外江涨桥至左家桥有喻弥陀淨公接待妙行院淨公早岁喜画弥陀佛无为子杨次公呼之曰喻弥陀名遂大传院距喻家桥甚迩盖以其姓姓其桥也予异时屡至焉比不至且久每记无垢张公所作宰堵铭具言方腊之乱淨公径入贼垒愿以一身代一城之命贼悚为少戢夫为善之心勇猛坚确而本於诚实是能感通神明彼盗贼之徒虽甚悍桀亦有人心宁不为之革面改图惟善之归乎况推之以造事立业将无不可为者淨公前後所为如欲饭百万僧乃至三百余万凿西湖多宝山为弥勒像又增广其居为殿堂楼观皆一念之诚实始而终之方其画时坐一淨室禅观寂然见阿弥陀光明好像而後下笔故所画如所见凡所建造如其所画也事见于张忠献赵忠简张无尽之颂之赞皆世之钜人元夫也圓悟勤大慧杲真歇了皆敬重之如见在佛则佛法中之大知证也不亦伟欤院更多故久就摧圯幼山冲公提点早受业妙行往来诸山遍历僧职各有劳能雅意第欲弘其祖师前规以酬夙愿而已乃以华亭义兴两庄八百六十余亩山一百五十余亩归之常住一新其院三门藏殿佛殿浴室无量寿阁廊庑楹榭高下曲折奇花异卉芳菲掩映宛为胜处大开养鱼池每岁临池放生以申祝赞圉圉洋洋不可胜纪又通船步拓蔬圃广梅檀林以安挂锡至于建菩提园修水陆堂由中徂外莫不完备祖师心传所谓勇猛坚确而本之诚实者朝夕奉以从事冲公年已八十许健强如六七十其力足以达其所为用克底于成先是喻弥陀之寂也张循忠烈王以文祭之王五世孙模予婿也承其先志以来求记戊申十一月也予闻冲公自称方是闲观其大作佛事无负祖师之付嘱亦可以少闲矣而犹曰未是闲也自有此院未始有记真大欠阙事必得记方是闲也其果遂可闲欤予愿冲公益加之意虽休勿休予弥陀死而不亡岁时来归顾瞻新宇亦当忻然为之一笑

松江普照寺记

一切世间佛法最盛盛矣而不能不变者数也变矣而不能不复者时也必理足以馭数而不尽倖乎数智足以因时而不违乎时而其能又足以立事式克底于成故垂名无穷焉普照本堂乾元元年大明寺也相传为陆氏故居始孙吴时陆抗封华亭侯世居华谷三十五里谷水之阳崑山之陰时尚隶姑苏天宝十年始为县石晋天福五年始创秀州割华亭以隶至元丁丑陞为松江府史传称陆机自孙氏之亡退居旧里盖自建邺宅归也普照岂非其别墅欤自梦形黑壤地化宝坊春钟击鼓而作佛事此其盛之始也会昌五年天下僧寺皆废普照亦其一也钱氏时镇守司空张瑗於寺後凿河通流寺故基去三之二矣此其变之始也大中十

二年良惠元珂等再建寺宋祥符元年改为普照主僧必以学行者充寺僧凡二百余房至无所容此其变而复盛者也建炎绍兴至淳佑戊申屡经郁攸此其屡变者也宝佑乙卯行金再造山门翬飞翼跂此其屡变而复盛者也役之大者释迦殿千佛水陆院千僧海会堂予尝为记以具载其事他如库厅海月堂即高僧惠辨号海月法师也梵修院尝立观堂即旧之五百罗汉殿也善住教院即旧之东塔院也至于圆通殿西方殿懺院藏殿之类靡不完具钟楼钜钟声闻五十里而宝塔峥嵘屹出云表尤为奇观每岁官僚于此建道场申祝赞益广善缘为民祈福遇首春仲春仲夏四立日皆修期观诵经典率以为常此皆前後诸人所共修营或捐已资或转化施或出主僧或出徒弟其智足因时而能足以立事不徒谄诸数也庶几盛而不复变焉前主僧佛智通悟大师子闻实相与规度叶赞其力居多大德丁未因来求记非徒侈土木之盛也以见诸人之劳使後者考也况佛之智慧即吾之智慧不如待时也佛之能仁即吾之能用力於仁也岂流俗任智矜能者之比哉铭曰

大相国寺并包百数殊涂同归不内外故人之观物必於会通剖去藩篱是谓大同林林总总普照院室言栖尔单几瓶几锡有万其法各闲户牖贯以一理何殊已有而今而後阐尔弘规洞朗轩辟尽撤已私自然福德遍河沙界不可限量亦无障碍是为普照释迦之殿高竦挿云邦壤攸奠蒲牢霜吼扶桑日出红光陆离幽雾辟易靡所不照斯之谓普普照之中物无患苦潮汐以时亦无风灾稻海日富布施日来稽首佛慈其何以报谨尔薰修是祈是祷悔过兴善一念猛烈愿尔衆生永离尘劫

君子轩记

是气流行阳一而陰二故为君子者常少不为君子者常多有所不及则有所胜焉惟立教之君子以降衷秉彝修道而制其数以默扶造化之所不及之为君子亦欲人之皆为君子君子多则为物之春否则草木当大夏而黄落分数多少之间教之浅深之验也古者家塾而党庠遂序小学而大学皆有教法当其时之可不过时而扞格也知类通达至于大成不小成而止也从容以尽其声不徒记问也长善而救其失不徒私淑艾也此即孟子所谓君子所以教者五虽各因其人品所施若殊要不过教人使为君子而已先儒以孔孟弟子言之时雨化之之顔曾成德之闵冉达财之由赐固君子也若乃樊迟之不终絶于君子陈亢之概有闻于君子亦得与于答问私淑艾焉由是而推诚圣门教人之大法也後百余载孔子所教之君子散在四方既已略尽异端起而功利炽孟子不求胜之惟举圣法以示学者圣法修则君子多君子多则邪说息孟子之所愿也孟子亚圣似顔子传道似曾子时无孔子不当在弟子之列方且日与其徒难疑答问欲然自谓予未得为孔子徒也予私淑诸人也夫孟子曾不得为时雨之事淑艾自私独为君子岂其所愿哉天之生圣贤固不使其自有余於己而独为君子也张仲实居今而学古从之者衆乃拓学古斋之右创为使斋疏朗清旷体日以舒教日以专学者日以亲予本孟子语榜之曰君子轩而戴君师初为之铭仲实复求予语予闻数岁来吾党之私淑艾者不忍独善颇出其绪余以惠後进弦诵之声相闻教之将盛欬况欲人之为君子而幸世之多君子仲实夙志也今将进而任君子之教与世道之责有大於是惟吾仲实勉焉若时雨之义则师初之铭美之矣

陵阳集卷九

卷十

钦定四库全书

陵阳集卷十

元 牟巘 撰

记

周公谨复庵记

周公谨以复名其山中之庵间谓予曰岁丁丑吾庐破始去而寓杭燕雀过故墟犹有嚅啁之意况先中丞迨先人三世之墓故在霅岁一至或再至焉辄旁徨不忍去年益老惧无以自还抱恨没齿近得吉土先人之莹侧倘异时营菟裘遂狐首下从九京志愿毕矣幸为我记复庵新息後在泊浪鸞影站站中卧念从弟少游平生语欲守坟墓称乡里不可得今杭视霅为旁近郡公谨岁时展省沃酹不废已得为马少游尚何羨乎复虽然试为子言之天地之间一气混沦而磅礴求之于黄钟八十一分九寸之管牵牛一丈三尺一寸四分之晷阳九万四千六百一十七岁出入之元求其复也岂不在吾方寸中剥烂复反穷而後有复失而後有复君家无极翁曰复其不善而动而已复则无不善焉复之初九复之善者也不远而复何悔之有故曰元吉大之也若乃六三频复失之屡危矣而犹曰无咎六四独复力之微难矣而犹曰以从道此其意开人以善自非终迷不复如上六未尝不致其惓惓公谨侨寄他邦盖不得尚若穷于性分未云失也顾戚然以远家事为已缺者亟图维厥终使治复庵而日从事於复不以独复之难自阻必以不远复之善自期一旦膏车秣马问复庵之里闯其藩而休於其居图书无恙鸡犬相识忻然以笑曰吾今始真归矣载瞻楸枿根荑芽甲於霜露之既降而函活於春雨之既濡喜极而感则又以之怵惕以之焄蒿而凄怆此固吾方寸中之一大复卦也因思夫物溃反原以已屈之气为方寸中之气者则非吾所复而得吾之初焉善孰有加于此抑予闻复善道也亦长道也其未复也顺而正以观其长其既复也顺而行以导其长顺斯长而亨出入无疾则眉寿无害考终命之福也朋来无咎则子孙逢吉必复其始之祥也予敢自附善颂以落复庵之盛

俞好问交乐轩记

俞好问名其轩曰交乐以问於吾吾曰是何居好问曰吾得之蒙庄书吾曰岂非老子之语南荣趺所谓交食於地交乐於天者欤他日子綦以语九方歟则又曰邀食焉邀乐焉何也夫交者同也邀者求也试就其说而言之曰交是矣交食於地人乐也交乐於天天乐也人乐与人为徒者也天乐与天为徒者也人游乎天地之内而未出乎天地之外是故人物同宇而物易汨乎人利害同域而害实生乎利四者盖同行而异情天而不人则相安以恬乐也人而不天则相争以夺不乐也乌呼安得至人而与之论天乐好问胸襟洒落疎快无町畦无留藏居敢

溪之上萧爽数椽堂有老母以志为养菽水尽欢有如甘旨一可乐其性喜书昼抄夜诵有四犹子时来讲说二可乐又喜为诗操笔立就有佳客至相与吟哦三可乐隙地杂植有香之花四时皆春芳菲不断四可乐好问每曰我交食於地不与地争嶮巇之利交乐於天不与天争陰阳之和孰为人与物孰为利与害惟其无四者之累是以有四者之乐未尝力邀而强取之如子之云者天耶人耶人耶天耶吾闻之叹曰吾於好问托其交而不知其乐吾其至愚哉何足与论天乐虽然至愚同至人其亦可乐吾所乐乎哉

重刻晦庵景行堂记

古者建学释奠必有合有国故则否而乡先生亦得祭於社焉三衢郡故有尊贤祠如端明汪公太史范公犹合之他邦惟江山学祠是正介先生而次五贤于景行堂则国故也乡先生之位也文公朱子记其氏名与其学行气节备矣车牵之卒章曰高山仰止景行行止孔子亟称之以为好贤如此此五贤之所立虽若不同然正介学于胡安定延平学于杨龟山所以求仁也谏议力攻蔡京童贯仁人之能恶人也叔纘以一士曹掾叱睦寇宅卿以一太学生责金酋则又杀身成仁者也壹是皆人心天理之不可泯考信史参轶闻大书深刻以风励当世而兴起後人盖诗之好仁朱子有焉夫无欲而好仁一人而已在孔子时已叹其少况後乎孔子後乎朱子乎淳熙以来仅百余载碑已湮漫残缺越在榛莽过者恬弗怪焉乌呼可观世变矣郡人柴君来领教事丞与周君谔召匠治石更为刻遗文重担穹跌视旧加严於是五贤之遗风余烈犹有足证暂晦益彰而观者亦改容更貌复知学行节气之可贵可重可企慕有功斯文有补世教实大其庶几能好朱子之所好者欤二君皆名家後柴君谏议四世外诸孙其先世潜心君兄弟尝与延平共学龟山之门而周君则正介诸孙也至今犹藏其诗稿源流有自是尤可纪者既成属某识颠末某父子尝先後貳衢他日子将按部又至焉每以未得一拜祠下为恨焉今隤伏深潜旦暮且迫乃幸睹是刻之新获附名于碑因窃自喜夫高山仰止者知之事景行行止者行之事何莫非学亦何莫非仁俛焉孳孳惟尊闻行知是务此又朱子所为推本於学之意因并以谄观者云

重修顏魯公祠堂记

吴兴多贤守在唐顏魯公以名节着人皆曰吾邦魯公也余则曰天下魯公也盖张巡许远从父兄杲卿一辈人平原蔡州事具史册无庸察察言惟是乾元己亥公尝撰天下放生池碑铭进之而其再进大字本则上元庚子帅百僚上表请问起居西宫遂贬蓬川则庚子八月越明年辛丑至大历癸丑十有三年公由临汝转吴兴始追刻而建之郡东放生之池上所谓一日三朝大明天子之孝问安视膳不改家人之礼示天下必有尊也苏文公以为公实规讽肃宗非区区放生池者可谓知公之心惟公大忠大虑奋不顾身每为朝廷争典礼为国家折奸邪而又一正其本为天下万世明纲常使凡为人臣子无敢遗君後亲虽触忤陨越卒陷死地而不悔夫感慨杀身易从容就义难平居能犯顏敢谏则临难能仗节死谊兹其为天下魯公也欤当宋嘉佑辛丑之际始即池上剏魯公祠绍兴初始赐额忠烈庙崇树表章伟矣乃自近岁编户杂居庙毁像坏过者太息东平李侯奇以今辛丑夏四月实来为守下车闻之矍然丞按祀典考郡乘躬至其处参订申画而谋诸长若貳佐作新庙民相其役始七月成十月中蕭公

像揭?妥灵大其门庑敞其轩楹規制尤宏杰既用牲祠下郡学教授周鲔以侯意属记於陵阳牟某某氓也弗获辞焉乌呼轮奐虽新感怀犹昔尝试凭楹而观波光渺弥镜明黛蓄照彻上下而公忠义所在其精神之盛焄蒿凄怆千载如生安知不睠遗民怀遗刻乘风云而来下余盖不足以见之若夫斷荒而兴怀耸善而扶正如李侯之为者则诚有补世教而卓然异于流俗可尚矣诗云高山仰止景行行止维侯有焉後之人尚毋忘斯语是为记

普照千僧海会堂记

三代盛时礼乐制度学校伦教修设明备外物莫干其藩厥後寢衰以微东汉明帝时竺法兰摩腾首负四十二章经至白马寺符丈六金身之梦上所崇信趋者澜倒诸人先生徒持空言以抗曾莫之止日蔓月滋唐会昌五年以前不啻二十七万余僧宋天禧以後不啻三十九万何其盛也一盛一衰相与消长势使之然昔伊川程子尝游觉海惠林精舍见衆衲方食忽叹曰三代威仪尽是在是矣彼其拜则膝拜衣则条衣非可比而同之三代程子之言顾若是何欤礼失必求之野或者观其会而得其意欤方其于于而来脱双屣而升临席而坐不语而食蔬食菜羹必祭如必斋如雍容可观古意犹有存焉者故程子有慨于衷不觉喟然而叹欤礼仪三百威仪三千其目繁多要不必尽同亦取其意之存乎古者而已它可类推特未知佛氏所谓三千威仪八百细行同乎否乎维松江普照寺有千僧堂自唐乾元宋淳佑丙戌由回禄之厄无复旧观崇教六师祖祥之所建潼川北涧之所建者又悉为瓦砾之場至元丙子万户沙侯来镇是邑与慧悟兴教大师某相为倡率首创钟楼库堂西庑而千僧堂未遑暇也又四年己卯里人赵架合施所居堂为之因陋就简意未称临化之际专以此事嘱其後人於是徒弟通辨大师其铗积寸累且募檀施大德癸卯於旧址重建其堂完明周密风日不到设座备物使僧衆得以如法而住繙诵经帙下自已功夫出则听说法申祝赞功德无量因来求文以记逆施之人当去未去视被临化洒脱明了一办大事者为何如且强立文字以传久远海会之丛林有具眼者不得献笑乎重说偈言曰

盛哉海会千僧之堂是为普照选佛之場其有禅客白丹霞衲若去选官不如选佛霞问选佛当在何所选佛之堂江西马祖万中选千千中选百於百之中又选其一愈选愈少其义伊何人以为少我犹曰多有如此堂愿友所造窗几静深牀坐完好夏有疏簟冬有重席摄衣而起振履而出千僧齐唱一口百声千口万声清彻朗朗有大导师默然晏坐忽狮子吼唤醒惛惛闻者震越得大警悟须臾之顷万善咸具凡诸佛子皆得度已稽首首照朝夕弹指

绍兴嵎县新建东岳行祠记

古者诸侯祭境内山川以其能出云气为风雨祭之礼也春秋书鲁犹三望公羊氏曰望者望祭泰山河海也郑司农以为鲁境不及河鲁得祭泰山曰河者非也三望淮海岱也公羊盖失之然鲁之旧法旱则修雩吁嗟求雨而已未闻有事於泰山是鲁虽得祭泰山而谨之重之不轻于祭也如此今东岳之祠徧四方穷陬下邑往往而有田夫里媪日扳援叫号以祷以禱不惧其渎何欤夫泰山之云肤寸触石不崇朝而雨天下其施溥其功钜天下通祀可也鲁固不得私焉嵎越之名邑其民知礼义而通於法号为易治青社余君洪以丙申岁来为尹平易近

民济以明敏夙夜讲求民瘼与为便安距县一里有东岳行祠比岁旱祷辄应丁酉秋青虫为孽祷之明日虫罔遗育令知神之信已愈自飭敬事神越己亥夏六月大旱早苗多槁死老农谓过处暑藉不得雨晚禾不复矣令闻之戚曰民以食为天今视天枯然设不幸如老农语民且殆令何心独全复走祠下愿减已寿年为百里命请命于神越三日果大雨四境沾浹焦卷尽活苗怒长乃有秋民皆喜色相告我从令得雨令实活我令谢曰神赐也吾敢攘神之功惟是旧祠久毁神栖数瓦下前令李繙於其东南六百步作後寝今令至继作正殿揭妥灵盥荐始有所而两庑门观未备也乃谗于衆曷图之用答神意民又皆喜愿尽力赋丈属役某任某事而为之期起九月毕十月趣具百烦工徒竭作至期成焉屋凡百楹昔所未备今也大完翬飞雄峙一旦杰出官道之西中为一亭由亭达于桥由桥达於祠池蓄异鱼环植佳木侈庙貌而昭神贶也士民共乐之?稭在野歌舞在道薰为太和以迎善气以占嗣岁其屡丰年无有害又益喜相贺愿伐石纪其成则因予世旧上虞刘悌壻西秦张模以来请纪惟神无方无在不在贤令尹不有其躬欲以?塞民灾发于衷诚非有一毫自为意故神之听之虽远而迹大庇于民民从之役不踰时食其报者而或者昧损上益下之义刻民之肌惟已是利水旱弗恤诿曰非吾咎神弗顾答则且将事土木以要於神失其本矣曾谓泰山不如林放乎予尝使越未能忘其民也既幸其获蒙神休而尤有感于今之义特书之俾刻焉以告于来者而系以诗曰

岩岩泰山实奄东鲁龙驾帝服爰作神主使云前驱风以为御歛衣尚征左右帝所惟越在东则一其顾慨彼槁乾沃之膏雨旱火不光休气布濩维山之阳民拓新宇石梁既抗於堂於庑庙寝孔硕神其来下其灵剡剡瑶席椒糈载掄尔瑟民歌以舞水有魴鲤陆有秔稌至於来兹丰年其屡神功莫名乐哉此土维郡维邑皇受多祐

至乐斋记

古涪文君心之间为予言吾室环堵门关落然孰使吾终日安从而不去者非书乎书诚吾之至乐也或者曰书糟粕也忧患也至乐无乐乃皆束书不观游谈相高以是为至乐焉人盖有饮食而不知味者未有不饮食而知其味者也吾固疑而不信且吾先人寡慾而好书颇勤勤辑散佚以遗其後授而读之未尝一日而舍书以敖至哉天下乐终日在书案此欧阳书语也故吾摘之以名读书之室而求吾之所谓至乐者予闻而异之读书亦大难异时藏书之家所少非书而读书者常少无他书易得而不知其为可乐书肆而已虽读之不乐也与亡书同占晬而已虽读之不乐也与不读同邺侯之架一一悬牙籤新若手未触韩子之书视欧阳殆不免乎讥韩言藏欧言读李繁辈其果能读而乐乎否今之书日益以少而难得读者宜益以少君知其难易将至矣有能知书之难得则知书之可乐而至乐者出焉心之生长见闻资稟卓异意气之盛如川方增乃退然承其先志以欧阳子读书为法夫欧阳子盖知其难者也自其蚤岁率从人借书且抄且读尝见昌黎集於随州某氏破篋中求之以归始为古文每叹在夷陵欲求史汉一观不可得是时承平且久书难得尚尔迨其晚岁所藏仅万卷三代以来金石刻千卷又皆出於四方万里穷絶之处得之难然二者非有声色臭味可以移人而公甚笃好或手自校讎或以立训传或以订史传百家之讹谬至与其为六一而乐之终身其得之之难而乐之至如此诗盖言其平生所得而实则天下之名言也彼谓欧九不会读书岂知言者哉

心之藏书不多於欧阳子之晚岁亦不易於欧阳子之早岁今也坐一室中牕明几淨左右横陈俛仰千载非芝编缥帙部居条列以为美也非虞初稗官凡将急就以为博也非薰香摘艷以为功也盖有其至乐者之存吾心而已所自得言莫能喻抑知其难而有以乐之欤心之属予记顾眊惛因记其所与予言者且以信予之说毋遽忘其难而寢趋於易则其乐亦无穷矣如江海之浸膏泽之润涣然冰释怡然理顺此则至乐之候也又将以是观焉

林庵记

壬寅首春林庵廉访僉事按临吴兴郡郡之吏民莫不洒然改视易听与岁俱新不以苛察为明健决为断深刻为能酌缓急寛猛之中隐然虎豹在山林而藜藿不采盖輿人之诵如此而予卧病荒园久絶情造请乃特枉车骑过之濶略将迎高谈朗咏瀹茗从容因知其所存过人远甚间谓予曰若知吾林庵之意乎昔吾尝从事安西幕为蒲城长由河洛嵩华道襄岷以出岐梁往来秦商蜀汉之间今自监察御史出赞浙西宪司由鲁复淮泗絶涛江至京口过姑苏憩于钱塘以来苕霅凡天下之名山巨镇雄伟而杰特孤峭而奇絶涓秀而窅深者皆徧经而历览虽外縻乎职未能超然自放其间以遂吾平生之志然未尝一日不梦想坐驰每念入林恐不密之语为之慨叹故以林名庵以见吾意愿为我识之予以眊惛辞不可窃惟古之高人胜士胸中自有林壑功名富贵不能涉其藩干其虑故在魏阙如江海在市如山林不见其异否则富贵之念先入其中藉今岩居川观其视嘉木奇石萦绊耳晴岚暖翠尘眯耳朝猿夜鹤笼檻耳适足为吾病焉况方沈着富贵又安能使之一旦以此易彼哉林庵恬淡文雅公退之余观书之隙或呼硯与笔浓墨大书体岩势逸各当其物或倚阑舒眺捻髭索句嘲弄风月直欲与槧人墨客角其技或屏都骑载单舸上下林壑穷幽选胜忘其日晏其视富贵为何如也林虑之山豹林之谷衡岳之雪林岳楚之道林庐山之东西二林固已尽在林庵中尚何俟予言夫以林庵之能謂抱负有功见之当大究厥蘊次犹当长谏官御史言听志行使穷陬僻壤山颠涧隈之氓皆被其泽而支离疏辈亦得与木石共老岂徒专林庵之乐以自乐哉尚平了婚嫁而恣游五岳谢安石成功名而雅志东山付之他日未晚也

周景远君子堂记

东平周君景远甫壬寅之夏以使事过霅首扁舟访敝庐静专大雅温然君子也良以既见为喜他日再见语益亲盖君子尝名其燕处之室曰君子而以问于予夫君子成名之人也君能取以自名美矣予何足以言之且孰不愿为君子如尧时君子十六人周时人皆有士君子之行而鲁亦多君子其类衆其道广固君子之愿也不必自有其名然阳一陰二大往小来可为君子而不肯为君子可化中人而不能化中人则君子之类少而君子之名始着君子之名著而君子之道始孤矣岂君子所愿哉名者忌之招而又巍巍然抗其名以为的於天下吾惧其立于独却往来无方也故蘧伯玉耻独为君子何耻也耻不能使人皆为君子而已立于独也後之君子或不能为蘧伯玉徒使恶直丑正者竞起而相仇名适为君子累楚之好修汉之尚节义及唐之清流是也无乃好名之过欤周君曰子之言几矣其曰好名之过者何也君子病其名之不章学以求于君子求而不得者有之矣未有不求而自得者吾方求于君子之不暇而暇好名之避乎避好名是君子不可为必同流合污而後为得也夫实之所在名斯从之抗

君子之名不可避君子之名滋不可吾升吾堂因名思义凡易象传记称君子者殆数十百其嘉言善行一日森列左右实果外乎名哉吾家濂溪子曰实胜善名胜耻也故君子进德修业孜孜不息务实也意谓务实则其实修而名善非恶乎名也而敢以是说继衆君子後以自儆焉不亦可乎予益异之予闻周君之先尝跻膴仕习闻中州风俗文物之旧君趾美象贤早有令誉宦辙所至不合辄引去不少徇流俗往往寓意於诗旨趣甚远今以博文多识与於礼文之事盖所谓君子以制度议德行者既无负明堂之义而犹务实自儆如此可敬也因具识之予前言则陋矣

陵阳集卷十

卷十一

钦定四库全书

陵阳集卷十一

元 牟巘 撰

记

游桃坞记

程周卿纠湖学晋辅长尹堂两邦相望故家蔚如此会晋辅秩满归相与挈家望母憩桃坞庵楚望汉卿偕内外诸孙侍文孺辑杖候于门亲友来会者予与文性之史顺甫刘道甫自俞步至庵五六里所庵雅洁可居沧洲翁所位置翁以来增葺之前曰桃坞後曰更不疑巨碣峙立赵庸斋笔也先人氏名亦在焉时适三月半雨新霁青松如沐笋已上番茶蘼盛开芍药亦有开者主人兄弟怡怡愉愉连日以奉母之觞徧酌客饮酌甚欢中夜复浮大白对牀笑语尤真吾观周卿饭不足晋辅囊无余而能调娱其亲不知山中为寂寞而妻子皆有自得之色此固人之所难而吾侪之所为喜也留三宿与时止时作拄杖叩诸庵徧叨茗供殊清适性之玩金鲫鱼良久隐见不常若自珍贵不可致者雨盛还庵中性之大书雪壁且赋诗一章曲尽佳致绍老克翁亦继来期而不至者史载陈正则正德及文端甫予则陵阳牟某献之甫也时丙申三月十八日记

荆叔麟以斋记

都邑浩穰承平日久上恬下熙弗虑弗图一旦风尘倏起父子兄弟对面相失顾吾心之天者独在过故墟睹遗蹟感慕伤嗟有不能自己者焉若荆叔麟之复为此斋是也叔麟之先父讳某自号以斋居杭新门里朝市肩相摩不乐仕进自壮至老手不释卷尤善书以斋其所书也八法咸备见者忻美生乙亥终丙子年六十有二五子纶纬绂绅素绂即叔麟少年事远游去杭且三十年岁乙巳来归自宣问其兄弟鲜矣问其室庐毁矣兴言往事无与共语古有为鹤语者曰去家千年城郭如故而人民非而塚累累岁代辽邈理有必然无足怪者三十年者特千年之一瞬息尔叔麟之所与遭遽至于如此可胜叹哉幸四世之祖墓在西湖之上守者无恙再获瞻省有念以斋不可复见不觉感慕伤嗟非吾心之天者其孰为之要不当以世变论叔麟卜居乡闾复为以斋子昂集贤赵侯为大书而揭之越丙申夏因来寄声求记其事予惟以斋以以名斋非徒自谓也盖将遗其後之人不在叔麟乎夫生事之以礼死葬之以礼祭之以礼为人之子终身行之犹恐弗克况生事葬祭之而不得以其礼欲报之德昊天罔极此心当何如传家名斋曰以以之一字叔麟固宜敬恭朝夕奉以周旋思其音容而属其荒絶存其手泽而着其德善以斋在是则吾亲在是吾亲在是则吾心之天在是千载一日而何三十年之有叔麟人今而貌古有学问有践履必能立身扬名以图其孝之终以大其门以无愧以斋

之义矣

报德院记

距松江五十四里而近曰下横泾时思报德懺院在焉盖佛氏有大报恩七篇柳子厚以为此七篇皆由孝而极其业以儆夫世之荡诞慢弛好违其书者夫报恩即报德也报其父母生成之德也而其报德又莫若懺罪报德者昊天罔极而致其时思也懺罪者改过迁善而致其愧悔也岂不五体投地千声齐唱而求其罪消灭哉院之主僧曰友懺派出顾亭林宝林寺自幼敏悟听讲天竺能背诵法华经修长期观气貌古朴不事外饰兼通周易嘿参妙义非苟焉者宋咸淳辛未易徐氏基地结庵庐以庇风雨以事香火度弟子元吉普润等善治生广业普润习台衡教于超果分任院事次第而举懺间语吉与润曰吾年七十行且去矣盍为我罄衣孟建九品观植净土缘且市田为供给刻之石以示久远元贞乙未啓长期申祝赞首剏三门两庑僧堂岁役未竟大德庚子壬寅懺与吉普相继示寂润竭蹶嗣乃事置法堂砌祖塔构钟台建释迦殿塑左右侍从普陀大士罗汉诸天备极庄严壁有金彩沼有红蕖层阁飞槛高切云汉平芜絶岛近在目睫殊伟庄严遂为一方胜处先是啓长期之岁东北隅忽竹园产灵芝夫竹之有筠四时不改柯易叶已非凡植况灵芝煌煌与寒光翠气交相映发邪衆皆欢曰造物者生祥下瑞以有此芝振动时人之耳目故一切兴修有相之道次第而成不待懺罪而德已报矣越至今日咸归功于润焉润自号泽翁笃实而疏通是能尽报德之义克与先业盛其福泽至大戊申春赐金襴袈裟号慧光普照大师尤有荣耀焉良月远来求文以记予盖不获辞乃铭曰

於惟懺公秉志夙坚爰发弘誓独奋空拳始来横泾把茅三椽殿堂楼观一旦屹然翠樾之杪华榜高悬是日时思以报所天报之维何懺罪是先诱化浇俗崇植胜缘綢緼和气芝实鍾焉九茎三秀衆美具全厥在报德其应尤专人所创见竟夸以传润也师吉後克继前晨夕薰修不懈益?施於奕叶益昌以贤如泽之润获福无边

义斋记

临安山水天下奇异时英雄崛起之迹历久而平钱氏子孙希白穆父辈皆去而为文词取科目司诰命至近代平齐洪君出又以伦纪常着名节流风余论今犹可考也方君天瑞生於是乡妙龄秀发雅慕前修劬书嗜古而喜为诗其居有山月吟牕日啸咏其间家则堂尝为作诗序其胸次已不俗又以义名其书斋而问於予予曰识瞽学落然尝闻仁以义节故亲亲而仁民仁民而爱物否则爱无差等墨氏也气可配道与义故浩然塞乎天地否则以义为外告子也敬义立故德不孤否则敬以直内而不以义方外释氏也若是者皆不能以无义义者固非一行一致之为而子犹昭昭焉以义为揭者何哉岂有夜半叩门摄衣从之不以在亡为解者乎亦有怀愤不直拂人色上而稠人广衆辄譙责不顾者乎抑亦有排难解纷辞千金而不受因絶其人不与通者乎天瑞曰是之所义非吾之所谓义也况并以辨义义之与比君子喻义之类曷尝不专言之而元麟之取节则原道行而宜之之语也昔曾子曰义者宜此也中庸曰义者宜也扬子云曰予得此宜谓之义也韩子殆本此欤予於此知天瑞真好义者矣夫天下

事物莫不皆有当然之则子之居是斋也盍试思之自君臣父子兄弟以至朋友乡党邻里以至一语一言一举动云为之之际凡行之而得其当处之而得其平由之而得其正辨之而得其分者皆所谓宜也义也是义之名也固标絶於一辞之表而义之实每裁制于衆理之中虽以之为诗可以兴可以立可以怨可亦义之宜也发於情止於理义止亦义之宜也传曰诗书义之府也孰谓吟牕之不谓义斋乎

敬愍侯祠记

唐以来使海外亦曰使絶域其选甚重至元甲申朝廷以日东国负险远不可武令遣使者宣示德意用怀柔之於是刑部尚书福建道宣慰兼提刑按察司福唐王侯除参知政事张帆揭节乘舶以行侯姿仪山立足以竦物望知略辐辏足以应事会辞辩渊博足以申使指人皆谓是行必能得要领归报视海如涂不劳戈甲坐以无事曾几何时诤问倏传朝论嗟惜具列其故追赠锡爵节惠定谥曰敬愍侯卒时年五十六五子皆早世祿其季子都中为少中大夫平江路治中即吴中赐田宅所以饰终恤後者备至其孤奉母张氏来居吴相依为命母独深念旅魂不复终天曷报乃削髮为尼住妙湛寺朝夕繙经礼拜归诚于佛修寺起废役比再举盖佛有大报恩且使其孤一意事国焉厥既就职追慕不少衰又念人子事死如事生事亡如事存求之无不至惟佛俛仰之间再拊海外吾父死而不亡安知不往来与俱遂辟寺东庀创敬愍祠塑侯遗像以严香火以致延伫冠佩有肃神采如生相率拜祠下且喜且悲因市田百亩舍入常住为此祠岁时熏修及七月十五日忌日追远费专一僧掌之具有规约治中继陞太中去为浙东宣慰副使岁癸卯自述颠末来以谗其先友陵阳牟某求为记刻石示方来乌呼予尚忍书敬愍侯之事哉昔叶公子高将使齐问於孔子以为事若不成则有人道之患事若成则有陰阳之患欲处若成若不成以自免而孔子则曰事君者不择事而安之忠之盛也盍勉之使忘其身而遂行耳今侯之远使犹未入国不幸齎志而终虽虑患不如叶公子高然视孔子之勉子高者夫何歉是固宜书况有贤嗣于旬宣立身扬名式克负荷其为是建祠捐田种种佛事匪直以妄塞悲也一念之孝根于心通于神明抑至也宜牵聯俱书焉後之人尚守成规广前志惟诚惟敬弗懈益?是祠也千禩一日永终长存可也侯名积翁旧朝名执政留耕先生伯大之犹子故自号存耕留耕尝为端明殿学士制置福建云与我先人道谊交而侯又於予厚死生契濶执笔泫然复为歌辞三致意俾侑祠焉辞曰

訐謨碩輔宜廟堂一朝龍節徂遐方揚颿直欲梢扶桑怒濤稽天物怪狂奄忽誰為尸不祥魂兮渺渺之何鄉亟命下招遣巫陽謂我弗信眎密章吳都綉錯美稻粱甲第中啓宵洞房湖山左右蔚相望魂胡不歸此徜徉追思罔極涕泗滂新祠屹若依寶坊雨花繽紛梵唄揚侯兮來歸駕鸞凰陰風飒沓佩玉鏘有椒其醕羅餽饌歲時宴娛跪陳觴子孫世世永奉嘗

松江普照寺釋迦殿記

松江普照寺陸士衡別業也自孫氏歸晉兄弟入洛以文膺事任威聲權勢振動當時倚伏者相尋曾未瞬息已有華亭鶴唳之嘆而其台榭化為像設研席化為梵唄乃至今存何歎寺北坐九峰層巒疊嶂攢青擁翠相為蔽?陰陽家者流謂風氣藏聚可安千衆蓋特於佛僧為宜也

唐乾元时本号大明寺僧两惠尝创释迦如来殿逮宋祥符间改赐今额道者严善誓僧宗幸真歇凡三度重建淳熙戊申厄于祝融里人钱武翼仰之首议兴造其事未竟子之信竭力继之使张彦中掌其费僧祖镜等佐其役咸淳甲戌僧惠思与武翼旧念不可废前人功亟劝率贿施以助殿始成衆请行啓典殿毕涂墍而营像设於是慧辨颐慧悟秀以白镇守沙侯欣然致从吏且厚施之超益倾资化缘不憚劳费久之而就万瓦鸳浮重檐翼跂加以藻绘金碧交辉中设释迦像若左若右分列八位备极庄严而三世如来圆通大士应真罗汉诸天人之相亦次第而成至於琉璃无尽灯瓜华诸供且莫不完好每岁州侯率其僚属於此建道場申祝赞而祷水旱穰风灾者亦皆至焉夫成之难则其传之也必久是役也再见丁未甲子复周盖非一手足之力而超成其终功尤多可谓难矣超既寂其孙了闻职是薰修事实来求文以记曰是固所以久传而不废也予闻万形皆朽惟理独不朽者而佛氏亦曰一切诸法皆有破坏惟有法身常住不灭虽与吾说若不尽同然所谓法身亘古今弥宇宙到处充满亦无杂坏岂拘于形而外于理哉区区言语文字如浮云如空花乍起乍灭了无根蒂反欲取其常住不灭者托文以传闻也果以为能久传不废也盖亦归诸于已而已乃为之赞曰

维我普照王本自法身出光明摄方寸虚空常独耀尽三千大千无限河沙界皆佛慧照中夫是之谓普衆生宿业重展转动迷误愿佛垂慈悯与除诸障碍譬如摩尼珠炯炯照浊水一作是念已业去障自空而我初不觉心目划开朗稽首释迦尊为我证明之

普照寺千佛水陆院记

普照寺自唐乾元元年至於宋数百年矣屡兴屡废淳佑戊申迨今又六十年寺之耆宿分任其责山门列庑佛殿次第兴建千佛水陆院地广费鉅衆请属之惠慈大师志新既领主席於是慨然捐衣盂营檀施寺僧元德为之分幹徒弟净恩净心闻入为之叶赞大作新之始於戊戌继奉护持之旨其事尤严越丁未乃来求记予尝记释迦殿矣固辞弗克则复之曰善必由积累而後成佛乃曰不於一佛二佛三四五佛而种善根已于百千万佛而种善根何也夫计亿兆者本于一至寛乃所以为至衆也且一者何心是也心以方寸而总万物如木之有根生意函活千条万干耸壑昂霄皆自此始水陆院之义亦然昔梁武帝尝制水陆仪文三年而成几三千卷其後修设者以十六位各分八位而为上下召请则通三时法虽简施则博其上八位慈容瑞相为人敬慕下八位殊形诡状为人恐怖有善有恶有劝有戒大率以懺悔为先有能用意猛烈一悔之间诸恶荡除衆善咸具曷尝不本于一哉今惠慈於此三役位置曲当山门两廊壁涌天台圣域五百高流阁上设西方三圣铜铸千佛阁下设千叶卢舍那佛普贤文殊二大士左右壁涌水陆冥阳三界像间饰以金采眩耀衆目辉映方池而其池面菡萏敷披飞檻相属生香不断疑净土移来此地诸佛子於焉修行莫不超然得大自在皆惠慈十年之间苦心劳形之所成然亦其胷中自来积善如木有根故一人所发有此殊胜非徒极庄严事观美也盖欲使生者蠲其罪业日增福佑死者拔其幽滞免堕轮回而已世安有一念之顷不能感动鬼神而能普济含灵功德无量遍河沙界乎惠慈得之矣铭曰

我观人心内有善元无恶颠迷彼弗知往往路头错尔时诸天人一切诸菩萨忽现慈善相与衆共说法法皆由心造罪亦由心起心起罪一空各已得度已衆生地狱衆六道阿修罗随佛

登天堂只在一刹那

澹轩记

燕山乔侯扁所居轩曰澹参政左山商公挺实名而书之因来寄声俾为之记顾某耄愴不能为役而乔侯之意友朋之属不得以辞澹之义大矣尝试求之蒙庄氏外篇其刻意则曰澹然无极而衆美从之缮性则曰古之人在混茫之中与一世而得澹漠知北游则曰相与无为乎澹而静乎而刻意之言为无备盖始澹终言淡中言恬三言者虽若不同其致则一实相为用焉夫惟澹然後能无极而衆美从是故夫平易恬淡则忧患不能入邪气不能袭德全而神不亏言恬者如此虚无恬淡则合乎天性纯粹而不杂静一而不变淡而无为动而以天行言淡者又如此一澹之中衆美咸具乔侯名轩於焉取义不亦善乎然蒙庄则曰此乃养神之道非朝廷之士尊主强国之人之所好也惟是乔侯入则郎省户出则赞藩方今又怀澄江丈二组有社有民诚朝廷之士尊主强国之人而惟澹是好独何欤予窃谓人生而静以上不容说澹庶乎近之自朴散淳浇习俗破荡功名富贵之役劳吾形声色滋味之奉汨吾神攻者衆存者寡惟欲虚徐其貌容与其意而自以为澹事物之来未有不丛脞胶扰失其故常者无他神不全故也神无为妙万物曷尝沦於空虚同於无用哉夫存神以致用易说也岂惟蒙庄贤哉乔侯日坐澹轩因名思义恬无嗜好焚香读易参玩爻象以洗其心何其澹手抄经史左右森罗吟咏其间寄兴简雅何其澹庭空月朗神闲志定素琴横膝大音希声何其澹所养愈深则所存愈澹神不亏而用不烦矣昔曹相国避堂舍盖师用其说从民之欲慎以无为且去刻深吏而进谨厚长者清静宁一天下实受其福所谓朝廷之士尊主强国之人非耶敢以是记澹轩乔侯名篋成字仲山甫云乙巳六月二十五日记

简斋记

人之有宗族犹水之有源委木之有根干其所从来远矣司马子长班孟坚皆尝自叙李翱及旧史皆称韩氏自叙其先本汉司空稜颍川人後徙陈留中昌黎韩文公之先世也世之自序率本诸此惟陈氏本京人继徙眉之青神太常公徙雒阳长子忱京东转运使靖康中运使子慈州司士参军挥避地蒲之猗氏遂家焉简斋则太常次子恂之孙也靖康南来绍兴间参知政事以疾请去除知政殿学士知湖州归老乌墩之精舍既没遂窆於归安县广德乡上强里之岩山南北隔絶二百五十余年两房子孙簪纓不絶但不复相闻区宇混一以来参军之五世孙损斋公来为浙东廉访使即是参政之五世孙屋访损斋浙东叙兄弟焉离而复合夫岂偶然然损斋慨念水木本源自浙东谒告来霅拜简斋之墓汉人以过家人冢为荣公之此行盖为得之俾予识其颠末将刻石列之冢祠予与简斋之先俱蜀人今寓於霅窃嘉公尊祖敬宗之义不敢以固陋辞云

新庙记

鬼神之德体物而不可遗诚而不可揜所谓造化之迹也故社稷有祈有报有由辟而山陵川谷丘陵能出云为风雨民所取材用亦得祠焉未有宗而不感感而不通者世弗烛厥理或沦

虛幻或涉怪誣事神之義戾于古矣越上虞縣四十五里是為廣利侯廟崇岡列峙大溪橫陳乃衆流所匯閼蓄精佑前有二石筍東南有二龍湫禱禱必應其民無水旱之憂宋熙寧八年制以神聰明正直庇於一方供民之求如影響特封廣利侯實協古道太守趙公拚紀其事于石使君祠事益恭如制書侯蓋石晉之方石聖官而吳越錢氏所封通澤將軍也按唐乾寧三年錢鏐以兵渡江誅董昌遂并有越歷五代至宋初八十四年雖通職貢奉正朔猶自封其境內諸神故侯有此號然歲無所考舊記乾德二年邑令盧某禱而獲應其得封殆斯時乎又十七年錢氏始入朝又九十七年始去錢氏舊號二百年間略可考者如此而晉非典午之晉則明甚建炎省方過縣而趨四明義旅險扈見空中旗幟有若廣利侯之號此其尤卓異者也廟舊在石筍下紹興辛亥始更面勢迄今又將百有餘年日毀弗不治荐爵無所前嘗護他役神弗顧答歲在乙未里儒金應辰慨念古誼興任之于是金夢桂潘行孫分其職僧處恭總其施若廟寢若門庑次第一新崇閼嚴翼軼于舊觀揭?妥靈近遠來會歲復大穰嘉氣時效呼舞載道惟神功是贊以某異時嘗使本道其治在越粗無愧于神惟民使來請記惟侯開五季能保扞茲邑民於兵革搶攘中以俟平一膺荷寵靈廟食其土有感必通惠利廣矣雖中更多故而神之昭明發見着在人心如一日廟貌載新敬事自今始宜有紀述次推獻公辭弗獲乃推迹本原嗣書之用侈神之休烈昭示方來無有窮極

陵陽集卷十一

卷十二

<集部,别集类,南宋建炎至德佑,牟氏陵阳集>

钦定四库全书

陵阳集卷十二

元 牟巘 撰

序

顾伯玉文藁序

士散久矣卓犖非常者负恃其能不肯辄俛首从流俗时又无大科异等以得诸徒区区建数尺之竿悬一鲂之饵而欲待横江之鱣不已疏乎且羣举茂异岁一人美名盛节也孰不以为希濶难逢而幸一值焉然不闻羣刺史劝为之驾县次续食与计偕又不闻公车朝奏而暮及故士始而奋继而疑且忌造端宏大而其毕也小事之不可料每如此?李顾文琛伯玉岂非所谓卓犖非常者欤年弱冠着文名实在是选勇不自制一旦蹶屣走数千里新丰逆旅斗酒独酌解橐出所为文类进卷行卷者写之生纸以干气象是时伯玉年少意鋭如川之方至太阿之出匣三军之负气其视一世为何如濡留两载执我仇仇亦不我力倦游以归鼂董公孙皆前为博士乃冠其科伯玉岂有不能正使须试而後用何至参差回薄今犹在羣博士下予滋所不解或者曰伯玉论太高文太奇尝称作伤已赋以为杂之退之子厚悯已惩咎诸赋殆不可复辨又尝上书光范以为世无苏明允不当在弟子之列其辞骖然无所谓逊宁知不取造物者所恶忌耶予观自昔文人往往高自标树范晔谓吾诸论放纵实天下奇作其中合者不减过秦陆机谓闻伦父欲作三都赋待成当覆酒甕杜审言谓吾文奇当得屈宋作衙官虽昌黎亦曰世无孔子不当在弟子之列何独以尤伯玉造物非忌能者意者磨礲涵养老其英华而大其器业诚所以厚伯玉也今伯玉学日新文日盛必将尽穷天下正理尽备古文衆制斯名世而後止命之通塞科之大小要不必深计伯玉久交予壻张栻又辱交予子应龙携文过之若以古道相存取予既耄昏平生多爱奇气习略尽无以知伯玉姑论其大者而归其编

送梅君遇入龙虎山序

梅君遇居澄江有诗书之业水石之胜以贫故不能不出从斗禄奔走尘埃鞅掌独劳非其所乐一旦赋诗拂衣径去何其见之高志之决也自号云水道人忽又弃其家入勾曲山为道士布褐芒屨霞餐芝茹见而识之者相与劳苦辄笑而不答尚喜为诗好风凉月时复朗吟能自道其意近寄声云当繇柯阜出水谿以访龙虎之仙山而赠言者颇衆予老病日侵强食息人间世旦暮且尽欲附六翮从之不可得可恨可恨君遇其子真之苗裔耶仙山乃骑麟繫凤霓旌绛节之所上下而往来是行也安知不与子真神遇幸为我问之曰自去九江隐吴市门翩

然遐举为仙果乐否虽无妻子累然平生一念惓惓忧国能遂忘却千载之下谁与论此意颇为我道尔笑否

文子序

禹受计於会稽会稽会计也武康计筹山因计然尝度地於此而得名然其义固有所本范蠡师计然见於史记顔师古以为与孔子同时是也其书曰文子者有与平王问答语徐灵甫遂以为周平王时人则误甚刘向着录文子书九篇耳李暹所注乃十二篇疑不能无附托其间或谓乃楚之平王楚越相强平王时楚事日非子胥既奔吴而计然亦去楚间道适越耶不可考矣南谷杜君辨博而笃实恬静而疏通其能可以用世而其志果於遯世虽尝领兰台珍馆亦复舍去筑披云之庵於计筹山上燕处从容取文子书及其事之散见它书者会粹而刻之三代古书遗迹一旦震发於湮没之余真山林一大奇事予观自昔财计之臣鲜有能自全者计然之策范蠡略用之於越十年生聚既以报吴乃飘然远隐竟免於乌喙之毒手而图谍相便计然乃神仙得道人【阙】

已盖计然尝受於老子者也夫善计不用筹策此岂区区废居操纵从事於鞭算之末乎不贵难得之货不舍俭且嗇不以不足奉有余生财而不有成功而不居若是者盖几乎道固已超然於利害祸福之外而世之拥货专利者往往违天时竭地利自谓以心计析秋毫不知正犯道家之所深忌祇以自贻殃祸覆辙相寻曾莫之悟可叹也南谷尝注老子得其宗旨又粹此书俾与师说并行其警世切矣学者合而观之可也虽然书徒糟粕旷洞遐想沆寥虚间胷中系累云扫雾除岂不一快然者哉又安得从南谷君登筹峯望玄墟求鸱夷子所以泛湖之处

杜南谷筹峯真率录序

百世在吾前千万世在吾後求为可传而後有以传琅函羽葆典领名山则夫章既往而垂方来弗可略已此筹峯真率录所为作也计筹山之阳夙有灵迹周计然子文子开其先晋太极左仙公葛玄继其後虽年禩云邈而斗坛丹井犹可寻越前朝南渡杨武公茂勲请葺常构斋宇以奉家祠香火欧阳公故实也未几复为报德昇元之观命毫人洞微先生祖常主其席遂当左仙处号重以德壽宫亲御宝跗锡之华扁昭回云汉焜耀林泉式克至於今粤岁某甲当涂杜道坚实来上距祖君十二代然才百年而兵革之余次第经理为力盖有甚难祖君时者矣厥既扞卫其樵牧以妥以宁则倒廩以賑荒山巔涧隈耄稚赖以活因兴敝举废一新之百废具举类无不可传者顾前源源委世次未有纪用为大欠乃为真率录裒其名氏列诸左方俾後有考焉夫衆万不齐本其初一真而已真则一而不二纯而不杂至实而无妄故真心存则真气聚真气聚则真脉永後之人尚思杜君之所用心迺续之持保之其可传者将与此山相为无穷计然援范蠡传最为端的不系於此山故不书

周公谨齐东野语序

野史杂录尚矣疑传疑信传信为史者网罗散失率多取焉否则参稽互质焉张象谓李林甫

水山开元錄中语治监取之他若壶关录乐天乐甫无微不考庄宗还三矢於庙虽五代史顾不取唐史如高祖字叔德则见於唐书直笔姚崇十事要说则见於昇平元记室耆次相张齐丘失於详考不免承明皇杂录之误续长编号为谨严乃以湘山语录附见开宝之末建绍以後曾布日录蔡儻後补初不以人废而秀水闲居之类系年要录亦颇及之然皆随事考析或为疑词故不足以累其书昔名臣言行录之始出东莱贻书晦翁以为尚多考订商略者愿相与讨论大抵皆此意或谓建隆遗事涑水记闻邵氏闻见录马永年元城语录等书若有所去取其间则前辈嘉言善行之在人耳口相传以习者所存殆无几是又不可不知也余病卧对墙壁平生结习扫除略尽每闻人谈旧章故实往往面热汗下已为椎鲁木僵人周公谨忽以齐东野语示余岂尚以故意待之耶公谨生长见闻博识强记诵之牒存於篋以为是编所资取者衆矣其言近代事特详盖有余之所未闻或闻而不尽同者乃自托於野何居文胜质则史质胜文则野与其史也宁野野固非所病也况礼失求之野谋之野而获何独史而不然他日任笔削者傥有取诎不能补史氏之缺而发其所讳乎卷中载脱鞬图赞先君子之遗事也呜呼宝佑开庆之间奸邪小人奴事熏腐中外相应以丑正诬善之说欺君误国驯至不可为识者推原祸本未尝不太息於斯因揽涕书於卷末

仇山邨诗集序

观水必於海观其会也李杜其诗之会乎非精能之至未易据其会而擅其名山村仇君仁近尝有辛丑出西岳诗适从何来而欲效渊明耶自此亦皆以甲子书似此例者甚衆而世独喜言渊明盖渊明知甲子凡十二诗自叙其生平出处本末略备庚子镇东参军使都已有静想田园好人间良可辞之语辛丑还江陵中途欲投冠归故墟以申前志乙巳建参军使都则其田园日梦想其意愈迫矣是秋去为彭泽令八十余日遂赋归去来羲熙元年也其使事往来及留上京还旧居皆在此六年中自此不复出乙巳至丙辰又十二年庚戌西田曰遥遥沮溺心丙辰下濮田畬曰遥谢荷蓑翁则往而不返致命遂志无可复言论渊明者要当以是为断仇君自号山村有山村不愿富贵而志在田园正如已酉九日庚戌西田丙辰下濮田畬获耳是真知慕渊明者可尚已

杜南谷老子原旨序

偃仄尘坱中曾次愤愤对俗人谭益不乐南谷杜君扁舟过余议论超然有以开余意相与登道場云峯宿焉夜参半出所为老子原旨余不寐篝灯几彻晓杜君博极羣书不但发明其宗旨而已於某章曰是尧舜之事也某章又曰是禹文王武王事也其说以为老聃为柱下史所职者史而百篇之书亦史也故以书求之余惊异焉自司马子长以老韩同传千载不满河上公注老子颇及导引吐纳之类其後孙登陶弘景松灵仙人唐道士成玄英张君相辈亦皆注老子又近神仙家王辅嗣以老子解易人或非之然其解老子则初不及易至苏子由直以是谓袭明为释氏之传灯老子亦岂意其末流之至此也今杜君乃求之於帝王之书参之以帝王之事譬如披蒙昧出幽深明白正大气象顿殊岂不甚韪世未有能察杜君之用心者夫道术久裂人各私其私竞立门户甚至保残护缺以相非诋莫肯旷然舍已求为真是之归杜君虽自号原旨而不主一家惟理是同惟经是从惟正是宗务使天下後世无所致疑於其师之

说其用心盖若此可谓弘也已岂固与原道异哉余固陋於原旨未深究姑论其大意云尔

送文心之钓台山长序

子陵口占尺机磨切鼎铉怀仁辅义天下悦之两语十四字平生所学正在此光武夙同研席乃诤曰狂奴故态何耶使肯幡然相助为理必将以仁义尧舜其君建武之治当不止随世就功而已久要刘文叔已在子陵剂量中陛下差增於往盖深寓其不满之意士固有志又安能自贬其学以从人哉河水不鱼母落吾事子陵可谓不负所学矣钓台距水极远磴道转山腹乃至与顾野王所记水边有平石临水者若稍殊然壤断境绝真足以隐噫南阳帝乡寂寥千载子陵此地乃遂建精舍聚生徒列於学宫益知太虚浮云功业要有尽而君子之学殆山逾高而水逾长也古涪文心之为山长将行求予言辄书此以贻之心之颖异绝人靡不通贯曩时父子兄弟自为师友盖甚乐今去而之山水荒寒幽寂之处尤可静坐读书暇则登招隐阁羊裘轩从容吟啸其乐未有艾也予尝欲取所谓十四字者大书刻岩间而不果心之尚有意乎

张仲实诗藁序

始予闻张仲实名未之识颇曾见其诗仲实生王侯家不有其贵富力学自课如诸生间关多难度无所展用始肆意於诗间之山水穷绝处吟哦忘日夕诗浸有声而家事落矣仲实夷然不顾建言诗不能穷人为之益力遂以诗名昌黎云不用文则已用则必尚其能者能者非它能自树立不因循是也近世士多失故常拔出流俗用文辞致声誉如仲实之能者岂因循所致哉故予决与女既来杭诸公见者问无恙外辄举手贺得佳婿比过其家书数束茶数串泊如也仲实俛首微禄时奉甘毳娱其亲而宾客日至则人人与为醺答或高谭极饮论文赋诗一不问有无其中要有过人者焉所为诗殆千余篇已传之好事犹手自删去十取三四择之严宜其为之不苟也夫以仲实迈往不羣天分高而笔力胜不肯稍从时尚必期於简洁深稳而後止譬束波澜就熨帖为力盖甚难然凡诗之病既尽去而活法精意高情雅韵亦可得而见焉余尤喜其遣兴一首善推迹原本有关伦纪而感行役谨时物往往出入少陵此非余之私言也尝观周诗所述山川草木风俗气候皆在豳岐丰镐之间至黍离而感念深矣异时少陵由长安走凤翔转同谷以入蜀次其道里所出亦皆在於西秦川诸诗至今读者犹慨然真足以继风雅而验世变仲实先秦人诗以少陵为法余閱其藁因相与根极而论云

严光大先天图义序

邵子发先天之秘不过四图然自一分而二推之至於无穷邵子以为犹根之有干干之有枝愈大则愈小愈细则愈繁而朱子亦云本是小底变成大底到那大处而变成小似非假图以明之则四图之义未易悉究是以朱子谓东北以之西南便是自否以之泰是两角尖射上与乾坤相对又谓邵子天地定位否泰反类诗八句是说方图中两交股处意欲分作四层看又谓文王八卦应地之方是邵子见得四正卦生出四角是方底意思皆若有取於图者严君养晦心通於易尝取方圆定位二图演之为四十九图毫分缕析如机织之错综经纬布置粲然

可睹而未始有所牵合穿凿大抵一本於邵子朱子之说如八卦相错一卦分八卦上下顺逆对待博易数从中起天根月窟乾坤六子纵横之类皆有以发其义遽数之不能终也自非潜玩默察先具此图於胷中安能与之脗合乎亦可谓精且详矣最後一图乃易之所谓太极邵子所谓道即太极心即太极而朱子所谓象数未形之全体也两仪四象之所由生今顾列於诸图之後严君之意自流溯源盖欲复其性初於寂然不动之时尤见先天图心法是当求之象数之外

厉瑞甫唐宋百衲集序

诗雅四言汉以来遂为五七言唐开元之际又始俪偶为律诗论者谓诗之道至是略尽殆不可复变宋百余年间乃有集句者出其不变之变欤求之回文离合双声叠韵建除郡邑名诸体无与集句类者惟联句近之但栢梁则君臣同时昌黎则朋友同席视集句远袞古作颇异焉实始於半山王公半山平生崛强执拗行新法则诋诸老为流俗作字说新经义则自春秋为断烂朝报然乃甘摭拾陈言从事集句何耶然其天姿殊絶学力至到猝然之顷不劳思惟立成数十韵对偶亲切脗合自然抑难矣四明厉君震廷瑞甫博学工诗尤喜集句合异为同易故为新大抵效半山而自有活法前後凡若干首题曰唐宋百衲集唐宋集古乐府皆在焉壬寅春闻吴兴太守东溪李侯与其友千秋李君皆有诗名唱酬甚盛慕而来谒一閱其集咨激再三亟俾募工刻之以传而辱徵予序昔李汧公以衆琴为百衲琴黄豫章以集句为百家衣直戏言耳今廷瑞精能之至所谓细意熨帖平灭尽鍼线迹而百衲之可乎吾侪寥人得一破衲须蒙头熟睡素无诗分何敢言集句然亦能知其用力之难非一朝一夕因为识梗槩如此且以见君子成人之美焉东溪名岳千秋名昌龄

送俞观光序

俞君观光自新昌絶涛江访苕霅望其容倾而整听其论辨而博诵其诗雅而洁以思学名其斋盖名御史默斋公之诸孙也曩余尝得侍默斋同朝间者濶焉见观光如见默斋观光以选为山阴教谕乃古者乡校党庠之任虽地若分於异县而教实本於一乡其齿位父兄也游从师友也占毕子弟也论议月旦也固未占已孚然予尝上下世变自典午过江衣冠之人东晋往往皆在山陰而王谢诸人惟谭玄理慕风流道则未之闻也旷数百载先朝建炎再值南渡於是尹先生以辞经筵得谢而来吕太史以省侍曾文清公而来朱晦翁以常平使者救荒而来後先相望此邦遂为道学渊源之地而士亦知所推尊由濂洛泝洙泗江左风尚为之丕变非前时之山陰也气数回复诚不意百年之间绪言日泯东州文物夜艾星稀默斋公独岿然以身任道行年九十视听不衰方且立训传俟来世岂非天相斯文使之耄期称道以兴絶学乎虽藏书未肯轻出窃意观光自有得於亲授密传之际是行也升堂皇集衿佩必将发其异闻与学者共乡之教即家之教庶几渊源所自犹可考习俗所移犹可回当仁幸毋逊焉谈玄理而尚风流夫我则不暇

张氏学古斋唱和诗序

木犀之名出於近代或云即尔雅所谓檍木者樛枝偃蹇秋半始花花過於枝香過於花公等安在何相见之晚广寒宫丹桂娑婆下有顾兔乃一旦与之齐名玉局翁鸛峯蟾窟之句朝钱塘暮四海其名益盛此花盖晚遇而翁犹恐孤芳老於涧边欲采撷而佩之士含芳抱洁伏岩谷而不耀者曾不得如此花之遭自拔於凡草木翁独能无情乎张仲实氏学古斋前一枝初吐香气进林戴君师初相率诸友就饮花下时适白露降之三日天高气清余暑辟易吾仲实迈往之韵挹鸛峯翻蟾窟为花着语洒落不凡四座诗流竞发新意而丹梯癯仙颇复与花共话畴昔不喜时之艳阳而喜其风露之高寒不取花之富贵而取其山川之耿介风流赏晤胜絕一时可无涧边孤芳之叹矣予方逃疟对庭中犀两株缤纷落蕊闻诸贤雅辑慨然想见其处愧不克陪既和其诗复书此贻好事者与会和诗者一十五人师初王子庆周性之邬愿学白廷玉戴禹祖屠存博陈无逸顾伯玉王德玉丘良卿凌德甫仲实之侄如晦景忠不与会和诗者一人牟某献之父

俞好问诗藁序

诗直耳目玩耳自昔诗人往往以之鉅心搯胃甚至欲呕其心而少陵亦有良工心独苦之语夫愁劳其心以娱耳目如膏自煎盖可叹而世且竟为之悲鸣两吻不肯止岂所苦未易夺所乐耶俞君好问日以吟哦为事吾意其未免昔人之所患苦而君方夷然以笑曰吾将以是娱吾心閱其帙佳句层出不务为深刻嚙杀自有意度读之犹能使人喜岂不足陶写性情哉必有得之心而非耳目所能与者君既以东坡诗句且娱心者名其集又取林和靖暗香疎影流水公清茶浊酒之句为韵而赋之用意如此宜其有以自乐也余有忧幽之疾念不能自释今而後知诗之可以娱心奏金石破蟋蟀之吟安得与好问同其乐

送郑晋辅赴和靖书院山长序【程】

教授州选比年以来不无贤愚同滞之叹求为变通悉以委外铨注学正山长与教授同诚振淹救敝之活法也士抑遏颠顿久咸俛而就之予姻家程君晋辅前是十余年尝为吴之和靖山长矣至是复为会稽之和靖焉晋辅忠文公诸孙有文学有议论见为得人胡安定教授江湖陈后山教授徐颖徐节孝终身教授楚州初不以小大淹速论也或怪晋辅往来吴会何若是敖敖然而晋辅曾无几微见顔面间语人曰始在吴时吾年少气盛母老须禄养居之三年不见其不足年运而往欲美不待苟得一席之地温故书数斗陈继薄饭可也安所置不足其间哉况尹先生载其师说远自川陕来憩西庵已而侍经筵为侍从澹然犹在西庵也其後辞侍从老会稽亦犹在西庵也险夷一致终始一节天下尊慕吾晚学乃得再托宇下讲绪言夫何幸今絕江涛一日而至其处湖清且漣如彼泮水有蒲与荷如彼芹藻何莫非道亦何莫非教而凡能为学校累者吾书堂举无一焉尤幸之大者也亟装为行闻者壮之亲朋毕集酌酒赋诗以饯而予为之序予固三十年前主千秋鸿禧老祠官也恨不与晋辅俱东春风监水不改旧波而吾非故吾矣如有问者以是语之亦可一笑

陵阳集卷十二

卷十三

钦定四库全书

陵阳集卷十三

元 牟巘 撰

序

虞舜民礼乐韵语序

约礼之文而读之以韵语略见於仪礼士冠礼三加之辞而传亦有之曲礼所谓正尔容听必恭毋剿说毋雷同少仪所谓不窥密不旁狎不道旧故不戏色是也他如太公丹书管氏弟子职莫不然至於宾之初筵抑抑威仪相鼠有体之类则通於诗矣客歌骊驹主人歌无庸归【阙】五伯桓文宋襄楚庄秦穆亦为五伯他如朝宗遇觐会同曰六礼冠婚丧祭乡相见亦曰六礼乾坤六子曰六宗天地星河海岱亦曰六宗六经曰六艺礼乐射御书数亦曰六艺名数同而事则异见於施用必且靡杂而无章乖戾而不协矣虞君舜民名数启蒙乃自历代以来涉乎名数者皆挈其凡要序其次第而又参稽互订取其是者附注於旁其义较然如指诸掌可举而行无悖於理夫衆万不齐者数也至当归一者理也通一而毕万则殊会而归同此盖天地人物理数之总括非直童子方名日数寻行数墨之书也

赵氏族谱序

尚论其世世必有诗宗则专焉族则广焉予观自昔华宗茂族遭时多艰宗谱散亡夷於民庶往往弗克自保况其族乎刘知几作宗史又作谱考如云彭城丛亭里诸刘不承楚元王之类按据非不精然後世凡言刘氏悉曰彭城而知几之宗史谱考不复论矣苏明允作谱族又作谱引如云眉之有苏自唐神尧时郡刺史苏味道父子始以亲尽不书之类书法非不严然近世凡言甲乙氏族必曰江卿而明允之谱与族亦不复存矣可胜叹哉东平赵氏避靖康之难举族过江盖五季刘汉凤翔节度曰平章晔之後也其六世左丞公被遇政宣时犹子侍郎公受知淳熙间进用天地间吉凶同穴忧喜聚门虽皆不得老壽以终其後乃益蕃衍而十一世诸孙某又能作祖赵族谱於世变之余不亦贤乎谱有图仿年表为旁通继之以谱纲举目张？联珠贯不尽用苏谱例族无疏戚随长幼皆以次第书其散居某所则见附注外继某氏则见因亲录姓之本始则见纪原至於志状本末姻戚閥閥见闻坠轶则皆见右集与摭遗焉积数岁然後成盖衆谱所不及勤矣备矣某字仲德博学工文词其为是谱实绪成先推官之志首挈淳熙旧序具述遗训列於谱之前後尤惓惓访祖塋而念荒隔感时物而叹乔寄也勉子弟而致期望也孝慈忠厚申重恳至发於内心可以上对左丞侍郎公无所忝後之人欲知其心观其谱可也甲辰十月旦陵阳牟某书於下方云

送张纲甫之广德学正序

儒有环堵贫不愿仕啜菽饮水以事其亲诵诗读书以诲其子嘯歌一室俛仰千古亦足以乐而无求矣然吾不韪人之已知而人之知之者有不能已焉此昔人所以为亲捧檄而动色也节孝徐公后山陈公服勤劳忍贫苦坚志节惟母是养此岂有意於世而诸公知之朝廷知之节孝由望江簿教授山阳后山起布衣教授颍川节孝家山阳后山家徐徐颍相望也所以处两公者如其所自处故能内全其性分之乐外忘其富贵之诱时为歌诗以见其志节孝之崛奇后山之高简徒诗乎哉吾友张君刚甫蒋忠文公之外诸孙也性直而温学博而约诗雅而丽衆誉翕然而予深敬其事亲有笃行自其慈帏微恙未尝一日去左右汤液之调护寒燠之适节寝兴之掖扶悉自任其劳积数岁不少懈尤人情所难者前当仕越怀其牒固谢不往甘贫教学以助甘旨而诗日益多感时物咏性情非以求知也盖其师慕节孝后山者如此他日诸友相与言如刚甫之躬执苦勤尽心奉养可无三釜少报其意乎闻者用为广德学正距家最近不减山阳颍川而皆有位於学待刚甫不薄矣可以出矣至是诸友交贺且賫其行亲为喜强加餐远近皆载酒赋诗走西郊以饯予谓刚甫是行亲意也况药房翁屡荐不售发闻宜在子行矣勉之是邦风俗淳厚想侧闻高行薰善良而兴逊顺者已相寻於桐汭之间亲悦而友信怡然其春尽揽山川之美而赋之倘以寄我丁酉二月朔序

袁稼学重刊勉斋讲义序

勉斋黄文肃公讲义二十余卷大抵本朱子提纲挈领不为伎辞而简要严切深中学者陷溺沉痾之病世不可无此书旧板久废良足叹稼学袁君守儒笃学乃裒散帙为一编朝夕玩味精加讐计辍衣食合衆助重刻之以贻无穷意甚奇而工甚夥其子德远衍训嗣事绪成之自今家有其书因勉斋所讲以求朱子之言其为发明弘益多矣余昏眊废学喜见其成窃惟在三之义父师居二焉勉斋力阐师说有益世教固已无愧其门而稼学之子能继父志以广是书之传亦可尚者当牵联俱书用识其末稼学名俊明云

极圆觉上人诗禅录序

少陵云不见旻公三十年予於极圆觉上人正复尔异时尝行脚衡湘又遍游天台鴈荡倦而归休老於菁山之崇福折脚铛中煨饭过三十年终日圆觉不涉世故七十有七雪颇鹤骨精神不衰江西李後林朱约山吾邦陈本斋诸公皆与句语复来索偈极即圆圆即极屋下架屋泥中洗泥无有是处有人於此因有愤发大省悟一念之觉一觉之顷顿起上善譬如云开雾除忽然见月全体呈露迥出常情又有一人勤修积习从微至着一毫不到便成欠缺譬之月之初生至望夜十分杀满无余无欠乃见全功敢问极圆上人只此一轮月是同还是别

陈一斋诗序

永嘉自谢康乐後山川神秀皆发於诗流风浸远近代作者乃推陈止斋氏大抵诗本於学无论魏晋一斋陈君博物多识而以诗名视止斋犹曰吾家子云耳其雅言步骤山斋之十章奇

采横溢如明珠光霁一见使人惊眩不定白石鴈荡纪行则又如挹刚风浩露神情为之爽也然止斋仅白石岩一首异时读书鴈荡乃独无诗岂偶遗落耶此集人与境胜足当补处止斋尝谓以雅颂萧勺羣慝训诂则付之诸生一斋师友渊源讲明有自岂但言语之工而已温柔笃厚诗之教也一斋尝授教其乡诗之教固已行於里闾矣今合三道而主文盟所施益以广一吟一咏何莫非教因其风俗道其性情自近而远无难焉抑予闻成周之盛惟二南国风作而二南之正始变曹邨小国有匪风下泉之作乃以终南风而又继之以豳风何也盖亦止斋之意而予衰眊废学敢於一斋折衷之

费茂卿方书序

方术犹云一方之道也五方殊分风气攸限道则一而已医之为道药虽出於其手而方多传於古人故修方之家采之欲博择之欲精而其用之人欲有活法盖医者意也所以通殊途而会一理也世率谓孙思邈得龙宫玉函禁方其事甚怪及现千金方论治积聚为虚则取之雷公药治伤寒则取之仲景华佗风眩则取之徐嗣伯蒸汗则取之张苗陈廩丘莫不自有所本焉况当区宇混一如江右晋时医师所述支用存范祖耀等脚气八十余条晋宋时苏氏所习小儿诸方皆前所未见则又取其经验者用之它如崔文行度疗散西州续命之类亦所不废其博采而精择如此非胷中有活法酌古今通南北孰能会於一乎吴兴费茂卿世医也予稔知四十年矣兼明诸科博习诸经而周知南北之俗安分知足志在济人谒方求药者日踵其门悉意调护多所全活暇日博采古今明方类为若干门条分胪列无微不载往往其平日以活法用之而有明效者盖非一朝夕之力也得古千金方为多茂卿不以自私将板行於世使传之者亦能用之以活法守常而知变潜利陰益可胜悦哉昔陆宣公闭户集方伊川池上施药予窃慕而不能故茂卿是编乐为之书茂卿名某今为医学教授

缪淡圃诗文序

古人谓粹其文谓不间以诗则不俊於口不俊者属辞不得流传也此岂有风致可尚耶诗固无取於鄙朴便澁而重迟耶世人朝摹夕拟句煅字炼以为唐诗而终少风致正如傲叔孙敖衣冠而不得其抵掌谈笑之意故必有唐人风致乃有唐人诗句半山从宋次道家尽观唐百家诗平生硬掙且复执拗而诗则唐人也如万绿枝头红一点动人春色不须多千红万紫凋零後始见闲人把一枝殊有风致不类其为人则又有不可晓者合沙缪君自号淡圃风骨整峻心事笃实平日兢兢惟乃祖遗训自守文不苟作赠遗友朋以规不以颂序东流则告之以禹之行水行所无事论古罇则叹其田不井而鲁亩秦陌持论甚正及覩其诗乃更清婉句以意胜意以韵胜讽之而有遗音挹之而有余味风味蘊藉如此非唐乎虽求之刘後村潘紫岩集中亦未多见予交淡圃久不观其诗犹不能尽知淡圃则不知淡圃者多矣然徒观其诗果能尽必其所未知乎淡圃笑曰是但见吾衡气机也

郑御史序

余闻有内乐有外乐人子之事亲以志养者内乐也以禄养者外乐也是虽不能无资乎外而

未始以易乎内内者天外者人内者重外者轻也古盖有捧公府之檄者有列五鼎之养者有卿太常而去冕以导母舆者有百官回班而起居者固乐乎外矣而犹未全乎内也有教之以义方者有喜其居官贫窶者有为京兆而乐其平反者有为御史而勉其尽忠者则有以乐乎内矣而未始易乎外也非明夫内外轻重之际孰能与於斯监察御史郑君鹏南高堂有九十之母康宁而好德导江张达善序而纪之燕山史彦明传之以谗於余观其菽粟饮水有同旨甘延致名师笃教其孙以成其子之志而鹏南亦能称身受位不为苟得决狱停疑求为可生以严其母之训虽史传所称何以加诸是宜太夫人登高年膺五福以食善祥之报御史保清名分六察以对宠荣之盛不特以禄养尤能以志养庶几不以外易内不以轻易重矣达善有行谊彦明能孝养其言宜信余爰用泚笔侈其盛事云

义门和乐诗序

人有兄弟均气同体诗曰棠棣之华鄂不韡韡言其华鄂相承也鹄鹄在原兄弟急难言其首尾相应也盖友爱之谊莫切於急难之际及哀之原隰忧患既平侑尔笾豆饮酒之饫必曰兄弟既具言如是则和乐且孺矣妻子好合如鼓瑟琴必曰兄弟既翕言如是则和乐且湛矣盖友爱之情尤不忘於安宁之後棠棣之不可一日废也如此德清孙氏上世以来兄弟同居见谓义门至明之微之其义愈笃中更忧患散而复聚不但饮食之适室家之好一如承平时又作和乐之堂取义棠棣昆仲皓首嬉娱其间和而後乐申其燕好养其恩义未始忘忧患时也庶能知是诗之旨矣於是姁戚称其睦乡里纪其顺郡邑传闻旌门以表异之士大夫嘉叹作诗以宠绥之流闻四方以为盛事其母党俞好问萃为一帙以序属予伊川谓棠棣之诗章多句少多者极其郑重少者各陈一义诸贤固皆得之顾鄙陋之辞猥簪其列似若不类况又冒书编端能无慙乎

陈公辅听雨亭诗序

宣城陈君德亲平生业儒投老陵阳峯下韬光铲采人不知胷中有国子监也独喜聚书教子公辅能承其志好古博雅汎埽一室右置书册间以名画古彝器其前种巨竹列湖嵌中置一亭名以听雨读书之暇雨则卧而听之用意殊不俗此数物者得其一已足为胜况兼之听雨事自韦苏州至韩杜皮陆苏黄往往而有他未暇悉数惟王元之齐安竹楼尽掩六宜而以夏宜急雨有瀑布声为首此备物具美意者名亭盖慕元之也韩仲文向予言恨耄矣无繇至其处然听雨一也所以听则殊公辅荣赞宪幕方为世用非山亭听雨时秋禾耳生点滴皆愁颇念疲农乎泥深路滑竹鸡声苦颇念远役乎风定云黑牀牀屋漏颇念寒士乎蒙庄谓听以耳不若听以心听以心不若听以气敢以是为听雨亭之助

吴信之茶提举序

唐中叶以来顾渚茶岁造万八千斤谓之贡焙大历五年始有进奉之名建中二年袁高为郡尝进三百六十串高节尚慷慨在掖垣缴贡有回天力予颇疑其此举因考之则其来日久非自高始高不过循前比而已况又作诗一章刻石摹本同进实寓规讽非专为进奉也其後每

遇进茶湖常两郡守皆会顾渚张宴赋诗遂成故事先朝重建茗顾渚寥寂几三百载厥惟今日复治金沙泉修唐贡焙设湖常等处茶园提举领之其事益重矣吴信之明敏详练尝任茶所遂用为副既满升同益习茶事通民情十余年间讲求利病多所建白深山穷谷之退不知有官府也贡焙之纲以时而进甚称其职而人户亦有茗椀茶话之乐最书上彻将专权任以究厥功尤人情所善者信之尝为余言茶之香味性情地之阴阳向背与其采摘之宜先後之际曲尽物理得所未闻可以为玉川子诗及沈存中笔谈补注予用是益知其能虽然玉川意不在於先春抽出黄金芽纱帽笼头自煎吃而在於巔崖苍生受辛苦到头合得苏息否之语信之行且再为顾渚来愿毋忘此诗

挂蓑集序

久不见俞好问忽自余杭携王居正挂蓑集过我蓬庐试閱之亶亶乎何其辞之贍也意者取之胷中施之笔下如出自然无一艰澁寒俭态而其间多有佳处如西园三十六韵好事而又有济胜之具宜其能自乐其乐遇好泉石则吟好风月则吟好朋友则吟李观复邓善之仇仁近皆有往还言句而山村尤密熟予甚隼永山村诗句居正欲挂渔蓑於其诗境大是奇事虚谷老子遂以王蓑衣称之可知其人矣江上晚来堪画处渔人披得一蓑归故自佳也不如孤舟蓑笠翁独钓寒江雪不犯手脚自然图画炎天畏暑火云如山辄以此书挂蓑集如何如何

唐棣诗序

予卧蓬庐中忽唐棣者袖诗来见名甚异貌甚臞词甚敏问其年甫弱冠问其师则心居子陈泰初也泰初名家宿儒何幸亲薰炙之教之读书作诗以磨砢其气质而唐棣銳有立志不肯碌碌随俗用力甚勤亦可喜者又闻作诗之暇舐笔和墨留意於画尝作二图可丈余幅尺殊广而岩崖草树心目俱到有非年少初学所能办予益喜之但颇疑诗与画二者难并进或者曰诗乃有声画画乃无声诗不必差殊观要当养其精神老其岁月多读好诗则诗自好多閱好画则画自好其进未可量也予曰然因书以勉之

张竹山文藁序

予闻竹山张君名久涂辙参差未及识菊存媚作秦张谱於忠烈王从子恭庄公四世下特书竹山予用是益知君龙集已亥竹山来霅始胥会风骨森秀襟袍卓犖殊非侯门富贵中人因相共剧谈颇及往时中朝羣叟西州同社所见闻知前日事为之慨然且叹其白叟滯留之不遇也几间有文一编题其上曰慚藁好奇似太过予惊焉自昔文人多护短家有敝帚享之千金苦不自知小慚小好大慚大好退之自知之自言之信斯言也中乡贡其小慚乎中进士第其大慚乎宏词不尽中其大慚而尚有未大者乎退之固曰观所试与得之之文吾亦无甚愧焉退之果慚乎否母乃有激而言乎否则直戏耳竹山久谢塲屋其为未尝不欲步骤古作而犹慚藁云者激乎戏乎予故曰好奇似太过也大率喜持论者文不必优优为文者理不必胜以予观竹山议论辨博倾四坐洒洒可听及伸纸操笔一挥累幅澜翻条畅足以发其意之所欲言然不为支词曼说言言皆理自本自根而尤好言易若铭若赞列之座右验之躬行日用

无可愧竹山而既尽得之矣非徒追琢时好而使人以为好者也夫易有圣人之精有圣人之蕴予盖不能言甚惭於竹山或曰惭之一字万善从出一惭之不忍终身惭乎迨我暇矣将於竹山乎叩之以祛我惑吾之惭庶几其少解也

送王仲敏山长之明道书院序

明道先生尝谓一命之士苟存心爱物必有所济其主上元簿遇螭黏鸟雀者折其竿虽哲人细事推是心也得时行道决不忍一物之失其所此盖异时争新法张本眇然一主簿位至卑乃独以学道爱人为心彼为天子宰开塞轻重之权震动一世顾甘心功利以新法毒天下其用心何啻霄壤异岂非学术之误耶新经义之害甚於清谈王介甫之罪浮於王夷甫半山寂寥过者未尝不发新亭之叹先生官稍达论愈忤虽不能少行其志如上元时然天下後世皆以斯道斯民之责归先生至今祠享之然则学者宜何择焉王君仲敏为明道书院山长诸友赋诗饯别余衰病不能出辄以学道爱人为勉仲敏趋向正诗笔高今挈挈为先生来必将益崇其学而求其用心之所在远到未可量也

唐月心诗序

唐以诗取士士皆工於诗盖有工而不遇者矣场屋既废为诗者乃更加多然工拙深浅有定评名实之间要不可眩正不待决得失一夫目也唐师善自号月心旧时举子业修而学博去为诗人诗尤工世人往往苦心竭蹶求合唐诗而卒不近师善则优为之句意至到音节谐美处活脱唐诗声名方猎猎以起未为工而不遇也况西涧以来崔李继至而交说耶予手其编不能置者昔李诚公以诗送质肃公盖用进退韵世传为落韵诗者殆非质肃语特高名千古去国一身在此诗为失对耳故陈简斋亦欲学诗者以唐诗掇入少陵步骤墨中大抵句律是尚师善以质肃之孙参简斋之语千古一月当印此心

陵阳集卷十三

卷十四

钦定四库全书

陵阳集卷十四

元 牟巘 撰

序

高景仁诗藁序

商颂曰既和且平依我磬声又曰亦有和羹既戒既平予读书至此然後知和平者物之极致不但声之与味为然虽诗亦然夫和平之词恬淡而难工非用力之深孰能知声外之声味外之味而造夫诗颂之所谓和且平者乎故精能之至及造和平此乃诗之极致也福唐高景仁存其序藁自谓平生刻意於诗既去其谐俗者又去其乏和平之韵者所存者仅十之二三焉何其择之精也景仁天藻濬发盖异时举子之雄一旦敛芒锜束?墨以为小诗岂所甚难然犹乞乞用力如此景仁其亦知恬淡之难而又欲造乎和平之极致焉耳天下惟实病难除实德难进自昔诗人护其愚是其一蔽未有能自知其诗之实病也景仁识老见定独能以心为权度身为鍼艾公其是非严其去取无一毫自私自恕之心勇去其诗之未和未平者弗少靳实病除则实德进今观其诗金石相宣盐梅相济大抵皆出於和平诗之进之之验也夫岂特诗为然诗之进德之进盖予於景仁之存藁而得其为人

郎晋卿归涿州奉亲求诸公诗成牛腰轴矣为序以勉其行

皇皇求仁义与皇皇求财利虽若同而所以求之之意则有不同焉涿州郎晋卿敝衣破履奔走四方皇皇然若有求何如此其极也非求财利也求诗也非求诗也求仁义也何也晋卿之亲年高矣澹无嗜好独喜吟诗故晋卿求诗急於求财利所得已数千首其意未渠已将裒成巨帙携归为亲寿以承其志而悦其心迹之事父亦仁义而已矣其来吴兴赵子昂集贤昆仲首为之赋继之者甚衆予倩张仲实亦自杭以其诗来求予诗且求为序峻拒而请益勤惟古诗南陔白华华黍三篇有其义而无其辞义者南陔孝子相戒以养白华孝子之洁白华黍时和岁丰宜其黍稷是也即所谓序也三篇之义本与衆篇之义合编不冠於三篇之首是以三篇亡其辞而其义独存赖其义之存因以知三篇之为某事而作也序之於诗岂不重乎今晋卿之诗且数千首一是以为其亲莫非南陔白华之辞不待序而传亦明矣嘉其为亲之笃勉为序後云

潘善甫诗序

闽多诗人然不可以一概论昔晦翁师刘屏山东莱师林艾轩其渊源皆在闽晦翁送胡籍溪

诗屏山和之艾轩题渔梁诗东莱和之屏山固非诗人诗也晦翁罢经筵敖臞庵为太学诸生作追送赋甲寅行吊甚哀而愤愈激毁江湖集婴奇祸而名愈高为诗人重矣潘紫岩早岁已奇人谓太白子瞻後身及奉大对极言巴陵虽策名第三人而立朝才数日摈远流落犹论巴陵不置以终其身铭其藏者八百国之同不能止一士之异此世教所谓民彝其有关於国论者如此他诗人如赵仲白之流不必论而其已贵者亦不暇论紫岩尤足为诗人重矣予尝为吴之庾幕紫岩补处也所题诗在姑苏台柱每慨想其人恨不得见今乃见其从子善甫焉善甫久寓吴名弥坚实用庭坚之字素慕名节力学工於诗殆紫岩一枝之演出世之为晚唐者不锻炼以为工则糟粕以为淡刻鹄不成诗道日替善甫虽不区区为如此之诗而气脉厚格律適自有意度不见剗剗予益喜潘氏有诗人後村谓紫岩脱去笔墨畦径秀拔精妙其後益进德铲奇崛趋平粹以善甫之能加之以学为此岂难哉予尤愿善甫家法之外益求之朱吕氏闽中之渊源则不但诗人之诗而已善甫又尝为稽山山长读书讲学有所得其进盖未可量也

赠甥李松坡天瑞序

吾乡文物李氏为最盛官师公首登进士第为宗正簿有隆山易传朱晦翁多取之宰饶之德兴有惠政士民立庙封忠惠文烈公是生三子秀岩布衣召对赐第专领四朝史事至工部侍郎着述甚多东窗凤山皆登世科凤山官至参政同知枢密院而东窗止於兵部郎中独讲明道学晦翁门人黄勉斋李敬之皆推重之江东提举拯荒归奏极言史丞相不合去长子字行伯亦由太学登第为成都节度推官兼会要所检閱次子字平叔後秀岩尝修徽钦史浙东宪可谓盛矣秀岩先娶吾曾大父介壽翁之甥女也先父存斋翁实受知於秀岩故予娶其外孙女邓氏长姊亦归东窗之孙金判【字伯刚】长女又适金判之子姻好蝉联焉金判夫妻不幸早世诸孤尚幼德义其第四子【今名天瑞】也吾择师教之分俸周之曰冀其成立世异事殊流落奔走餬其口於四方既丧其妻慨然有离世絶俗意闻有王野愚结庵於塘头能通道书持戒极谨乃往依之野愚喜而受尽语以其所闻甥颇攻苦食淡服勤不懈一日来拜具言其事予语之曰人生一世流转尘海中何有底止倘有一把茅可盖头一棱田可种菜啜粟饮水便了此生况又有所主归闻所未闻乎行矣勉之清虚以养其气恬淡以全其真坚苦以持其行此在汝师法中无俟予言因书其先世文献本末遣之薪水之暇尚念之勿忘吾七十有六矣过门幸时问其死生可也

说

家自观字说

颐山先生名其孙曰颐孙於是性存老人以自观字之洞山遗老申颐山之意合孟氏之说以训之重规叠矩见於家庭之间自观亦既朝夕奉以从事而性存以书抵予曰吾两家相好子生孙孙又生子独可无以语吾儿乎予异时尝见颐山西湖之上从容留语出所为颐山书院记示余曰此名虽示不忘家山而象则易也盖略如洞山所云今三十七年矣因追念慨然识眊学落顾未知为自观言者夫名以宾实字以尊名是卦也濂溪尝以之更名而字曰茂叔则

茂实之义犹从旧名伊川又尝以之为名而字曰正叔则养正之义始与名叶自观之字其诸慕程者欬伟哉子之祖若父之进子於学也予观鼎井取象於物皆言养不言观颐取象於物乃言养必言观盖观有颐諝省察之义观於物固未若观於身之近而易知也颐首言养正则吉而观颐则观所养也自求口食则观其自养也观者非他亦观其正与未正而已谨言语节饮食养之事也於出入之际谨之节之则得其正矣舍尔灵龟观我朵颐观之事也於方动之初舍彼从此则失於不正矣伊川之传各於言下互相发明反覆致意尤莫切於观象以养其身谨言语以养其德节饮食以养其体之三言余切以为此乃伊川之大字说也自观盖亦以是观之惟侍郎公文学行谊重海内而家教家严传之颐山又传之性存皆有闻於时传於後自观生长闻见姿质美气象谨操趣正已足为佳子弟方且孜孜於学深惟自观之义求以不负名祖名父之训其进未有艾也自者自用其力非他人所能与余诵伊川之传相与共讲焉继自今学益成见益老学益充正吉之福益厚予於自观乎观之矣

林清甫字说

永嘉林氏德芳家世本儒有擢科第者弱冠慕道风骨秀爽趣向恬淡其师杜南谷字之曰清甫求予为之说予谓清甫自子之为此名名已从子而不去子字又从子之名而不去虽惟予之说子与子之名若字未始不相从子而不去而何以予言为且为子之说者曰天得一以清一者何而得天之以清也或曰此在吾说中一者无极而太极者也子之说同乎否乎吾盖不得而知徒见夫浑沦既剖物之轻清而上浮者其色苍然其状杳然其气溟滓然遂以为天天无形也而不能以无形也於是其澄然者为河汉湛然者为雨露莹然者为雪月而泠然为风又遂以此为天之清其所以清者果一乎果太极乎天且不能自知夫孰从而知之吾无以语子也然是清也流行乎天地之间人之有值焉盖寡今子离尘块脱滋垢以游於旷浪之野汗漫之乡所谓清者其必将值而有得焉字曰清甫不亦可乎清甫曰吾将食六气茹三秀以养其清濯沧浪以激其清游神之庭以畅其清转蛄蛭吓腐鼠者不足以滓吾之清伐毛洗髓者始足以雪吾之清而佯狂垢秽者又适足以混吾之清毋宁为灵均之独清其庶几东郭顺子之清真可乎余曰可也归而求之南谷有余师遂书以为说

碧潭说

梅溪刘公之孙景渊甫自号碧潭盖寒山子诗语也所谓无物堪比伦教我如何说者亦不为未见但以指晶荧作用者而言与程子人生而静以上不容说之意虽同而实异夫静极而动主静工夫又在此意後大率渣滓去得尽净则彻上彻下可达天德明镜止水同此一理碧潭两字彼固不得而专之也学者於此须见得动静互根体用一源则卑不溺於物欲高不沦於空寂矣否则殆不免指心见性之偏也碧潭妙龄而静忘其昔日之富贵安贫读书倘念虑澄然之际知其所用力之地不为外物回夺变迁则墨言而儒行亦可也晦翁晚岁颇取寒山子诗予不能记此诗在其间否姑以意言如此然亦赘矣观者当有以识之

褚无隐说

吴兴褚君自号无隐属予为之说予惟夫子之言事师事君则曰无隐他日语二三子则曰吾无隐乎尔而於事父则为父隐独何如无隐曰言虽若不同而义各有攸当无隐固也有隐亦所以为无隐也未始不同若夫子之自处则天也夫何隐之有然非学者事也惟近取节於无隐之二字求无愧吾心而已且人心本坦荡孰为充塞使人一旦视之秘於鬼神不可俄而度岂其情也哉吾平生不敢内其心行年踰五十惟恐纖芥留藏以为吝悔益愿以此自警予窃谓此亦夫子意也夫言及之而不言夫子犹以为隐以为愆而况巧言令色鲜仁色厉而内荏匿怨而友其人者乎夫子固恶夫人之有隐也大抵天地间公平正大疏通洞达者为阳为善为君子回护缭绕深黑幽闇者为隐为恶为小人莫不曰我为善也然而阳善阴恶人莫不曰我君子也然阳为君子阴为小人若是则又不可知则能知其情有不知其所趋者往往遂判心迹为二途故予於无隐深有取虽其质直不为缘饰不为崖岸阻深言必由衷洞见底里不信世间有所谓面谄腹毒衷甲笑刃事人皆以长者称之每延致名世以孝悌忠信教其子若孙栽培方寸间乃子孙无穷地此无隐所以无愧造物流庆未艾者也年益以高犹勤勤揭无隐之义直欲披肝膈以示人予愧无能发其意间里往还今可以空怀而语开口而笑矣

怡云说

予病卧空斋云林在望疲曳不能去忽有剥啄声推枕起视乃空隐谷公号梅方者自长兴得来为之喜出其诗编见上有怡云字尤为之喜云之於物乃天地至和氤氲之气骚人墨客竞喜吟咏自太和气散而云日以醺朝朝暮暮阳台之下其云荡白衣苍狗斯须变灭其云薄上下四方以从东野其云芳碧云暮合佳人未来其云愁终南一片裹向鹿门其云孤若是者其去太和愈远惟陶隐居山中之云只可自怡悦不堪持赠君翕兮蔼兮融兮郁兮含乎太和与造物为徒最可喜岂非梅方所谓怡云者欤师居浮云之山其心漠然无所起其容淡然无所滞其意怡然无所忧其诗盖亦似之不剗刻不推敲不鉅心而擢胃信乎有得於怡云者也然隐居不屑於持寄梅方之云乃托於诗流旷逸之地如予之昏眊鄙朴者亦得而玩之何耶梅方曰吾终日吟诗而吾诗未尝作也到处见云则吾之云未尝出也又安知自之与他予笑曰然子之诗曰山好野云多高卧白云归而求之可也此真用意会心句也他日见芻林不妨举似

觉非斋说

庐林邓君觉非过余苕霅上从容言曰吾乡昔有平亭某氏讼者已而交逊所争地以为乡饮酒之堂而先正存斋翁实篆其楣楹幼时从父兄与观礼焉至今犹想见其处也惟先人淳佑壬寅由史馆通守庐陵郡之士日相从讲学间因其求命笔大书以记其山川而存其风俗遺蹟往往而有甲子且一周而觉非乃能追忆乡饮堂事如昨日闻之重感叹且嘉觉非去其乡久而不忘本如此觉非之先素号大族所居在甘泉门建炎初隆佑太后如章贡驻辇其家故门陞特异至觉非之祖学者之先生文学行谊为乡里州县之所尊敬有史记音义佩觿录等集行於时见於中斋邓公所记者尚可考觉非今始居吴门室仅环堵以其字字其斋赵侯子昂甫为作籀史觉非斋三字复求予言曰将以助观省昔卫蘧行年五十而知四十九年非一念之觉实为之至渊明赋归去来因有觉今是而昨非之语而觉之早亦未如卫蘧渊明二公

皆能自觉其非者诚可敬可仰此两字遂为後世学者改过迁善之大机括大鍼砭盖天下莫善於觉莫不善於不自觉其非觉则知知则改不觉不知何改之有是遂非也迷复也医书云痿痹不仁正以其疾痛痾痒之不知沉痼之极耳故先儒以觉言仁最为切近觉之一字本出於吾书或者窃之彼既以性为幻不知所觉者何吾见其迷而已孔子不言觉而尝取有觉德行之诗及语顔子又欲其视听言动随事省察介然有觉之顷知其非则勿之故一日克已复礼而归仁焉觉非之效也惟顔子足以当之觉非为贫而仕未能为渊明之高予窃谓以其知发实践下克已工夫希顔可也予老病日侵大惧堕於眊昏而不自觉何能为觉非言盍归而求之觉非之斋

程尧封静山说

人莫不乐佚游乐宴乐而仁者独乐山何取於山而乐之夫山屹然停而峙寸云触石千里霽霽而山之静自若也草木之盛有时衰落而山之静亦自若也一举目之间全体呈露岂不与吾心同一静乎而吾之所谓静者何如也人生而静以上不容说仁人心也所以主静而立人极者非礼不动复也终食无违主一也皆静也山之体也吾非乐乎山乐其静者与吾同也孔子曰仁者乐山仁者静既言仁者之体段又言仁者之性情惟深於体仁者知之不仁者不知也彼其胸次胶胶扰扰私欲万端山自陈乎前不见也见而不乐也无他静躁之不同也乐佚游乐宴乐固有以夺其所好矣或曰孟子之言仁曰火然泉达无乃与夫子异者孟子盖指仁之流行发见者而言此盖言心之苗裔而其体则未始不静也不然智者利仁亦岂自戾其说乎眉山程尧封沧洲尚书诸孙天姿明敏故能动心忍性於忧患之余以静山名其书斋曰人见其为山吾见其为仁将求其所谓静者焉予深嘉之程子尝曰静中自有春意深得仁者气象予每味斯言而其乐有不能已并以语尧封庶几为静山斋中观省之助云

汤与权静德斋说

汤氏寺丞公之孙桀字曰与权而以静德名其读书之室发其意者已详复求予语夫铢两斤石钩是谓五权名虽五而实一盖犹数语黄钟之宫於时为冬而有四时之义焉非徒块然而已故权与物均而为衡衡运生规规生圆矩其用则屡迁而不居其体则一定而不易人但见其推移往来静也而不能无动遂曰权变也殊不知物有轻重势有低昂形有圆方而所以制其轻重定其低昂而成其圆与方者则皆在乎权非至静者孰能之静诚之复所谓动贞夫一者也伊川深辟汉儒反经合道之说以为权即是经龟山则曰知时措之宜然後可与权岂固为异哉时措之宜静之动也用也权只是经动之静也体也动而无静静而无动者物动而不动静而不静者神必也动静体用而权之义乃可言周子曰定之以中正仁义而主静盖本大学知止能静之义推类而言行之以中衡也处之以正权也发之以仁规裁之以义矩也动静周流亦曷尝不定且静哉与权倘以是求之则知矩本於权权本於静而所以字其名扁其斋者皆在乎是矣予於寺丞父子夙有事分虽未识与权闻其明敏而静故愿与切磋究之

耕隐说

自昔以来士率以隐遁为高事或不同其致一也有隐於耕者长沮桀溺耦而耕是也有隐於钓者严子陵被羊裘钓於七里滩是也有隐於卜者司马季主卖卜长安市宋忠贾谊过之是也吾友俞好问之旧隣蔡道明字子诚自号耕隐其慕耦隐者欤但存方寸地留与子孙耕为此言者可谓知本矣要使其後人长留得读书种子耳吾老农也曾无寸土可以施其鉏耰於耕隐盖不胜健美因书而归之

刘耕心字说

三良刘国良甫自号耕心因俞好问来求予说予再世倅衢若有夙缘每闻衢人语辄喜况世家好学者乎耕心盖取但存方寸地留与子孙耕之义也余谓国良浙右频岁水毁田与江通波民饥无所得食旦暮沟壑不自保而国良方自耕其心之田何其色之怡而计之迂耶国良笑曰吾之田不耕种不菑畲无南阡北陌之殊无耒耜钱鏹之劳无水旱螟螣之害乃上世以来口分世业常熟之田也岁纵大歉顾视吾方寸之间其田无恙吾复何忧余然後知国良之所耕在此而不在彼天下未有耕而不种种而不生者修德以种之讲学以耨之必有事焉勿正心勿忘勿助长以养之其用力盖有百倍於农夫者矣因以鄙语为一诗以遗之云尔夕阳犹作子孙计尺寸之疆抵死争劳苦形神何日足见成田地没人耕传家旧种休教断积善心苗自会生今有刘章种田法尽除稂莠保吾成

陵阳集卷十四

卷十五

<集部,别集类,南宋建炎至德佑,牟氏陵阳集>

钦定四库全书

陵阳集卷十五

元 牟巘 撰

题跋

跋杜隐君墓铭

予假守武攸会眉山杜君来为李曹掾笃实而文同寮相好也一日怆然示予以其先隐君山庄老人龕铭因获考论隐君之为人盖庶几所谓质直而好义志仁而无恶者力学华皓不一与计偕齎志以歿李掾君乃能以科第自奋国人称愿焉是可以知隐君之教矣隐君素为鹤山魏公国博李公所知畏斋吴公南轩先生高弟也固不轻许可亦喜称隐君隐君平生所为类多可纪如不负杨大安虽古烈士殆无以过也始曦盗蜀一时诸贤义不为贼污往往避伪弃其官去而权大安军杨公震仲遂死之杨公前死以书遗其家有曰是第一郡无様子也又曰不错不错其处死从容如此予读其书未尝不为之流涕隐君盖其客也异时力白宣威上其事扬名赐庙且褒録其孤而杨公之节闻於天下虽人心公论有不可泯然实自隐君白发之也翟公不云乎一死一生乃见交情方是时杨公而既死矣寒根断绪谁复顾存隐君独不以死生为间夺匹夫之力为人所难汙暴白其忠是岂有为而为之耶呜呼杨公为不负国而隐君为不负杨公矣隐君且不负杨公使之获用其忍负国哉其後蜀变溃旅猖披隐君愤骂遭戕视杨公之死虽若有小大显晦之殊要之均不肯为不义屈意者主宾平日於死生祸福之间讲之熟而处之审矣或谓隐君之遇溃不足以死巽辞以免可也呜呼孰有杨大安之客而为贼屈者乎昔于嵩依张睢阳为张籍言巡死时顔色不乱扬扬如平常昌黎着其语後叙中千载之下读者犹凛凛有生气而嵩之名遂附睢阳以传然则隐君之于杨公法当牵聯得书惜无以告之太史氏也嵩死于仇隐君殁于溃事固不幸而适相类者然嵩死无子今杜氏有李掾君而诸孙洗洗又皆领荐斯文盖未艾此又隐君吉祥之报固非嵩所可望也予生也晚恨不及升堂拜隐君因窃识其大节於其铭之末使後之观者有以考焉是亦其子若孙之意矣

题渊明图

渊明来彭泽几何日一督邮至飘然径归高矣乃托之情在骏奔何耶士出处关世道岂真为小谅此二者要未足以论渊明也渊明既赋此辞自是不复出意固有在帝乡不可期盖其微词所寓而论者或未之察也呜呼内望旁徨修门愈邈吾生行尽去将安之亦惟安乎天命而

已奚复疑哉此又致命遂志之义与子云逝於不虞以保天命者异矣

题松苗图

尺寸之木加乎岑楼之上高乎哉不高也势也苗之於松也亦然松栢之下衆草不殖苗非加高於松也今且易置之苗居山上若助苗长者而松顾居其下则一寸之茎可以庇百尺之条矣非高也势也然是松也势虽若屈於苗而正性挺然无一毫惨沮抑鬱不自得之意此固处于非据者之所甚愧也世率谓积薪居上愈于久次之汲直七叶珥貂愈于白首之冯唐果何如耶果何如耶

题仙人楼居图

吾闻至人御风骑气与造物游直缘所见者超无所系着故其观人世楼观台榭俄然而秦倏然而汉如海市浮空烟云变?耳未知亦有丹台绛阙金城玉室五城十二楼若是区区者今舜举作此图驾言於仙笔意俱妙陶隐居中三茅而立馆又建三层之楼已处上层弟子居其中宾客至其下此殆是耶吾犹未免诘曲世间安得摄衣从之

书东坡石菖蒲赞後

周礼朝事之豆其实昌本注者以为菖蒲根切之四寸为菹四寸一握也春秋载周公阅来聘餼有昌歜注者亦以为昌歜即菖蒲菹而唐人乃谓徧检诸书传菖蒲草无别名未知其所由疑之似太过文王嗜昌歜安知非昌本而礼遂设之耶月令孟秋其味辛注者云水草之和气即昌本也既言其辛又言其和何也本草云菖蒲味辛温二者皆备与此注说合但东坡所取乃节叶坚瘦根须连络石上好事者移置盆中为几案玩如今所见者也其根安得一握四寸之长而可菹为耶况所谓水草之和气初未始言生於石上意深山穷涧之中或有如本草所云然未之见也退之云昌阳引年则又别为一名岂退之亦以为似是而非而人得以訾之耶俞好问示余以东坡石菖蒲赞因书鄙见如此以俟博物君子考焉

题赵主簿遗像

事亲以承顔为先其歿也事之如生既为木主象其中身以祭焉陈其衣物思其居处与其嗜好或求之陰或求之阳无所不至礼记曰三日斋七日戒必见所祭者则几若音容之可接焉吾之身即亲之身精神气脉相为贯属有感必通幽明无间也後世之俗生则绘其像谓之传神歿则香火奉之谓之影堂礼生非古然方其旁徨四顾思亲欲见而不得忽瞻之在前衣冠容貌宛如平生则心目之间感发深矣像亦不为徒设也昔伊川先生以为毫髮之不相似者为疑而其家自太中公以前固尝用之要为不可废曩更兵火士大夫家侈幅长幀饰以绫锦往往不能全桐川赵君必满乃独得其先主簿之遗像於东隣虽仅片纸粉墨惨淡而丰神自若盖主簿之歿以甲戌此生前所写也失于乙亥得于癸巳二十年间若有护以待其子孙而畀之非一念纯孝通于造物何以致斯耶持白其母装缣而揭之祠堂如久出乍归喜极而感

感极而潸然以悲也予闻主簿出贵胄能力学取文荐不负其父料院公之训是其有子世其传又将辑其遗事非独此而已予得之予友张刚甫因识本末遗其子若孙尚永此意于无穷云

题徐容斋荐藁

昔古灵先生陈公襄荐司马温公而下三十余人苏文忠公亦在焉其章草皆亲笔涂改勾注其旁温公亦有荐士录自至和逮熙宁凡百有六人皆公手录其外题曰举贤能亦公所作隶古也前辈荐贤报国诚笃恳切如此真可为法东平徐公琰自号容斋人有寸长片善不啻如自口出廉问浙西士之贤者多所论荐尤留意学校举学官二人焉以示劝江西李湊性学西秦张栻仲实是也於仲实称道尤至不但喜其文词言语直以高迈超卓通国体识时务者归之谓其他日成就必越伦辈可号于天下曰知己矣此其申牒之章凡更定增损于再于三而後定尤见不轻於许予也公其有慕於古灵温公欤仲实得之以示予犹记丙申岁予偶来杭容斋首访寄邸称仲实不置且贺予得壻意甚惓惓揽其遗墨已成隔世使人悲怆仲实感念知己不能已因书右方归之云

跋忠烈王传後

天生非常之人所以弭非常之变光武当四七之际中天而济大业时则有二十八将高宗值百六之厄南渡而成再造时则有十三处战功君臣相得岂非天之所授哉高宗御将同符光武维张忠烈王四将之首战功之伟者也考其本末大类好时侯耿弇盖弇起扶风而王家三阳则乡里同弇谒光武卢奴而王首事大元帅府则遇合同弇言使者从西方来欲罢兵不可聽王亦言蜡书从围城中来敌人诈谋愿勿聽皆有关於利害王郎骤至夜渡滹沱弇则合渔阳突骑以拔邯鄲苗刘甫诛仓卒航海王亦战明州城下以挫乌珠皆有关於危急存亡至於破五校破李贼皆为平剧盜破临菑破刘豫皆为败齐寇大率英雄所见略同非偶然者克济中兴不亦宜乎予观光武审黄石存包桑而外无强敌不任三公事归台阁而内无权臣然弇自克齐之後功不再见范蔚宗犹疑时之度数不足以相容而况绍兴倡和桧实误国方且挟强敌而忌功臣则王之处此更有难於弇者矣江邈累疏竟罢枢馆於是絕口言兵全身远害而已尚赖主知获保晚节虽英规伟画或有未究而苴茅胙土延庆於後子孙鼎贵至今犹盛要终而论视耿氏累叶功名与汉兴衰者何以异也某曩侍先人颇获窥金柜石室所藏建炎以来元功之次每以副墨散落为叹王之五世孙栻予倩也卓有立志能大其门而亢其宗暇日采旧史参家乘为此传以示余词约而备事综而实士大夫则知尊祖矣盖深嘉之惟论史得引古相方因详着如左以附於云台之列史称耿贾鸿烈忠烈之名要当相与并垂无穷焉

题唐饶州遗墨後

唐公景实初主簿於霅首见先公执弟子礼相从讲学寂寞中先公以其用志坚苦必能有所立甚敬之既满去以书见修斋先生王公曰吾自存斋来也亦遂为知己予实知修斋益与景实厚在越以狂愚触权威几陷大戮景实独为予喜走书追劳江上论甚伟明年冬景实忽起

番阳守时事儻变殒身白刃终全太节视偷生苟免者异矣同时如池阳之赵长沙之李及他死义者数人偶皆游先生门世率牵连言之陈梅居分教此邦出所往还诸书读之悚然最後一书三月八日也距景实死无几日书中所云此惟有死等语可为悲叹毛仲翔尝为予言景实遗业仅十八九亩可敬哉又闻其二孤已矣天何不佑泉明之酷也因泫然书卷末

跋浮沔歌

浮沔何所起起处起耶方雨之势滂然下注而水之气潏然上浮相逼而相激不能以不为也然而谓雨非水谓水非雨非雨非水强名曰沔果非雨非水耶及其散也既不得为沔而犹曰沔者何耶将不曰沔而且曰水曰雨其可其不可耶或曰沔须臾之间且起且?本无成也何有於坏若使能坏而复能成虽佛之力有不暇为也而孰能为之耶乐普和尚因六观之义作为浮沔之歌意者以为人生之起?生死亦犹是耶抑以为无起无?无生无死耶其法嗣古潭源上人书之以传当已默解大意间以示余既自曰浮沔予亦可曰浮沔

题周味道菊埜

周原膴膴萑茶如飴地气实人力之胜质之理无足怪虽菊亦然近世谱菊者多至数十种蒔之庭圃人力胜其天往往竞出新奇以悦可人意变之速有甚於萑茶惟一种花小而正黄芬烈过他品盖菊之真者也顾林樊篱落掩翳寂历乃独不变反蒙野菊之诮野则放放则真真则大吾方贺菊之得此名而何歉於野哉风俗之移人贤者有所不免得见野者斯可矣殆有甚於菊无已则求诸野可也灵均惟其野故能作离骚彭泽惟其野故能醉东篱而书甲子非野不足以见二子野固二子者之所愿也峩峩风节遂与花俱高彼饮菊潭南阳者遽变为容悦为脂韦藉其名以娱人正坐不能野耳非野之过也菊可变而菊之野者不可变伯始可变而灵均彭泽不可变是未易与俗子言吾乡周味道多难早孤流落困顿万有一生脱艰虞中以来吴门所谓辛勤三十年始有此屋庐视前君少泰需於沙而衍出於穴而享常情於此未必不境换意迁而味道方且以菊野扁其书斋图而列之岩之峻以喻其前日之险阻菊之野以况其平生之孤介风霜披剥之余寒花晚节有不变者存又将以保其岁晏之芳菲盖其所自叙如此论议词藻之?然质虽野而文则史吾惧其山林之不果也味道方自此升昔人愿毋忘在莒时予亦愿毋忘在野时乃无负於斯菊

书陈养大祖赠告

自昔丧乱之际至有以大将军告身易一醉况有甚於此者故家遗物云散潦空不自意全古杭陈养大乃能访求其大父赠朝议大夫告虽断缣尺许而明禋之貤恩吏部之印章陈氏两世之官名犹有可考盖其一念思亲志存旧物期於必获故造物者实阴相之世有藏唐诰多顔鲁公所书而陆农师追封其祖亦米南宫为书告家则堂师慕平原者也既志其事而性存又以忠孝称之则陈氏之所得侈矣不但取元章之字画而已也

跋崔清猷公帖

嘉定中清献崔公以次对帅蜀其後遂制置西事宾客从者忠文洪公实黷賤翰崔公清规重德洪公雄文直道参会一时蜀人纪之以为殆过石湖放翁也崔公出蜀归卧五年杜门谢病而洪公以考功郎论巴陵事得罪摈天目山下端平改纪崔公遂相白麻一出天下倾想风采公力辞不拜御笔手诏旁午於道朝臣中使守门趣发公汔不起以至谢事是时亦起洪公为台谏给舍为两制论驳不少贬顾以病不大用宾主相为终始盖如此至是丙申得观两帖於唐师善家为之感叹崔帖後有中书省印乃程沧洲家旧物而洪号平斋又号蒙斋云

跋蔚上人约梅集

往来衲子纷纷籍籍如麻如粟欲求一梅花树下僧乃不可得坐对真成被花恼出门一笑大江横谁与领此必远自越以蔚上人约梅集来三十年前当面蹉过方相识此集中不契而合大是奇事上人高提句律咄咄逼唐人晚更老辣与梅莫逆尤苦说梅乃所谓参寥子有不可晓者欤端不负梅矣吾侪食息人间愤愤过日徒叹老嗟卑而已不知去梅几格此老胸次固自不凡予谓其诗集有梅花处可无一本

题范氏文官花

韩魏公守维扬郡圃芍药有腰金紫者四置酒召同僚王岐公荆公而陈秀公亦与四人皆先後为首相亦异矣草木之华其尤异者至和之萎也本乎天而应乎人理无足怪京口鹤林寺花久归阆苑近世盛称邢台范氏文官花粉碧绯紫见於一日之间变态尤异於腰金紫辛稼轩尝为赋水龙吟白髮儒冠误盖属泸溪令君物不虚生必有其应应之迟发必大休宁令尹泸溪孙而稼轩外诸孙刻其词置花右至今犹存若有护持之者其子雷卿遂以斯文发祥领学事主文盟文官之应不虚矣人皆曰花范氏瑞也夫以雷卿之贤两家百年忠义之脉文物之传在其一身宜造物以功名事业付之花本出唐翰林苑中雷卿即为翰林主人花亦荣耀吾方贺兹花之遭然则花瑞范氏乎范氏瑞花乎

书范雷卿家谱

范君雷卿以学事至雪示余以其家世本末盖范自唐以来为邢之着姓所居尧山范解利环十里皆诸族有为虞部郎官者君之四世祖通守号河朔孟尝靖康之乱能全其宗收穷周急信义具着由进士出身为蔡州之新息县绍兴辛巳十月以其县来归及海陵败盟我以成闵镇上流赵樽屯德安捣虚溃蔡时也晋氏晚过江者皆以怵荒遇之高宗兼爱南北凡归正人率厚加礼秩以系中原之心事优前代矣中缘和议指名取索伤忠义之气絶英豪之望至是公等来法当超授以劝乃仅添差湖川长兴丞绯衣银鱼不尽如章也未几亮殒褒继和战未决或又倡为遣归附之说动摇物情赖庙谟坚定公等以安始公南迈至宣谕司有某公之子曰盍稍增饰功状可冀超用公峻折曰吾父子归朝廷要以忠孝立身奈何甫过淮河遽欺君欺天乎乃以质言及命下欣然就职寻又例为不厘务不屑也益捐俸廩活饥氓赙寒士委祉於後意盖有在改签书镇江军节度使判官厅事召赴都堂审察添差通判本府以寿终於官葬丹徒遂家焉子泸溪令实同决策孙招讨司参谋有诗名曾孙休宁令有政声五世孙即雷

卿江浙儒学提举大得士誉诗书事业未艾皆公履信思顺积善余庆天之报施始嗇终丰如此某窃惟先朝寤寐神州收其豪隽公与辛公弃疾先後来归忠义相知辛公遂婿於公公当审时陈公俊卿伍公炎皆知公而公老矣不果用齎志以歿辛公声名日起入则导密旨出则跻执撰领帅垣呜呼公之不遇命也惜辛公不径以前贤例取泸溪作行状使此十余纸渐蠹断幸玄孙之贤收拾完补为巨轴传示将来不负励志之嘱矣高曾百年之意其亦少慰九原

跋汤徽猷昌言錄

绍兴甲寅七月五日太上不克执爽於重华逊位东宫改元庆元实赵忠定公之谋也孽韩侂胄不过传导之劳乃欲专定策功憑藉肺腑居中用事羣小碁之首去旧官僚又出御批去侍讲朱文公以撼忠定其势已非乳媪陈谢所可解生枣再扑所可除乙卯五月忠定竟贬死遂以逆党伪学设为厉禁一时诸贤皆在戊午谏议中国空无人奸凶愈肆卒至啓衅稔祸流毒海宇而後已甲寅之初徽猷汤公为学官建言太上未须移公又言朱公不当骤去与忠定意向实同忠定既贬公亦外补甲子始入为丞郎时朝论渐平故也继待次台州乙丑改知常州尝移书於韩极论其非且论苏师旦周筠之过时北事已有萌中外汹汹丙寅盛夏出师败於虹县公又移书数其罪状视前益峻丁卯招接北来人意在再举公以应办钱粮不继降谪赣州犹逞前憾也是冬师旦诛未几侂胄殛公甫得自便黄巾贼起而後赦党人之罪幹离不陷中山府而後言党人之忠汤公所遭不幸适类是呜呼可胜叹哉四世孙丹阳尉晖老父子世其科追念先烈哀集遗事为昌言錄赵南塘以忠定党获重谴者其挽词并附见焉五世孙弥昌少领乡荐前鄱阳书院山长其兴未艾忠义之报也因余友越教姚式示以此錄敬观感慨輒以所闻识於後云

陵阳集卷十五

卷十六

钦定四库全书

陵阳集卷十六

元 牟巘 撰

题跋

跋韩子苍帖

韩公字子苍蜀西之陵阳人故世称为陵阳先生政和间以试文入馆为中书舍人兼直学士院靖康初起知黄州晚以次对奉祀居临川又号北窗居士其父德翁登东坡及鲁直之门公早为二公所知中遂以元佑学术罢又尝与陈了斋游集中压卷是也以诗名天下吕居仁欲邀入江西社然其诗自成一家有陵阳集行於世帖中语载集中其余问讯诸帖盖在临川时诸贤患难流落何所不有惟林下衲子辈犹能用情东坡山谷亦多有与诸禅帖此帖笔法似山谷老硬处亦似了斋书某家与公同郡五子迪登进士为夔漕先祖姑嫁其子其诸孙有克已者仍世姻特科入仕藏公数帖许见分当时忽不取今亦不知存亡矣观此为之慨叹

题博爱堂诗卷後

吴兴郡判官自号博爱堂至官甫踰月人皆谓其持身正处事恭声誉赫然一日访余敝庐相与论旧因知所谓博爱堂乃其上虞为宰时所自创而廉访使者过县时所书扁也邑之士共赋诗称道盈钜轴至是亲友程晋辅携以示余三十余年前予使越按部首事上虞因记其山川风俗阅此良以嘉叹不鄙病髦俾发博爱之旨昔吾夫子未尝轻於言仁也故以博施济衆为难而孟子则推人以善欲其推不忍人之心以及人故曰善推其所为而已矣不忍人之心即惻隐之心仁之端也盖指人心天理流行发见者而言也譬之泉焉涓涓一綫其初甚微穿石達溜迤邐为江为河以至於海莫之能御者非他源愈深则流愈长流愈长则泽溥矣此自然之理也君以博爱存心观其已试之明验在上虞推之以及於一郡不既博乎况其先世之遗爱在吴兴推之以传於无穷不愈博乎勉强力行终始必一斯可矣虽然爱不可无差等泛爱衆必曰亲仁博爱之谓仁必曰行而宜之之谓义敢以是复於博爱堂

跋范令君晋陵时诗十九首

晋陵范令君闲静翁十九诗余从其孙月观提举获观之令君出为招参稼轩辛公婿也长歌抚剑之叹实有妇翁风槩及观行赈行潦视旱等作乃能细意为民恳恻笃至如此其大父通守公以绍兴辛巳来南至是甲子一周故江南风俗利病讲之甚熟悉仁哉令君之用心诗曰恺悌君子民之父母晋陵之民抑何幸欤令最近民一膜之隔天壤悬殊水旱常有而贤令尹

不常有可以发千古一慨天庆观奚凝为刻本今甲子又踰一周而月观藏之楮墨如新可敬已山陰道士爱逸少黄庭经予谓不若奚道士爱此诗之有益於民也

跋归去来辞

渊明平生志在田园虽尝薄宦未始一日不念归也始为镇威参军经曲阿诗曰聊且凭化迁终返班生庐已有归意及为建威将军幕使都诗曰田园日梦想安得久离析归意愈切矣俛就彭泽为三径资八十余日即赋归去来翩然而去自此不复出矣此其意岂在区区一督邮耶松雪斋为虚谷翁书此词盖深知其心事故虚谷赋诗题其後因以自见老笔雅健读之敬叹若子昂字画之妙中固已言之

跋梅花赋

梁昭明称陶渊明贞志不休安道苦节白璧微瑕惟在闲情一赋皮裘美称宋广平铁心石腸而梅花赋新清婉媚不类其为人两事正同然闲情卒章尤蔓草而诵召南坦然存其诚与广平所谓贵不移於本性俚君子之高即者异词而同旨裘美盖未足以知之赵子昂为虚谷翁书梅花赋真本虚谷既取广平叔父永保贞固之语以明之予因发渊明之意以补其说焉

跋厉白云诗

东白厉氏自唐殿中侍御史与姚贾同时以诗名至太师屏山公尚世其家法名章伟画错落峨峨间予从老人大父尝及见之今白云其季孙也徙家於杭年甫踰弱冠藉藉有诗声为诸公所称道是家信多能耶一日来雪以白云集倡予其辞隽其思清其兴寄远读之殊使人有凌云意白云曩尝浮淮江走粤闽慨然有志於世顾肯效山翁溪友指白云为归趣要未易与俗人言陶隐居挂冠神虎尝谓山中白云祇可自怡悦不堪持赠君盖落遗外观自乐其乐内足於已不以已徇人者也意者白云患苦世俗殆有意隐君之所乐乎是将脱鞅掌超尘块以与莽苍鸿蒙游方之外矣不然何其莫逆於云乃如许它日上下四方从东野见之白云深处当相视一笑

跋小学大略

县令位卑而董子以守令为民之师帅其任乃与守等盖所关於教化者大也言政不及教言教不及化则簿书期会而已耳世之为令者类曰吾位卑期会簿书一不应程譙责四面至日救过不暇师帅之任教化之事有守在吾奚为与之哉其自待何薄欤史君彦明尝宰岳阳之平江不劳而办暇日颇进其贤士秀民相与讲学又取所藏李君简古今训学大略刻之梓而引先儒尽性践形之说序之以传庶几有补於教化之事矣来雪以示余阅其编大抵本诸晦庵朱氏小学书所谓立教明伦敬身稽古者而其条目则不能悉备至於外篇嘉言善行以广而实之者则又无之取其大略故耳然其采摭裒聚用力甚勤不但施之小学使学者家有此编岂不有助於修省而有裨於教化是则彦明之意也方彦明在岳阳予不知其长为谁而一

令乃能若是使凡为令者皆能知彦明之用意非风俗之幸乎

跋叶一山所藏文山相国书後

宋丞相文公魁垒英杰以盛年负重名居高位其视一世为如何所荅括苍叶君书乃不惜余论期獎备至而词气又过自谦屈如此胷中所存可概见矣书中又云思永与陵名义有犯请更之盖为永思陵也公於嫌疑之际造次之顷犹不忘恭谨他日临大难守大节死而不变亦此一念所充耳叶君首江西漕解推轮於公一饭之报不以存亡间藏其遗墨於患难奔走之余如护拱璧赋诗追祀有主死忘犹未之句读之使人酸鼻朋友之义与君臣父子夫妇兄弟并世道日薄顷刻变态弃之如遗况一生一死乎况又有大者乎一女不事二夫忠臣不事二君楚龚语也文公似之思着主衣裳为人作春妍有声当彻天有泪当澈泉陈后山语也叶君倡之然则叶君固可书也

题四明二僧诗卷

东臯谋师以四明此山华国两上人见余於蓬庐过当过当读行卷殊佳盖有意趣有标致殆不类僧语闻二人皆傳家子源委固当自书中来也今岁七月旦江淮一大异生灵一大厄可骇可叹是时此山在吴下承天华国在京口浮玉适与坏会诗中乃无一字及之岂定力自能遣忧患耶昔琴师欲进其弟子以学则移其耳目志虑於冲风怒涛崩岩振海之际安知二子之诗不因变而奇乎然此山尝寄华国曰砂锅煮荠竹涧看花华国寄之亦曰斲池烧畚依松编^十此犹未涉忧患怀思故山已如此今当山益深林益密吾恐诗虽奇无由轻落人间矣

跋刘君择所藏孝经十七章像

先朝仁宗冲幼时有撫孝经要语画为图以资把玩者此图其起此欵虽不尽在笔墨之间然其前後布置亦甚难细观可见况首章画夫子及侍坐者皆有所本非徒苟作也

跋鲁公乞米诸帖

太保李大夫即劾大将管崇嗣背阙坐者盖李勉也李公以名节相期时有所须不自嫌外然必数月食粥乃乞米妻病乃乞鹿脯於李公尤不苟求如此清介之风可以槩见世称鲁公得王右军笔法岂不信然後有杜祁公富郑公及蔡君谟孙之翰宋次道诸名贤所题尤可宝乞米鹿脯二帖旧刻在忠烈庙庑下今不知其尚存否有能摹此本刻补遗軼亦一奇事也

题三高图

用计然策伯越功成至於五湖而去之其得脱於鸟喙之噬盖已甚危而思蓴鲈者虽轻於一出犹幸勇於一归千载之下可以号於知几若夫终身甬里笠泽之间钓烟波以自适采杞菊以自肥初未始出也而何有於归此予所以有慕於天随也

跋捕鱼图

陆鲁望皮裘美作渔具诗十首计其取之术可谓巧且密矣东坡翁乃放鱼东池恐数罟之损鳞鬣长堤之隔涛瀨何用心之仁也然吾能暂免之於此果能终免之於彼否今观此图江天欲雪鱼正深潜而渔郎四集网下如云无所逃於天地间乎然其笔意活动殊可玩赏与鱼相忘於江湖亦足乐也

题阎静斋与张仲实诗後

士抱负卓犖方混混庸衆人中邂逅知已一言而善携手以上盖未易得况未识面而深相知者乎黄豫章教授大名未识苏长公也江梅有佳实之句深致其意而苏公首和寄之自是遂为知已此固非常情所能与也静斋阎公曩使浙右张模仲实时为江陰学正初无畴昔雅公望临一时而谦勤下士不惜余论獎成後辈闻仲实之能遽作诗寄之诚出意望外诗中称其门阀喜其辞采且有黄金燕市须神骏会见风雷起渥洼之句期待之者甚至千里马常有伯乐不常有有之矣而或不值值之矣而或不顾虽权奇汗血孰别其神骏哉静斋之於仲实独得之未识面之间可谓不凡也矣是时仲实年三十许已能为文辞致声誉今年愈进识愈定刊落枝叶以求本原用力於义理之学以远大自期实由静斋獎激之静斋已长翰林院记忆不忘得遂其禄养而公之意未渠已也渥洼风雷之语不徒出必能相共成之

题西秦张氏世谱後

古者命将出师固将除残暴定祸乱拯民水火中易之师曰以此毒天下而民从之非尚杀也在师中吉故能上承天宠三膺锡命以有开国承家之庆若太公望克於牧野封於营丘子孙数百年与周兴衰是矣汉初封功臣四百十有五人带砺之盟爰及苗裔而太初百年之间见侯者五乃有不尽然者焉及观张模仲实譔其祖忠烈王世谱其事始益信盖王起行陈靖康之勤王绍兴之戡难皆身冒矢石争天下於羣虎狼之口岂非以杀止杀德在生民功在社稷而泽流子孙欽矧王之为将未尝妄杀荐達偏裨待士卒有恩意此其所以能以杀止杀也自三班以来三世三公皆以王贵王位极人臣分茅胙土施及其後四子名冠以子诸孙名冠以宗宗之下则取五行相生为次王弟之子孙亦如之节钺之重师保公侯之贵易名之美後先相望有光史册何其盛也後有登进士第者上舍释褐者有与殤韩而复以忤时贬者任守阕而竟以杀使死者非但重絀叠组而已越至於今则有济甫年高德邵为族之望仲实其子务学而通至於国器之雅而秉礼如晦之敏而急义皆予之所识者其未识若性之若仲芳守其内而无求於外积善以遗其子孙盖可尚矣近岁名门华阀凋落居多惟张氏克持其世诗书不坠是可书谱略效太史公年表为旁通书之至六七世未艾历官槩见於左而於本宗卒葬特详尊其所自出亦苏氏谱法也王字伯英仲实以模为名尝奉父兄之命复先庙修家传又为世谱而叙其首示不忘本来求余语既具论之抑予闻典午渡江重氏族严谱状雍州是为郡姓张氏本三秦固当在江北四姓之列而其勲劳名位子孙文物之盛又如此是谱也後之人尚宝藏之

跋周公谨自铭後

周君公谨以世旧夙厚余间不见且久梅潦被道吾庐无来迹君忽披蓬藿相就谈始予见太末时如川方至之意气眎一世何如也岁星四环天余固早衰君亦华皓能不为兴慨者耶君晚更号弁阳老人刻石自铭出其词似予?挫洒落大抵轻死生等淹速太史公不云乎读之使人爽然自失顾予犹区区形骸之内今昨之间陋矣公孙夏使其徒歌虞殡赵台卿於寿藏图季札子产晏婴叔向及已像各为之讚裴绿野小杜公辛季剑诸人皆自志司空表圣豫治木卧起其中林和靖自赋壽藏诗苏文定自作颖滨遗老传秦淮海效渊明自制挽歌高风旷度不胶而卓君非斯人之徒欤何其脱略襍祥疎宕可喜也气有聚散有伸屈原之於始而知所以生则反之於终而知所以死故理不可不明世或以了生死为一大事其视沉迷利欲苍黄颠蹶者固异然未尝穷理往往幻妄世人卒亦未免怛化自私至於昼夜死生之说则又习闻其语又不知所谓通乎昼夜之道盖体之无二非强之使齐也是皆未足与语弁阳君抱崛奇而老忧患据会通而观变化反博趋约落其华英澄然一室固已深玩至理而有得观其所自铭兢兢以百年之泽一身之承为不易力为其所当为以求无媿於心无坠於先训盖有临深履薄好学不美久生之意非徒示旷達而已余以其能折衷於道得所归宿用援先好书诸左方云

题凌波图

洛神一赋发於神遇备极变态卒能以礼自持此图逸而靓丽而洁盖深得其意子雋之於子昂可谓竞爽矣观者殆不能伯仲之

题向氏山居图

钦圣母仪三朝实文简公诸孙故其族益盛而多贤无流水游龙之习过江以来忠毅以死节着其子秘阁居衡山从学於胡文定公而节林居清江尤有声绩被知遇号为博雅居於霅者今莫知谁下三十年前颇闻其家所藏名画古彝鼎器皆入权门以贤相尊戚之後乃凛不自保每为慨叹此图出於散坠之余尤使人把玩不能已岂徒以其画哉

书范石湖遗墨

石湖公由广右帅蜀不但宾从之贤词章翰墨之伟照映一时汉中望渭上树如荠未尝不慨然有所赋也此诗送人犹知为泥封函谷⁴⁴土斋坛等语不能忘情令剑栈自夷矣杜老云意欲铲叠嶂事复何如安得起此翁而问之

题毕良佐山水图

阅寒林多矣此卷殊佳叶脱林瘦远山横陈垠堦虽露而犹有蔚然秀杰之气笔简意足把玩不能已少陵云毕宏已老韦偃少良佐岂其苗裔耶

书蔡琰归汉图

蔡文姬陷身沙漠十二年曹操遣使以重宝赎之一旦与使者俱还既慰中国土思且上先世坟墓得其正矣观此图垂发之际二稚牵衣万里永诀旁观者皆为之掩袂乃与胡笳十八拍中同一凄哽何其悲之甚耶母子天性虽文姬以义断恩而骨肉之情终有不忍忘者要亦不失其正也择婚而嫁以归董祀它日文姬又能言之曹公原其死罪於垂绝之顷故史书曰董祀妻继列女之後宜哉曹公於文姬一事独能始终恩意曲尽亦可书也

书陰符经

陰符经或以为黄帝授之广成子或以为受之玄女又以为黄帝风后共玉女论云甲陰阳而为书既以可赞程氏则又曰非商末即周末人为之而朱氏则直赞其出於李筌盖本山谷之论也不可考矣然其言则多有可取者三茅观旧藏王逸少亲书已归之权贵之家徒使人感叹云

擊磬图

孔子往来於卫殆至四五所遭皆可叹此擊磬不知果何时然不无所感矣荷蕢者虽智足以得其声圣人之心要非彼之所可识孔子固亦自知其道终不可行自卫反鲁一正雅乐盖不得已也不然荷蕢犹能已而孔子顾不能耶

跋范文正公书伯夷颂

皇佑三年十有一月文正范公在青社用黄素小楷书韩子伯夷颂遗京西转运使苏公舜元盖天下万世大纲常大议论扶植天地不可一日以无者昔文王三分天下有其二以服事殷伯夷固知其将终身西伯故辟纣而归之其心岂遂忘殷哉一旦武王之师载木主而以王号於其衆非文王意也兄弟奋然以天下万世纲常身为争之继之以死其事诚卓絶然人乃或非之至孔子时犹有以为怨者而孔子独曰求仁而得仁又何怨至唐时犹有以为偏而不通者而韩子独曰伯夷者特立独行穷天地亘万世而不毁韩子之言上继孔子而公乎天下万世有功於纲常甚大时无韩子议论废则纲常泯吾为此惧而幸获睹范公之所书义士仁人壮顔毅色凜在心目间使顽者懦者一见且泚汗破胆知畏议论是范公亦与有功於纲常矣公平生自许忠义前後缘论谏得罪至被以诬谤自以朋党摈斥远外而公信道之笃蹶而愈奋老而愈厉伯夷颂固其中素所蓄积者呜呼皇佑盛明时公之书此犹义形於色设不幸处纲常之变当何如若公者真可畏而仰哉大兴李侯勘得此本於燕丁丑岁竭来守姑苏偕济南陈君祥汴梁焦君德明首谒公祠下访问其子孙而以畀之尊贤尚义有如此公之孙邦瑞士贵敬受而藏不啻拱璧始其家尝以摹本刻於义庄岁寒堂至是乃得真蹟於二百四十年之後若有神物护持以待其子孙而後付殆非偶然二君议勒石传不朽而吾友满君弥坚实来辄具论颠末俾以刻晏元献杜正献文忠烈富文忠蔡忠惠诸贤与公忠义相期各有题赋而苏公词翰气槩又公所重宜并刻於後若昌朝执中輩虽素有抵牾亦不以人废焉抑予观

忠宣公兄弟有感手泽言泯意外忠念深矣尤後人所当取节二君皆有典型文学能充其宗族党所共推尚帅其族之人与其子弟谨守此宝图继前忠用衍忠义之传其永之无斁

陵阳集卷十六

卷十七

钦定四库全书

陵阳集卷十七

元 牟巘 撰

题跋

题李尹异菌

大名元城县李毅卿新授分水县尹其母孙氏和易贞洁绰着阃范已酉正旦以微恙终卜莹未遂停柩中堂四月八日忽菌生柩上状类芝草又类牡丹张倩仲实书来为予言其事盖甚怪昔唐张九龄杨炎固有紫芝生其亲之墓者矣然上有雨露之滋下有土泉之润犹有可诿今孙氏之柩隔以衣衾周以胶漆是菌也何自而生哉不宜生而生必其潜孚默感窈冥之中自有莫之为而为者然则李氏之事岂非母之积善其子之纯孝有以致然欤因书此以美之

题俞子清侍郎画

西清公劳侍从之事早退老壽跌宕笔墨间此二纸真蹟也其一嫩篁老木荣悴各有态其一水行石间笔墨殊活故是此翁胸怀本趣余家旧岁山水四横坡今不可复见见此斯可矣壮猷力学劬书而游息之时博雅之趣如此岂非知仁之所乐哉

秋江晓渡图

江空木落晓色方开小艇横岸慨舟子熟睡未醒也扶杖之叟从以童奴问渡江干非名非利何忽遽如许意者谓江外幽人宿有期约不可顷刻愆期安得仙家两骐驎凌空赴之

庆掾省杨彦远得子

维熊维罴男子之祥在蚤岁已可嘉在中年尤可贺速固不如迟迟则根原实而福泽厚易固不如难难则庆华深而期望切亦理之必然者东平杨彦远持心近厚积善余庆五十之年过二始弄第一雏平生欠事一朝意满诞弥之旦贺客填门兰以为沐金犀以为钱文綉以为衣褓或称天上石麒麟或嘲明珠出老蚌彦远皆欢然领之作汤饼分利市其喜可知也予试闻啼声而张倩仲实为索语昔康伯之生伯温又早数岁行年四十五我始为人父喜之者如此教养诚在我愿汝为大贤期之者又如此况在彦远乎敢用此为善颂

跋周卿所藏坡帖

此东坡公凤翔签幕时与其从叔书也公以嘉佑七年二月十三日被命疏决宝鷄等四县禁囚乃是月壬寅诏旨书中云近有诏书疎决是也既竣事遂朝谒太平宫并南山而西游楼观大秦等寺帖中云因得恣游南山是也十九日始归书中云近方还府是也是时老泉被命编修礼书留京师书中云屡得编礼书是也此书後题三月初五距十九归府时仅半月凤翔去蜀颇近家问不絕犹有以叹而况吾侪流落羈旅万里外回首故山可胜凄然

跋三苏帖

苏氏一翁二季词旨翰墨具见於三纸间敛衽伏读因有感焉前二纸老泉为编礼东坡为凤翔签判时也後一纸东坡谪海丰颍滨谪高安时也未四十年而盛衰之变如此可以观世道矣然东坡不以患难流落为戚方且施药葬枯骨造桥以济病涉此与陆敬輿在南宾集名方同一意故颍滨有能安遐陋抚恤病苦之语万里兄弟依依至情尤使人慨然上有学士院印章程沧洲家旧物良可宝也

跋赵光辅骏马图

饮水齧草翹足而陆马之真性也而烧之剔之刻之烙之曰吾善治马马之性始离而多病矣蒙庄氏以为此伯乐之过也观此图岂不然哉治民与养生者亦莫不然

题元吉猿图

柳子厚以为猿之德静以常山之小^木必环而行遂其植故猿之居山常郁然此黄黑二族山深日暖朋俦相命雄雌相从领其子孙相与嬉遨攀援上下反挂倒悬若相语相持而其老者或隐树间或伏枝上以观窥之百态虽殊意甚自适了无诤勃喧呶搏啮挽裂之态而其旁老干丛条苍葱自如与柳子厚所言无异可爱而玩也图有秦氏印章可考真元吉画

题毗陵所吟

昌黎云懽愉之辞难工愁苦之辞易好金君拱之庚午甲戌之间客於诸公往来苏常诗中多及官府承平风物所谓懽愉之辞也於其难工者而工之无他恬淡之意常存乎胷中纷华外物不得而诱故也继是而作者往往一变而为愁苦之辞悲鸣两吻不能自已吾固不愿拱之之为此也拱之自叙盖已有感於康衢之歌矣岂非其所愿也哉

题李伯时杂画

物之变熊千彙万貌观於其会则俛仰不尽其奇此卷盖非一时之事一家之说而各效情状於短幅之间使病耄翁得以隐几而观诡特荒诞者可怪可愕深静幽闲者可喜可羨不劳思惟若有所得而岩崖^木树云霞波涛又皆曲尽变态令人把玩不能去手然渊明乃向来攢眉不肯入社者胡为亦在其列耶龙眠真墨戏者矣以定观妄以常观变可也

跋繆淡圃文集

古有山泽癯列仙之癯予於合沙繆仲晦甫见之盖能得天地间至清之气是以自号淡圃淡於进取淡於声利淡於嗜慾顾独耽书曾次三万竿皆取英咀华拔新领异絶畦径而为文私淑泛应往往成帙予颇与观焉如明珠大贝潜深閼幽光景时见而有卓犖者存如清湍急流枳金戛玉音节悲壮而有逶迤者存如晚菊霽梅凌雪傲霜意象凄冷而有芳烈者存真老於文学者也然文岂徒作观其论齐霸衣裳之会者独以于贯为盛有所重也辨先圣章服之异而深取郑氏之诗有所尊也读循吏传则以商鞅之术惨为寒食散申韩之法甚於用牛羊有所叹也至於记吴周将军庙并及蜀事於孔明公瑾之盛心若又有所感焉它类是者尚衆有待於世道徒文乎哉予病耄余生弃置万事无复訾省惟爱奇一念结习未忘於吾淡圃诚爱之重之因书其文藁如此土苴绪余能为我发一笑

跋意山图

人之於物可寓意而不可留意昔有是言矣盖留意於物则意为物役不能为我乐而适为我累耳山本无情而好山者每每用意过当如谢灵运自始宁伐木开径直到临海从者百駭动旁郡退之登华山絶径不可下邑令百计取始得归留意於物其害乃至此山犹尔而况声色货利之可以动心者乎采菊东篱下悠然见南山始无意适与意会千载之内惟渊明得之所谓悠然者盖在有意无意之间非言所可尽也今观此图林峦泉石皆兼有之乃武康王氏之隐处意山盖其自号也可以想见其人焉世故甚恶幸而有山林之乐惟恐其用意之不诚似未容以留意於物者议之

跋陈忠肃公遗墨

陈忠肃公在合浦与其弟书也公因其子正彙告变蔡京至於父子对狱正彙既获在戾公亦坐此贬海上谢表所谓更觉有生之有累不如无子之无忧读之凄然而公此书乃云但愿刘氏之安不愿罔子之祸则其词气愈厉身尔忘家国尔忘私盖可敬而仰也射人先射马擒贼先擒王公子荆舒始自稍怒至四明始诵言攻之虽不无见事迟然春秋推见至隐未有如公者焉其後毁日录屏字说罢配享皆本於公之论亦何及矣公卒於政和之甲辰又二年而中原涂炭距辛丑一百七十有八年遗墨流落独见葆藏於廉副商侯之家再四展玩不胜嘅叹

题牧牛图

此牧童者烟蓑雨笠搢筵於腰坐牛背如广舆其一犊也荒野之状安恬之意岂复知有世间富贵忧患耶邹公坐论三后陈公坐论二章万里百谪九死一生偶然北还而定国早以苏累贬南宾叔党亦侍翁过海皆备尝险阻者矣虽然为此所画者盖不可得政和大观距今一百七十八年伏览遗墨嘅叹

题费茂卿随分二字

入於自己惟分内往往不暇省察每认非分之物为已有极力周回而不知有生之初天之与我者随小大高下厚薄各有定则非可以一毫妄求而幸致倘顺受而安焉斯为守常知足本分人矣吴兴费茂卿平日受用随分二字吾友子昂甫书之者庄子因鹏鷖而论分辨至齐物篇则曰分者有不分辨者如不辨故茂卿曰随分则顺乎理而分则安乎命者也茂卿?而隐不近名谩而仕不违俗有子宜以传家有善药足以拯人不以万物婴吾之方寸不以人之富贵易吾之环堵所谓不分之分自乐其乐盖有约於庄叟之意乎予与茂卿往来最久知其守常而知足顺理而安分喜而志之如此

题渊明图

渊明以贫起为州祭酒不堪吏职少日自解而归平生胸怀本趣可见此又在彭泽以前梅居遇旧庐在澄江一旦念归遂脱尘鞅作此图时复展玩亦不俗矣凡仕宦者无问官之高卑如能绘此图於座右存此意於胷中纵未能高举远引庶几知其涯分不致役役富贵而不自止也

跋傍云

四明楼攻媿之裔寄身道士法中自号傍云世之傍人篱落骑马傍人门首皆是此独傍云云之为物清虚间旷卷舒无时去来无方非如富贵利达之人有可托以托人之所托也不彼之即而即此何耶傍云其亦知天下不依形而立不恃势而存者矣

书兰亭修禊图

王谢诸贤一时高风玄契岂堪持比金谷二十四友望尘辈而逸少顾以为喜何耶余尝见龙眠真笔於曹氏阅此益增感叹

题百牛图

我有沉牛二去耕绵上田矣黑牡丹何用许耶然亦可见或降或饮或寝或叱气象

古木老柳图

老柳疎散脱木离奇正如高人胜士嶮然滋垢之中有不可点污者此笔宁宗之乙酉作也噫岂不有感於党锢之诸贤耶

鼠 瓜图

漚落其大未至瓜烂也而鼠辈已窃入腹心咀其犀使枵然无遗种因念往事为之慨然

题牧羊图

左慈以身化羊黄初平叱石为羊神仙人乃作此等狡狴事舜举此笔法可谓得言外意观牧羊悟此生余於此图亦云

元吉二獐图

秋风树叶呦鸣相命正甫自乐其乐何自涉人境吾侪可得狎而玩之同其乐意亦复可喜使值曹景宗辈固将数助而射渴饮血饥食肉如甘露浆人以为彼之乐矣幸寄声朋曹深藏而决游此乐勿使人知

细竹图

好事者醉吐胷中墨每作老竹怪石助为豪放而不知嫩篁密干之难工此图萧森婀娜浓淡相映雾气袭人淇淥漪漪宛然在目

三仙图

吕洞宾唐末进士锺离五季故将皆得道者跛鳖何为亦相参语岂非支离其形而全其天者欤

跋坡帖

此图笔墨甚简率顔貌细密精神活动能得言外意张舜民字芸叟号浮休居士取庄子生浮死休之义中遭党祸晚始得归此殆其所藏云

跋吕自牧词卷

云中吕晋卿以其乃祖自牧公乐府词卷见示或豪宕或凄惋或容与固能者也但其压卷一首有不忍观伐国不问仁人朝歌墨子回车全忍之哉亟卷还之晋卿年虽少好学善问用意不苟尝从予友邓善之游其进未有艾愿益以学自勉不必作晏叔原康伯可辈人可也毋以吾言为过

书尚书讲义後

讲学所以明理理之不明而辞之徒费虽多奚以为伏生书仅二十九篇史称秦恭增其家法至百万余言亦既多矣论衡又称说尧典篇目二字十万言但曰若稽古二三万言就其中尤猥多焉度与近世所谓时文大义者复何异班固以为不思多闻阙疑而务碎义逃难便词巧说破坏形体不惟切中当时之病殆若为时文发也呜呼书出屋壁简脱字讹尚难究悉若於

分外泛滥牵引重自纏绕辞愈烦理愈失终其身无所见可哀已今为讲说者固当一洗此陋
悉简从要求其坦然明白者庶几圣贤之意或得五六不然亦一时文义耳予倩张仲实在江
陰时尝为诸生讲尚书其徒裒取数篇示余异时吾家君牟氏章句授业者万人顾予皓首不
名一艺甚慙无以发之然深喜其不为游词得讲经之法盖先考音义名物度数次列诸儒之
说辨其是否畅其同义大抵随文直解毫分粒剖求其至当而一皆订之以朱子之说朱子虽
不立训传其见於他书散於语録者往往采用焉如以克明峻德亲睦九族平章百姓协和万
邦合於大学危微精一允执厥中合於中庸善於言圣人矣仲实幼能刻苦力学通於经术徒
称其诗文未为深知仲实者夫义理无穷学问亦无穷所当讲者似未止此尚益勉其未至尽
毕余义成一家可也孔安国始注尚书其族兄臧貽书规切固不得雷同相私过有称道览者
当自得之

题施东臯南园图後

先父存斋翁以淳佑丙午卜居雪川定安门之里马公桥之旁乃庆历间郡守马寻宴六老於
南园处也越明年丁未冬先父以言事忤时宰谒告来归始奠居焉尝赋五絶其一曰买家喜
傍水晶宫正在南园故址中我欲筑堂名六老挽回庆历太平风盖纪实也门人马君廷鸾大
书南园二字揭焉直斋陈貳卿与先父有同朝好今跋此图乃庚戌七月五日後六年丙辰中
秋後所书偶不及焉直斋後重修郡志始书曰南园今年存斋所居是其处也今年庚戌施东
臯携此相侣视直斋所书之岁适同岂偶然哉把玩感慨不能自己辑书其末而归之庚戌清
明日陵阳牟某书年八十有四

跋范天碧定史诗

事当论逆顺不当论成败汉昭烈帝室之胄立於蜀汉高祖始封之地也章武改元不改汉号
而祫祭高祖以下名正言顺操名汉相然贼也不受汉禅然篡也孙吴虽通蜀好然党贼也助
篡也乃千万世不易之论陈壽何见帝魏黜蜀下倂孙吴习凿齿力破其私以蜀汉为正而魏
为篡且谓晋当越魏继蜀汉其义伟矣其後欧公处魏於正统章望之非之治监书诸葛入寇
朱文公非之而张宣公经世纪年遂以献帝之後系於昭烈後主之後系於魏尤为确论孙吴
之事世往往置而弗议何耶提举范君定史一诗乃归首恶於仲谋以其讐蜀袭杀关公盗贼
之靡而篡夺之助也义例新辞旨励读之耸然方关公至破曹仁降于禁斩龐德威声震撼操
至欲徙避之汉事几集关公死荆州陷蜀势孤汉望絶魏禅成谁其使之况操欲吴图公以解
樊围权遽表闻杀公自效实承操风旨操图篡已久尚憚物议权遂称臣陈说符瑞实率先傳
会黄初之始大行封拜遂为吴王受九锡实首受上赏诛心而论仲谋复生殆百喙无以自解
定史之诗予深取之始张堉仲实以诗来予谓之曰天碧读史有眼目论事有波澜因复详记
之如此是关大谊不独为云长吐气也庚子七月既望

跋东坡帖

东坡翁赋此词送其乡人复自书而遗之盖自治平丙午去蜀至熙宁乙卯为十年此当是自

密移徐时年恰四十然字尽比前遒劲故山应好在孤客自悲凉之语诵之凄然使人益重故乡之思也

跋恩上人诗

予多病不出户限又颇嗜睡人或与诗辄置枕间意殊愤愤莫晓何故苦事苦事近四明恩上人忽自姑苏来访不觉惊起固是我辈人何相见之晚也闻此上人有诗千百首自号断江声价喧传远近予以寡陋今昉识之年来诗人聪向僧中去而僧中亦罕见如此者予所见乃游庐山百余首游洞庭二十四首杂诗四十余首不过千百首中之一二已为奇特大率不疏笋不葛藤又老辣又精采而用字新用字活所谓诗中有句句中有眼直是透出畦径能道人所不到处想当来必从悟入非区区效苦吟生鋤心陷胃作为如此诗也或谓禅家每以诗为外学上古德多有言句不知是诗是禅是习是悟是外是内耶上人受业云门口口灵澈若是到处亦复何异但恨世无梦得子厚诸人知之然正亦何用人知其为莫逆畅游天目曰下方雷作婴儿叫非常语也予因题云把断风光不许通坐天目顶月明中下方雷作婴儿叫莫是山僧耳太聪旁一人笑曰何不道惊动人间八十翁予亦大笑曰然且还诗卷去也

陵阳集卷十七

卷十八

<集部,别集类,南宋建炎至德佑,牟氏陵阳集>

钦定四库全书

陵阳集卷十八

元 牟巘 撰

启

通湖南王帅漕启

星临一道载瞻帅节之严云戍两冈实隶教条之近未遑受约束而诣大府乃辄事竿牍而效小夫某官伟望骏隆宏规开济绿竹之歌瑟僩文章由道学而来虹玉之贯孚尹忠信妙精神之蕴自先朝之茂简揭华贯之瑞仪历上三丞皆第一选史筵屡入夙资殚洽之长省户重来独秉清通之识绣斧益光於七聚油幢旋倚於十连鰲峙仙班使三山其屹若龙收甘霁如四海之望何方自适於考盘之余盍亟还於访洛之後云开衡岳划见祝融石廩之余野濶洞庭好张咸池钧天之奏果驰骊驾来问熊湘福星出虚危间一方幸矣金文聚丁卯岁多士翕然况兼帅领之崇尤系顾忧之重中权後劲威惠剡劘二矛重弓气势聯絡乃跻华於戎萃仍晋直於尧章虽太史之在长沙寧有滯留之意然申伯之式南国宜酬屏翰之功便径陪碧落之从班行遂纘金华之相谱某山樊弱植疾疢余生束带立朝久负空餐之愧止戈为武误叨乘障之行良切凌兢幸依巡管亟稟令於道涂之次尚懼顏於庇厦之间黔之漓巫之礪敢鄙夷於远俗水之汉星之斗第翹企於下风

通湖南李仓启【义山】

同师文靖之门夙钦先契假守武攸之郡幸隶使家属涓上日以建台阻顺下风而伏谒亟凭贄牍以闯贺牀窃以慕李元礼以造门自言上世闻苏孺文之行部喜有二天何敢挟故於平生所愿受容於今日幸哉晚陋有此际逢某官诸老渊源奕叶文献永嘉响振复闻正始之音双井味高指入江西之派践扬中外会蔚西南刃弗顿而礪若新火洞然而玉不烬重来省户笑看元都观之花尝从鄢城快写平淮碑之草肤使屡驰原隰之轡番君最得江湖之心宁屑领於锤官乃自怡於珍馆虽英猷之少郁然伟望之益隆野渡方横坐閱秋水落霞之观浮云尽卷划开天柱紫盖之峰乃起郎潜来宣上指乡邦绣错即便观风农扈金穰又开嗣岁炜星驰於龙节淑春满於熊湘太史公平準之书伫闻治最真法从甘泉之橐即上禁途某单见冥闻孤根弱植立本朝而甚腆人谓斯何得支全以焉依天其或者甫问戍楼之役适严轺传之驰十三星之在渭南是为仓廩千万间之庇天下尚记帡幪

通交代杨寺正启

冠惠文而率属久俟归期弋止武以名邦猥当补处出入相为於先後交承实托於云仍况忝通家敢稽用贄某官伦魁夙望善类夏盟準周易作太玄後世子云之学约春秋作史记平生司马之书盍自编摩径排胶轕士皆咋舌畏汉鉤党之累人公独诵言数唐军容之误国天王明圣世道清夷追三代之英方晋陪於议礼防六朝之旧乃屈赞于征谋大夫同升少府出节是宜在论思之列俄特膺临遣而来宣布教条犹是黄龙之诏作新风化一如白鹿之规揉以和平兴其孝秀卖刀相语我始讐由公亲骑竹成羣昔未来时汝弃更歌麦熟共爱棠陰人人传续志之编字字皆最善之实安得结辈数十尽令天下之苏愿借寇君二年姑听道旁之请越既懋赐金之典便盍归羣玉之班表用而为公卿盖具存於故实决狱而传经谊顾方重於儒生乃屈仁人俾司邦谏秦尚存其一已洗深文尧曰宥之三更观定力况近世诸公之大用多自理廷而中兴吾蜀之类元尝跻揆路是姑寄径可但持囊某誓慕方深污朝良忝周章野鹿雅难着於冠绅历落饥鸿或自谋於梁稻补外稍谐其本趣瞻前幸有於良规所望旧政必以告新不然小知其可受大山公在朝汝不孤矣倘记斯言凉州名士何以代之未知所称

回公孙倅启【止】

久污本朝补外亶繇於天幸繆分支坻治中获屈於人英惠傲粉榆敬用竿牍某官器宏以远玉璽以温唐房相之湖秀独鍾於英气汉菑川之第早已策於变名詎应常调之拘挛便合层霄之凌厉屋低人杰暂迁簿领之劳羶冷官清自得襟期之乐俄道闋而着范急絙瑟以调琴雉最昭升骥涂横鹜荆州用武国今最重於上流长史宰相能昔具存於芳躅惟都梁万山之底犹别乘再驾而来盖其大耐於功名於以厚培其风力在郡绰绰无事不妨司马之从容游刃恢恢有余不见全牛之肯綮沂歌四達儒教益章文盖小留姑借黔漓巫碻之重尺书亟下即归觚棱阙角之间某久抱幽忧轻违深密高人长士且将相与笑之小国寡民或可行其志耳拊摩初无於他技关决赖得于斯人四海交游孰若同乡同官之契一家相守尚几胥训胥侮之忱欲请正多其喜莫喻

回张教启

武冈侯之行更迭幸从于屡请文学掾之至後先良喜于同时况在年家敢邀寅好某官钧韶雅韵金璧清臚考亭武夷之间渊源有自西铭正蒙等作宗派适同既凌厉於巍科尚拘挛於常调勾稽簿领高士肯为总统纪纲督邮借重坐閱羣飞之上来寻独冷之曹黔漓巫碻曾不鄙夷其俗周情孔思益将大肆於文恐未煖于臯比即催归于瀑直某无禅朝路自觅斗城正度尽万山而来乃幸依半水之重言政不及化方自慙俗吏之为匪颇而以规其勿废古人之义

谢叶丞相启

覆帔载持夙依大造因循玩愒遂至弥年愧治状之蔑闻摯谢函而若惕窃以汉之循吏传无

可书唐之高贤考甘最下故善兵不求於赫赫而奇策莫若以平平智名勇功事泯於当时之近流风善政意存于既久之余然非得惴惴无华之人祇以为苟且自安之地伏念某本非翹楚见谓濶疎樗散离奇其姿不足以适用鸿飞历落其羽不足以为仪荷播物之所私致逾涯之若是入则污班缀出则忝拊摩凜欲试于平生曾不量其非称固知非健决之吏初未尝鄙夷其民一新学校而兴之庶几风化之本者催科寧缓奚忍榜敲讼讎顿希本无钧钜粗若相孚於父老然而未了於儿痴蚩蚩之氓咄咄其怪斧螳锋蝟詎忍杀以为嬉带犊佩牛曷若安於无事幸多全活得早救寧是谁之过与难辞已责非臣之力也悉自王灵载惟负乘之踪宜在譴诃之域满百乃报虽荷於并包有七不堪当思於夙退及兹初考凜若後图而况驴止一鸣它无伎俩鹤仍多病愈觉 蹠所几息影于祠官惟切归心于翹馆兹盖恭遇某官两朝元老四海真儒永底蒸民之生惟上承於德器大计羣吏之治方下饬於官聯至若遐陬亦严考绩尚念孤危之蹟俾逃瘵旷之诛某敢不仰体鸿私益殫努力岁有余日不足非敢急於近功人所欲天必从尚少休于末路

通汪帅啓【立信】

肃被诏声易镇方面地严北固久资节制之尊天睠南邦兼领帅连之重置卹所暨欢诵惟均某官实学兼该英规有伟俊杰识时务已复軼於人羣文武有威风宜独当於事任有所谓经纶之妙曾不知盘错之难宥府编摩望郎荟蔚征谋治法屡借密筹侯度使华几膺隆委尝諏度於淮甸扶风之近实讲明乎周官荒政之条擢兰錡以跻华总油幢而采重内则聯江介襟连之势外则屹淮堧鼎峙之形制闢宏开端任重弓之寄卿聯峻陟肆颁进律之恩导密旨於枢廷通仙班於秘殿虽久?旁观之手未容横夜渡之舟简在上心起镇京口风寒壮甚不过一衣带之间威望隐然所恃万甲兵之老肆酬伟绩来重全湘耸闻斋钺之临日俟楼船之下鱼龙不动坐澄洞庭青草之波牛犢自闲无复渤海潢池之习不烦教令尽肃提封星沙千里之平如在几席霖雨九州之施即此权輿仁有诏褒即膺榜用某本无能解何有施为虽尽此心求副牧与刍之责终非其据曷逃负且乘之诛方下考之仅书幸前予之来莅广天下士之庇愿歌少陵之诗书覃部帅之勲请视武冈之刻

通陈提举启【合】

荣被诏声起将使指出少府节棟风采之一新望祝融峯净云翳之尽豁先声所浹一道为清某官九牧盛名两科异等浑浑灏灏而妥适章句允谓精能本本元元而殫洽见闻夙称宏達自着身於芳润便策足于清华晓候玉堂奉翰林主人之对夕讐黄本发藏室老氏之储设醴藩房含香僦直儒猷小试为开鹿洞之书省户重来仍补鹤厅之讚引舟风急出岫云迟正元朝士之存今其能几小雅使臣之遣母乃更迂上方以近甸而视遐陬公其持丰年以报明主小临封部立有最声恐难淹仓庾氏之司谅已在文字官之选最宜为诰允属当仁人喜福躔方光临於翼分史占奎宿又入次於紫薇某未熟父书岂嫻吏治但知持已期无媿於高高宁有及人考惟甘於下下已上祠官之请幸逢轺传之来十三星在渭南是为廩廩千万间庇天下尚托帡幪

回教授谢荐举启

同门而事河汾夙固知於所教下车而荐文举旷不嗣於此风公方夷然仆则媿甚兹幸酬於凤诺其敢辱於鸿谦某官天分浚明风猷凝远平生参请尽得诸老之渊源小出绪余足为多士之模楷肇新?舍益振铎铃庶几邹鲁之风允矣黔巫之重诸公登台省少閱羣飞先生作栋梁竟收大用便合径排於胶葛岂必常调之拘挛而某自顾何人敢於言士举而不先慢也盍致负荆忠焉能勿海乎尚期发药

通交代汪守启【万顷】

疏恩宸宸作镇都梁已觉旌倪歌襦袴之来暮自慙晚陋真糠粃之在前傲好云仍声彻隶史某官瑰明照物厚重镇浮豫章孤漂砢礪共期於器业芙蓉九孕盘礴实萃於英奇自平涉于华涂皆荐更於剧任宣威幕下时看鄢城夜观之碁总赋輿边力致蜀道青天之粟入跻四辖出领双潭属大阃之宏开复元僚之倚赖?鑣向阙方陞戎监之华出幕持麾仍上富川之最未容家食益懋简知肆颁菟佩之荣俾旅龟琴而上中军诗书之帅岳静海澄湖南宾客之贤云飞川泳甫借筹帷之重即闻符传之催载惟此邦虽非昔比然而潢池赤子久已相安白水青秧居然可喜日俟仁侯之至自臻静治之休惠然临之为续武冈之刻自此升矣径登文石之班某全抱迂疎居成玩愒苦心何补良有负刍牧之求归梦已驰会且觅蓴芦之假喜聆使纛来望帅垣岂惟窃庇峙之私抑又缔交承之契靡忧淑後亟喜恭先已唤沙鸥期我苕溪之上尚随竹马迎公巫水之礚

贺汪安抚开阃启

荣奉宝纶淑开玉帐洞庭九洲之广尽属提封长沙千里之平耸观号令星驰邮命雷动欢声某官气塞两间身当八面经纶宇宙妙筹略於胸中表里江淮多麾幢之补处既屹金焦之砥柱盍归闾阖之觚棱帝谓重湖令为巨镇欲壮东南上游之重势必得文武兼资之伟人二矛重弓属方谋帅中权後劲全以畀公趣旨肆颁刚辰叶吉旌旗之拂牛斗已开赐履之封袞绣而正魁台伫听十行之召某瞻仰牙纛拟具囊鞬望岳麓之云幸焉依於巨庇摩武冈之石尚嗣纪於殊勋

贺汪帅参啓

元戎自辟天子曰俞与我共理惟良方资贤牧屈公以望此府允谓英游虽千里之舛然而一道之幸甚某官器宏以達玉璫而温人物英英实鍾九芙蓉之秀经纶绰绰自有万甲兵之奇比纓菟佩之荣爰旅龟琴而上有如黔漓巫礚之岑寂已觉耄老稚齿之懽呼公不屑行上为改命中军诗书之帅岳静海澄湖南宾客之贤云飞川涌留借筹帷之重坐策樽俎之勲大夫同升少府出节某方交好亟致贺緘斗絶一隅固攀缘之莫遂云连大幕尚庇冒之焉依

贺陈提举建台启

夙驰轺传肇建崇台一节星临顿觉汉常平之重羣峯云卷争看汉吏部之来布濩先声提封交庆某官文章尔雅议论崇竑海内第一流自是老斲轮之手湖南二千里乃尚纒揽轡之行公不以驰驱上下而为劳士则谓内外重轻之当计长孺发粟何如拾遗禁閤之间太史浮湘岂若执事从官之内恐未容於席煖行即有於诏温歌四牡而劳使臣母淹苞栩草尺书而诏赞对趣伴薇花某辱在下风欣闻上日悚观条教已知籀篆之新自附门墙倘念稽孤之旧

贺宝庆陈知府启

疏荣北阙作牧南州上意具宣亲奉如纶之旨下车伊始欢腾襦袴之歌一念所孚千里幸甚某官风猷肤敏天分高明故笏袖传见谓甘棠之犹在新硎刃发每闻错节之立分臚仕夙登能声绰着既着班於万玉盍方轨於九衢上念此邦实先帝龙潜之旧卿其为我消比年犷佩之风共传条教之简寬顿觉旄倪之呼舞最书立上召节伫颁某邻烛分辉野芹将意燕方来贺良自愧於後时鸿可为仪尚悚聆於言语

贺吴提刑转官启

出纶中禁追律崇台厥以最称遂居诸道之右若时明陟岂但拾级而升成命俶颁有闻胥怪某官文献之脉明哲之师禁暴诘奸游弭弄兵之警洗冤泽牧悉繇折狱之明两载諏询九州函活吴公河南第一已应褒书贾谊岁中超迁即归禁甬某自领言语倍切庆惊燕雀之贺厦成盖不自知其欣跃龟鱼之?瓦影尚有赖於庇存

道州徐宗丞到任启

肃膺明诏来领名邦上日吉圭方籀红之喜滌先声布濩已湘緑之暖浮凡在提封凉深颂咏某官英英人物绰绰规摹地胜龙湫独奇鍾於一气手高鰲钓遂连擢於两科既妙誉之霆行宜横翔之日濶入跻玉笋出对金焦国子监一部书士心交属麟正丞十五事治道攸关方考白玉牒之旧仪盍在紫粉墙之妙选翻然剖竹久矣种棠亦既终三年淹复以二千石起公纒隲轨虽未愜于輿情上念春陵每欲隆於吾道爰资硕望俾究儒猷驱腊雪以随车岁年丰美对条风而出教父老懽呼方少惟於绪余已高絶於流俗坐令今日复见古循吏之风归重本朝即补直侍臣之选某幸依邻睦敢贺厦成参错数十公但细哦於此诗沮洳三辰步尚可窃於余波

谢书考启

惕日山城偶成细牒瞻云霄极敢昧大恩感切轮囷敬陈竿牍伏念某分惟循已智弗瘳人弓冶箕裘既夙慙於家教牛羊刍牧敢自诡於民庸初非子子之姿徒有区区之志读抚字劳心之传则窃慕唐之高贤诵中和乐职之诗则思发汉之盛德中更纷纠遂堕谬悠厥既血脂而汗顔何能为役不适医创而剜肉只复可怜怅始愿之浸乖冀後图之是勉閱时云久课效益疎而况兵旱相仍民尤寡遂疾病居半吏率多偷虽复竭轡线以为长强铅刀而使割竟无强

翎之效自见当时惟有凋瘵之余以待来者居然不武何以自文薇亦柔薇亦刚荐成岁律瓜而往瓜而代已迫戍期然且监牧不加诃士民不推去再获书於下考庶遂保於末涂永惟此恩讵无其自某官端委廊庙砥砺臣工率属昭王三岁乃不计於羣吏视民由已四海无不被之一夫睠此遐陬欲其静治每曲加于函覆俾克底於璧全某敢不感烈铭心凌厉壶尾一日必葺庶如始至之时终更亟还尚冀曲成之造

书考谢运使啓

列部受容幸书考下职司论荐猥与数中不足乎扬敢忘所谢窃以周使臣爰谘諏谋询度汉郡守乐职宣布中和惟五善具皇华之篇尤先访问必三诗合鹿鸣之雅而後转闻倘不其然亦祇以媿某少而竅紫长益支离言圆行圆是固元子所恶行散坐散愿为龟蒙之徒周章强着於冠绅眩瞽顿惊於钟鼓竭来远外宁复激昂虽於保障茧丝粗知所择尝恐櫛机饕餮以辱其先惟知似似以下心岂意咄咄其怪事虎兕出於柙是谁之过与龙蛇放之菹以邻为壑也赖诗书之谋元帅於樽俎而折遐冲千里动中於事机一朝尽寒夫赋胆提封以肃全活维多由公而仁大书潭帅柳中丞之绩非臣之力每诵渤海龚太守之言自惟负乘之惊幸免譴诃之域满百乃报已辱并包有七不堪所当亟退久鸥盟之入梦俄鸛表之横空虽一字之褒荣於袞衣岂九州之大无此芳草或者表里洞然之既久是以父子牵聯而俱书未必心诚求之而谓之有志不能乱庶遄已而谓之得宜称其坊止水以居中喜其民按堵之如故曲加枚拭昭示宠绥然而无实之名是乃先民所惧?其纁裘凛若刺芒某官宗派黄豫章模楷李元礼岁寒後凋之风操特立千秋江左独步之声名高眎四海况践扬监牧之重尤喜谓人物之间谓察吏已熟於见闻而报国乃吾之职分共理良二千石曷称上求参错得数十人乃愜公意遽俾溱荐士之藁恐有负牧民之箴某敢不敬服徽言益坚素履心驰去意寄书已问於当归身托平生作诗愿哦於远志

陵阳集卷十八

卷十九

钦定四库全书

陵阳集卷十九

元 牟巘 撰

啓

通交代赵寺丞啓

辍班外府宅牧南州来从魏阙之间具知上意坐使巫礲之下如在近畿辱附交承亟修贄问某官天台神秀地望穹华汉诸侯王有?苴茅之旧唐进士第并驰韦布之先猎猎贵名駸駸华践发硎游刃初何有於盘根前箸借筹盖居多於帷画遂繇骥乘入簪鸿仪既键司福祿之颁且簿正僇鸿之事谓宜径上分辉藜杖之端顾肯斜飞坐啸梅花之外复持美最归重清班三丞朝望之夙优列宿省郎之平陟银黄丈二组何勇退之甚高紫翠七一峯殆夙缘之有幸邨传至止輿诵翕然载维此邦虽非昔比然而潢池赤子久矣相安白水青秧居然可喜允资坐镇所愿速驱帝简宗英宁久作巫夷之长朝知治行即峻跻供奉之班某全抱迂疎况婴多病初无循良之效可望古人惟有凋瘵之余以累君子襦袴已歌於来暮糠粃幸掩於在前愿言奕叶之云仍惠傲交好尚与都梁之父老敬候先驱

通曹漕啓

自天锡命易地建台占軫翼分以星移实同躔次分戊巳屯而云列正赖转轮轺传肯来提封胥怪某官高标絶俗实学济时康庐数千仞其高地灵不断魏笏一再传而後风烈如存粤早践於夷涂已共期於远器由外司马为中都官六院寢高晋司禁键专城廉取肯向【阙】淮堧作坞以甚严仓庾名官而尤重转而反楚复此

爰周时并植於双台身实兼於数器外则馈饷不絶宿饱相欢内则敛散以时常平益广征谋密赞伟绩於昭公宜畴最以径归上欲用贤於已效备契丹寬河北当护本根遣鲜于出京东宁迂轨辙顾熊湘其密迹驰骊驾以增光入境而褰帷涓刚而视篆先声有俶和气潜孚自比而南重湖正资於均惠不夙则暮一札会见於趣还行复家羶即持禁橐某漫分斗垒徒玩岁华食粟何裨问戍期而已过合符良近遥归梦已先驱自幸末涂聿逢揭节倘一日而未去得奉六条真二天其焉依庶几全璧

通刘提举啓

荣被诏声起将使指湖南二千里尽归揽轡之中天上十三星是乃积仓之次先声所暨和气

已孚某官宝璐大名渊源粹学萧然风骨所谓山泽列仙之臞伟甚词章如闻钧韶九奏之雅峻跻清贯夙负有声太学诸生犹记举幡之日集贤学士共惊落笔之时道家蓬山望郎省户使其依违婉娈以谐乎俗岂复偃薄回翔以至於今逮乎访落之勤爰借僝工之重记正元之朝士能复几人陪上雍之侍臣是特一武忽飞鸿之惊矫渺独鹤之来归水竹清华图书跌宕神全而气采王身退而名益高石室棋间难久袖烂柯之手衡峯云卷独深知皎日之心果闻黄纸之除书茂简白头之老监起郎揭节涓日建台太史度湘岂若执事从官之内长孺发粟何如拾遗禁闥之间上方以近甸而视遐陬公宜持丰年以报明主甫临封部立有最声寧久滯於六丝即平登於两制某漫分山垒何补县官萧索戎楼久瓜期之云熟呶哑归櫓觉蓴兴之已秋正末路之凜然俶輶轩之至止倘尚留於一日幸得事公虽独有於二天敢云私我

贺汪帅除都丞啓

荣被温纶肆加异数寬忧南顾允资中军帅之贤导密西枢爰进真从臣之列提封所暨颂咏惟均某官实学兼该英规有伟胸中甲兵数万敌胆为寒湖南壤地二千民襦悉暖教令孚於期月威风懔於重湖富公之在青州非多蒙振魏国之帅定武顿革惰骄治最卓然宸衷简在乃亟陞於从橐仍系重於帅垣惟承旨视鰲禁之至严而入侍与螭墀而并峙绍兴赵子画实兼次对之华元佑王彦霖径领本兵之寄伫观柄用以展儒猷某仰窃庇庥独深庆忭统府檐趋之末媿未能全正衙麻卷之颁又将来贺跃跃以喜亶亶奚殫

贺运使建台啓

载涓刚旦肇建崇台英簫辅函移福虚危之分棠陰閱世恰逢甲子之周初滌籀纹一新条教某官夙传家学见谓吏师玉渊三峡之泉去为江海洞庭重湖之野来奉钧韶坐使离骚之乡复见皇华之雅列戍懽呼於宿饱诸生倚赖於夏盟一尺商霖已应随车之雨千艘楚粟坐通下水之漕立有最声平跻禁路某系匏未去庇樾焉依杂沓贺裾兹幸逢於上日呶哑归櫓尚亟请於下风

谢除大理正啓

外庸何取猥玷除书後至当诛自归造命辄陈悃悞仰答生成窃惟士制刑之中史告成於正是为地官乡帅之属实视南台特书之班厥任匪轻以人而重要必称寺中之絕乃可司天下之平藉未能得西京黄伯之循良亦当复南士顾荣之秀望始为宜称无负选抡某戍削之姿欸繁之识如魏王瓠落本空如纪消鸡虚憍已尽粤叨乘於一障偶坐閱於三秋责以会期初不过俗吏所能为者问其治状何敢窃长者之称乎仰藉大钧仅臻细满俄予环而使入爰上印以亟行久阻涛波倏侵晏岁虽式微之赋幸已来归而棠棣之诗恐其或废属经营於薄绪遂宿留以後时暮雪兔园自慙未至春风燕垒尚许重寻自怜支离稿乾之余复与光明盛大之际昔渭滨云远每怀报一饭之恩今东阁天寬又目覩四方之士突兀眼着於大厦依稀身傍於名躔人贺其遭已慙非据某官勤劳再造平决万狱京邑空囹如见成康之世太仓发粟实同禹稷之心流海宇之颂声辑庭帙之庆事八十者五豆方宏老老之仁三千年一花益

衍绵绵之筭既宏开於寿域尤茂积於陰功谓其旧服於官聯盖以粗知於德意卑污是正更
广好生某敢不敬受嘉仰酬洪造画衣冠而治惟知仰贊於明时带笈簪以游尚冀少安於愚
分

谢除侍右郎中啓

元佑师臣密侍临轩之旦淳熙郎选误叨除目之荣恩华度越於流辈威烈轮囷於轩瞻恭趋
严屏肃摯谢函自三班更旧制以来惟两选以右铨为副七千八十六阙尤叹久淹五万四千
词条孰能遍睹肆今日丕厘於积蠹而冗曹顿为之一清然而综叙得人自足服衆多之口妄
庸非据恐反生侥幸之心世胄必得张宣公之贤蜀士亦须杜起莘之望岂繫謏陋可玷清华
某结纳无奇支离堪笑虽从诸老先生之後良憎见闻徒慕两京循吏之风莫知宣布竭重来
於班笋甫四閱於堦蓂贯索晓沉幸空列犴武成春锁恐漏多鱼偶沙汰之尚寬岂乔迁之过
望不图冗散忽与甄升紫粉界墙在一时而超甚青绫倬直如列宿之笑何莫盖其愆欲辞弗
获必使无冤矢职乃见清通正自以椎少文安能敏絶靖循侥忝弥切凌兢某官文武兼资劳
谦盛德緇衣兮又改造敝袴以待有功允出至诚尤严责实再念铨衡之公法是关磨勘之微
权深愧愚踪曷当隆使某敢不敬修职守祇服休明自知无佳吏部之称可孚輿望何敢以老
衙官之语而忽选曹惟既乃心庶无所负

贺左史王侍郎啓【应麟】

升华柱史晋秩天官冠螭首蛾眉之班紫毫发彩上鸡翘豹尾之列金镜题才宸命诞颁朝绅
胥庆某官四明间气诸老传真海内第一流负古人所自任之志胸中三万卷成当世不能为
之文擢异科轶平园於盘洲载令德自文正而懿敏畴咨鸿硕遍历清华夕金华而朝石坳藉
甚告猷之益内玉堂而外西掖焕乎宜诰之称丕彰近甸之民庸式着本朝之公望复作蓬山
领袖盍为禁路羽仪褚遂良之録起居载笔聿严於书法孙莘老之振淹滯持衡爰别於品流
增贵纶垣行登政府某幸依官簿况托年家慙无佳吏部之名愿言庇厦敬致真从臣之贺尚
听扬廷

通交代浙东提啓【家铉翁】

予环趣入方劳使臣之来出节俾行猥承贤者之後辄修初贄自托下风某官问学淳涵风猷
整峻大儿孔文举一老高视於人羣难兄陈元芳二季共称於世瑞越自驰英声於茂宰成美
最於介藩擢外府丞维天子使并涛江而东鹜乃冯翊之左区路熟重来风生一道苍崖赤子
自以为不冤玉壶清水挠之而不浊含香径跻於省户寓直密傍於奎钩有功见知原省因任
留之以帝乡之重待之以成宣室之厘方底緑绋顿觉小蓬莱之近属车清蹕即跻旧笔橐
之班某积愧空餐日寻归梦顾铅刀之钝甚如绣斧之轻何必咨以周敢以驰驱而自诡其则
不远庶几矩矱之是承

谢马丞相啓【廷鸾】

太微积星之次良玷清班小雅皇华之歌骤膺重寄循墙弗遂衔袖以前窃以行部过江昔之所重观风近甸今者尤荣况我朝初设於祥刑维外郎首膺於出使自非夙望曷称嘉师某蕞尔微踪凄其先绪带衡佩矩仅守曲士之寻常错节盘根初蔑良工之剗剗平生惟思於敛退所至辄用其疎愚治郡平平甘催科之甚拙司铎瞶瞶耻揜以为奇盖深逃健吏之名幸不在巧官之目胡不归之赋颇叹菊荒无何有之乡乃全樗散比陈情以自列恃知己之汝容岂意出纶反叨持节地大物衆莫如冯翊之区人微望轻岂称职司之体无乃畏景而就日凜其受命而饮水某官学为帝师心主善类周公相祀上未许於明农两结当封天密扶於陰德荡八荒之开寿广一道之好生爰重谋询尤加选择谓某虽甚腐於力若不足以激昂然有志於民可与闻於钦恤遂令司臬实荷化钧某敢不敬服明休冀殫薄效相期勿犯幸逢画像之朝尚赖曲成亟反屠羊之肆

谢福王啓

明德茂亲夙仰宗藩之重皇华宵雅误将使指之隆循墙莫控於忱恂削牍用伸於礼敬窃以鼓楫而过江左昔谓至难露冕而行南阳世称殊宠共惟今日尤重帝乡三辅皇图俱号扶冯之近两朝赤子深涵丰沛之恩必将坐致於无刑斯可延洪於有庆匪时宿望曷受嘉师某本以妄庸游叨任使出司民社曾微慈恺之称入忝铨曹又乏清通之识窃自知其樗散每深媿於食浮力请职祠惟期从欲不能者止亦分量之所安爰用咨諏敢驰驱而自诡况慙愚惟知遂一致之性而闇劣未易析两端之疑顾视阙然宠灵厚矣某官盛德而仁熟行高而属尊赐朕膳於弟兄式笃先朝之爱分宝玉於伯叔益隆圣主之恩大路綏輶之备殊徽黄髮台背之介多祉肆劳谦而下士益推广於好生某敢不明清单辞矜畋庶类画衣冠而治将奚补於盛时带笈簪以游倘蚤谐於初志惟祈函护弥切瞻依

通洪安抚啓【焘】

建牙禹会耸闻赐履之称将指周原喜是抠衣之旧虽造化曲为之地皆汲引以至於今辄冒顔行敬抒心曲某官光明俊伟凝重粹温郊藪之有凤麟蔚羽仪於昭代山川之出云雨将润泽於苍生出入垂四纪之余险夷惟一节之贯爰自畴茂庸於分阃乃思挹爽气於游帷岩居川观花香竹色公虽袖看碁之手上方兴当展之思谓旧笔橐之臣惟灵光之独在而小蓬萊之地乃冯翊之要区五阁冠班十连领帅为我强起未容龙卧於清波惠然肯来况复马谙於熟路先声布濩环境懽呼领东方之缙绅靡须煖席问西厅之典故即干洪枢某立朝何裨予节良忝若时华选敢当小雅之遣使臣实有夙缘复见文昌之为帅长乃平生之知己尤今日之至荣所幸有函丈之可亲岂敢以外台而自列奉令承教一如在幕府之时当局处中愿复入钧陶之数

回郭衢州啓

观风问俗愧无古肤使之能宣化承流幸倚东诸侯之望敬修削牍仰复司籤某官实学兼该宏规有伟盘根利器未尝肯綮之少经坚车大輶每贯险夷而一致自早收於儒级已超着於

英猷宸扈晋班珍曹叠组急流勇退竭为鹿洞之游异最昭升径陟雉工之长既益深於涵负难久閤於经纶若时太末之区颇狃潢池之习蜂蛰起於袖人皆貽愕以莫前龙蛇放之菹公独笑谈而遂定懋着期年之最坐臻千里之安方略具施威声益振烂柯日永已知暮着之高褒玺春温更觉橐班之近某立朝何补乘传竭来深惟司臬之匪轻正望同舟之共济康衢謠咏喜复见真淳之风原隰驰驱亦邀安靖之福

通鲍制置启

赐履至海方瞻统府之尊六轡于原猥玷使臣之选夙幸邀於先好兹又托於下风乘传甫来飭函以摯某官风仪简远论议崇闳少微古括之精英实锺间气太山洪河之涵负卓为伟人自亲简於严宸遂历居於言路抨弹霜肃凛其一御史之风忠说日陈不在三谏官之下咸斂手以避於司隶乃持橐径上於甘泉史观兼华秋卿叠组主体国论方有赖於儒猷後劲中权乃出颢於闕任仍跻仙殿来重瀛垣粤从号令之新坐使提封之靖春生秋肃山立霆行海不扬波已独高於殊绩林有伏虎盍归重於本朝暂为十洲之少留即闻两地之径拜某奚堪用世甚忝为郎归梦久摇每绕苍苔之上误恩过厚俾持英蕩而东媿隆指之莫将幸高牙之密迓周原膺膺敢自诡於驰驱夏屋渠渠尚焉依於庇冒

贺朱漕启

辍武机廷将输河漕木天寓直遂通东壁之躔银汉乘槎密傍长安之日悚闻揭节尽肃提封某官天分夙高人门甚伟引笔伸纸其言自成於波澜游刃发硎所至无前於肯綮自与闻於国计益展究於英猷有蔚功言盍膺事任刘子羽之在枢掾实在魏公之谋鲜于侁之号福星尝闻迂叟之语教条所暨和气已孚漕引以归中都伫昭异最拾囊而从上雍遂陟禁涂某夙荷眷知尤深庆忝驰驱英蕩敢云六丝轡之并持流落草堂复望千丈裘之大庇

贺章参政启

涣颁奎笔晋贰台衡敕寧武图功方领神枢之重继自今立政遂参国秉之隆赞书一传举笏交贺在昔仁祖有若郇公肃艾清忠实相庆历之治重谨微密具形徂徠之诗洪惟今公克笃前烈某官堪輿间气经纬全猷乔岳泰山极包涵而云雨自润祥麟瑞凤不鹄搏而羽毛毕朝早以魁垒之英共期公辅之器历谏官御史之职有伟建明居给事侍从之间益隆德望已为仪於清要犹未究於经纶旧学甘盘上方笃从游之眷中兴常武公遂跻申命之聯乃蔽宸衷擢陪宰席退思岩之深念无非为国家久远之图天章阁之宏开方自任天下太平之责於以慰苍生之至望於以昭真儒之极功以首参而摄行岂但用龚实之之故事当中书之虚轡行遂继毕文简之芳猷某幸囿陶熔第深庆忝駟骆之持丝轡初何补於馭原燕雀之托帡幪其敢忘於贺厦

贺刑部陈尚书启【宜中】

趣驰召駟晋长爽鳩王人多闻密赞月将之益儒者给事遂跻夕拜之聯叠组生光垂紳交庆
某官伦魁伟望善类宗盟永嘉正始之音斯文独任庆元鉤党之籍姱节尤香自五色之占祥
已九重之懋简御史无官长具严豸角之威太常不是卿径上鸡翘之列典司帝制备极儒荣
由礼闈而践政涂盖用王魏公之故事请福唐以便养亲乃继蔡忠惠之芳猷十乘惠临七闽
苏醒然而林有伏猛所当归重於本朝海不扬波讎可独私於遐峤果招旌之繫至俄德履之
径升暇日到石渠丹地开黄卷 头巍立注意益深濡墨涂归已见引纲维而争大体把麻庭
告行遂溥润泽以福苍生某将指駟原懽顔燕厦奉令承教方将仰隶於统临当轴乘钧所愿
共陶於坯冶

贺陈察院启【过】

简自严宸擢居宪府紬书天禄阁方资笔削之长察事司马门遂任纪纲之寄除音诞布輿论
交孚某官老成典型大雅宏達明月宝璐纷内美之好修繁露玉杯抱遗经而独究久周南之
留滞俄宣室之兴思职教武成横经宗邸博士议郎之选允藉多闻承明著作之庭尤资夙望
益光家学洵谓儒荣肆天笔之亲除遂霜台之分察力致天理人欲之辨尤严君子小人之间
第一法筵已竦闻於伟义二三执政行径践於迓聯某越在乘轺喜聆出綍浓墨大字愧乏徂
徕生之诗广厦懽顔第哦杜陵老之句

回倪处州啓

疏荣严展作镇近畿细?广厦之间方倚成於君德古括少微之分乃自诡於民庸诞布寬条懽
腾輿颂某官金华秀杰丽泽渊源季方并着高名时称竞爽子云多识奇字见谓洽闻少资璧
水之楷模遂给玉露之笔札风舞槐龙之翠密侍熙明夜燃藜杖之青徧仪中秘兼华省户举
武禁涂乃莫回勇退之怀竭来旧补游之处昔在臯比之坐已闻学子之翕归今凭熊轼而来
想见邦人之相庆盖久孚於教化初何事於施为田里人安江山开悻坐令今日复见古循吏
之风归重本朝即造真从臣之列某夙蒙异予今幸同寅駟骆諏原自媿驰驱之何补燕雀贺
厦第忻贵煮之焉依

陵阳集卷十九

卷二十

钦定四库全书

陵阳集卷二十

元 牟巘 撰

啓

贺郭正言启

显被龙光擢登骑省御史六察方资纠正於官邪诤臣七人尤赖切劘於君德赞书俶下舆论翕孚惟庆历增置於谏员若襄公崛起於海服自昔右拾遗之妙选孰如此六日之新除久远功名蔡忠惠夸朝端之风采礪硤言论石徂徕辑天下之颂声在当时?若神人肆今日复闻盛事某官人物师表问学渊源磅礴扶輿秀出五羊之裘魁垒杰特独立万马之中比茂简於宸衷遂晋司於台察纪纲顿肃奸宄潛消具严白简之威遂上青蒲之列正臣进者治表士竞相欢明主可为忠言公益自奋谓习俗当使之粹美谓议论当使之听行有如第一义之建明足为千万代之瞻仰谏官能如此岂不致於太平宰相可行之遂尽摅於素学某悚聆除目倍切懽惊属縻使传之乘阻与宾荣之贺朝阳鸣凤方观奏藁之传夜月惊鸿倘许寒枝之托

贺陈殿院啓

奎笔涣颁台端晋贰有裨帝右方资劘拂之功执法殿中益峻纲维之任忠贤进矣颂咏翕然昔在建炎有若忠简维三年之夏甫任谏员越一月之间径跻台副孰不谓除书之甚峻岂知视故实则已迂考言事簿所行俄升横榻取枢府衔而入即遂秉钧窃惟今公复当盛举某官色和气劲实钜声洪大蔡神蓍洞视万物而先见积石底柱澜倒百川而後知蔚为善类之宗懋简虚皇之眷姓名内出纠察晋司治世鸾凰平生岂乐於鹄抃法筵龙象第一咸耸於听闻襃积丹忱芬芳菊节上方喜忠嘉之论公遂进遗补之官韩魏公存藁谏垣孰知雅意刘元城徧历言路绰有前猷岂曰台无长官庶几国有君子曾未閱旬时之近已共瞻丰彩之新观象门甫綴於紧聯延英阁快传於伟论供奉赤墀下宁复久淹任参黄散间即闻大政某夙叨函护倍切懽愉燕雀贺成愧已居於人後鹿麋许放倘自遂於物初

贺叶丞相启

简在渊衷 升台席贰公寅亮重傅则国将兴三朝会同敬事则命以始扬庭有肃薄海交懽惟仁祖之盛时有沂公之魁望夙陪鹤禁盖独高羽仪之功亲载龙飞遂再被股肱之寄在昔靡闻於牢避况今又异於平时岂其我公司遂雅志某官忱通造化学贯本原如璧如圭瑟僖本威仪之盛在洵在陆寤寐皆忧爱之真粵从导若木之晖久矣正太微之次民自择相上方

倚公已致平於期月之间乃决去於崇朝之顷急流勇退岂乐钱宣靖之名晚节含香每诵韩魏公之句虽野老相忘於尔汝而圣主每问於起居谓新益从游毋遽野而若予弃谓初元该辅盖画宫而续於成俄银信之密传果砂堤之重筑仪图维旧眷注可知属当四郊多垒之余咸傒一马贰童之至诸生举旛於阙下使者结辙於山中虽富贵不足动其心然宗社宜深为之计天高气爽喜闻庚伏之清言忠义亲尤竭辰猷之告久竚瞻之云切肆优礼之是加至和之相文公特下百官班迎之诏熙宁之召正献适当七月入对之时有德进而朝自尊大老归而子焉往於以祈天永命於以宁武图功益隆磐石之安茂介秀眉之寿某夙叨钧播竦听制麻偶尚留丝轡之间犹得际袞衣之入歌诗九百字愧莫写於螽鸣聚观数千人喜即迎於马首

通陈制使启【存】

通班禹阁出镇瀛垣尚书五兵方峻跻於德履元戎十乘遂倚重於分弓明诏一传先声咸耸某官治朝著蔡善类凤麟出神入天之文追媲古作内圣外王之学号曰儒宗物望夙隆宸衷茂简自重来於省户俄岿立於谏坡执法端门风生突鹞之击记言洞案日侍俩螭之坳公每梦想於清苔上方眷留於紫禁以夏卿而掌帝制若元佑之东坡以春官而侍经帷若绍兴之文定学馆倚楷模之重史筵推笔削之公兼华已极於儒荣一武即登於揆路而乃屡抗戈天之疏竭为表海之行瞻此郾峯实维都会右扶左翊在昔所严後劲中权於今尤重虽忠贤当在於禁近然宵旰欲宽於顾忧一闻位置之新坐致提封之肃吏士具孚於号令旄倪咸傒於旌旗樽俎从容姑领十洲之胜经纶密勿即归两地之崇某夙辱眷知竦聆成命窃喜声光之近获依节制之尊駟骆诤原自笑驰驱之已倦燕雀贺厦尚惟庇冒之是邀

贺徐察院启【卿好】

光被亲除晋司分察出节少府已闻水漕之通执简南台咸竦霜棱之峻赞书诞布輿颂翕孚载稽先猷最重言职裕陵简擢尝以使还之余乾道训谟必由邑最而用盖欲周知於民事若时复举於彝章某官粹学英规崇论閎议地灵杰出实为仲原常父之邦风采着闻夙有元城了翁之望厚培器业小试弦歌紫盖峰前屡书抚字心劳之考金曜门里独升文学掌故之班方茂简於九重俄峻跻於四辖见大夫无可者利社稷则专之发河内仓无劳使黯弄御史印其无易尧果被殊知遂居剧任凡其力陈於殿陛之上莫非目击於地里之间守备十三条言言尤切法筵第一义凛凛甚严盖将一正於君心於以共扶於世道善类有主元气益昌斯谋斯猷正倚忠嘉之告汝为汝翼遂跻辅弼之聯某越在乘轺欣闻出綽读南州高士之传虽未接於下风续东鲁徂徕之诗喜亲逢於盛举自惟臬事幸隶台容沃轡六丝何有询諏之善珍裘万丈尚祈庇冒之仁

回安抚洪尚书启

生磨蝎之宫人皆怜於奇分挹洪崖之袂天欲制其颓龄锡以好词温乎盛德某官桐柯色耐白雪调高癸酉初置於藁珠方诤旧典壬戌曾游於赤壁自度新腔犹记辱在泥涂之中特纆

世掌丝纶之手幹百斛鼎絕知健笔之丰扛有千岁苓幸附长松之小草粧褫初度探借春风
清穎诗篇荷尚怜於叔弼南丰香瓣窃自愧於履常某蕞尔孤生凄其多幸再命三命而走其
敢辱於颂言九月十月之交倘早谐於归志

回洪制机启

玉树生阶庭幸托通家之好铜狄话畴昔辱存初度之临妙语过施微惊增惕某官朱弦清越
金薤琳琅文章当家自有五凤楼之体郎君早贵即催双鳬舄之朝不靳珠玑用华弧矢真所
谓幼妇外孙之作乃得此名父哲子之间吕宝臣丁未之同许邀余福文潞公丙午之会愿祝
耆英某自愧摧颓莫当縑籍闻鹤飞於铁笛空记当年诵鲸卷於锦衾第钦盛意

贺婺守赵侍郎启

简知当宁来重价藩天近虚皇密接图书之邃地严牛女光分棨戟之辉甫眠籍文已腾輿颂
某官三代循吏两汉宗英徐公自有常不易平生之价叔度挠不浊可知彻底之清粤从严瀨
之一丝对秉勾吴之双节入跻河漕坐镇神臯京师无忧有范君式资雅望关节不到有包老
益着清名爰畴最於尹厘遂升华於户籓满岁为真之近只急流勇退以谓何通国去思起家
有诏惟此邦夙以处承明之老在今日尤当用慈惠之师条教一颁旌倪胥庆叱初平石坐令
风俗之醇赐颖川金靡俟葦年之久即从笔橐大究经纶某旧忝侍朝新闻建牧自愧无一毫
之善如古诹询乃所愿千里之间得贤师帅光心之喜舞手以言已具归舟端为鲈鱼而计相
懽贺厦未忘燕雀之私

贺平章冬启【二】

六符之星曰太平式应连珠之瑞千岁之日可坐致宜膺献履之长惟我元臣辑时若祉某官
春融盛德天鑒精忠观阳复於初爻朋来有喜占岁临於吴分三捷奏功宜对芬芸永绥戩谷
雪晴鵲方传广内之驩香直麒麟散作函生之福某有惭诹度所赖庇全暖律一嘘愿早回
於生意云卿多寿但?致於颂私

乾清坤夷共睹连珠之瑞晨贺画会独冠万玉之班维我元臣哀时善颂某官庆风云会见天
地心金柅靡牵宜羣英之退听铜仪密运知元化之自调属兹献履之辰茂辑捧觴之庆泰初
之元起历世运方春冬至之日壽人函生蒙福某偶縻把绣莫旅贺裾问驿使之梅端悉由於
造化对卫公之竹愿常报於平安

章参政【二】

岁次在鹑尾适符元佑之壬申度起牵牛初方数泰元之甲子维时硕辅茂辑颂声某官学探
天根身壽国脉下丞相一等参幹繁机陈泰阶六符密调元化履长伊始受祉宜多前疑後丞
益茂重瞳之眷晨贺画会即冠百辟之班某使传叨乘宾荣阻造绣衣直指自惭无一线之长

黄髮秀眉愿仰祝千龄之壽

黄钟起历九寸之律最长紫殿称觴千岁之日可致维时碩辅茂辑颂声某官北斗躔魁庆云世瑞阳长陰消之际妙探蹟於先天文经武纬之全独称抡於两地芳芸初茁戩谷惟多伫闻麻制之传即列火城之盛某属縻使传莫筵宾荣濡饗六丝何有线长之补珍裘万丈尚垂緹覆之温

福王【二】

阳比君子德方回嘯律之春王今叔父尊宜介称觴之壽顺承刚旦茂辑颂声某官都若重緹粹然大玉玩義易初爻之动吉宜应於朋来锡鸿畴次九之全福方臻於向用适届黄钟之候益开朱邸之祥受祉自今有邦同庆某偶叨把绣获旅曳裾书鲁观之云已共占於多壽赋梁园之雪尚密映於余辉

南陆迎长景方增於宫线东平乐善庆宜辑於宗藩式对初阳衷时善颂某官青社綦贵黄钟函和三十分而後成妙探義画九五福之咸备宜用箕畴兹亚岁之陈仪爰自天而锡美方开衍筴有永皇家某密藉宏庥第增庆臆绣衣直指初何有於寸长黄髮秀眉愿永绥於多祉

台諫

元佑壬申记景至熙成之岁泰初甲子协清躔毕聚之祥维时正人茂辑善颂某官身壽国脉学探天根景星庆云出则为明时之瑞严霜烈日俨然主公论之盟丹忱屡上於囊封香气密依於扇影晨贺昼会方陪亚岁之朝前疑後丞即听扬廷之命某猥叨持节莫与贺裾濡饗六丝何有线长之补珍裘千丈尚依緹覆之温

陈殿院

黄钟为律首是持阳数之符朱衣在殿中密接天顏之粹维时善类宜辑殊祥某官学操易原身为治器严凌霜栢方扬鹄击之威瑞应獬篇咸耸凤鸣之伟芳芸初茁戩谷多官五更三点之朝方陪亚岁泰阶六符之曜即正中台某越在乘轺莫陪贺履夜持丹笔窃自愧於平反晓望喬云愿曲垂於庇冒

洪安抚

登台书云物已符岁美之占听履上星辰宜践景长之庆维时阁老茂辑颂声某官北斗穹班阳春盛德葺年报政久腾五袴之歌和气致祥已应六灵之喜芳芸初茁戩谷宜多遂繇義序之崇入补舜裳之缺某偶叨把绣幸预称觴会前殿之八能即闻登用歌闋宫之千岁愿祝壽祺

庆元陈制使

验南端之圭影式应迎长表东海之履封宜多介福顺乘刚旦茂辑颂声某官学探天根身为元气春回田里懽传梅溪一杯酒之诗云净涛波小试希文万甲兵之手在师中吉应复朋来某密倚崇墉倍深庆臆六丝濡饗媿何补於驰驱千丈珍裘尚焉依於庇冒

吴提刑

汉历太初律先起子鲁经南至日喜加辛茂迎线綉之长时辑皇华之祉某官名高云壑令肃霜台百九十字之箴一新明德千二百黍之律久积陰功已淑问之旁流宜阳刚之直长即膺诏綍归俸御庥某幸托部封莫趋贺庑扇开孔雀愿即陪供奉之班鑪拥蹲鸱窃自笑嬾残之迹

陈提举

律起二千百黍肇应黄钟珠连一十三星有光翠节若时亚岁茂辑迎长某官露寒之水霞光之綉为鲁太史曾书辛日之云发汉常平直是荒年之谷上方考八能而明陟公宜裒五善以径升甫对刚爻即颁湿诏某属縻守绂莫旅贺裾炉拥蹲鸱窃自笑嬾残之迹扇开孔雀愿即陪供奉之班

贺平章正启

一气转钧岁纪心躔之次三公拜璧日膺眉壽之绥宜对刚辰益增若祉某官心通元造躬致太平南纪波澄再启庚申之运东淮尘净坐收甲戌之功乾清坤夷晨贺昼会桃林骑火共传腊月之捷书栢叶羽觞载辑岁瑞之善类方开衍莢永燕之余引领【阙】祈尚冀【阙】放鳩之惠

汪安抚

王者当午尤重南维长子帅师宜膺中吉新开鸡帖喜溢熊湘某官硕望顒昂仁心簇達和門令肃旁行青草洞庭之区执撰班高密接红云通明之殿整军以暇列部皆春半夜牙璋趋镇上游之方面九天翠杖归陪元会之班头某幸托万间又逢三始雪深戍垒幸早许於残更春满辛盘怅莫陪於施贺

运使

春回紫宙方占元日到人日之晴晓望皇华愿致新年胜旧年之祝辑时多祉福我全湘某官绩茂方输规宏園物即潜久滞记紫粉之宫墙岁计有余峙金汤之粟粒和董列部简在九重着练鹄之袍立通水漕瞻袞龙之坐归照火城云云

诸郡

七润一章方正太初之历万有千岁宜歌闕宫之诗时乃价藩薰然叶气某官履端以始泰内其亨画鹿车幡是为明府之瑞黄龙诏旨诞布圣朝之仁茂对青规趣归紫禁某幸修邻睦又见岁元春入辛盘愧徒勤於颂咏云深戍垒冀早遂於残更

代邓知县谢启

笔福苍生久切昭苏之望圭磨宿玷特蒙擦拭之恩睠淖泥顿濯於清波信雨露可生於焦谷恭修竿牍少叙轮囷伏念某岷雪寒澌邓林病叶杨惲之於司马每慚外氏之书韩湘之於昌黎空忝诸孙之列侵辱微宦历落寒途自知命薄以数奇所至身勤而事左属者不量疎譾冒试剧繁覆辙相望前无完锦抱琴独往殆若投胶然而幸閱於两年亦且粗安於百里不谓末路凌兢之际忽生旁观萋菲之言长官谁使汝为伤弓至此短薄能令公喜夺席宜时虽当时咸谓其非辜顾数语厚诬之已甚落千仞而此冤莫白越五载而其书尚存惘惘行吟苍苍满鬓身在菰蒲外几无路以自言额塌沙土中幸有天之可列果画开於大照遂尽直其前谩饗饗鼎之污今知免矣余皇舟之复非幸而何徒怜屯蹇之余重费乾坤之造恩深啄菹心誓捐糜兹盖恭遇某官忠贯两仪重厘二柄金城图上拓旧日之成规玉铉羹中酿丰年之和气方开八荒之壽未忍一物之枯谓范忠宣犹有外孙谁其扶植谓尹师鲁尝陪上客犹记汝怜遂令练袂葛帔之踪亦动赤舄袞衣之听拔之陷阱允矣遭逢某敢不镂骨铭肌息黥补劓活西江之鮒已自幸於余生起中廕之驹尚希终於一顾

代谢得阙启

委身化治僭露惴私列属计台猥叨钧播允矣寒微之幸异哉特達之恩晋谢阶符恭修竿牍某质良苦窳分复奇穷断鴈孤鸿曷奋飞於霄汉常鱗凡介甘漂泊於泥洿栖栖州县之间浸浸岁年之晚远行湘水冒领制岩民枵其中每易烹鲜之扰獠环於外尤难怒兽之驯良自笑於铅刀惟恐伤於锦制相安疎拙幸免旷瘵视紫芝焉于之歌何能为役寻五柳归兮之赋幸遂此心虽窃喜於璧全岂不思於穎脱鸛章或斲蚁磨仍迂欲成九仞之山奈亏一篑非得千丈之绠孰拔重渊旅食京华上书光范方拟图於续食庶几遂於合尖果荷甄陶俾游幕府莲欣依俭固已甚荣瓜糜待齐尤为过望载维水漕越在淮堧中兴赋入之渊昔闻此语东园登覽之胜今匪当时然必疏通之智而後可以佐方输抑真明敏之姿而後可以裨婉画自量甚审曷称所蒙某官功被生民心存王室断鳌立极力成再造之大功飞龙御天身受两朝之顾命当重任如伊尹勤小物如毕公遂使妄庸亦叨器使某敢不服勤职守期称恩知塞下貔貅无乏连营之饱淮南鸡犬尚希舐鼎之仙

陵阳集卷二十

卷二十一

钦定四库全书

陵阳集卷二十一

元 牟巘 撰

劄

贺陈仓赴召劄

简在清衷倅颁严召见知则说乃畴四牡之功式遄其归爰趣八鸾之覲仁贤进矣气类翕然某官世出词家朝之治表香风一道皆兰芷之芳菲皎日寸丹愿江淮之清晏久劳使指益懋眷知谓汲直当在於拾遗而仲舒最宜於为诰属輶轩之循部乃急诏以唤归治舍人装诣行在所九重虚伫趣之至四辈之驰多士共期决然居两制之选悚观奎笔入告宸猷某辱附门墙喜闻纶綍愿如蔦贾之後贺无以自文若曰文子之同升则又何敢

回何尉劄

屈公以望此府久矣贪贤取人而拔其尤庶几报国非相为赐何谢之云某官经纬之全渊源之正自足幹千钧之龙鼎濶步一时亦尝舞丈二之蛇矛锥风四面越自红旗之破贼坐消赤子之弄兵未遂畴庸姑烦赞画颇有此客否正自不凡乃欲相吏耶居然可敬况方兴文武共弱之叹盖所谓圣哲不足之时是宜辐辏於上前未许宝横於道侧且将大任聊复小陞某自笑寸莛初无强翦文僖尤喜得尹师鲁东坡不忍负季直方效古灵豪之品题不知量也继来石砚之勲业还以赠之

贺李运使赴召劄

诞布温纶肆膺严召远有礼乐皇华之使久矣透迟朝无耆艾白首之儒孰其顾问仁贤进矣诵咏翕然某官善类羽仪词林根柢前矛後劲独奏磔妖之勲左粥右饁人蒙免采之赐贤劳允懋睿简益隆太史久滯於渡湘仲舒雅宜於为诰果招旌之特下亟驰传以唤归治舍人装诣行在所上心虚伫趣之至四辈之多除目謹传决然居两制之选径从禁甬平践政涂某辱附高门幸逢盛事凤凰覽晖而下已治表之可觐燕雀贺厦之成愧庆函之良後

贺浙西黄安抚劄

冠仪计省晋领神臯江左之有夷吾方高人望西都之用黄霸尤赖尹厘赞书初传举国交贺某官识高见卓学博用周平生曾南丰独得文章之派不比大老范有伟经济之胷文武而有

威风俊杰而识时务自膺臬任屡奏肤功征谋治法之兼明义实仁齐之旁鬯虽护北门之管钥厥任方隆然制西事於庙堂此言当念宜宸衷之简在爰峻旨以趣归左翊右冯姑少烦於弹压一食二货亦坐究其源流繇省府乃践於政涂盖祖宗具存於故实靡须温席即听扬廷京兆逼云霄已独高於綦步尚书践台斗行遂副於金期某夙荷殊知竦闻新渥适闻涛江之远愧旅贺之莫前瞻言厦屋之成尚垂庥之是赖

贺董都丞劄

显被华褒肆颁异数晋班东壁密联上帝之图书导旨西枢遂筮侍臣之笔橐得輿之喜举笏攸同某官抱负瑰奇见闻殫洽名父之子夙推学问之渊源知兵之儒见谓经纶之磅礴属举行於机廷用图回於救卜宜畴夙望之贤俾为一老之助乃升宝帟密侍筹帷惟承旨视螯禁之至严而入侍与螭坳而对峙绍兴赵子画遂兼次对之华元佑王彦霖径领本兵之寄伫凯晋用以究宏施

贺安吉任守劄

奏最澄江易填苕水争杜公於境可知父老之懽然自东坡迄今复见乡贤之至止寬条诞布輿诵翕孚某官粹玉方规盘根利器家声伟甚盖元符御史之後人治行卓然访西京循吏之遗意盍膺表选径践穹华惟此邦率用名流在今日尤严宅牧端赖仁贤之重以幸畿辅之民籀篆方开袴襦已咏扶风冯翊既历试而有成泰畤甘泉即趋归而径上

武冈送交代物劄

三年上最一节趋还卧辙攀辕愁絕紫阳之父老持囊簪笔即为碧落之从臣甫入修门峻跻华贯某叠联雅好倍切庆悰属行色之俶装辄菲仪而将意依依嫪恋盖不胜折柳之情谨谨护持当共爱憩棠之茂

回钱安抚狱空劄

化浹神臬诏嘉空圉辟以止辟庶几刑措之风书且屡书伟甚尹厘之绩和声所被盛节以兴某官职大司徒领右内史为治行之第一已简殊知问断狱之几何即通迓列栖桡杨而不用写琬琰於将来某伏沐貽函悚观拓本浓墨大字愧莫继於颂声茂草圉扉喜亦同於生意

答太平赵侍郎劄【日起】

采石风清想骑鲸之正逸玉川云冷叨致鲤之甚恩某官荷橐穹班粉陰雅谊手书郁穆藹其前辈之风台饗丰隆逮此同僚之士某莫名所感亟拜而登裹饭而问子桑敢当盛意下诏而徵黄霸惟切颂言

回送小録劄

牘传集仙殿企并世之魁躔顶戴千佛经修清时之盛事捐函下逮拓本宠颁窃观浓墨大字之所题深愧新学小生之亦与袭藏惟谨铭感曷深

回南省诸乡人登第请劄

泥金姓字方幸蜀珍之有人衔袖文书忽聯赵璧而过我且以互乡之晚出获依峻甲以同升猥见牵聯俾陪容与荷眷私之甚厚岂謏陋之敢当执牛耳以主载书夫孰踰於公者附驥尾而致千里尚加惠於儿曹

回赵园令劄

隆指是将幸托鸣珂之庇高情良厚首勤枉翰之临深切感藏薄言控谢某官器宏以远玉粹而温卓尔不羣夙共称於大雅卑以自牧尤深执於过谦粤粉省之蹇华久琳宫之均供捧耐而见宗庙式昭助祭之勤赐膳以亲弟兄行茂均厘之渥宸纶亟下斋钺径跻某未遂投间偶叨乘传凜莫称咨询之职胡敢当庆问之貽曾琼报之弗周尚锦归而亟谒

贺洪帅兼仓劄

丝纶诞颁台阁并建郤縠之谋元师方畀中权太史之上会稽爰修平準便蕃异数布濩欢声某官学博用周德全能鉅使华帅领兼数器以有余惠气威声達四封而尤鬯星明胃南之积膺泽及天下之函生某自谓陈根欣传新涣闻厦成而贺第切懽惊修郊輅之恭仰留侍庆

回洪帅谢宴劄

位不同礼亦异敢邀法从之名躔谦自牧尊而光肯枉元戎之小队欲少见事长之意用辄忘躐等之嫌里咏涂歌不足以写盛德山肴野蔌不足以奉清欢竟席凌兢旁观荣谕谓南阳公宾客之盛於其主以可知严阁老礼数之寬盖斯今之未有欲踵门而拜辱乃勤损翰之下颁轻身以先匹夫曷当盛意衆人而报国土敢昧殊私

贺洪帅入宅劄

穆卜刚辰肃临大府文昌为帅府前罗檠戟之严州宅似仙居坐得蓬莱之胜令方修於庭户诏归坐於庙堂某仰止崇墉盍摠庆臆燕雀之贺大厦其喜可知龟鱼之?新亭自今以始

谢洪帅宴劄

宴以示慈敢辱献酬之礼歌而发德甚慙縑籍之词敌以下且莫当求之今而罕有某官经纶

伟望文章当家元帅聿临如郤縠之说礼乐初筵有秩如卫武之谨威仪遂令未至之踪亦与特诏之命金石备设水陆毕陈入三逊而後升所以示不慢不争之教获五善敢不拜岂足堪爰諏爰度之诗若小人属餽则有之与先生并行则过矣【阙】爰居於九奏灵牝徒辱於兼金某既用戢藏尤深悚惕备乐而延秦子已顿有於光华瓣香而敬南丰第益勤於归倚

谢福王请会劄

虎拜对扬天子之命幸际昌期鹿鸣燕乐嘉宾之心俾陪盛礼极隆谦而下士出珍赐於上方御府分綃瑞箴更翻於薰吹宫葩压帽名香载实於宝奩醉饫以归宠荣无斁某恐勤钧重阻造宾筵爰居享九韶第益增於?眩台背俾千岁愿弥祝於炽昌

回福王请宴劄

乾亨际会震夙开祥云集绅綏共致三呼之祝天颁诏旨载称万壽之觴兹伏披於钧函猥被陪於盛典某自惟千齡之希遇敢不百拜而祇承

贺福王子除秘撰劄

鲤庭辑庆凤阙疏恩乐善推东平胜衣授列侯之印好学如中垒繙书照太乙之藜诏墨诞颁宗藩增重

秘撰

穆清茂简论撰跻华奎璧之主图书允为清选脈膺之亲兄弟宜举旧彝纶綽肆颁庭闈增粲

贺福王生日劄

以殷仲秋诞弥厥月在壽星之次喜适应於岁行玩先天之图方益增於乾策御府骈罗於珍锡庆霄郁穆於殊祥永膺正社之尊丕巩宗彝之重某猥叨乘传幸际称觴言采其芹辄效微忱之敬俾耆而艾愿惟纯嘏之祈

贺洪尚书生日劄【二】

峻极储英揆初纪度香山未老曾赋文开八袞之诗莱国笃生咸诵少逊中原之主自今以始以莫不增某官四海典刑两朝寿俊传斯文印记赤壁之前身与造物游挹洪崖之左袂无心出岫有诏自天属方讲於小郊宜趣登於大老台背俾耆艾爰歌千岁之祥端冕听咸韶即与五人之列

明时辑庆初度题期月在斗牛之间适几秋望数起角亢之首是曰壽星蓬莱方沸於欢声藁

珠已传於蜚诏峻跻宥密永燕期颐某夙忝登门欣逢荐笋校中元列仙之籍但祝修龄致南丰一瓣之香辄伸微敬

回洪帅送生日劄

某曩尔寒踪安知初度虽男子始生之旦爰有垂弧然古人已孤之余犹不纯采故此日每增於多感盖频年弥切於苦心詎谓钧慈特垂轸念有来介使赐以颂言尘几萧条忽有珊瑚鈎之照海图坼裂俄惊綉锦段之奇其在微贱实难蒙荷炽而昌期而艾於自寿以何心尊者赐贱者辞恐不恭之有譴已腴顏而登拜第芒背以弗遑未既谢私尚储谒侍

谢福王送生日劄

躔磨蝎之宫自怜微蹟废蓼莪之什安识揆初詎意某官下士而极劳谦懋德而勤小物宝函蜚逮照以陆离之光列筐横陈锡以庶多之品於昭盛礼惕若愚衷尊者赐贱者辞何敢妨於严命炽而昌期而艾愿还致於颂言

冬至送物劄【回诸郡】

荔挺初生式应得輿之吉梅花远寄尝修贺厦之恭岂意某官蜚俾函书记存节物词华有烂盎乎重緹之温飨施鼎来甚矣引玉之媿某亟言登拜倍切感藏增一线之长正自怜於病况听五更之漏愿还致於颂言

洪帅【冬至】

复朋来之亨阳刚初长师在中之吉天宠宜承茂对昌期径登宥府某密依崇屏盍致庆私芹献至微辄仰干於主进云气多寿尚造筵於宾荣

回洪帅

企践斗之班媿莫修於献履援书云之笔乃忽辱於貽緘申锡贙仪有光节物况骈罗於品错益昭仞於眷私某既拜而登莫名其感枝头春信肯分将驿使之梅夜半灰寒自笑惟嬾残之芋

福王

律起黄钟已应浮葭之候位隆赤社宜膺戩谷之祥刚长顺乘寿臧永介某密依宏庇盍致庆私

回安吉守

南至日长甫测丈三之影右扶风近宜膺第一之褒方辑庆函已纡谦柄某官霞光之綉露寒之水画戟凝香坐看诸县丰登之乐翠綉鸣玉尚忆去年供奉之班方简在於御屏即飞来於诏綵禁涂直上扇影徐开某隩企州门欣闻輿诵会八能於前殿悚听徵书继六客之後尘敢忘拜祝

回淮东总领

紫宸天近用亚岁仪金堂月高持少府节宜乘刚旦茂辑蕃厘某官和气缙温清姿冰洁王人序诸侯上已茂贤劳公辅在两社间厥惟世践伫膺诏綵归俸御庥某未克驰緘首蒙赐翰北府可饮兵可用亦既登嘉西平有子我有臣敢忘善颂

岁节送物割用回宝庆程守

泰道始亨未献辛盘之颂谦光下烛首蒙子墨之荣如被阳和自慙臯後某官清芳冰映隼采春华地重宝藩暂拥燕香之乐天颁玺诏即归豹尾之班綏福履於新元假宠光於敝邑某敢当好语祇佩高情爆竹声中笑甫休於行役金幡影里尚颺玃於贺私

回邻郡

天又回杓是谓三朝之会地加错綉甫修一介之彝岂谓某官德媲阳规谊高风槩梅花岁晚肯怜寒谷之孤芳椒茗春浓特寄新元之善颂申之祝遗粲若情文某既拜而登莫名其感亟少伸於谢悃弗重列於庆言

回平江倪仓

斗觶龙角方共企於奎躔春入轡丝爰载驰於使传况在右扶风之近宜膺内君与之亨首奉宸奎峻跻禁甬尚念冰曹之未分颁斋穰之多三寿作朋愿敬伸於善颂五浆先馈惟益佩於盛心

回安吉守

龙觶斗柄方舒紫宙之和鹿画车幡爰辑苍苔之瑞宜多寿祉以介仁贤某官襟度瑰明词华藻丽人孚条教共歌凝香森戟之诗天锡褒书已懋增秩赐金之渥盍从元会峻陟禁途某密藉宏庥实怀善类未能与旄倪之列共听班春所愿托宾客之余亟声贺厦

端午送物割呈福王

饭同水饼不知节物之临玉唾银钩忽被谦函之宠横陈珍错昭示眷私进五时图谅方膺於宠渥祝千岁寿愿仰致於炽昌

福王

奏薰吹之五弦来从殿角开菖华之九节宜泛宫壶窃效献芹之意尚冀矜容载歌俾艾之诗
第勤诵咏

洪帅

夏以五书式表端阳之盛昼当三接宜膺宠数之新蒲献虽微芹忱攸寓倘特蒙於领録实信
有於欣荣入和虞弦方大为天下之福近依楚畹庶不致小人之归

回庆元守

衆人醉我独醒方钦高躅一纸书贤十部兼被匪颁远自蓬莱光生蒲黍倾银注瓦共挹清香
切玉浮金遂成佳节某亟言登拜倍切感藏饮美酒读离骚莫当此意歌微凉坐殿阁即以公
归

回镇江赵总领

香罗叠雪驰颁天上之恩荣玉壶清水分饷人间之奇絶北府固知於兵胜昌歎尤见於味同
饮美酒而读离骚真成奇事咏微凉之生殿阁快问归期

七夕送物劄用回福王

石梁天津御新凉於霄外云章锦段畀大巧於人间遂令极陋之踪亦被殊珍之赐敢不重拜
亦既黽勉以登嘉虽则七襄未喻轮囷之怀感

重九送物劄呈洪帅

坡老在彭城之秋重修旧事忠献镇鴈门之日最爱晚香宜献寿觞以对嘉节茱萸健在第仰
祝於修龄菊把萧然敬修於微贄

回福王

开三三之径怅已动於归情祝九九之龄方欲修於微贄首勒钧翰仰佩谦隆灿列品之前陈
於昭厚意亟整冠而下拜莫喻感私

福王

天开北阙分来萸佩之香地近南阳宜饮菊潭之寿适逢佳节盍致寸忱自慙篱落之微萧疎

莫掩遣侑糗餼之末麾頓是祈

送丞相折俎劄

宸筆趣行夏車入觀頌聲歡動可知四方萬里之情禮貌優加參用兩日一朝之典肅紳綏而
迎勞開閭闔以祥延某偶忝臬司夙陶鈞播幸親逢於盛事盍少輯於慶私宰相禮絕百寮何
敢捧觴而進上公享用九獻輒伸捲俎之儀

陵陽集卷二十一

卷二十二

<集部,别集类,南宋建炎至德佑,牟氏陵阳集>

钦定四库全书

陵阳集卷二十二

元 牟巘 撰

祭文

祭梓潼文

奥西日之苍凉兮珠玉不脰而北走神朝发乎七曲兮夕余至乎帝所嗟九州之博大兮何必怀乎故都睠都梁之醇醢兮山川莽其回互纷莎草之被堤兮又蕙茝之盈室诏鸾鹤以服輶兮曰此焉止息嘉岁年之丰靖兮羌不知其神之力谁忽幻此怪妖兮蔽幽篁而不见日狐九首以昼嗥兮驱丰隆使攘除神辅帝之不杀兮千里之安堵爰亭坛之是经兮洞虚明而轩翥揭嘉名以冠顔兮植羣芳而罗庑歛云旂之晏娭兮澹容与乎壽宫俨多士之在庭兮陈椒醑以荐衷命余觴以沾丐兮介景福之昭融蔚斯文之熠兴兮与兹山其无穷

祭范尚书文

维蜀范氏代有伟人堂堂蜀公四朝老成越两太史元佑绍兴至公二难益光前闻长公肮脏特立独行古之遗直位止列卿物望在公身任典刑维公素履金玉準绳若不胜衣退焉循循而中所守甚似其兄蜀公之正太史之淳帝在东宫早闻公名自请光皇以为之宾见辄改容唐监之孙迨於访落仍侍熙明从容密勿言忠谊醇譬之殊玉光景不生潜利陰益山川晶荧帝曰咨公往重斯文撒棘丐去勉留莫能授钺东甬公母久勤二府虚席伫公延登云何不淑遽陨元身当宁太息夺我荇臣呜呼善类夜艾疎星又弱一个龙蛇何屯山泽之臞骨坚气清乃不壽艾此理莫询某也无似辱知公昆不鄙孺子教载之恩公念畴昔拊我甚温露章推轂有味其言竭为此来往别公门公惨不怡岁晚重分我以书詞旷不嗣音讎音远传骇叹失声因循唁问负愧平生寓词千里鸡絮薄陈公而有知尚鉴厥诚

祭陈司法文

呜呼年盛气壮车坚御良中道折轴云何不臧维母之思匪身之疚泣血柴瘠其死以孝母先子後丹旄翩翩至此极耶呜呼其天轉车云返卮酒以告魂而有知母怛远道

祭杨观使文

岷峩惨凄前辈日逝晓月长庚在者其几国有乔木世臣之谓文献所证典刑所寄存乎其人岂计爵位於维我公克弘且毅老圃之孙克斋之子两翁在昔国之元气伟节高风抗眎一世闻者至今凛凛生意公实象贤纘武嗣事制行如玉遗荣如介漫仕平进甫及半刺我悬我车曰此先志朱幡是锡珍馆是畀絜之维之其志未遂公志未遂公请不置名利之腴趋者日靡闻公此风其颢有泚公位虽卑世道攸系婆娑丘园黄髮儿齿子孙环列福履顺备平生对越浩乎无愧昔有高蹈蜀景仁氏不以忧患而易富贵聪明强健饮酒乐只涑水有言神相岂弟公视景仁其实一致甫跻八袞曾不慙遗西州耆旧几尽於是有识之士相与永喟某也晚末世托姻谊方拟升堂扶杖操几云何不淑降此大戾感念今昔不知溟涕亦既後时乃荐薄菲维公有知鉴我兹沫

祭心斋文

呜呼昔者两翁同泛苕霅出处同道夷险同节一二兄弟相与左右公知我心独视我厚天之降割丧我先人所恃惟公自公南征累然幽忧谁其我拊公虽在远劳我良苦我免於丧重至京师见闻辄问迟公来归忽得公书不类他日心之忧之语不敢出我薪外补得请出关道闻公病我忧在顔驰調未达遽以凶讣追惟前书殆其别语饭僧虎丘雪涕如洒道江而西不与丧会輶车既脱丧且有期我病在牀感极益悲呜呼棺不得凭穴不得视幽冥之间永负此愧不死来归公丧已除深衣瓣香以拜公墓新松离离宿莽荒茫公不可见曷慰我思呜呼公之平生多忤寡遂肮脏流落白首晏岁突梯脂韦宁彼自贤不肯少贬山立屹然真人勃兴讲幄晚遇大用属尔而又辄去方心直道正词劲气壮顔毅色崇论欲议呜呼公兮歿而不忘而况有子肯构肯堂率我妇子敬陈沃醑有泪无声喟其永嘅

祭叔时斋辂院文

哀哉吾叔清修博雅和缓缜栗前辈典刑亲薰而炙匪棘匪徐所守静嘿求之今人则不可得惠止一县年近七袞呜呼天乎其理莫诘叔始微恙舍医弗即我来省侍不寐通夕叔恐戚我持病自力诿曰平时气稟素实曾不踰时遽以易簣昔我二亲教养视恤我时艸角俾陪研席年适相若分辨情密以?以冠长各成立其间未尝有数月别别最久者游湘之日仅三四年离而复合何图一旦遂尔永诀呜呼哀哉此情何极一致之性浅狭狷急岂不我规奇偏莫克汔用其愚积忤权戚几陷大祸旁观为惕行不纪难语其伤物我之於叔自叹莫及岁晚相约向晦入息未能免俗破戒轻出叔方杜门坚坐一室见之恍然又以愧色徐公有常通介若一无存老人自为今昔因循荏苒悔往痛泣叔既全归我复其识嗟哉族姓万里寡特欲营义田欲讲宗法叔每是之曰子之责匪曰一时相煦以湿惧不能保百年之泽叔今已矣凛凛孤特日益浮危复死何益敬伸薄奠不过蓴鲫哀来攻心有泪洒臆

祭孟从吾文

维已亥十一月戊子朔二十五日壬寅鲁国牟某谨以清酌致奠於近故亲家从吾漕元之灵呜呼哀哉君山泽之儒臞森衣裘之气骨宜坚强而壽耐胡大损於眠食昨扶惫以造城将善

医焉是即惊奇疾之已就殆难攻於药石有骨肉之可望况田园之自适何沉忧之伏痞而直为此菀结昔子夏之失明凜畏友之义责尝引此而力譬若至苦而奚益曾别去之未几竟莫起於斯疾抱孤孙以长丧增见者之酸恻始久要以期君送将归之行客乃先我而长往非意虑之所及亦淹速之何计变寓哀於蓴鲫呜呼哀哉尚飨

祭射洪文

维神孔毅且仁威风惠气剿荆全蜀乃夏五神实降火 中天白崖峙雪其畴敢不?某黏臈未去此犹得奉椒醕荐壽宫所傲福於神者无物疵疴年谷以熟则千里蒙神休而某虽去亦与有幸焉尚飨

祝文

谒大成殿祝文

某以诸生试郡始见学宫示有先也越三日再至於庭惟仁之一字其在圣门未可骤语若乃节用爱人居敬行简则某也敢不夙夜从事勉焉孳孳求以无悖於圣无戾於民者宫墙如见尚鉴厥衷

尧禹帝庙

某猥被上命出守是邦恭惟明祠实在境内视事三日敬用典常只拜於庭罔敢不肃

诸庙

惟鬼神者二气之良能而造化之迹也无愧於心斯无媿於神无媿於天矣某被命来守是邦敢不夙夜敬恭求其所以无愧者神其鉴之绥静千里以有丰年神之赐也

渠渡 城隍 鰲山

惟神昭德赫灵是有庙祀以食於其土而大庇其民某假守兹来实与有民之责圉利自封而莫之恤则何以见於神只谒之初矢辞以告神尚陰相之俾克行所志繫神之休民实嘉赖

社稷

某惟有民此有土故曰民为大社稷次之先民而後致力於神也某被命守此土视事三日未有以自见於民祇用典常来拜坛壝其敢不恪嗣岁方开神尚陰相之俾自今其有民力普存敢忘昭报以答神休

大士

惟大士以大慈悲大愿力悯救一世如月在水随所闻见莫不满意尚惠都梁曲垂全庆某始至敢祷

三大神

某闻神之在天下如水之行地中无往不在不以方所论也神庙在蜀惠此都梁灵游来下乃睠西顾盖未始忘蜀也某蜀人也固不敢私事神神尚有以私之俾毋为人羞眡事之始恭敬以告

射洪

盼曰遗直侨曰遗爱谁其嗣之邈矣千载惟神英烈生为谏臣直道去国以遂其仁惠利所施没而称着爱直两全何媿於古玉屏之下玉垒之东神之精神万里而通壽公孔宁奠此椒酒英风幽寒如在左右

祈雨诣龙王祝文

礼记谓山林川谷丘陵出云气为风雨见怪物者为神然则是山之泉其神而为龙也固将嘘气成云伏光景撼震电神变化水下土无疑矣越自分龙以来高原告病民吁嗟求雨者日甚若飘洒未足旱气颇深傥如是数日低畴且见告矣万人之命一岁之计悬於旦夕神其忍深閼熟视而不之恫乎洁诚以祈神其亟请於帝驱风霆出云雨振迅之顷泽徧千里槁乾胥浹岁则大熟吏得以逃其责而神益以昭其所为神者民之报其敢後

诣渠渡祠

维神庙食兹土民所信敬盖以神之能御灾扞患大庇民也今亢旱已极苗且槁死人心皇皇大命近止神犹忍立而视之欵前令以往祷不得请敢率僚吏躬至於庭夫民望不可以久孤神功不可以久閼神其畀矜斯人大沛甘泽活此朝夕盖早之一日有一日之利早之一刻有一刻之私惟神亟图之毋舛民望以为神羞傥以吏为不职则灾於其身以塞咎异以谢千里亦吏之愿也矢心以告神尚鉴之哉

祭二郎

鼃灵之怪鼃孽之繁三犀之刻万羊之祭神之异蹟震於全蜀者盖不可殫记然考之太史公之所记则不过曰凿离堆辟沫水而已非水旱之为灾是盖自昔之所畏今使蜀人有灌溉之利而无旱乾之忧则神之所以为神固在此而不在彼也神而移其惠於蜀者用惠我千里大沛甘泽俾有丰岁则洁牲丰盛所以祷神而报之者将千万祀其无替

再祷诸神

某日者焦心竭诚告於神凡愿得一雨活千里民延望又信宿矣神听逾邈神其果无意矣乎夫神与民相依者也苗旱而槁其野如赭所谓不得食民将流亡而神失其依矣岂神之所安乎或且曰廩有陈粟余贾不翔是无伤也呜呼富家若有余贫民岂有余乎目前虽可支来岁其可支乎某行将授代去矣不敢以去而忘其民而遗其忧於後以为是恳恳也或又曰诚意不孚积急而求神且张旦暮之忧以迫之宜神之不汝听是则某有罪矣而神岂以某故重患苦吾民乎然则某犹窃有余冀也惟土专城隍惟龙司雨泽惟渡渠祷辄应惟鰲山祠最古惟德源在蜀能使蜀人不识有水旱是皆民之望也未有灵於昔而閤於今者也合席而处岂无一可以救吾民嘘吸陰阳迅发云雨一举手投足之顷化焚燄而润泽转枯槁而昭苏厥灵孔昭民益以附矣神何憚而不为此霓望终觖神旂徒及固非民之愿也亦岂神之愿哉率吁忱恂敢固以请

诣渠渡

天子以神能庇此土之民而去其菑害曰雨曰阳随祷辄应是用嘉神之美号以宠光於神神宜有以报上施者乃今旱气日深高原早禾无所复望人心皇皇神而亟哀斯人沛然下雨俾欲槁之苗犹得函活则其德为甚大其灵为益昭而对扬休命为无斁某谨率僚吏躬拜於庭屏息俟命以刻为岁神其念之哉

送渠渡龙王回庙

比者亢阳弥月嘉气弗効高原秀稻日就槁萎是用致神以来一意精祷不敢事语言为神瀆岂意神肯顾哀弭节之明日而雨淋漓滂沛越三日未已也槁者泽萎者苏千里动色曰维神之功呜呼神勤施于民其信而可恃者如此继自今民其益有所依赖矣某实不职三年之间勤神者再虽予取予求不汝厌斁而某宁不重自媿乎牲酒斯陈少伸答谢神其终相我穡事俾汔於成无有害某受代有日尚嗣告於神以去

二月十一日祭文曲圣父祝文

维神隤祉储祥笃生圣子以孝廉称则诞称之旦奉觴称壽人神一理乃者首春原飨诏旨诞颁维我惠文忠孝武德仁圣王肇新美号宠灵赫然对扬圣天子之丕显休命以悦於亲其在兹时敢因荐觴以告一堂奕叶其尚鉴之益昌斯文用惠我多士其永无斁

醴泉有源灵木有根积善余庆笃生神君诞称後先是曰同物我称斯觴敬父子忱

梓潼

日有癸卯神降之辰凡我多士斋宿以奉董修今乃克用牲币举岁常非缓也惟神以壽其亲

者壽斯文壽斯民万有千岁其无穷

祭蚕丛祝文

维神之灵以蚕为氏睠我都梁敬供以祀浴种条桑维其时矣神尚相之有以丝枲

谒府学先圣祝文【浙东】

某以诸生叨试臬事至之三日再谒庙庭惟片言折狱在圣门犹难之而况於某虽然敢不夙夜惟钦求其无悖於经无戾於民者宫墙在上尚鉴厥衷

书堂先圣

圣道如天无往不在某适既躬拜於学矣载瞻燕居申申天天有德其容其敢不益？

朱文公

某惟淞以东是为先生过化之地也而某也以臬事来自顾不肖不学大惧无以祥刑敬狱祗若明命惟有讲求遗风尊用格言朝夕从事以免於世俗吏之为者始谒祠庭其敢不肃

尹和靖

先生之学以敬终始用能任道固节克配其师自吴来越祠坟岿然过者必肃某叨臬兹事未能躬拜爰用彝典尚鉴厥衷

诸庙

某猥被上命於兹祥刑恭惟明祠实在境内眡事三日敬用典常祗拜於庭罔敢不肃

杂文

祈雨

沛然下雨益深溪望之情仰而呼天是亦吁嗟之义恭趋净宇自列危惊伏念臣素无行能安有政绩愆其谬戾以貽灾气之流行求以感通又愧精诚之浅薄旱既太甚民也何辜愿少回造化之仁亟哀救须臾之命微机一转生意立苏越夕以来殷雷倏起层陰已隳於霏霰先兆可卜於滂沱伏愿深衷早敷甘霑坐使肤寸之云合毋挠於风庶几方千之里间实均此泽稻畦称望急须一雨而苏蕊笈扬科?致九天之祷不胜忧迫傥遂感通伏念臣食粟无能及瓜将代妄希小稔庶可谢於疲民詎意余愆又重罹於亢旱祗累来者何辜斯人夫岂无因而

致然其敢以天而自解伏愿哀此一方之命救之数日之间大沛甘霖俾槁乾之胥浹曲全末路庶成败之稍寬

荐父心词

局蹐为亲久瀆盖高之听吉蠲事帝甫申欲报之私虽曰后时益?初意伏念臣父某孤踪自致直道靡回其行已可质穹苍其言发不忘宗社先帝去凶而後尤洞照其清忠圣王访落之初将延登於严近力析香火竟谢轩裳自感恙之日深尝陈情而露祷所愿以臣之龄延父算以父之疾加臣身然而徒有此心难移者数百身莫赎岂往事之忍言一念未酬恐他时之遗憾兹辄修於菲荐庶少追於积愆伏望皇慈特垂昭鉴倘先父平生之大节勿堕沉沦则微臣未死之余年敢忘载荷

愿意

臣辄有危苦之惊上瀆穹隆之听伏念臣岁在甲子省覲京华时则先父某久染沉痾浸成奇恙忧惶朝夕靡地自宁控沥忱恻惟天是吁由臣不孝莫克少延嗟流涕以何追偶终丧而不死因循远宦愧负初心维此季春适当中泮昔先父实生於是日而微臣未报於大恩是用借公宇之靓深肃斋坛之严洁式陈净供载演真科以酬宿昔之祈以冀哀矜之造伏愿帝慈昭格陰佑潜敷游魂早遂其超升元化莫名於块圮誓坚素履仰答宏私

入宅保安

传舍相承别有司存之旧驾轺甫至猥将使事之新辄露愚衷上尘真宰伏念臣圉形覆盖赋分凄凉揣已何修永戴帡幪之造效官所至举无凌震之虞兹叨误渥之荣骤畀祥刑之寄亟言于役非便其私幸陰相於过江之余犹吁祈於入越之後乃荐苹羞之洁庸修藁箴之科伏愿美锡高穹鉴垂列圣爰居爰处冀臻长稚之乂宁载驰载驱敢昧始终之对越

疏

乾会节功德疏

招摇指而天下夏适当辞见之辰里鼓鸣而圣人生况在虹流之地敬裒善颂仰致精祈皇帝陛下如升如恒时万时亿天所助者顺坐臻宁敕之功邦永孚于休益懋延洪之庆

壽宁节满散疏

太极生两仪是谓先天之妙南风长万物适逢弥月之临敬演真科用陈善颂伏愿自今伊始既壽而康广内称觴备极四海九州之养泰元授莢益开万年亿载之期

天庆观送蝗虫疏

埵占鸣鸛正切关情野有生蠧惧将貽害永惟此异厥有其原岂催科太苛而田里无以遂其乐狱讼不察而吏胥得以容其奸既积谬疵遂干乖盭顾微臣之有罪将斯人之何辜敬扣琳宫辄摠丹悃伏愿赐之霖雨护此穰秧尽驱食叶食心之虫俾无遗育汔致多黍多稌之庆实荷至仁

荐杨少监疏

治凤载翔方叹漂漂之举岁蛇多厄遽兴起起之嗟讎音远闻善类短气近故军器少监梅坡杨公立朝雅望治郡最声吴会相羊谅方膺於追诏参墟萧瑟胡又殒於奎躔平生未究其设施有识皆为之痛愕长身玉立宁复斯人满眼棠陰已成陈迹辄哀遗爱仰叩真乘以纾此邦父老之思以见奕世交游之谊伏愿真灵不昧白香山径归兜率之天惠利无穷朱仲卿永顾桐乡之地

修湖州路儒学疏

夫子之美宗庙有屹仞墙鲁人之修泮宫实我路寝惟湖学自文昭而始盖教法乃治道所关须先生作栋梁本为谁事使庠儿费藿肉良忍此心大匠不顾木章谁主但烹瓠叶或既卷怀而逃於墨此方俛首而代之庖支柱目前则几成於架漏经营分表则殆类於谈空用告同盟庶几共济生我者太极可昧厥元勤子至他人恐非所愿不妨熟虑试为特书费甚泥沙俱敢尽錙铢之取恬无风雨然後知帡幪之功

喻义斋洞庭山建退庵疏

有腾空劍也曾飞过洞庭湖无买山银未易卜居豹林谷好寻真境共结胜缘提举知观喻义斋喜静恶喧重义轻利当年驾部尝扞膝以径归今日仙坛亦掉头而不顾除书已下於碧落结屋欲旁於陰厓托我蓬庐任渠争席扬子草玄宅未泯师傅商山橘隐翁尚余乐地既平时耻言阿堵物岂一旦幻出何有宫嘉惠芳题大开檀施买一百万屋只在咄嗟对七十二峰不妨奇特

游德明入燕疏

故国非乔木喜见诸孙行者有裹粮坐臻千里要丘墟於冷焰须共办於热心德明路教胥次真淳笔端洒落当时一琴一鹤清甚家风今日无车无鱼凄其旅别况霞城其浸久望云路以载驰子敬倾困谁饷周郎之急优孟抵掌聊效楚相之谈端倚赖於仁人用济登於远役风寒易水且勿动游子怀意重泰山其敢忘国土报

建城南第二桥疏

天上人间谁则最上善郡南门外未有第二桥况当驰驿要冲其奈断虹斜照三百步沮洳大费支吾十一月徒杠早须料理正好倾筐倒廩相与驾石为梁下导衆流上通千里布施当鱼鳞次不日可成往来在鳌背行是人都喜

千里晨门南临大路两崖秋水中断小桥倘袖手以旁观恐嚤喉之若碍而况三百步沮洳倍费工夫十一月徒杠正当时节自无烦於鞭石端有赖於捐金堪笑堂前杜老翁自防颓岸岂若香山白居易力去险滩独未忘情又还饶舌把钱作鸿毛看何事不成教人在鳌背行我心亦快

俞好问刊诗集疏

太白平生诗传常留天地间豫章以後家????亦有江湖集俞好问甫胸中卓犖笔下清新七步即成章莫踰其敏一字不堪煮乃坐此穷北则容斋老山南则厚斋虚谷大相流品尽可流传可与运斤成风便施妙断勿令漏瓢贮水徒费苦吟辄与发端以谗好事

奥里疏

茧室未营雨渍禾头之湿麦舟肯付春回泪眼之枯少报生我之恩是即如天之赐奥里少府史氏诸孙俛仰百年亲欲归於黄壤东南一尉儿已叹於白头事已至难时不可失故令治命难效杨王孙孰倡义风岂无郭元振

三皇庙疏

人之壽考康宁是均所愿王者神圣工巧孰啓厥初昔三皇与天同符为民立命河图一画分陰而分阳药録灵枢载生而载育千万世实蒙垂佑十三科各务精能其在吾邦盍彰显祀日来月往栋挠梁倾木有本水有源曷申昭报輦斯飞跂斯翼宜厥宏规用是惕然谗於识者捐貲多助壮观一新皇肯顾歆有风马云车之至物无疵疴皆青芝紫困之功

陈守约葬亲疏

游子思亲恐没齿而有憾仁人恤患每动心於无情范公指麦舟而付石曼卿苏子指衣帛以贻李芳叔一旦而举累年之丧此皆盛德之善闻谁谓义财之难舍陈守约甫闽峤宿儒志养而适四方本图甘旨道穷而逢多难遽隔存亡竟弗逮中釜之荣犹越在菽途之次树欲静而风不止已矣奚追城如故而人则非归与未遂发言欲涕决策在任莫劳乎三月之聚粮莫大乎百年之终事寒食上塚可不如夏畦马医半夜叩门所望於季心剧孟厚为之赠俾掩诸幽将古道复见於今时而陰德必召夫阳报凡好事者幸特书之

修茶提举司疏

羣仙司下土玉川尝谢於月团大匠无弃材涪翁策勲於茗椀载考唐朝之制最重顾渚之春
越至於今益严厥贡提举司兼城叠组载酒开筵坐中合一家春事务在两州界陈诗述职笔
下不惜千金之费度地庀工眼中不为百姓之扰蔡後丁前讲求未到辰入酉出期会孔殷老
屋徒碍於清风良图盍更於爽垲宁吾庐受冻况敢烦人赖诗情得偿岂无好事庶几协力相
与尽心龙护密云金线泉更添新樣燕巢大厦綠莎厅不比旧时

陈正则问铨疏

一飞而待三年不妨高举宿春而适百里姑试远游虽云拾级而升可无投臂之力正则学正
兰茁其砌青胜於蓝綽有修能雅厚字以正则未除豪气岂但坐之大牀顷者长城之行难为
短袖之舞沼盘有苜蓿良可永叹披腹呈琅玕未能少快问铨已迫拟步犹迟谁谓尔歌慷慨
而以之干碑兀且濡近渴何觥饮之能须更借好风得苇航而竟去凡我同志幸为特书

张刚父助?疏

迎尔相承宗事穆卜佳期闻有客使前羞宜神庆遗昔阮宣子当长年而受室若晋名流争先
至以出钱固非直贺娶之辞盖亦古劝婚之意可无礼贐以倡义风况吾刚甫学正菽水怡顏
丝萝缔好彩衣而偕菜妇始是万全柴车而迓少君或云太简买羊沽酒好一洗苜蓿盘撤帐
拦门须大开芙蓉褥相与作成於和气庶几焜耀於余光此日高堂共致千金而称壽明朝前
巷共看百辆之送将

陵阳集卷二十二

卷二十三

钦定四库全书

陵阳集卷二十三

元 牟巘 撰

上梁文

七先生祠

承流郡国当知风化之端取则儒先爰考渊源之自相与社祠而尸祝庶几目击而道存惟七先生实万世祀衣被虽徧於天下脉络尤系於湘中盖关洛之传实自春陵而倡蜀闽之老其惠岳麓者深都梁固已在过化之余郡乘乃独无揭?之所宁非欠事或者厚言期会簿书我犹未免於俗道德性命人亦且以为迂然宅家方新於表章岂承学反昧於宗旨乃规爽垲乃辟堂皇不日成之未始勤民之力高山仰止窃希尚德之风凡其致知而力行与夫兴化而善俗具存本末随寓着形恨不操几杖而从之则有若警欬乎侧者深衣大带缅怀师友授受之亲秋菊寒泉勿替岁时奉尝之敬修梁举矣善颂发焉

儿郎伟抛梁东地辟天开一亩宫吾道至今如日揭後先诸老发明功

儿郎伟抛梁西州宅相连屋角齐欲尽承流宣化职须将此道达民迷

儿郎伟抛梁南对而云山翠泼岚自有此祠师道立明纶稽古足相参

儿郎伟抛梁北伊洛湖湘同一脉师友渊源萃此中规模虽小开三极

儿郎伟抛梁上景行可行山可仰愧我拳拳但此心安得从之操几杖

儿郎伟抛梁下洗石开池更清洒跃者自跃飞者飞活泼真机谁识者

伏愿上梁之後儒术光昭人文增盛川融山峙莫非吾道之流行政简刑清是即诸贤之福泽

词

木兰花慢【钱公孙倅】

山城如斗大君肯为两年留读易堂前翛然松雪留得君不天边乍传消息趣春风归待翠云

裘留取去思无限江蓠香满汀洲 不妨无蟹有监州臭味喜相投怪底事朝来骊歌催倡唤起
离愁羨君戏彩脱却一身轻无事也无忧昨夜梦随?履道林麓岳同游

千秋岁【壽黃倅】

平分敏手更觉山城小聊?幘时舒啸当年湓浦月偏照香山老头未白而今半百才踰九【半
百过九年乐天诗也】共说东园好问春余多少红药晚金沙早花须风日耐人看功名久催
洗醖对花一笑为君壽

鷓鴣天【壽何簿乃尊】

鸠杖龐眉鶴髮仙诗中有史笔如椽爱莲自是平生趣吟到梅花晚更坚
珍九鼎食万钱谁如有子彩衣鲜蜀陈旧事君须记贵盛还当具庆年

渔家傲

病枕逢逢惊晓鼓那堪送客江头路莫唱骊驹催客去风又雨花飞一片愁千缕
折柳凄然无剩语加餐更把篝衣护泥滑篮輿须稳度云飞处亲帟安问应旁午

水调歌头

表海归来后眠食喜清安身轻於鹄上下山北与山南何必交梨火枣自是霜筠雪柏岁晚越
坚完摩诘本无病微笑指蒲团天有意留一老殿诸贤平生出处何似试把二苏看惟有黄门
最贵况是龐眉最壽九秩閱人间持此为公壽是即壽元元

念奴娇【同前】

山之天目蔚迢嶢最佳泉石见说老龙高卧处正拥深深寒碧独閤云霏人思霖雨未许无心
出苍崖赤子而今谁为苏息昨夜凉透西风玉?晚澹喜见归鸿入十二虚皇凝竚久飞下陆
离宸画綉鹵使名洪枢御位催綴新班立旗常婀娜要陪沙路清蹕

贺新郎【同前】

云拥油幢碧睽蓬萊宿缘一纪竟须公出上界清高仙地位耿耿为民还切此自是平生愿力
雨後新颺凉如濯喜湖山千里皆生色便乘此问闾阖殷勤好与磨铜狄炯精神依然未老鶴
标龟息造物生贤非无意偏近中元时节试记取平园菜国况有盘洲当家樣酉年秋恰已升
枢极继盛事看今日

洪文安乾道巳酉六月枢密八月参政九月兼同知十二月相

满江红【壽枢密】

七筴新春问底事以人为日记正观郑公恰至名因人得况是今朝生上相老天着意尤端的
便唤为人日岂徒哉公人杰 宇宙要公扶植善类要公收拾愿我公千岁长陪丹极山立扬休
人正健耐寒彩胜簪华髮看年年天际不曾陰真奇特

水调歌头【壽福王】

某官庆辑皇家祥开赤社秋乃万物所说揆度正中福者百顺之名若时并锡天地其壽宗祏
之休敬陈乐府之词仰致閤宫之祝

叔父茅封贵先帝棣华亲平生为善最乐夙德宛天人玉叶金枝方茂瑶沼丹壶如画光景镇
长新五福一曰壽万象总皆春 正秋分记初度綉纒麟传宣来自绦阙瑞采蔚轮囷乐有钧天
九奏尊有仙家九醞翠釜紫駟珍笑把南山指还以祝岩宸

陵阳集卷二十三

卷二十四

钦定四库全书

陵阳集卷二十四

元 牟巘 撰

行状

黄提干行状

先生姓黄氏讳某字济叔隆州井研人其先自金华入蜀子孙散居邛资隆三郡而隆之族为大四世祖迁登元佑三年进士第元符中以选人上书诋时宰名在党籍曾祖考时敏三冠里选尝着易通六经释疑义号为博学祖考顺卿与兄朝卿同举於乡里中称双凤朝卿後登绍兴二十一年进士乙科为青神宰考子说性刚介青神当磨勘朝奉郎告且下而卒无子或谓君宜亟图之庶几赏延者君正色持不可人以为难曾祖妣陈氏祖妣喻氏妣王氏先生生於庆元丁巳髫髻嗜书十九丧父哀毁柴立免丧即负笈游蜀学成都石室郡四方士殆万数先生试辄上游已而叹曰是不足为吾学归闭户穷经贫益甚学益苦从之游者日益衆普慈素多士岁率以夏秋之间为讲会坐臯比者皆宿学大师士不憚裹粮竞往听先生持所见与之击连折五鹿君会下竦服早游秀岩东窗二李先生之门而某之大父雪溪公先人存斋公尤敬之奉书币延至家塾先生以师道自处诲诸生有法每讲诵过夜分未尝假以词色诸生一笑语稍譁一步趋稍异一容止稍慢先生辄厉声呵责之人谓焦先生弗是过也大父即世与先人俱东流落厄穷有不堪其忧者二老方相与紬绎经传考同异以不足日为事其後先生家於吴书问往还无虚时岁或一再过先人留辄累月子弟奉巾屨侍左右不敢怠与先人道同志合每相规以正先人立朝议论或抵忤先生辄喜闻其得请去尤喜诸贤闻先生行谊皆愿交退庵吴公朔斋刘公双谿李公前後交聘先生独从朔斋双谿而於朔斋尤久朔斋以文墨称一时往往质诸先生而後出先人守当涂先生倦游强以往凡书翰悉以烦先生尝建小学属先生为之规约甚备先人得罪权贵人归卧苕霅先生亦杜门教子不复出先生连蹇名场淳佑癸卯甫荐江东景定壬戌以累举当入对诸老力劝之行会有旨学县皆设官调台州宁德县丞丞厅催岁役钱为关子九万有奇人逆憚莫敢向屡更聊掇弊益滋积逋如山而诸吏揽上户相表里不可问甚者去其籍先生究知其病乃条画诣郡白之且曰州县母子相依痛痒相关盍立定期往专卒乎毋徒困其子守戴侯恫一始见辄握手论文如旧相识留之幕府先生力恳还曰丞虽卑吾职也敢旷官乎侯益敬叹先生所请悉行之至邑则户与一清册使有钞者销无钞者纳未几负者毕输解新补旧不督而办下户预借之弊尽革先生初与二卿家公司同寓吴幅巾短褐日相从萧寺公性高简不可一世士独敬先生二子颐山坤翁则堂铉翁因与先生厚至是则堂提点本路刑狱首问先生所在屡罗致不就举以关升应诏荐士复以先生为首曰学有渊源文有楷法持论坚正制行洁清早登西州诸老之门独擅汝南旦评之誉蔚为物表宜备师儒之官其相推重如此赵侯子寅来为守未识面亦以所知举

先生宁海为叶公通德里公角巾还第先生候之郊垧公犹不忘昌国时一见喜甚摘赏贄文警语再三问语其乡人以先生学问操履称之不容口迨解归公复贄书中朝相料理而先生已无意荣进矣过越则堂力要权检法官先生亦为之尽心献议务得其情使者出循部先生留司吏抱成案促详覆驿致行司日不下十数牍先生剖析详明傅以经义多所平反壬申秋则堂召而某继之辞不获命先生知某当来趣为装将归某亟书丐少留愿受教先生曰子以一致之性处羣物之会吾为子惧虽然勉之无负所学时雪岩先生洪公起帅越兼庾事雅知先生辟茶盐司准备差遣幕府省文书日与同寮赋诗饮酒为乐退辄掩关馈问不通门无杂宾郡有西汉书板脱误踏差几不可读先生欲白府刊正之适洪文忠公以真文忠公所编文章正宗属先生校讐先生曰是吾志也乃并汉书白之即仓司置局字字参订虽盛暑弗置所厘正藁已具未刻梓先生忽感风眩谒告少间犹自力拟文牋閱书策应人事如他时时先生二子请举江东未还某往省先生使人逆拒之因属先生之姻杨君明复昼夜视先生先生谢医叩药曰吾无所苦也一日与杨君坐语至暮忽痰薄咽间疾复作竟终於官之正寝癸酉九月乙酉某以诸生实制服受吊洪公尤嗟惜赠赙特厚且经纪归其丧先生性静专於书无所不读一再过则终身不忘尤粹於经格言要义往往皆成诵讲明义理居多士自得其大旨率本伊洛而诸儒之说亦皆参考互绎贯穿融液以会其归义有未安者未尝苟同颇为改易其於象数制度名物口讲手画粲然可观以至训诂义疏一语之疑一字之讹人所不经意者先生言之甚精伦类博通本末赅贯世之号为儒者未之能及也每叹学者好高骛远躐等凌节之病故其教人必以致知格物为先而主之以敬使人静坐收敛心身整齐庄肃曰不如此无下手处平居寡言笑及讲学则乐於开导诱掖旁引曲譬亹亹不倦其词气反益宽平真得讲师三昧虽过时而学者皆言下有省先生制行甚谨如蹈规矩如奉圭璧终日兢兢未尝见有燕惰之色不欺暗室不愧屋漏先生有焉威如之教行於家严不可犯然其中洞然无城府处事接物一出於诚与人交笃至周尽终始无间人有片善寸长不啻如自已出逢人辄称道不置闻言人之恶则掩耳避去尤谨笃於礼垂老不废虽童稚亦与为酬对不少忽不求人之知而人自知之於其知之者亦介然自处亲不可疎言不及利徧游诸老而贫自居环堵萧然无担石储不顾也所居必痛扫一室蓀兰菊列图史布衣蔬食其间以名教自乐不知岁月之徂学成行尊朋友信之乡闾化之公卿大夫敬之不得已而仕白首下位不沮不戚惟职业是勤盖有为乘田委吏不卑小官之意然明链通达宿於其官者所不如故所至有去思其於文根据渊源力宏以肆大抵取诸胸中而书之凡钩章棘句巧顰悦而窘边幅者先生所不为诗则薄晚唐尚王苏精深华健得骚雅意与大父先人暨朔斋诸老唱酬联轴笔法尤遒劲逼欧柳真之名帖中莫辨也为金石书者以不得先生书为憾如岷峩楼记喻德君墓碣太白祠堂记黄庭经等书皆尽其妙争宝藏之晚自号樗庵老人有论语幼学说易集传诗会解汉晋史节通监类名物度数性理指南信笔録等书皆蝇头细字每帙不下十数策藏於家始先生逾四十不娶大父以孙明复邵康节之事感之娶史氏省元元一之孙子男四人壽文起潜待省进士黄中为外祖喻氏後皆力学能文词世其家良老早夭女三人长早卒次在室次适进士王佐材先二年卒孙男三人见心奎壽晦老皆歿孙女三人其孤将以甲戌十月庚午奉先生柩葬於平江吴县至德乡凤凰山之坤原呜呼先生师道之立经学之术如胡翼之孙明复使其稍进於时必能助成王德有补世道而位不配其德用不究其学齎志以歿其所就仅如此可胜痛哉某卅角受学先生先生视之如子耳提面命以至成人虽不敢自谓有得於先生之万一犹庶几未死之年月闻师训以不为小人之归詎意一旦梁坏山颓呜呼已矣无复可言矣

罔极之恩其何以报矣患难余生志气颓落方为门墙羞其何能论次先生之平生而先生遗意谊不得辞顾葬日薄乃掇言行之大略着於篇他尚多所遗无以发先生道德精蘊此则某之罪也立言君子尚矜而赐之铭尚有取於斯焉

墓志

朱雪崖朝奉墓志铭

吴兴郡东踰一舍有雪崖朱氏之隐庐雪崖未尝入城市盖自知止足所谓乡里称善人者也辛丑春其子天锡来为郡学正相与往还因稔知日用间事居三载学正代归稍不闻问而雪崖已下世矣善人云亡又重为之慨叹一日天锡墨衰造予拜而泣曰自丧吾父抱痛终天支缀余息未尝倦以有大事在幸既卜远顾墓道之石无刻辞胡可谓孝愿矜而畀之铭庶几遗善永终长存九原有知不悼不幸矣又泣而拜呜呼予忍固拒终没人善不以慰其孤而纾其悲徙扬十世祖翼宋天圣中礼部尚书翼生尚尚生存之其间仕者不絶如綫当炎绍之际避兵至郡之乌程常乐乡地曰东朱适与姓叶遂占籍焉曾祖说将仕郎祖信京学谕父文质迪功郎力善务本益衍以裕雪崖生端平甲午夙通敏嗜书尝以登仕郎就漕试不利辄弃去颺志奉亲日调护其眠食不肯离左右甲戌初事会方殷由督属超补官资後遂以朝奉郎致其志厥既归附殿门罕出治田园整庐舍聚书延师教子使克有成立世方以儒相诟病独能修学宫礼贤士与流俗异趋声誉益起中丞崔公或驰驿相访辞不行郡守李公彝秉伺知徐公琰举充提学学校官亦不受勉清隐处士之号以雪崖扁其便斋标致尚矣为人恬淡简约桐帽棕鞵徜徉山水间吟啸自适然性笃厚颇信内典卓庵荆桥作诸利益事贫者解衣推食病者予药死者给槨无所靳癸卯岁大侵民艰食饥殍流亡相系於道雪崖慨然倡义捐廩或捐价以济或计口以食自春及秋远近之人赖以全活无虑万数皆举手曰生我者朱师子也郡邑省台次第列其状宣抚使博采公论具以实闻於朝且谕郡邑推表其门曰清节朱氏道义之门人皆荣之会子舍归侍拜庆人士踵门举此以贺盛事萃一时雪崖虽病倦意甚喜强起为加餐谓当埽浮穴以享上壽踰年浸革戒其子以忠孝立身勤俭保家丧葬宜从约已而焚香默坐翛然而逝大德甲辰四月九日也乡人德之往往出涕而畴昔贺者亦共嗟惜焉娶沈氏前太学进士应桂之女男一人天锡孙男福孙孙女二人俱幼以乙巳正月廿六日癸酉葬於东职里余庆之原予惟雪崖平生言行类可纪而捐廩之举尤有德於民昔成都黄承事平桀赈饥有陰德张忠定公咏时为帅守一夕梦府君揖黄承事坐於忠定之上雪崖盖无愧於黄承事矣有陰德必享其报不在其身则在其子孙乃铭以志焉铭曰百年之计惟德是树栽之培之匪积曷裕世或趋利苟且旦暮皇恤厥德为他日虑於惟朱氏笔豪华绪十世复昌繇积累故贤哉雪崖仁性天赋尔饘尔粥全活毫孺我书我诗保守澹素以儒为官有子克副年开八袞荣及三釜乃表义门乃着清誉人所难得已独兼具夫复何憾含笑泉路负土为山孝思远慕郁焉松标春雨秋露自叶流根永笃尔裕是曰余庆雪崖之墓

朱山长墓志铭

前安定山长朱君君望卒於吴兴寓舍以丧归葬毗陵从先墓其志也嫠孤共载哭泣感行路

予尝为诗吊之越三年其姻家采石山长缪君叔晦过予曰朱君望之墓有宿草矣长婿池州学録钱适自毗陵来将图其不朽者敢以其孤见愿矜而畀之铭予固善君望视其孤孱然弱也诚不可无述待其长使有考焉按状君名自期君望其字也本衢州龙游人曾祖某迪功郎妣孙氏祖某将仕郎妣袁氏父某登仕郎漕贡进士妣汪氏继赵氏自其祖宝佑间随宦晋陵遂占名籍後徙居城之东君幼敏悟祖每矜语人曰此孙他日必昌吾门景定辛酉年二十请乡举德佑乙亥补太学生方磨砺以须属时多故束书入山恬无仕进意龟山书院兵後久荒圯君来为山长竭力经营且新其祭器稽其田籍旧观浸还士论称之又为安定山长时寓祠溪亭回视故宫异物充斥势不得争喟然以叹乃节浮费叶衆议惟新是图得曹氏庐改创书院後遂迁焉盥荐有所以教以育推厥攸始实自君望又捐已俸造笱豆可谓知礼者爱是邦佳山水秩满待选乃买屋以居昔者胡安定见徐节孝头微侧曰头容直节孝因思头容直心亦直君望乃以此为敬以直内之义则以敬名斋本心文公为作古榴焚香端坐读书其间暇则往来南北诸山从容觴咏与朋友共乐丰仪秀整性行温雅乐道人之善内恕及人虽僮仆不见其有疾声遽色遇困乏者辄赈贍之无所靳人皆称为善士庚子春忽念先茔当以时汛埽扁舟亟归道得痰疾疾止复还竟不可为其卒三月廿六日也以六月十七日葬常州武进县占石之原年五十有九娶东阳刘氏通判君之女先十七年卒生五女长妙云适钱适次妙宁适柴嵩妙惠适姜英发妙淑许适邹志孙妙由许适赵由琥继室沈氏生二男长文俊次文英女二人妙安许适缪世昌妙定许适钱适弟庶女三人妙素适张复妙观妙善尚幼异时进取之士驰骛不足从乡贡已难况得入太学尤难盖有槁项黄馘不能与其一者君望十余年之间领乡荐补太学兼取人之所难得造物岂无意然崇化之席未煖而去遽回濡滞又二十四五年一文学掾竟不克申延以待何始丰终嗇耶有二子而女十人其婿皆高门大族名士之家力能经纪其丧还窆故丘遂其始志又择师教二子使有成立造物之报盖在此君望其庶几无憾矣铭曰

人谁无死君以孝故上章困敦感时春暮夏畦马医皆上丘墓我胡不如星言归路抱恙而还魂已先去云其何依若祖若父成愿初志铭魂归厝松檟良久慰尔永慕我铭昭示以封以树

野翁禅师塔铭

始予闻野翁为本论疑焉及观其所谓本则曰吾本曹溪曹溪本达摩心传面命具有先後其传愈远支????互分然本未尝不一也野翁一本乎禅故有此论且深以竞华逐末为世戒在其法中庶乎知本矣其何疑於是野翁之葬且三四年其徒即是因是来自鄞越以觉恩上人所次遗事求铭厥藏按师讳烟野翁字也越新昌张氏生嘉定癸未年十一出家投邑之大明寺僧大轰为师端平乙未祝髮受戒夙具聪敏有志於道负笈从台东掖宪法师习天台教居数岁弃所习复从大轰大轰课之特严其长而克有成者轰之教也端嘉以来吾蜀痴絶冲公无準范公倡道东南学者倾向皆愿为之徒师首从痴絶於道童一见刮目坐数岁大有警发乃之径山见无準时问道者肩相摩师年最少机最捷无準亦骤进之又数岁往造大慈济大川之宣明举腊月火烧山话拟对竹篋杖之当下有省因留不去川本灵隐以为书记力辞且荐归云度禅云盛有词藻人多师焉让焉後掌记履斋吴公判郡知其人俾出世自大慈迁延壽又迁香山越丙子屏迹雪窦静閲世故会杖锡逊席不得避一住十二年靡怀不在乡里剡川

自更兵火积骸满野即收聚焚化殆有万数设水陆大斋於石佛寺前广为说戒惠及枯骨矣山多虎豹人家小儿横遭咀作驱虎行声其恶而去之虎岩灵隐愿以师补藏至则大新僧室及诸寮舍学徒四来振起遯庵密庵时气象无锡官河客舟一日而覆溺者三十八人师悯之斲石为尊胜幢六级其长一寻有半自为铭刻而立之洲渚之上施食设以拔沉冤三年东归游双径云峰有遯堂舍盖意亟微服还锡杖扁其室曰晚泊闭户书法华经有老来非厌客静里欲书经之句雪窦虚席衆谓无以易师因共举师育王亦争欲得师不能夺寺榜应梦名山昭陵所感穆陵所书号为胜处师益喜得此虽岁苦缺食两持钵浙右不憚也用宾礼延致东岩石公相得欢甚它日行事东偏岩谓师盍遂即此营菟裘既成家性存之巽书寄幻二字揭之挹乳峯珠树雪瀑映带左右师往来游憩禅宴其间随化委顺意甚自适壬寅八月十五日升堂语衆劝厉极慈切盖自别也衆请留偈笑而不答至夕而逝越七日奉全身葬寄幻遂塔焉壽八十腊六十八度弟子若干人师为人寛厚笃实病者与药贫者周之随意作佛事不藏人善片言只字称道不容口文集十卷该淹经史诗偈尤洒落每升坐记禅人骚语联络贯串总为一说而条分缕析各中肯綮颇效痴絶云如周伯弼家则堂文本心黄东发舒闾风咸与之游予谓野翁立谈不忘本临行不留偈遗戒不茶毗塔而铭之岂师意乎其徒是之谓曰寄幻铭曰一切世界及一切法无有坚固幻依幻灭幻既俱空所寄何地而复於何寄於所寄幻则非寄寄则非幻强立名字未离二患欲问寄幻寄幻久寂瀑流千丈雪峰之侧幻为奇观砰处溅霍凡有耳目如梦斯觉乃刻坚珉与寄幻对幻身何在法身不坏

龙源禅师塔铭

道場山龙源禅师既寂之五年为乙巳七月其记室怀珠哀次遗事偕其徒希渭来求铭心源之塔予尚记岁甲午访师云留三日穷极幽讨意甚乐又七年与今翰林修撰邓善之再至为师喜见顔开舍予高阁煮茗话旧夜无倦色明日下山握手若不能释不料遂为死别也留耕先生王公伯文先朝名执政与先存斋忠义相期议论同肝胆同而予亦复交其子若侄师盖公之族也故惓惓於予者如此铭可辞乎师讳介清龙源号也世福州长溪祖讳一夔古田县尉父良辅知黄岩县母蔡氏素好善尝梦神人介而进一子曰是善知识当生尔家果娠而生师幼不茹葷年七岁喜看佛书长益通悟泛览经史百氏父知其不凡俾出家於郡之雪峯居半载行脚出飞鸢岭抵义兴法藏得度於一峯齐禅师年十五薙髮受具戒遂徧参诸方是时静慈石帆衍灵隐退耕宁径山虚堂愚皆明宿德争欲致之师颀然山立举动雍容言旨闲雅志不苟从适游吴兴道場东叟颖以为典宾继东叟者无等融即请师为内记力辞絶江过育王谒寂窗照禅师入室有契以为侍香次掌藏钥寂窗自枯禅枯禅自密庵得其传授皆闽伟人师世出四明壽国迁开壽有史督相之子州尹见师行解相应舍开壽行府与师营菟裘曰四明兰若为终隐计未几道場虚席两浙诸山举师锡来此山盖唐刹自熙宁间大苏公游道場诸诗一出名愈重五山由此其选不轻畀也丙子劫火洞然化为瓦砾迨乙酉凡十年旧观未还师既至慨然以起废自任首建大佛宝殿金碧辉煌像设华好次建观音藏殿摹大藏经五千四十八卷及旃檀林列翠阁蒙堂法堂僧堂等之钟鼓法器由中徂外焕然一新四方衲子闻师之风挑囊负钵袂属肩摩云归霞集於是声达帝廷钦奉纶言赐金襴袈裟敬受法旨加号佛海性空庶少答其道心精勤之所成也辛丑六月三日忽示微疾索浴净髮书偈曰佛座有千劫我座十七年说甚生死义古今无後先翛然而逝时当庚伏停龕七日神色不变閤

维後顶骨牙齿素珠不坏者三壽六十三腊四十八度弟子一百五十余人今住崇恩士洵为之上首寺初无三塔师以为歉间语其徒士芝等图之乃捐已财买朱氏山於寺之东徬建三塔且力请为师壽塔於其旁庵庐既成师遍之【阙】心源芝等又集衣资买田以供香灯之费俾行者职洒埽满三岁则推其名次之居首者度以为僧而礼当代住持以改名改名已复礼塔为师其规约如此至是瘞焉世率谓种种佛事皆有为法此未足论龙源然龙源建立亦因其时之所可为而尽其力之所当为非为已而为也故终岁有为而实未始有为如必为此而为法一切诿之不为则澄观师之僧伽塔昌黎公何以称其公才吏用之过人而以其灵骨已老而为之叹惜耶师之愿力亦弘矣铭曰

留耕之裔密庵之传燕坐云峰十有七年应缘而出缘尽而逝居然一旦冰解蝉蜕吾性本空无亡与存是为佛海龙源之源酌之不竭无古与今是为龙源方寸之心乃营三塔而四其三是为真宅心源之庵各自道場无乎不在处处光满亦无杂坏维尔子孙视我刻辞如未见师自源求之

东臯友山恭和尚塔铭

四明慈溪福昌院友山和尚之塔久未铭壬寅秋云门恩上人録其行实与其宗旨自集贤赵侯子昂所来求文以刻柳子厚尝谓葬大浮屠得用碑晋宋多法梁多禅唐多律而所铭南岳诸律师颇病夫言禅者不徵旁行拘则泥物诞则离真真离诞益胜若深有取於律必将用毗尼为室宇而慧为户由定发慧一归真源无大小乘也其阐扬龙树之道南岳天台之教甚大顾余未之学或曰此吾法中良其背其道光明盖戒定慧是虽然何以铭友山按状师名智恭字季礼友山其自号慈溪陆氏子陆故大族母周感梦而娠生嘉定丙子早孤母改适王氏挈以俱性聪悟稍长诵书辄能记惟喜啖茹止庵文喆师在德润湖华严院持律甚精往依焉服勤不懈年二十祝髮受具戒日以律为务能通旨义淳佑初更从佛光晦岩照公於南湖延庆覆讲有机辨不滞文字乃入观室居三年与侪辈十人者然指祷旱辄大得雨归结茆薰孝子祠後以便养母堪笑翁颇相规切用其语即邑之东臯徬精庐为接待饮食药物百须具往来者赖之因以诱进初学无不满意後愈开斥遂为福昌县院尊止庵第一开山示不忘本也有良田若干顷岁用平斛入其租使佃自槩量尝有刻石於题曰入门不问方隅托鉢不限钟鼓用心平广类若此时出游诸方徧如禅老多所悟入卒定宗旨嗣佛光咸淳中白云堂举鄞之布金则力辞弗就自是数载益疏外务恨山不深林不密焚香嘿坐唯茗是事修比僧使过而礼之号以法惠招以悟真而师泊然无意於世矣戊子归老止庵墓庐曰冢间育王珙公遗诗曰闻得去年交院事世间谁识老师心友山得之意殊喜癸巳九月从容示病越五日书偈逝去闍维齿不坏即塔於冢间在华屿湖之右腊五十八壽七十八度弟子宗要宗孟若干人宗要侄初传业能守者也友山恬静安详举止中度虽屨鞋布襪而精神照人不可尘滓未尝有嗔怒好拯饥周乏繕舟梁治道路以作佛事华屿白龙祠久圯敝则新而大之平生交游多名宿士晚岁修庐山莲社故事举小弥陲懺勤同社简而易行僧俗乐从皆书某曰莲公标名录间为五字诗有金碑点示及惟心观起教观二义人皆抄传曰东山韩僧亦知问经归敬焉昔我先人存斋翁善佛光当时弟子如友山者殆不可复得慈感少愚同门也实与恩上人胥趣铭恩亦辯博有信行铭曰

止吾师也山吾友也吾以为归与吾同体非山非止是曰真依华 之湖冢间之塔龙护持之
山空月明无法可说龙之听之

陵阳集卷二十四